



1  
Liv. très rare de Th. de Beze.  
36 f.

[BARNAUD  
T. 1.



LE  
REVEILLE-MATIN  
DES FRANCOIS, ET  
DE LEURS VOISINS.

*Composé par Eusebe Philadelphie Cosmo-  
polite, en forme de  
Dialogues.*

*Charles Tremble*

*No 54 J. Gyrard*

A E D I M B O U R G,

*De l'imprimerie de Jacques Iames.*

Avec permission.

1 5 7 4.

DC 116.5.83

*[Faint, illegible handwriting]*

*[Faint, illegible handwriting]*

*[Faint, illegible handwriting]*

*[Faint, illegible handwriting]*

*[Faint, illegible handwriting]*

*[Faint, illegible handwriting]*

# L'IMPRIMEUR AUX FRAN-

çois & autres Nations voisines.

\* \*

**M**essieurs ayant recouuré la copie de vostre Re-  
 uelle matin dedié à la Roynne d'Angleterre  
 par Eusebe Philadelphie: & cognoissant le fruit  
 que la lecture d'iceluy vous peut apporter, ie n'ay pas  
 voulu vous en frustrer plus longuement. Et m'assurant  
 que l'ayans veu, pesé & bien considéré vous m'en sçau-  
 rez aussi bon gré que l'affection qui me ment à le vous  
 presenter merite. Je ne despendray pas un mot à vous  
 recommander mon zele, encore moins celuy de l'Au-  
 theur: seulement ie prieray Dieu qu'il vous face bien  
 tost iouyr du plaisir & vtilité qu'un tel labeur peut  
 apporter aux sages. Vous trouuerez au commence-  
 ment vne petite epistre de l'auteur dediant son liure  
 François à la Roynne d'Angleterre & le double d'une  
 lettre Latine mise en François qu'il a escrite aux Po-  
 lonois leur dediant le mesme liure Latin. Vous y ver-  
 rez aussi un dialogisme d'entre le Polonois, & la Paix  
 Valoise & le double d'une lettre qu'un gentilhomme  
 partizan de la maison de Lorraine, duquel ie n'ay peu  
 sçauoir le nom a escrit sur le mesme sujet au Duc de  
 Guyse son maistre. Si ie puis recouurer quelque autre  
 chose de nouueau que ie cognoisse vous pouuoir seruir,  
 ie vous en feray bonne part, pouruen toutesfois que  
 j'entende que vous rapportiez ce present que ie vous  
 fay à l'usage qui luy est propre. Autrement n'en at-  
 tendez plus. Adieu.



A T R E S E X C E L L E N T E E T  
Tres illustre Princeſſe Elizabeth Royne  
d'Angleterre, de France, d'Ir-  
lande &c.

\* \*  
\*

Adame ie ſuis ſi mauvais flatteur , que ie ne  
M ſuis iamais plus aize , qu' alors que ie puis li-  
brement dire mon auis des choſes qui nous  
paſſent deuant les yeux , principalement ſ' elles ſont  
de quelque poids & conſequence. Que ſi d' auenture  
il ne m'eſt permis (comme ſouuent , cela eſt deffendu  
aux gens de bien , de peur qu'un libre iugement n' of-  
fenſe l'oreille des grans , ou que leurs mignons qui en  
abuſent ne ſoyent par là cognus & chaſtiez , ) Si ie  
puis alors pour le moins ayant mon recours au pa-  
pier faire parler quelque honneſte homme , qui deſ-  
couure ce que i'en ſens , tout auſſi toſt mes eſprits re-  
peus de ceſte liberté , vont reprenant nouuelle force.  
C'eſt ce qui fait que tout gaillard , tout reſolu ſans  
nulle crainte ( ne m'eſtant loiſible de dire ) ie vous  
offre pour maintenant un Reueillematin , Madame,  
tel que ma plume a peu tracer pour la gloire de no-  
ſtre Dieu , le bien de ſon Eglise , voſtre grandeur &  
voſtre eſtat , & pour celuy de vos voiſins. Ie ne vous  
diſcours pas icy les matieres que i'y traite : la lectu-  
re les monſtrera & le ſubiet merite bien qu'on pre-  
ne la peine de le lire. Mais ie vous puis bien aſſeu-  
rer , Madame, qu'il n'y a rien de ſuperflu ( ſi ce n'eſt  
aux trop delicats ) rien de faux , rien qui ſoit indigne  
d'eſtre dit & recommandé par eſcrit au temps à ve-  
nir : Voire rien du tout qui ne ſerue au bien public du  
temps



temps qui court. De quoy étant tres assuré, ie  
supplieray treshumblement vostre Maieité de rece-  
voir d'aussi bonne main ce mien labeur, comme d'un  
cœur treshumble & tresaffectionné ie le luy presen-  
te. Priant Dieu,

Madame, qu'il doint à vostre Maieité autant  
d'heur & de felicité, que vostre bon frere, allié &  
Compere vous souhaite de mal & d'encombre. De  
Eleutherouille le 20. de Novembre. 1573.

De vostre Maieité

Treshumble & tresaffectionné  
Serniteur Ensebe Philadelphie.

EPISTRE TRADVITE  
EN FRANCOIS DV LIVRE LA-  
tin dedié aux estats, Princes, Sei-  
gneurs, Barons, Gentilshommes,  
& Peuple Polonois, par Euse-  
be Philadelphie, Cos-  
mopolite.

es François, tres-illustres Prin-  
L ces, magnanimes Seigneurs, ver-  
tueux Gentilshommes, & Peu-  
ple genereux, vous sont en tant de for-  
tes redeuables, & obligez, & ie leur  
suis tant loyal & affectionné amy: que  
ie penseroÿ' faire grand tort à mon  
deuoir, si ie ne faisoÿe, paroistre par  
quelque bon & honneste office l'ami-  
tié que ie leur porte & la sincere affe-  
ction que i'ay au bien & tranquillité  
de vostre Republique & estat. Voila  
pourquoy ayant tracé en deux Dialo-  
gues vn sommaire veritable des mise-  
res

res passées & presentes des François: i'ay bien voulu pour tesmoigner ceste mienne affection enuers vos deux nations , n'ayant pour maintenant rien en main de plus conuenable au temps qui court, le vous offrir & consacrer , comme aux plus gros & plus notables creanciers de tous les François.

Que si quelcun de prime face trouue ce present-cy fascheux , & l'accuse de ce qu'il reueille les esprits de trop de gens : Le pouuoir & force indomptable de la trespure verité , à laquelle plus ie m'arreste qu'à l'opinion d'un tel Censeur, me seruira en cest endroit de plege & de bon garent , m'ayant contrainct de l'opposer aux flatteurs, menteurs effrontez , en vn Latin aussi facile comme est le langage François , auquel i'escris le mesme liure à la grande



Royne d'Angleterre simple & sans affecterie. Et ceux qui sans passion le liront pourront bien iuger & cognoistre, que le fard duquel Puy-brac en vendant sa plume, comme Balaam se langue pour maudire le peuple de Dieu, a usé en sa belle epistre à Stanislaus Heluidius, & tout ce que Monluc Euesque de Valence, Lansac & autres tels menteurs à gages vous ont sceu dire & proposer pour desguiser la verité, est bien fort loin de cest ouurage, qui ne marche que rondement, en son stile & au suiet.

Mais vous me pourriez demander. Pourquoi dis-tu, ô Philadelphie, que les François nous sont deteurs? A nous qui leur auons osté le second fils qui deuroit estre gardien de toute la France, & emmené avec luy des Princes, Seigneurs



gneurs, Gentilshommes & gens de Conseil tresnotables, chargez d'or, d'argent & de meubles dont ils ont vuydé leur pays pour s'en venir peupler le nostre. A nous qui leur auons cousté en faisant nos propres affaires vn monde d'argent de despenſe pour le deffray de nos Ambassadeurs, lesquels neantmoins n'ont daigné accepter l'ordre de Monsieur S. Michel qui rend tous ceux-là qui le portent, cousins de Charles de Valois. Il semble pluſtoſt que nous ſommes leurs deteurs en toute façon. Et quand bien tu pourroys monſtrer que nous ſommes en quelque forte les creanciers de tes François, quel bien fay-tu Coſmopolite ny à eux ny à nous auſſi, nous faiſant part de leurs miſeres & deſcourant leurs pouretez ? n'eſt-ce pas autant comme ſi tu nous diſoiſ ? Il

est vray que vous avez pour debiteurs tous les François. Mais ne denscz pas qu'ils vous payent de long temps vn tout seul denier. Ils sont si pources & belistres qu'ils dorront tost du cul à terre, & feront (si Dieu ny pouruoit) cession de leurs biens miserable. C'est bien loin de nous resiouyr , que de nous donner ces nouuelles, & toutes-fois c'est le présent que tu nous offres, ce dis-tu.

Il est certain (tres-illustres Princes & Nation tresrenommee ) que vous pourriez tenir (ce semble) vn tel langage que cela. Mais quoy qu'il soit, tous les François ne laissent pourtant de vous estre cent mille fois plus obligez que vous à eux si l'on regarde le dedans d'un si grand mystere , qu'est l'Election de vostre Roy, plus que l'exterieur & le dehors, où les fols seulement s'arrestent,

stent. ne pouuans penetrer plus loin.  
 Car posé le cas que vous estans de-  
 stituez de Roy, ne pouuans viure  
 simplement sous la loy & sous son  
 ame la raison, ne voulans aussi  
 vous commettre à la conduite de  
 quelcun d'entre vous, les François  
 vous aientourny d'un Roy de leur  
 nation (si toutesfois il est fils de  
 François : car de sa mere vous sçauiez  
 qu'elle est & sera Florentine) & que  
 pour vous auoir nourry &ourny  
 un Roy ils vous puissent auoir obli-  
 gé à eux en quelque maniere & fa-  
 çon : comme il est tresraisonnable  
 qu'on le soit à la nation & à la mai-  
 son qu'ils donne : Vous ne le ferez  
 iamais tant aux François, comme  
 les vieux Israelites à la maison de  
 Isai pour Daud, Salomon, Iosias &  
 semblables autres bons Roys qu'ils  
 ont receu de ce bon tige, ou comme



gentilshommes d'entre vous enuiron le temps des massacres de Paris pour auoir l'auis du deffunct Seigneur Amiral , l'vn des parens de la France, & vous y conduire selon son conseil.

En ce qu'ayant sceu les nouuelles de ces horribles massacres , lesquels l'Amiral deuant l'arriuee de vos gentils hommes fut tué, vous despouillastes tout aussi tost l'opinion bonne que vous auiez de la maison de Valoys, pour en vestir vne tres-veritable , la recognoissans pour la plus traistresse, & desloyale maison de la terre.

En ce que vous eussiez lors volontiers en detestation d'un tel crime , esleu plustost vn muletier, ou quelque autre bon toucheur d'asnes , que pas vn de tous ces Bouchiers , n'eust esté qu'il vous estoit  
force



force de vous seruir de cestuy-cy, ayans irrité tous les autres, qui luy estoient competeurs abbayans à vostre Royaume.

Les François vous sont' aussi bien fort obligez, de ce que apres ces massacres vous ne voulustes iamais passer outre à la confirmation de l'election, sans vne promesse solennelle, que Monluc & Lansac vous firent de plusieurs articles, qu'ils iurerent au nom de leur Maistre. Entre lesquels cest article estoit l'un des principaux : Qu'il seroit faicte diligente enqueste des massacres & punition condigne des massacreurs : moyen souuerain & vnique pour establir la Paix en France.

En ce que vos ambassadeurs, lesquels apres cela vous enuoyastes saluer vostre Roy en France, traicterent avec grande instance tout pre-

mier de la paix de France, que nul autre de vos negoces : tant vous estiez remplis d'enuie de voir tous les François paisibles.

En ce que n'ayans peu obtenir autre chose des articles, qui vous furent iurez en Poloigne par l'Euesque, quelque poursuite que vos ambassadeurs en fissent enuers le Tyran , pour le moins le bruit de leur venue auancea la fabrique & publication de cé meschant, trupelu & traistre Edict de paix : & par consequent leua le siege deuant la Rochelle.

En ce que l'instance priere que vos ambassadeurs firent , estans arriuez à la Cour du Tyran, a esté, comme Dieu a voulu , cause & moyen de la deliurance des pources gens de Sancerre , que le Tyran estoit resolu de faire manger l'un par l'autre.

Mais

Mais sur tout ils vousfont tenus,  
 de ce que vous ayans eu compas-  
 sion du rude & barbare traitement,  
 que les François souffrent sous la  
 Tyrannie de ceux de Valoys: vous  
 avez osté du milieu d'eux ce Roy  
 frere du Tyran avec vn bon nom-  
 bre des supposts & appuis de la Ty-  
 rannie, que vous avez faicts condui-  
 re en triomphe captifs sous les loix  
 de vostre Patrie, au tresgrand bien  
 & contentement des vrays & natu-  
 rels François. Lesquels en cest en-  
 droit s'asseurent que vous ferez de  
 façon & maniere, que iamais plus  
 ces bestes farousches ne retourne-  
 ront pour les mordre. Voila les  
 poincts, qui me font dire, que les  
 François vous sont deteurs.

Quant à ce dont vous vous pour-  
 riez plaindre, que ie vay descou-  
 urant par trop leurs pouretez &  
 b j



miseres. Il m'a semblé tresraison-  
 nable, que vous tous ausquels le fait  
 touche en foyez au vray aduertis.  
 A fin que vous puissiez cognoistre  
 ce qu'il vous faut attendre d'eux en  
 voulant recouurer vos dettes. Et cō-  
 bien que vos Ambassadeurs vous  
 en puissent donner de bons tesmoi-  
 gnages: si est ce que i'ose asseurer  
 que ce Reueille-matin, que ie vous  
 offre, vous en informera plus à plein  
 & plus à menu, qu'aucun autre ne  
 sçauroit faire. Et vous monstlera  
 quand & quand vne partie des re-  
 medes, dont les François entendēt  
 s'ayder pour essayer à se remettre.  
 C'est à vous si mieux vous sçauiez de  
 leur en fournir de meilleurs: si vous  
 pensez que leur secours vous puisse  
 quelque iour seruir.

Que s'il y auoit quelque autre  
 Royaume vacquant plus outre que  
 vos



vos contrees, auquel vous puissiez faire eslire le Tyran pour chef, (quand bien ce feroit au Royaume des Furies) vous sçavez combien il est digne avec sa mere & son conseil d'y presider : ou que vous peussiez trouver quelque habile moyen pour en depestrer bien tost la France. Ce feroit ( ie le vous iure ) combler les François de tous biens. En ce cas la vous pourriez tenir pour tous asseurez qu'ils vous erigeroyent des Colonnes comme à leurs liberateurs, & vous presteroyent à toute heure l'aide que pourriez desirer contre ceux qui vous voudroyent nuire : autrement il n'est pas possible pendant que ces Schelmes viuront, que vous puissiez recouurer d'eux vn tout seul brin de payement. Car tout cela qu'ils peuuent faire, c'est de viure au jour de la iournee, les ar-

b.ij.

mes au poing , les yeux au ciel, attendans secours du Treshaut pour la lascheté de leurs freres. Il ne reste plus tres-illustres Princes & nation tres fameuse ) sinon que vous preniez en bonne part la hardiesse de laquelle i'ay vsé en vostre endroit, vous offrant ceste tragique peinture tracee au moins mal que i'ay peu.

Ma plume ne sçauroit respondre  
 Au forfait tant est inhumain:  
 Mais elle vous peut bien semondre  
 A le venger de vostre main.

A tout le moins (tres-illustres Princes , magnanimes Seigneurs, vertueux Gentils hommes, faites en sorte que ces tigres tant inhumains que Dieu a par sa prouidence trainé & mis entre vos mains ne vous eschappent nullement: Et les tenez ferrez, de sorte qu'ils ne nuisent à vos voisins: vous gardans en toutes façons de leurs

leurs aguets & leurs embusches. Autrement, si quelcun de vos bons voisins venoit quelque iour à perir pour auoir lasché ces leopards, s<sup>on</sup> ame vous seroit sans doute redemandee du Souuerain. Que s'il vous en auenoit quelque mal en particulier, vous seriez en risée aux peuples qui habitent autour de vous estans allez querir si loin des sangliers pour vous dissiper. Dieu par sa grace vous y vueille mieux pouruoir, vous donnant conseil & sagesse pour vous y sçauoir bien conduire  
au nom de son fils nostre Seigneur Iesus Christ.

Amen.



DOVBLE D'VNE LETTRE MIS-  
sive escrite au Duc de Guyse par vn gen-  
til homme, duquel on n'a peu  
sçavoir le nom.

Monseigneur, m'estant de bon heur tom-  
bee entre les mains vne copie escrite à  
main, intitulee le Reueille-matin des  
François, en forme de Dialogue, & oyant bien  
consideré à part moy, les deuis & propos, que  
Eusebe Philadelphie, qui s'en dit l'auteur, fait  
tenir aux interlocuteurs: Il m'a semblé que ie  
ne pouuois faire de moins, pour mon deuoir, que  
de vous l'enuoyer par ce gentilhomme present  
porteur: & vous dire là dessus, ce que ie pense e-  
stre expedient pour la grandeur de vostre mai-  
son, & le bien de vostre seruice. Ie ne doute  
point Monseigneur, que quelque Huguenot des-  
pité pour les massacres, exercez sur les freres,  
( qu'on appelle, ) n'ait esbauché ceste copie:  
& ne doute non plus qu'il desire le renuerse-  
ment de la maison de Valois, que ie le voy sans  
rien flater, ni dissimuler, dire tout ce qu'il sçait  
de leur vie, & de la forme de leur gouuernement.  
Il y a si long temps que ceste maison vous occupe  
vn si beau Royaume, qu'elle le gourmande, au  
lieu de le gouverner: le destruit, & ruyne, au  
lieu de l'edifier, & bastir. Les cœurs de la No-  
blesse,

blesse, & du Peuple, sont d'autre part tellement alienez de ceste maison, & si fort enaigris contre ses desportemens, Ils sont par le contraire si deuots enuers vous, & tant affectionnez à vostre maison qu'il semble bien qu'il n'y fit onques si beau, qu'il y faict maintenant.

Du parti des Catholiques, vostre excellence a autant d'occasion de s'en asseurer, comme s'il les tenoit tous, par maniere de dire, dans sa manche: Sur tout maintenant, que tous eux regardent, pour l'absence du Roy de Poloigne, sur vous, que seul ils croient, & par le nom duquel ils iurent, comme de leur Libérateur: Quant au party des Huguenots, ce traicté monstre assez en diuers passages, le plaisir qu'ils prendroient à vous voir reprendre ce que de droit vous appartient. Et combien que pour quelques respects de l'histoire, il s'auiſe de marquer des choses que les vostres ont exploité par le passé au desauantage de leurs affaires, le temps, (vray cyrurgien des playes les plus desesperées,) a tellement pensé ces coups, qu'il ne parle que par acquit, & comme en passant de ces choses: traictant au reste si rondement de vos droicts, & de vos pretensions, qu'on ne peut mieux desirer: Que s'il se met à parler de vous en particulier, il fait tellement sonner l'exécution que vous fistes sur

*l'Amiral, que cependant il monstre bien, que  
vostre querelle particuliere vous y a mené, plu-  
stost que la hayne contre leur Religion, de laquel-  
le, & dans Paris & ailleurs il assure (comme  
aussi il est vray,) que vous en auez sauvé plu-  
sieurs: entre autres le Seigneur d'Acier, l'un de  
leurs principaux chefs de ce temps là. Cela me  
faict croire, avec le discours que le Politique en  
faict en quelques endroits, que les Huguenots  
ne desireroient rien mieux, que de vous voir  
remis au throsne que Hugues Capet usurpa sur  
les Roys vos predecesseurs. S'assurans bien (com-  
me ce liure porte,) que non seulement vous lais-  
siez leurs consciences libres: ains aussi tout  
exercice de leur religion sain, sauf, & libre par  
toute la France: Sans iamaïs leur fausser parole  
considerant le mal qu'apporte avec soy la perfi-  
die, à ceux mesmes qui la pratiquent. Mon sei-  
gneur, ie serois d'avis, que s'il ne tenoit qu'à ce-  
la, (comme il semble bien qu'autre chose, ne  
vous peut desrober ce bien) que vous fissiez tout  
paix, & aise, ce qu'ils voudroyent en cest en-  
droit, & prenant d'eux foy, & hommage des  
corps & biens, comme bon Prince, vous laissas-  
siez & leur conscience, & leur Religion toute li-  
bre, en la disposition de Dieu. Ce qui vous inci-  
teroit à les faire iouir d'une telle liberté, (outre  
que*



que c'est une Tyrannie qu'on exerce sur leurs consciences de le vouloir faire autrement: & que ceste violence est cause de la perte de tant de gens, qui se vont consumant l'un l'autre comme le fuzil & la pierre) ce seroit un exemple recent qu'a donné le Roy de Poloigne, au serment par luy presté comme vous, monseigneur, scauez, entre les mains des Polonois d'entretenir dans Poloigne toutes les religions qui y sont: ores qu'il sceust qu'il y a grand nombre d'Anabaptistes, & Ariens, tresdangereux & meschans heretiques: L'exemple aussi de monseigneur de Sauoye, favoriseroit grandement vos actions en cela, quand bien, à son imitation, vous entretendriez les ministres, & pasteurs de ceste religion aux despens des trop gras benefices, des dismes, & semblables reuenus, comme il le faiet en ses troys bailliages de Tonon, de Ges, & Terny, où il ne souffre nullement estre dicté une seule meschante petite messe basse: estant, au reste, si bien obey d'eux qu'il n'a nuls de ses subiects desquels il se puisse mieux asseurer que de ceux cy, & de ceux là du val d'Angrogne, auxquels il donne presque semblable liberté. Que si vous voulez un exemple du Pape, mesmes en plus grand cas vous scauez comme c'est qu'il souffre les Iuifs, avec leurs synagogues en toutes terres, & pays

qui sont de son obeissance : les Iuifs (dy-ie) que  
chascun scait estre vray ennemis de Christ: Mon  
seigneur , mettons le cas que ces gens cy fussent  
tombez en quelque erreur : (comme un chacun  
d'eux confesse qu'ils en ont commis un bien lourd,  
quand ils se sont par tant de fois fiez à ceux là de  
Valois : Mais mettons le cas que l'erreur fust en  
articles de la foy: ils se sont tousiours soumis d'en  
vouloir ester à l'escriture: Ils passeront condem-  
nation , s'on leur monstre qu'ils sont deceus : &  
sont prests à se retracter s'on leur pouuoit ensei-  
gner mieux. Ils ont faict voir tout ce qu'ils cro-  
yent. Ils sont tousiours prests de le faire avec dou-  
ceur & comme à Chrestiens appartient. Ie suis icy  
contraint de dire , qu'il me semble que ceste voye  
est la meilleure , & la plus seure , pour l'estat &  
pour la conscience , que n'est celle de feu , & sang.  
Quant à eux, ils scauent respondre de leur foy, de  
leur esperance, parlent de Dieu pertinemment, &  
presque mieux que nos docteurs : Quant à nous,  
nous ne scauons pas bonnement pourquoy nous  
viuons, nous ne parlons iamais de Dieu, si ce n'est  
le blasphemant, & ne croyons qu'à nos curez, ou à  
ce que leurs chambrieres croient. de leur vie, avec  
la nostre, si l'on en faict comparaisn, on scait qu'ils  
sont loin de desbauche , autant que nous en som-  
mes pres : cependant nous nous dispensons de les  
tuer

tuer tous à credit: Monseigneur, le Conseil vaut mieux, que Gamaliel donna iadis, lors qu'on poursuivoit les Apostres: c'est de laisser ces gens en paix: car si leur conseil ou doctrine est des hommes, soyeZ certain qu'il sera desfaict tout à plat: que si ceste œuvre est de Dieu, iamaïs on ne la pourra deffaire. Les estats assemblez à Orleans, quelques partiaux qu'ils fussent, & peu libres, furent comme vous scauez, de cest avis: les grans personnages de la France, apres auoir ouy les ministres des Huguenots à Poissy, conseillèrent la mesme chose. Ainsi, si vous tenez ce train, il ne faut ià que vous doutiez, que les Huguenots ne desirent vostre auancement, & grandeur: & qu'ils n'oublient ayseement tout ce qu'ils ont receu de perte par vos deuanciers, & parens: estant chose toute asseuree, que les iniures nouuelles qu'on leur va iournellement multipliant, leur font perdre la memoire des vieilles: Et que pieçà on ne parle plus que des tours de la Royne mere, de Birague, du Peron, & tels estaffiers qui manient tout ce poure Royaume en rond, de pié coy, & à Passades, & tout ainsi comme il leur plaist. Aussi ne faut il pas douter que ceste vye debonnaire ne plaise bien aux Catholiques, desquels les vns, par trop lassez, ne demandent que le repos: & les autres, ont tousiours eu en horreur toute cruauté.



Cela est doncques resolu que ces deux partis là vous rient : & par consequent , que le gros de la France vous y desire : il ne reste que le menu. Ceux de Montmorency vous en veulent: & vous leur en devez aussi. Il est à craindre qu'ils ne montent bien tost en credit , ce dict-on , par la faueur qu'un Duc leur porte : mais deuancez les dextrement : ils sont iusqu'à present bien foibles,gardez qu'ils ne rentrent en cour. Que s'ils y sont,& bien auant, declarez vous ouuertement pour liberateur de la France: vous verrez ceux de Valois bas , abandonnez de leurs suppos : le peuple crier liberté , & les Gentilshommes vous suyure: mettez au dessus les Estats: faictes qu'ils recourent leurs forces : Remettez l'ancienne police : faites que Iustice ait lieu : rengez moy la gendarmerie , & cassez tout le superflu : chassez loin de nous l'estranger , & les Italiens qu'on hait tant , deschargez le peuple d'impos & vous contentez du domayne , & de l'ordinaire courant. Bref, monstrez vous en cest aage le pere de vostre Patrie, qui semble vous tendre les bras: Monstrez vous tel, (dis-ie) par effet, & non par escrit seulement , comme ont fait ceux là de Valois, & vous les verrez bien camus. Je vous discourrois volontiers les moyens que i'estime les plus propres , à mettre à fin une si heureuse entrepri-

treprise, n'estoit que ie m'asseure, que monseigneur le Reuerendissime vostre Oncle, vous les scaura trop mieux tracer au vif, & aussi, que i'espere auoir bien tost l'honneur de vous pouuoir aller baiser les mains, & de vous dire à bouche, ce que le papier ne peut que mal seurement porter. Cependant, ie vous supplie treshumblement de vous resoudre, à vn acte si genereux, & magnanime, & de vous y disposer au plus tost qu'il sera possible. Si vous ne le faictes bien tost, croyez monseigneur, ie me doute, que vous n'attendrez que trop tard : les Nobles, auecques le Peuple, pourront bien vouloir recouurer par eux mesmes, leur liberté perdue, & secouant le ioug de Tyrannie, eslire vn Roy subiet aux loix, comme iadis firent les nostres, tout ainsi que font les Polagues. Ce seroit alors à briguer, ce que l'occasion presente (si vous la scauez empoigner) vous met comme dessus la teste. Souuiene vous, qu'elle est chaue derriere : A tant ie supplieray Dieu,

Monseigneur, qu'il luy plaise vous toucher le cœur de sorte, qu'en suyuant mon auis, & conseil, vous ayez à bon escient pitié, & compassion de vostre Patrie, que les Tyrans, les femmes, les Italiens, les gabelliers, les Ruffiens, & maque-reaux, vont rongeanst iusques aux os : & qu'il

*vous doint avec un heureux succez, & en tres-  
bonne santé, & prosperité, treslongue,  
& tresheureuse vie, de Reims  
le x. de Decembre*

1573.

\* \*  
\* \*

D I A-



DIALOGISME SUR L'EFFI-  
gie de la Paix.

Le Polonois. La Paix Valoise.

\* \*  
\*

- Pol. *Quelle femme est ce ou Nymphe que ie voy,  
Ayant le port de la fille d'un Roy,  
Plus haute à voir que quelque chose nee,  
D'habits nouveaux estrangement ornee,  
Haute en sourcy, superbe en son marcher?  
Mal-appris est qui n'ose s'approcher.  
Dites-moy Dame, ou Nymphe si vous estes  
Du reng de nous, ou des Graces celestes,  
Qui quelque fois frequentent les humains:  
Puis s'en reuont en ces lieux souuerains,  
Quand les mortels se plongent en tout vice:  
Seriez-vous point ceste belle Iustice,  
Qui s'esmouuant nous viene voir çà bas,  
Pour appaiser les guerres & combats?*
- Pa. *Je ne suis pas ce qu'estre tu me pense,  
Je suis la Paix que Charle a mise en France  
Dont ie suis sœur, bastarde comme luy,  
Le plus loyal des hommes d'aniourd'huy.*
- Pol. *Vrayment tu as un bon traistre de frere.  
Mais dy moy donc, qui fut aussi ton pere.*
- Pa. *Mon pere fut un Diable des-Guisé  
Dessous l'habit d'un Prestre supposé  
Monstre fatal, composé de tout vice,  
Trouble-repos, estable d'auarice,  
Dont s'eschaufa celle noble Putain,  
Le sang infect des bongres d'Italie,*

# D I A L O G I S M E.

*Nourry du lait d'une horrible Furie,  
Qu'un Pape au col des Valois attachâ  
Et dans le sein de nos Roys la cacha,  
Pour y nourrir la flamme che allumee,  
Dont France un iour fust toute consumee,  
Cause de maux, semence de malheurs!*

**Pol.** *Ce voile ainsi bigarré de couleurs,  
Et cest habit de pourpre figuree,  
De bleu, de verd, de rouge coulourée,  
Monstre-il pas, à qui le verra tel,  
Que tu n'es pas d'un simple naturel?*

**Pa.** *Aussi ne suis-je: ains suis ie toute telle  
Que l'esprit faux & cauteleux de celle,  
Qui la tissu d'un ouurage diuers,  
De traistres ieux & de semblants couverts.*

**Pol.** *Et ces cheueux que tu vas nonchallante  
Portant espars, ainsi qu'une Bacchante?*

**Pa.** *Ce sont les Rets, où sous ombre de Foy,  
Et de repos, ceux qui viennent à moy  
A moy sont pris, lors qu'ils me pensent prendre,  
Et dans mes las ne faillent à se rendre  
Ceux-la dont Mars n'a dompié la Vertu.*

**Pol.** *Quel escusson, Valoise, portes-tu?  
Où trois Crapaux dedans le champ se trainent*

**Pa.** *Les trois Crapaux, ainsi que nos gens tiennent,  
Furent iadis les armes des vieux Roys:  
Mais lors que France heureuse prit les loix  
De Iesus Christ, les armes se changerent,  
Et les beaux Lis les Crapaux effacerent:  
Iusqu'à ce temps, que nos Roys ont quitté  
(Ah mal heureux!) la vraye Chrestienté:*

*Intro-*

# DIALOGISME.

*Introduisans au lieu du Paganisme  
Vne Sodome, un horrible Atheisme  
Dedans la Cour, où les Lis sont fenez,  
Et les Crapaux en France retournex.*

Pol. *Mais dequoy sert ce mors & ce cheuestre  
Et ce serment qui pend à la se. estre?*

Pa. *C'est mon amy, dont ie bride les veaux,  
Qui s'amusans à mes Edits nouveaux  
Croyent à tout ce que Charle leur iure:  
Le Serment, c'est ma verge de Mercure,  
Dequoy i'endors & charme l'Huguenot,  
Et du sommeil ie l'enuoye à la Mort.*

Pol. *Et sous tes piez: Pa. les deux piliers de France  
(La Pieté & l'egale balance  
De la Iustice honteuse de nos Roys:  
Qui font passer leurs plaisirs pour les loix)  
Iadis debout, & maintenant par terre  
Sous vne Paix plus barbare que Guerre.*

Pol. *Mais pourquoy donc mauuaise te fais-tu  
Nommer la Paix, compagne de Vertu?*

Pa. *Suis-je pas Paix, qui en paix eternelle,  
En couche tel, qui iamais ne s'esueille:  
Plus ne font guerre, & plus n'ont d'ennemis,  
Ceux qui sous moy reposent endormis,  
Et sur la Foy, que Charles a iuree.*

Pol. *Pourquoy tiens-tu ceste lame ferree,  
Qui serroit mitux à un Mars inhumain?*

Pa. *Pour faire encore un beau coup de ma main:  
Sous l'amitié de Noces confirmee,  
Surprendre au liét la force desarmee,  
Mettre au sang des Nobles massacrez*



# D I A L O G I S M E.

*Parmy le vin des Conuines sacréz,  
O faux attraits! ô traistre mariage!  
Femmes, enfans cherront en ce carnage,  
Et de leurs corps les ondes s'empliront;  
Du sang versé les fleuves rougiront:  
Mais à la fin, si d'un coup de tempeste  
Ce Dieu Vengeur ne me froisse la teste,  
Du mesme acier moy mesme m'occiray.  
Et sur les miens ce sang ie vengeray.*

*Pol. Comment! veux-tu i'outrier aussi toy-mesme?  
Tournant vers toy par desespoir extreme  
Le fer tout nud dedans ton propre sein?*

*Pa. Laisse moy faire, ainsi que de leur main  
Merc, & enfans, & du Tyran l'engeance  
Fairs on verra d'eux mesmes la vengeance:*

*Pol. Quoy qu'il en soit si faut il te tenir:  
Car tu pourras meilleure deuenir;  
Et vraye paix un iour à l'aduenture.*

*Pa. Ne le croy pas que iamais ie soye seure:  
Tant qu'on verra la maison de Valois  
Fausser la foy, & se rire des Loix:  
Les faux Edits d'un Parlement esclaué  
D'un Cardinal, parement de Conclaué:  
Tant qu'un Conseil de monstres composé,  
Vne Chimere, un Garde-seaux rusé,  
Qui n'ont pour Dieu que l'Estat & la Panse,  
Tiendront en main les gouvernaux de France:  
Tant qu'Italie en France regnera,  
Tant que la France hors de France fuyra:  
Tant qu'on verra de Florence la Fee  
D'un Clerc seruisie, & d'une Rets coiffée.*

# DIALOGISME.

*Et que Catin aura ses Estalons,  
Un Diable au ventre, un Prestre à ses talons.*

## VERS AV CHASSEUR

*Dé loyal.*

*Je ne scauroy penser lieu où tu pourrois estre  
Charles en seureté avecques quelque honneur:  
Le peuple François t'a si fort à contre-cœur,  
Qu'il te veut aussi peu pour valet que pour maistre:  
L'accort Italien tes ruses scait cognoistre,  
L'Espagnol politic se rit de ton malheur:  
Le More ne pourroit souffrir ta Barbarie:  
L'Anglois & l'Escossois ne veulent point de toy,  
L'Allemaigne maudit un si barbare Roy:  
Le Turc & le Sophi detestent ta furie,  
Ils sont Mahumetains, & tu n'as point de Foy:  
Sans Foy lon ne va point en la celeste gloire:  
Les Diables en Enfer craindront te recevoir,  
Et apres le Concil, que nous deuons auoir  
Les Protestans feront raser le Purgatoire:  
Tu eusses donques bien à tes suiets pourueu  
Si mort-né le Soleil iamaïs tu n'eusses veu:  
Mais qu'on t'eust droit porté dedans la fosse noire,  
Et qu'aux Limbes Papaux tu te fusses tenu.*

# AVX VRAIS GENTILS.

*hommes François.*

Pourquoy François Nobleſſe  
D'un Tyran eſtonnes-tu?

Qui n'a force ne vertu  
Sinon celle qu'on luy laiſſe.

N'attien rien de ſa largeſſe  
N'en eſpere rien de doux,  
Et ne crain point ſon courroux,  
Et tu verras ſa foibleſſe.

Celuy qui craint ou deſire  
N'eſt reſolu ne conſtant,  
Et le licol va trainant,  
Par où le Tiran le tire.



ARGUMENT DV  
premier dialogue.

\* \*

\*

luthie, c'est à dire la vérité, estant  
A en une de ses maisons, qu'elle a li-  
brement dressée ez quartiers de la  
Hongrie qui est sous la puissance du Turc,  
voit venir son amy Philaluthie eschappé de  
la France : l'interroque de l'occasion de son  
despart: l'historiographe à la priere de Phi-  
laluthie la luy recite, discourant en gros les  
choses auenues touchant la Religion en Frã-  
ce, des François premier iusques au mois  
d'Aoust 1572. sous Charles neuuieme où il  
commence à raconter plus par le menu ce  
qui s'est passé. Le politique aide l'historio-  
graphe au recit de l'histoire & marque in-  
cidemment les fautes faictes de tous les deux  
costez, monstrant à l'œil le miserable estat de  
la France. L'eglise qui là estoit prie & parle  
parfois selon la maniere subiecte. Daniel, c'est  
à dire



Interlocuteurs.

*Alithie. Philalithie. L'historiographe. Le Politique. L'Eglise. Daniel.*

*Alithie.*

**V**Oicy venir à moy le petit pas, tout las & fort harassé, selon qu'il me semble, mon ancien amy Philalithie. C'est-il voirement: He Dieu, qu'il est maigre, deschiré, desbiffé, & mal en point! Si faut-il que ie l'embrasse, quelque mal vestu qu'il soit. Que tu fois le tresbien venu l'amy: Qui sont ces deux gens de bien qui viennent quand & toy?

*Phi.* Vous soyez la tresbien trouuée, madame ma grande amie. Quant à ceux-cy desquels vous demandez, l'un est l'Historiographe: l'autre, le Politique François.

*Ali.* Je suis plus aise de te voir accompagné de l'un que de l'autre, sachant combien l'un est nécessaire & profitable pour aider à la memoire, & seruir à la posterité: & l'autre, le plus souuent pernicieux & dommageable, principalement s'il est nourry à la cour d'aucuns Rois & Princes que tu cognois bien: toutesfois, si tu as tousiours bonne souuenance de ce que ie t'ay enseigné, ie m'asseureray que telles gens que les Politiques d'auourd'huy, ne te destourneront facilement de l'amitié que tu me portes.

*Phi.* J'aimeroiy mieux estre mort, que de m'esloigner tant soit peu de mon deuoir enuers vous, ou de flechir aucunemēt de ce que m'avez enseigné. Quant au Politique que vous voyez, cōbien qu'il ait esté nourry quelque temps en la cour du Roy



Charles ix. si est-il si modeste & bien aisé, que tant s'en faut qu'il se soit essayé à me diuertir de mon saint propos, qu'au contraire tousiours il m'y a aidé & fauorisé au possible : iusques là, que me voyant partir de France, il s'est ioinct à moy, avec ce bon Historiographe: Me prians tous deux (quoy qu'ils ne cognoissent pour toutes veritez, que celle de l'estat) de leur permettre de courre pareille fortune que moy (Ce furent les mots dont ils m'vserent à mon depart) quelque chose qui me deust auenir : depuis en ça, nous auons tousiours esté compagnons de voyage, de table, & de lict, avec toute la meilleure paix & creance que l'on scauroit desirer.

*Ali.* Je suis bien aise d'entendre ce que tu en dis, & de ce que Dieu t'a pourueu en eux d'une si honeste compagnie, & pense que ce n'est pas sans mystere qu'ils sont venus avec toy. Mais qui t'eust iamais pensé icy?

*Phi.* Mais vous vraiment: il y a bien plus de quoy s'esmerueiller à vous y voir habiter, & y tenir maison (comme ie m'apperceoy que vous l'y auez dressée) qu'il n'y a de m'y voir venir.

*Ali.* Quant à moy, estant plustost Cosmouague qu'arrestee en certain lieu, ce n'est pas de merueilles si passant par ce pays, & m'y voyant bien receüe, i'y ay planté mon bourdon & enseigne, & dressé ma famille, tout ainsi comme ie fay en tout autre lieu où lon me reçoit : Mais toy, duquel la patrie est si fertile, si heureuse, & pleine d'un si grand nombre de nos amis, ie m'esbahy comme tu as iamais eue le cœur d'en sortir, pour venir peregriner

regner en region tant esloignee de la tienne.

*Phi.* Quand tu-sçauras ce qui m'y a conduit, tu t'esmerueilleras beaucoup plus de ceux qui m'ont donné occasion d'en sortir, que de moy qui l'ay sceu prédre. Quât à ma retraicte en ce pays, le peu de seureté que ie voy aux autres plus voisins, pour la fetardise de ceux qui y commandent, m'a contraint (par l'aduis mesme du Politique) de venir ici de bonne heure chercher siege, & repos asseuré.

*Ali.* Que tu y sois derechef le bien venu. Quand tout est dit, la demeure en ces terres-cy par la grace de Dieu est beaucoup plus asseuree & plus libre pour nos amis, qu'elle n'est en beaucoup d'endroits où ceux qui se disent Chresties ont la puissance & le gouvernement. Mais ie te prie, dy moy la raison, pourquoy tu es sorti de ta patrie, & qui t'a ainsi desualizé & desapointé de la sorte?

*Phi.* Je suis content de te le dire, & te prie de croire, Quoy que ce melchisme soit adueni pour l'amour de toy: de ce que fauorisant ton parti, ie t'ay tousiours confessée & maintenue, enuers tous & contre tous: Je ne t'en demanderay aucun grand-mercy: encores moins t'en scauray-je mauvais gré, ny ne quitteray pourtant l'obligation que i'ay à te defendre & maintenir, à la vie & à la mort: Mais s'il te semble mieux que l'Historiographe que voila, recite le faiët plustost que moy, qui pourroy' sembler suspect à ces messieurs qui nous escoutent: luy, qui a la memoire bonne, & l'intégrité requise à son estat, te pourra informer sommairement, & ces auditeurs ensemble, du faiët ainsi qu'il est passé.

*Ali.* Je me refiouy grandement de te voir ainfi conftamment perfeuerer ( quoy qu'il t'aduiene) en mon amitié de ma part , ne doute point que ie ne te rende la pareille, & à la fin des douceurs (fi tu pourfuy) nompareilles. Quant à ces aigreurs paffageres que mes amis fouffrent le plus fouuent, tu fcais que la faute ( que le monde qui me hait fait contre moy & les miens) ne me peut eftre imputee, auffi peu qu'au bon vin, le blafme que l'hōme par fon intemperance s'acquiert. Mais pource que cefte matiere requiert plus long discours , & que ie fçay que tu es bien refolu de ce qu'il en faut croire, attendant que nous en puiffions parler plus amplement au benefice commun des ignorans: il vaut mieux que l'Hiftoriographe nous die maintenant tout haut, afin que ceux cy l'entendent, ce qu'il a recueilly & appris de tes miferes & difgraces. Nous veux-tu pas faire ce plaifir, mon compaignon?

*Hift.* Je fuis fi grand amy de la verité, Madame, que combien que ie ne vous cognoiffe point , & qu'au recit de telle tragædie, voire au feul fouuenir ie fente tous mes fens fremir, & iufqu'au poil s'heriffonner: fi fuis-ie content de dire sinceremēt ce que i'en fçay, à la charge que mon compaignon le Politique m'y aidera, adiouftant ce que ie pourroy' oublier par mefgarde, & retrenchant ce qu'il cuidera de trop dict.

*Ali.* C'eft bien auifé. Que t'en femble feigneur Politique?

*Pol.* I'en fuis content: & d'autre part marry, d'ouyr rafrefchir la memoire de ce que, pour l'honneur de ma



de ma patrie, de mon Roy, & des siens, ie desire-roy' estre enseuely au plus profond du puy de l'oubliance.

*Ali.* Commence donc ie te prie, Historiographe mon amy, sans y adiouster du tien, ny te monstrier passionné pour l'un ou l'autre party : dy-nous simplement le faict.

*Hist.* Je ne le puis pour maintenant dire qu'en gros, n'ayant pres de moy mes memoires: mais i'espere bien en Dieu, qu'un iour ie lairray le tout par le menu, & comme il s'est passé, sans en rien dissimuler, escrit à la posterité.

Pour ceste heure, Oyez.

La lumiere de l'Euangile (car ainsi l'appelloit-on) commençant par la voix & les escrits de Luther, Bucer, Zuingle, Ecolampade, Melancthon, & autres doctes personnages, comme de nouveau à se manifester : Le Pape (tout ainsi qu'en Allemagne par ses menees, & par les armées & moyens de Charles le quint, aussi en France par le moyen de François premier) s'y opposa fort & ferme pour en empescher le cours, avec bourrees & fagots, iusques à faire brusler par sentences & arrests, les liures du vieil & nouveau Testament, d'où l'on tiroit ceste doctrine, s'ils estoient tournez en François ou autre langage vulgaire, & avec les liures, ceux qui les maintenoyent, qu'on nomma pour lors Lutheriens. Ceux de Merindol en Prouence, peuple instruit de longue main par ses predecesseurs en la doctrine de l'Euangile, furent par arrest du parlement de Prouence en l'an 1540. condamnez comme Lutheriens à estre brullez. Et

pource que la ville de Merindol comme lon disoit estoit la retraite & spelonque des gens tenans sectes damnees, fut ordonné par le mesme arrest que les maisons y seroyent rasées & demolies, & le lieu rendu inhabitable.

Quatre ou cinq annees apres ceux de Merindol, ceux de Cabrieres & le peuple de vingt & deux villages d'alentour, pour la mesme doctrine furent poursuyuis à feu & à sang par le seigneur d'Opède premier president, & lieutenant pour le Roy en Prouence assisté du Capitaine Poulain qu'on appelle le Baron de la garde, & d'autres Capitaines & soldats en grand nombre iusques là qu'il fut tué & meurtry des pources gens de Cabrieres hommes, femmes & enfans enuiron le nombre de huit cens, contre la foy que le seigneur d'Opède leur auoit promis & iuree. Plusieurs autres grans meurtres & pilleries furent exercees sur ces bonnes gens desquelles ie me tays, pour ce que l'histoire qui en a esté escrite en fait assez ample mention. François premier decedé la mesme poursuyte fut faite sous Henry second, qui luy succeda à la couronne : durant le regne duquel, non seulement les liures & les corps des Lutheriens furent bruslez, ains aussi leurs legitimes heritiers priuez de leurs biens, qui pour ce regard estoyent confisquez & donnez à la duchesse de Valentinois, au Mareschal saint André, ou à d'autres semblables courtizans, en recompense de leurs bons, honestes & loyaux seruices. Il fut descouuert de son Regne vne assemblee de trois cens personnes en la rue Saint Iacques  
dans

dans Paris, qui assistoyent à vn presche qu'on faisoit la nuict en vne maison priuee , où aussi la Cene fut lors celebree entre eux : les prestres & le peuple Parisien les surprirent , les outragerent de parole & de fait , plusieurs de l'assemblée furent faicts prisonniers & poursuyuis par les officiers de la iustice. Nonobstant cela le nombre de ces gens alloit tousiours en augmentant , ils firent courre par Paris & ailleurs certaine Apologie pour eux purger des crimes qu'on leur mettoit à fus, affermans qu'ils ne maintenoyent que la vraye religion pour laquelle plustost que de l'abandonner ils estoient contens d'endurer feux & tout autre genre de supplice. Le Seigneur Dandelot neveu du Connestable & Colonel de l'infanterie Françoise fut accusé au Roy Henry d'estre du nombre des Lutheriens. Et en fin fut fait prisonnier pour auoir dit librement ce qu'il sentoit de la Messe en la presence du Roy, & fut priué de sa charge de Colonel , à laquelle toutesfois il fut puis apres remis par l'entremise du connestable qui le reconcilia au Roy lequel à la fin apres la paix faite avec le Roy Philippe, resolu de ruiner Geneue , en haine de la doctrine Lutherienne , & pour icelle mesme , de voir brusler A. du Bourg l'un de ses conseilliers au parlement de Paris : au milieu des mariages, festins , delices , ieux & tournois , estant blessé en l'œil d'un coup de lance , que le seigneur de Montgomery luy donna , en ioustant contre luy par son commandement , par grand desastre mourut.



Après Henry, le mesme feu cōtinua sous François second, qui luy succeda au Royaume, duquel tout le gouuernement tomba aussi tost entre les mains de messieurs de Lorraine, tant à cause de leur niece royne d'Escoffe, qui estoit mariee à François, que pour leur habileté & souppléssé.

Les Princes du sang, voyans l'estat du royaume es mains du Cardinal de Lorraine, du Duc de Guyse, de ses autres freres Lorrains, de leurs partisans & amis, n'apperceuant en François autre chose de reste que le nom de Roy seulement, se resolurent de luy faire entendre l'estat de ses affaires, de le supplier treshumblement de conuoyer au plustost les estats de son Royaume, de le manier & conduire avec l'aduis des princes de son sang, ou bien de les charger du maniement, & s'en reposer sur eux, suyuant les anciennes loix de France, iusqu'à ce que l'aage luy eust apporté plus grande cognoissance d'affaires. Quant à eux, ils ne pouuoient plus longuement souffrir, de voir le Royaume conduit à l'appetit d'un Cardinal, (duquel la vocation estoit de prescher) & de ses freres lesquels deuoyent en toutes sortes ceder aux Princes du sang, & plustost rendre conte de leur administration, que passer outre à la conduite de l'estat: n'estans exempts de soupçon de se vouloir emparer du Royaume: Ce que les Princes craignoient d'autant plus, que ceux de Lorraine se disoyent descendus de Charlemagne, fils de Pepin roy de France, sur la lignee duquel, après la mort de Loys le Quint 34. Roy de France, en l'an 988. selon que leurs historiens le recitent, Hugues Capet vsur-

pet vſurpa le Royaume, lequel depuis eſt tombé  
és mains de ſes ſucceſſeurs de Valois, auſquels  
les Lorrains l'arracheroyent facilement, ſi la ver-  
tu des naturels vaſſaux & loyaux ſuiets, n'y met-  
toit empeschement. Quant à la religion, ils deſi-  
royent que le Roy ſe laiſſaſt flechir, à faire ceſſer  
les feux qui eſtoient allumez par tout le Royau-  
me encontre les Lutheriens, à cauſe de leur foy &  
doctrine, laquelle les Lutheriens diſoyent eſtre  
contens, que le Roy fiſt examiner aux gens do-  
ctes par la ſaincte Eſcriture, ſeul & vray iuge de  
ce faiſt.

Ces poinſts redigez par eſcrit en forme de  
ſupplication & remonſtrance, Loys de Bourbon  
prince de Condé, s'eſtoit chargé de les preſenter  
au Roy, qui pour lors eſtoit à Amboiſe : Quand  
ceux de Lorraine, doutans qu'une telle requête  
ne fuſt cauſe de quelque ſiniſtre changement à  
leur deſauantage, par le moyen des gentilshom-  
mes de leur ſuite, & des archers de la garde, fi-  
rent empoigner aucuns des gentilshommes qui  
eſtoient venus pour accompagner le prince de  
Condé: les firent executer à mort, & eſcarterent  
les autres: de ſorte, que ce deſſein des Princes &  
ſeigneurs François fut de tout poinſt interuerty, &  
vn bruit ſemé (pour rendre le faiſt odieux) que ce  
n'eſtoit pas contre ceux de Lorraine, ains contre  
le Roy: non pour le ſupplier pour la religion, ou  
pour le bien de l'eſtat, ains pour l'occuper & en-  
uahir, que celle entrepriſe eſtoit faite. Le nom de  
Huguenot fut auſſi dès lors mis à ſus, pour vn  
ſobriquet d'ignominie à ceux qu'auparavant on



nommoit Lutheriens, & au lieu de faire cesser les feux contr'eux, ils en firent plus aspre poursuite que deuant, reduisant messieurs de Lorraine en tout le surplus, l'estat des affaires du Royaume à leur plaisir & volonté, iusques là, qu'ayans fait remuer la Cour d'Amboyse à Orleans, & là assigné les Estats, ils y firent aussi venir le prince de Condé, Prince du sang, qu'ils firent emprisonner dès l'heure qu'il y fut arriué, pour luy faire rendre compte de ce qui s'estoit passé à Amboyse: en danger d'y laisser la vie, si le roy François tost apres par vn mal d'oreille qui luy suruint, ne se fust hasté de quitter le premier la sienne.

*Le pol.* Je me souuiens fort bien de ce temps-là & de ce que tu viens de dire. Mais quant à la conuocation des Estats faite de la part de messieurs de Lorraine, sous le nom du Roy François, ce n'estoit qu'un masque & couuerture qu'ils prenoyét: pour monstrier qu'ils estoient contens que les anciennes loix du Royaume fussent remises sus, & entretenues en leur force & vigueur par l'aduis commun des Estats (iadis cerueau, yeux, & oreilles de nos Rois les mieus aduisez & la bride & chastifol des meschans & des mal sages) afin d'arracher par ce moyen du poing à la Noblesse & au peuple, tout pretexte de murmurer contre le gouuernement Lorrain: Car quant au reste, ie scay bien qu'ils ne vouloyent rien quitter de leurs desseins, faisans pour ceste cause elire aux conuocations particulieres qui se faisoient és prouinces du Royaume, des deputez aux estats generaux, les plus affectionnez de leurs partizans & amis: mais la mort  
du Roy



du Roy inopinee, ne pouuant empescher leur desir de voler, retrancha en beaucoup de sortes les aisles de leur esperance. Peu de temps apres (comme vn desastre ne va gueres seul) il fut ioué vn terrible tour à monsieur le Cardinal, si d'auenture ne l'auez sceu: ie le vous diray en deux mots.

Le pape aduerti de l'issue du faict d'Amboyse, & du bon deuoir que le Cardinal de Lorraine auoit fait à maintenir le parti de sainte mere Eglise Romaine, contre les Lutheriens deuenus Huguenots (qui sembloient ne se contenter que les feux allumez cessassent, si quant & quant ils ne parloyent & disputoyent publiquement de leur religion & doctrine) luy rescriuit par vn courier expres des lettres gratulatoires, le merçant de la bonne volonté qu'il auoit monstre à maintenir le parti du saint siege Romain, & le priant de continuer de bien en mieux en celle bonne affection: en recognoissance de laquelle, il luy enuoyoit en don par le porteur, vn tableau consacré par sa sainteté, d'une nostre dame de grace tenant son fils entre ses bras, que Michel Angel de sa plus docte main auoit pourtraict comme vn chef d'œuvre. Aduint (côme Dieu voulut) que le courier qui portoit les lettres du Pape avec le present du tableau, estat tombé malade par les chemins, rencontra vn ieune marchât Luquoys catholique qui s'en alloit en cour, & se disoit estre au Cardinal de Lorraine (combié qu'à vray dire il fust son ennemi mortel & desesperé, par ce qu'il ne pouoit auoir seure assignation du Cardinal, qui m'annioit les finances de France, d'une grande somme

de deniers qu'il auoitourny au roy Henry lors des guerres de monsieur de Guyse en Toscanne lequel il creut facilement, bien aise de ceste occasion, puis que sa maladie l'empeschoit de passer outre: ayant donc appris le nom du Luquoys, & doutant que le retardement des lettres de sa sainteté ne luy fust dommageable, il le pria de se charger des lettres & du tableau, qu'il luy remit entre mains, pour les liurer, comme il promit, au Cardinal. Ce Luquoys ne fut pas si tost à Paris, que ayant rencontré vn peintre à sa poste, & l'occasion de faire vn sorne à monsieur le Cardinal, fit faire vn tableau de mesme grandeur, où le Cardinal de Lorraine, la Royne sa niece, la Royne mere, & la duchesse de Guyse estoient peints au vif nuds, ayans les bras au col, & les iambes entrelacees l'vn avec l'autre: puis le fit soigneusement emballer dans le tafetas & toile cirée de l'autre tableau, & trouua moyen de le faire consigner, avec les lettres de sa sainteté, en la chambre du Cardinal, lors qu'il estoit en conseil, entre les mains d'un de ses secretaires: Quand monsieur le Cardinal reueni du conseil, eut leu les lettres de sa sainteté, il reserua de voir le tableau au lendemain disner: auquel tout expres il conuia messieurs les Cardinaux de Bourbon, de Tournon, & de Guyse, les ducs de Montpensier, & de Guyse, & quelques autres grands seigneurs: ils ne furent pas au second service, que monsieur le Cardinal ayant fait lire tout haut les lettres de sa sainteté, esmeut tellemēt le desir de la cōpagnie à voir nostre dame de grace, que quittāt le repas du corps pour repaistre leurs esprits



esprits, ils firent apporter le tableau, lequel bien dextrement desueloppé, estant regardé par eux, & trouué tel que ie vous vien de dire, ie vous laisse à penser si ces seigneurs en furent estonnez, & monsieur le Cardinal fasché.

*L'hist.* Je n'auoy' point encore ouy faire ce conte: mais vrayemét il est admirable, & digne que ie le couche entre mes escrits, pour môstrer d'un costé la force de la verité, laquelle d'une façon ou d'autre tost ou tard faut que se descouure, & la puissance du despit sur vne personne outree.

*Lepol.* Quant au despit dont tu parles, si celuy du Luquoys le poussa à faire ce traict que i'ay recité, assure toy que le despit que monsieur le Cardinal en print, cuidant que ce fussent Huguenots qui luy eussent ioué ce tour, leur a causé beaucoup de maux qui leur sont depuis suruenus.

*Phil.* Ainsi bien souuent, l'innocent souffre la peine deue au coupable: mais pour n'entrer plus auant en ce discours, ie te prie Historiographe, repren le fil de ton histoire.

*L'hist.* Charles ix. François son frere decedé, succeda à la couronne en l'aage de dix ans: Et Catherine de Medicis sa mère, & Anthoine de Bourbon roy de Nauarre, premier Prince du sang estans en différent touchant le gouuernement de la personne de Charles & de son estat, & peu apres tombez d'accord à l'auantage de la mere: le prince de Condé fut déclaré innocent, & absous du faict d'Amboise, tenu pour bon parent du Roy, & deliuré. Les feux aussi & poursuites contre les Huguenots furent faits cesser: les estats de



France assemblez: leur aduis entendu, & suyuant iceluy eu aussi l'aduis des Presidens & Conseillers des Parlemens de la France, avec les seigneurs du conseil priué du Roy, fut fait vn Colloque à Poissy, deuant le Roy & ses Princes, entre les plus doctes des Catholiques & des Huguenots: lesquels ayans fait confession de leur foy, disputé d'icelle en public, & maintenu leur doctrine par les Escritures, obtindrent pour conclusion vn edict du Roy, par l'aduis du susdict Conseil, au mois de Ianuier en l'an 1561. par lequel fut permise aux Huguenots liberté de conscience, & exercice de leur religion hors des villes du Royaume. De là sourdit vn grand nombre d'Eglises (ainsi les nommoit-on) & d'assemblees de Huguenots par la France: on prescha à la Cour, hors de Paris, & és autres villes, avec telle efficacé, qu'à vray dire on voyoit ces gens-là s'amender en la vie, & s'accroistre en nombre à veuë d'œil. Monsieur le Cardinal de Lorraine & messieurs ses freres, ne pouuans supporter vne telle liberté en ceux qu'ils reputoyent leurs ennemis, & craignans que si quelquefois telle doctrine venoit en auant, ils ne fussent cōtraints par la reformation de ces Huguenots, de quitter 300. mille escuz de reuenu, qu'ils auoyent des benefices en leur maison, & rendre compte de leurs charges & maniemens passez: pour fortifier leur parti de Lorraine, attirerent à eux Antoine de Bourbon, luy promettans de luy faire rendre par le Roy d'Espagne le royaume de Nauarre qu'il occupoit, ou la Sardaigne en change, erigee en Royaume: Ils s'adioignirent  
aussi le

aussi le Connestable, & le mareschal sainct André, tant à cause de la recherche qu'ils craignoyent qu'il fist vn iour sur eux, des dons immenses, receus du Roy, contre les loix du Royaume, que pour la crainte qu'ils auoyent d'estre contrains de rendre les confiscations des Lutheriens & Huguenots, si vne fois ils auoyent le credit & la faueur. Plusieurs autres grands seigneurs aussi se rengèrent du costé de messieurs de Lorraine, en haine de ceste doctrine de l'Euangile. L'expugnation de laquelle estant iuree par eux, le duc de Guyse commença à faire preuue de leur dessein sur les Huguenots de Vassy, desquels luy ou ses gens tuerent vn bon nombre, ainsi qu'ils les trouuerent assembléz au presche. Quand & quand le prince de Condé par le commandement de la Royne mere (qui par lettres & courriers luy recommandoit la defense d'elle & du Roy son fils, ayant descouuert l'entreprise de messieurs de Lorraine, & de leurs confederéz) prit les armes, & les fit prendre avec luy aux Huguenots de la France, pour la conseruation du Roy, de ses Edicts, vassaux & suiets.

Messieurs de Lorraine, ayans auparauant assemblé forces de pied & de cheual en grand nombre, & avec eux le Connestable, & le mareschal sainct André, vindrent à la Cour armez: & là s'estans emparez du Roy, eurent aussi à la fin sa mere fauorable à leur party.

*Le pol.* Il est ainsi. Et voila d'où nous vindrēt beaucoup de maux: car si la Royne mere n'eust iamais donné courage & mandemēt au prince de Condé de s'armer, ou l'ayāt fait, s'elle n'eust point à la fin

adheré à ceux de Lorraine, la guerre ne fust point nee , ny sortie si auant, ne si asprement qu'elle fit depuis : mais ie suis certain que la Royne mere (qui auoit faict tomber le gouuernement du Roy & du Royaume entre ses mains) se doutant, si les Princes & les grans du Royaume estoient vne fois bien d'accord, qu'elle en seroit defarçonnée, vſa de ce moyen de defunion, preſtant ſa conſcience & autorité aux deux partis, pour les tenir en diſcorde, les aſſoiblir par leurs mains propres, & ſe conſeruer par ceſt artifice apres les coups ruez au gouuernement du Royaume.

*L'hiſt.* Ie le croy: mais tant y a, que la guerre print vn tel traict, les vns & les autres ayans tantost du bon, tantost du mauuais: que finalement apres pluſieurs prinſes, & pertes de villes de tous les deux coſtez, le prince de Condé fut fait priſonnier, en vne bataille qui luy fut liuree pres de Dreux: le Conneſtable de l'autre coſté y fut auſſi prins par les Huguenots, le mareſchal ſainct André tué, & peu apres le roy de Nauarre deuant Rouen, & le duc de Guyſe deuant Orleans, dont s'enſuyuit la paix tant deſiree par les Huguenots, que la neceſſité de ſe defendre, comme i'ay dit, auoit armez: auſquels de nouueau par Edict ſolennel, fait par le Roy, ſa mere, & ſon conſeil, ſur la pacification de ces troubles, au mois de Mars, 1562. fut accôrdee liberté de conſcience, & exercice de leur religion dans les villes où pour lors ils faiſoyent preſcher, & en beaucoup d'autres lieux du Royaume. Tout ce qu'ils auoyent fait en ces guerres fut declaré auoir eſté fait pour le ſeruice du  
Roy,



Roy, lequel neantmoins par son Edict leur commandoit de mettre les armes bas, & viure au surplus (leur conscience sauue) en paix comme auparavant, sous les loix & police de son Royaume.

*Le pol.* Tu as oublié de dire, que la Royne d'Angleterre (pour la conformité de la doctrine qu'elle & ses subiets ont avec les Huguenots) leur enuoya durant la guerre vn grand & puissant secours: qui fut causé en partie, de faire hastier la resolution de la paix.

*L'hist.* Tu as raison: Mais pour reprendre le fil de mon discours, l'Edict de pacification ne fut pas si tost publié, que les Huguenots mirent les armes bas, & se conformant en tout à la volonté du Roy declaree par son Edict, menoyent vne vie tranquille & paisible. Quand la Royne mere, se souuenant du tour qu'elle leur auoit ioué (les faisant armer à son besoin & mandement, & neantmoins accommodant d'autre part son autorité aux Lorrains, pour les faire mieux entrebattre, & en auoir son passe-temps) & doutant qu'ils ne peussent oublier la memoire d'vne telle offense, & que tout le royaume estant d'accord, on ne fist quelque dessein de conduire les affaires sans elle, craignât de perdre par ce moyen son autorité: ou possible (comme Caton, qui appelloit conspiration enuers le pere de famille, la bonne intelligence de ses domestiques) ne pouuant voir plus long temps l'estat de l'vn & l'autre parti en balance, elle monstra de vouloir entierement fauoriser le parti des Lorrains: mais cependant elle s'acqueroit particulièrement le plus qu'elle pouuoit d'autres par-

tizans, ayans pour ce, fait faire vn voyage au Roy tout à l'entour de son Royaume, apres auoir pratiqué ( sous couleur de vouloir voir la Royne d'Espagne sa fille) vn parlement avec le duc d'Albe à Bayonne, où elle fut avec le Roy : où aussi la royne d'Espagne & le duc d'Albe se trouuèrent, non sans estroite conference, & ferme resolution de quelque chose d'importance, que ie ne vous puis declarer.

*Ali.* Si fay bien moy : ie suis contente de le vous dire. La Royne mere comme personne curieuse, ayant interrogué Nostradamus (qui se mesloit de predire les choses futures) de ce qui aduiendroit à ses enfans : & ayant ouy qu'elle les verroit tous trois Rois, croyant par trop à ses paroles, & doutant s'ainsi aduenoit qu'elle ne fust réuoyée à Florence, pour voir ses parens & amis, & ne sçachant quel parti prendre ( tout ainsi qu'elle voyoit la force des estats pieçà supprimee & la loy Salique, touchant le gouuernement, qui estoit tombé en quenouille, violee) pensant que pour la succession du Royaume elle en pourroit bien faire autant: promit & iura au duc d'Albe, de faire tomber la couronne de France, sur la teste de sa fille aisnee, & par consequent du Roy d'Espagne, pour se le rendre bon patron & garent, au cas que ses enfans mourussent. Mais le duc d'Albe ne la pouuant legerement croire, voulut pour confirmation de ce faict, que la Royne mere luy promist cependant, de rompre & casser l'Edict de pacification, & d'oster aux Huguenots tout ce qu'ils auoyent de liberté de conscience, & d'exercice de religion,



religion, pour meilleure preuve de sa bonne volonté enuers l'Espagne, au detrimement de la France, ce que la Royne fit volontiers.

*Le po.* C'estoit bien loin de restablir le royaume en son entier, que d'abolir ses plus anciennes loix: elle estoit bien loin de chauffer sa botine de The-ramenes, comme nous conseillions, quand elle vouloit ruiner la moitié du royaume qu'elle disoit mal saine, au lieu de cōseruer les deux, comme en vn corps demi paralitique on a accoustumé d'vser: He Dieu que la maison est malheureuse, quand la poule y chante plus haut que le coq! Mais s'il vous plaist, que l'Historiographe poursuyue, afin que ie me taise des maux sans remede.

*L'ist.* Je le veux bien. Apres ce pourparler fait à Bayonne, les Huguenots se plaignoyent en beaucoup d'endroits du royaume, des maux, des torts & iniustices qu'on leur faisoit, de quelques restrictions de l'Edict de pacification, & de plusieurs contrauentions à la volonté du Roy faites iournellement à leur desauantage, depuis la pacification iusques alors, durât le temps de cinq annees. Et cependant la Royne mere sous le nom du Roy, ayant soudoyé, fait entrer en Frâce, & venir droit à la cour six mille Suysses, avec l'aide de ses partizans & autres peu paisibles François, rompit ouuertemēt l'Edict de paix, sur l'heure que le prince de Condé s'estoit accompagné pour aller trouuer le Roy à Meaux, & luy faire ses plaintes & doleances, tant pour luy que les autres Huguenots, & nommeement sur ceste entree d'estrangers iusques au milieu du Royaume, &



pres la personne de sa maiesté, sans occasion apparente. Ceste rupture d'edict fut telle & si à point nommé, que si le prince de Condé & ceux de sa troupe n'eussent pris garde à eux, les Suysses (informez tout autrement des choses) n'eussent failli à les mettre en pieces, tant leur dessein estoit bien dressé.

*Le pol.* Nous estions extremement marris, moy & vne troupe de bons François, qui estions pour lors à la cour, zelateurs du bien de l'estat & de la reputation du Roy, de voir prendre ceste routte aux affaires: de voir la foy publique violee, par ceux qui la deussent garder plus chere que leur propre vie: voire que ce fust par les forces des Suysses, qui auoyent la reputation entre les nations, d'estre loyaux obseruateurs de leurs promesses iurees, d'autant plus que de ce mal dependoit comme d'un ruisseau vne mer de miseres sur nous & à le vouloir continuer, la subuersion entiere du Royaume: auquel les Suysses estans alliez plus fort qu'au Roy (pour dire vray) & leurs pensions payees des deniers des subiets du Roy, nous-nous esmerueillions grandement, comme ils n'auoyent regret de prendre de leur argent, pour les venir tuer en leurs maisons, en violant toute foy, alliance, & seureté publique. Et sçachans combien es Cantons de Suysses, il y a de grandes & puissantes Republicques, qui tiennét la mesme doctrine que les Huguenots François, nous doutions bien fort que le feu ne s'allumast parmi les Suysses, en leur propre pays, pour les empescher de venir en France, à la tuerie des Huguenots: nous trouuions aus-  
si

si fort estrange, de voir ces pources Suysses se laisser mener à la boucherie (car sàs doute il en mourroit & en estoient tuez beaucoup en France pour trois ou quatre escus le mois) à la merci de trois ou quatre Colonels qui remplissoyent leurs bougetes, aux despès du sang de leurs combourgeois. Et eussions biẽ voulu, qu'au lieu de six mille Suysses armez, les Seigneurs des Liges en eussent enuoyé six des plus sages & paisibles au Roy & à son conseil, pour faire entendre qu'à tout euenement en telles guerres ciuiles, il vaut mieux armer le parti obeissant, que le seditieux & rebelle. Que ce luy est obeissant, qui se contente des bons Edicts de son Roy: que les Huguenots (hors la conscience) luy rendoyët tous deuoirs de suiets, mais qu'au reste le corps est foible & moins appareillé à combattre les autres, quand il a perdu la moitié de ses membres: qu'il n'y a chose plus miserable que la victoire és guerres ciuiles, laquelle affoiblit le vainqueur bien souuent autát que le vaincu, le liurant à la fin du compte entre les mains de ses voisins: que partant l'opinion de Machiaueli (que le conseil du Roy sembloit suiure, tenant ses suiets desunis) estoit vne pernicieuse heresie en matiere d'estat: qu'il valoit donc mieux conseruer le tout, qu'en ruiner vne grande partie. Que les Republiques des Suysses & celles d'Allemagne (quoy qu'il y ait mesme diuersité de religions qu'en France) ne lassoient pas de prosperer, & estre bien fort paisibles: En somme, nous eussions desiré que les Seigneurs des Liges eussent fait remonstrer les choses, qu'ils eussent auisé estre mieux pour le biẽ



& conseruation du Royaume, sans enuoyer leurs gens à vn commun & reciproque rauage. Mais quoy? nous n'osîs mot sonner, ny en dire ce que nous pensions: & d'autre part l'ambassadeur du Roy vers les Suysses, monsieur Belieure, leur donnoit à entendre, que le prince de Condé vouloit faire tuer le Roy, & se faire Roy luy-mesme: tellement que les Colonels des Suysses, faisant sèblât de le croire, pour les pensions, gages, & profits qui leur en reuenoyët: au lieu d'y mettre la paix, y voyoyent volontiers la guerre.

*L'hist.* Tant y a, les choses estâs és termes que i'ay dict, le prince de Condé voyât que c'estoit à bon escient & à descouuert, & non plus par ieu & en cachettes, qu'on en vouloit à luy & aux Huguenots de la France: en ayant assemblé vne bonne troupe, s'en vint pres de Paris, où le Roy s'en estoit allé, pour entendre encore plus au vray le dessein de leurs ennemis: mais luy estant respondu à coups de canon, & couru sus luy à grand force, apres s'estre vaillamment defendu, se retira & les Huguenots qui l'accompagnoient, pour leur seureté & conseruation, dans quelques villes du Royaume. Quand les Princes protestans d'Allemagne oyrent ces nouuelles, sentans toucher à eux, ce qui touchoit aux François de leur religiô, & marris de ce qu'ô les traittoit ainsi à la rigueur, enuoyerent au prince de Condé & aux Huguenots François pour leur aide & defense, vn brâue & puissant secours de Reystrés & Lansquenets, sous la conduite du duc Iean Casimir, fils du comte Palatin. Apres l'arriuee duquel, la Royne  
mere



mere, le Roy, ses freres, & son conseil, voyans combien il leur estoit mal-aisé de ruiner pour lors les Huguenots, entierement, leur accorderent de nouveau par vn Edict solennel, fait au mois de Mars, en l'annee 1568. la mesme liberte de conscience, & exercice de religion qu'ils auoyent auparauant: reputant fait pour le seruice du Roy, tout ce qu'ils auoyent fait en ceste guerre-là, à la charge qu'ils mettroyent bas les armes, remet-troyent les villes où ils s'estoyent retirez és mains du Roy, ou de ses ministres, & renuoyeroyēt leur secours Alleman, hors de France. Cela ne fut pas si tost commandé qu'il fut executé par les Huguenots, le parti cōtraire demeurāt tousiours armé, dont aduint (aussi tost que le duc de Casimir & ses troupes furent retirees ( que de nouveau furent exercees par la France, plusieurs iniustices & cruantez sur les Huguenots, tant que le prince de Condé fut enuironné de garnisons, qui venoyent pour le surprédre dans sa maison de Noyers, où il s'estoit retiré: de sorte que s'il ne fust bien viste & dextremēt eschappé, avec sa femme & ses enfans, & s'il n'eust trouué le gué des riuieres qu'il luy conuint passer à commandement, il estoit trouffé en malle: & bié luy seruir de trouuer la ville de la Rochelle, où il se retira, fauorable: sans cela, c'estoit fait de luy. Estant retiré dans la Rochelle, les Huguenots faschez, de voir que si souuēt on leur faussoit la foy, furēt merueilleusement estonnez: mais peu apres ayans repris courage, ils accoururent de toutes parts trou-

uer le prince de Condé, pour se conseruer avec luy. Entre autres Ieanne d'Albret royne de Nauarre, vint aussi trouuer le prince de Condé son beaufrere, avec son fils le prince de Nauarre, qu'il le voia tout ieune qu'il estoit à ceste guerre, avec ses bagues & ioyaux, lesquels depuis furent engagez pour aider aux frais de l'armee. Le duc de Deux-ponts prince de l'Empire, entendant que la foy auoit esté de nouveau violee en France aux Huguenots, esmeu de la grauité du faict, s'achemina en France, & avec luy le prince d'Orenge, le comte Ludouic son frere, le comte de Mansfeld & plusieurs autres Seigneurs & Comtes Allemans, avec sept ou huit mille Reystres, & autant de Lansquenets. Cependant le prince de Condé menoit les mains, assiegeoit villes & chasteaux, faisant tout ce qui pouuoit seruir à se defendre, & en dommager l'ennemy: quand le duc d'Aniou frere du Roy Charles, & son lieutenant general, conduisant vne puissante armee contre le prince de Condé (qui n'auoit alors que bien peu de ses forces) luy donna vne bataille pres de Iarnac, où le Prince perdit, & y fut fait prisonnier, & peu apres par commandemēt du duc d'Aniou, tué à sang froid, par vn nommé Montesquiou, de la maison du duc d'Aniou.

*Ali.* Le prince de Condé se hazardant ainsi, monstra euidemmēt combien peu il aspiroit à la couronne, desmentant ouuertement ceux qui le calomnioient de cela.

*Phi.* Il est bien vray: Mais aussi fit-il vne grande faute, hazardant avec peu de forces tous ceux qui s'estoyent



s'estoyent à luy retirez pour se conseruer, & generally tous les Huguenots de France.

*Le Pol.* Ce sont des fautes qu'õ ne peut faire qu'une fois, & qu'il se faut bien garder de commettre.

*L'hist.* Il est ainsi. Or le reste des forces des Huguenots, apres la mort du Prince de Condé, demura (sous le nom du prince de Nauarre, & du ieune prince de Condé) entre les mains de Gaspard comte de Coligny, admiral de France, par l'aduis commün de tous les principaux, lesquels estans allez ensemble au deuant du duc de Deux-ponts & de son armee, qui leur venoit au secours: & ayäs trouué le duc de Deux-ponts mort de maladie, ne laisserent pourtät comme freres de mesme religion & volonté, de ioindre leurs forces ensemble: avec lesquelles (apres quelques prinſes de villes & autres faits d'armes) ils furent contraints de soustenir vne autre bataille pres de Montcontour, au mois d'Octobre 1569. que le duc d'Aniou leur liura, laquelle aussi ils perdirent: mais ne laisserent pourtant ayans ramassé leurs forces, de tenir la cäpagne, & se conseruer le mieux qu'il leur fut possible avec leurs villes, durant neuf ou dix mois: pendät lesquels aussi ils prindrent plusieurs villes, & eurent des rencontres en diuers endroits où il sembloit que la chäce se tournast à la faueur des Huguenots. Ce que l'on cognut encores plus ouuertement. En fin le 22. du mois d'Aoust de l'an 1570: leur fut derechef ottroyee la paix, qu'ils auoyent tät desirée, par vn edict que le Roy Charles fit, par l'aduis de la Royne sa mere, de ses freres, des autres Princes & Seigneurs ses conseillers



par lequel entre autres choses, le Roy vouloit que la memoire de toutes les choses passees és guerres ciuiles de la France, voire les sentences & iugemens donnez contre les Lutheriens ou Huguenots, du temps du roy Henry son pere iusques alors, fussent annullees & abolies perpetuellement, Declaroit tout ce qui s'estoit fait en ceste guerre, auoir esté fait pour son seruice: pour lequel aussi il recognoissoit que le secours d'Allemagne leur estoit venu, reputant pour bons parens siens, les princes de Nauarre & de Condé, le prince d'Orenge, le comte Ludouic de Nassau, & de Mansfeld, ses bons cousins & amis, & les Huguenots François, ses loyaux vassaux & suiets: leur promettant liberté de conscience & exercice de leur religion, en certaines villes, & és maisons des seigneurs gentils-hommes & autres ayans fief de haubert. Et par ce que la memoire des dommages reciproquement donnez en ces guerres, ne se pouoit si tost perdre comme il seroit bien requis ( voulant euitier tout inconuenient, & donner seureté à ceux des Huguenots qui pourroyent estre en quelque crainte retournans en leurs maisons, d'estre priuez de repos ) attendant que les rancunes & inimitiez fussent adoucies, le Roy accorda de leur bailler en garde, les villes de la Rochelle, Mont-auban, Coignac, & la Charité: esquelles ceux d'entr'eux qui ne voudroyent si tost s'en aller en leurs maisons, se pourroyent retirer & habiter, à la charge que le Roy de Nauarre, le prince de Condé, & vingt gentils-hommes de maison  
qui

qui seroyent nommez par le Roy, iureroient & promettroyent vn seul & pour le tout, pour eux & ceux de leur religion, de garder au Roy lesdictes villes, & au bout de deux ans, les remettre entre les mains de celuy qu'il plairoit au Roy d'ordonner, sans rien y innouer: Voulant pour plus grande assurance de l'obseruation de son Edict, que le Roy donnoit pour irreuocable, que tous les Parlemens, gouuerneurs, & ministres de la iustice & police de la France, iurassent solennellement, de le faire exactement obseruer selon sa forme & teneur.

*Ali.* On voit clairement és issues de ces guerres, vne chose admirable, que le monde ne recognoist point: c'est que ces Huguenots perdoyent tousiours les batailles, & toutefois obtenoyent la victoire de leur cause, d'autant que la liberté de conscience & l'exercice de leur religion, leur estoit tousiours accordé, depuis le temps qu'elle leur fut premier ottroyee au mois de Ianuier, en l'an 1561. tellement que on les pourroit dire vainqueurs, alors qu'ils ont esté vaincus. Chose qui fait recognoistre à qui regarde de pres & sans passion en leur doctrine, vn naturel effect de la Palme, symbolizant à la verité, laquelle tant plus qu'elle est pressée, plus elle s'esleue & ressound.

*Phi.* Cela est certain: Mais ce de quoy ie m'esmerueille le plus, & de quoy ie ne me puis encore bien resoudre, c'est, laquelle de ces choses estoit plus grande, ou aux Huguenots la patience, l'obeissance & fidelité: ou en leurs ennemis, la furie, haine & desloyauté?



*Ali.* C'est vne question bien mal-aisée à soudre: toutesfois quât aux Huguenots, ils ne pouuoient faire de moins pour iustifier leur cause, & recommander deuant Dieu & les hommes leur parti (qu'on accusoit de sedition) que de monstrier vne mansuetude & successiue obeissance à leur Roy, & à ses ministres, selon Dieu.

*Phila.* Voire: mais on pratiquoit par trop souuent sur eux, la fable du loup d'AEsopé, lequel beuuant au haut de la riuieré, chargeoit l'agneau (qui beuuoit tout au bas) de luy troubler l'eau, comme il disoit que son pere auoit fait, prenât sur ceste querelle d'Alleman, occasion de le deuorer.

*Lepol.* Laissons ce discours ie vous prie, n'interrompons pas celuy de l'Historiographe.

*L'hist.* Cest Edict de paix fait & publié, il fut iuré & promis par tous les officiers de la France, de l'observer: les Huguenots de leur part renuoyèrent leur secours d'Allemagne, & se conformerēt en tout le surplus, à la volonté du Roy, declarée en son Edict.

La Royne de Nauarre, le prince de Nauarre, le prince de Condé, l'Admiral, le comte de la Roche-foucault, & quelques autres seigneurs & gentils-hommes s'estans retirez à la Rochelle, apres les sermens & promesses de la conseruer au Roy faites comme il appartenoit, viuoient le plus paisiblement qu'on pourroit penser: & quelques gentils-hômes, gens de lettres, & marchâds, sous mesmes promesses s'estoyent pareillement retirez és autres trois villes baillees pour refuge: & tous les autres Huguenots retournent en leurs maisons, se tenoyent



tenoyét coy, chacun en sa vocation, comme si iamais auparauant on ne leur eust fait tort ou des- plaisir. Le Roy Charles monstroït de sa part, vou- loir que son Edict fust de poinct en poinct obser- ué: iurant bien souuent par la mort, & par le sang, qu'il le feroit entretenir: qu'il ne croiroit plus ce qu'on luy auoit voulu faire entendre, que les Hu- guenots le voulussent tuer, qu'ils luy estoyét trop bons suiets, pour attenter telle meschâceté. Mō- sieur, frere du Roy, ne se pouuoit de tant commā- der, que de monstrier tant soit peu d'enuie, que les Huguenots iouissent de quelque repos asséuré: au contraire, il faisoit ouuertement paroistre, le peu de plaisir qu'il y prenoit: iusques là, que le Roy & luy, s'en faisoient mauuaise chere, pour la discre- pance qu'ils monstroyent auoir en leurs volontez. Ceux que le Roy aimoit, sembloient hays de Mō- sieur: ceux que Monsieur aimoit, n'estoyét en ap- parence guere bié veus du Roy: duquel plusieurs (voyans les Huguenots entrer en credit) disoyent tout haut, qu'ils luy auoyét desrobé le cœur. Mais pource qu'en plusieurs endroits du Royaume on leur faisoit des torts & iniures, la royne de Nauar- re, les princes de Nauarre & de Cōdé, & avec eux l'a- miral, enuoyerét vers le Roy, quatre gētilshōmes signalez: sçauoir est, Briquemaut le pere (anciē ser- uiteur du Roy, & des vieux Capitaines de la Frā- ce) Teligny gendre de l'Admiral, la Noue, beau- frere de Teligny, & Cauagnes Conseiller au Par- lement de Thoulouse: pour faire entendre à sa maïesté, les torts qu'on faisoit à ceux de leur reli- gion, contre l'intention expresse de ses Edicts: le

supplier treshumblement d'y pouruoir , & leur administrer iustice , comme vn bon prince doit à ses suiets. Le Roy les ayant humainement receus, & recueilli leurs plaintes,monstroït d'en estre biē fort marri,& leur respondit,que par la mort Dieu il en feroit la vengeance , & chastieroit si bien les seditieux,qu'il en seroit memoire à iamais.

Monfieur , frere du Roy , ne pouuant laisser si tost la haine qu'il portoit aux Huguēniots,n'y mesmes la dissimuler , pour l'obligation qu'il auoit à l'Eglise Romaine ( de laquelle & du clergé François , il auoit deux cens mille francs de pension) donnoit neantmoins par fois esperance ausdicts gentils-hommes deputēz ; d'appaiser & rabatre vn iour à venir , le mal-talent qu'il leur portoit. Le Roy de sa part,continuoit tousiours ses caresses;ausdicts quatre gentils-hommes deputez, leur faisant plusieurs dons & presens : entre autres, il donna vn estat de Maistre des requestes de son hostel, au seigneur de Cauagnes : & quelque present en deniers à Teligny , lequel fit aussi present au Roy d'vn beau & bien adroit courfier Rabicā, & d'vn petit cheual , qui manioit en toutes sortes de luy-mesme, sagement & bien à point,& sans que personne fust dessus , que le Roy monstroït d'aimer bien fort & s'en esmerueiller. Presque tous les courtisans sembloient se resiouir, voyans ces deputez en cour, & montrans d'auoir oublié les aigreurs des guerres, n'oublioyēt rien des caresses de cour enuers eux , reprenans en apparence les arres de leurs vieilles cognoissances & familiaritez passees. Sur tout, le Roy , & la Roynne  
sa mere,



la mere, monstroyent desirer que la royne de Nauarre, les princes de Nauarre, & de Códé, & l'Admiral vinssent à la cour : afin que mettans à part toute desfiance, ils receussent de luy le bon visage & accueil qu'il estoit prest de leur faire. Quant au Roy, il desiroit sur toutes choses, s'allier le prince de Nauarre, qu'il aimoit autant que son propre frere: disant qu'il lui vouloit dōner sa sœur en mariage : S'asseurant, qu'outre ce que ce seroit vn rafreschissement des ancienes alliances de la maison de Nauarre, à celle de Valois, & vn tesmoignage de l'affection cordiale, que le Roy, la Royne sa mere, & messieurs ses freres portoyent à la royne de Nauarre, & au prince de Nauarre son fils : ce seroit aussi vn certain moyen d'asseurer & appaiser à ianrais l'estat de la France ; & oster aux Huguenots tout soupçon qu'on leur vueille doreseuauant nuire. Partant, le Roy, & la Royne mere, prioient affectueusement les deputez, d'asseurer en toutes sortes la royne de Nauarre, les Princes, & l'Admiral, de leur bonne volonté, & procurer que bien tost le Roy les peust voir en sa cour. Les deputez, tres-aises de voir ce qu'ils n'auoyent iamais cuidé, & d'ouyr ce qu'ils n'auoyent iamais esperé, rescriuoyent bien souuent, & quelquefois aucun d'eux alloit à la Rochelle, par deuers la royne de Nauarre, les Princes, & l'Admiral, leur racontans merueilles des langages, façons & affections du Roy enuers eux. Le Marechal de Môt-morécy, & ses freres cousins de l'Admiral, faisoient aussi tout le deuoir à eux possible, pour asseurer & tesmoigner la volonté du



Roy, & de sa mere, qu'ils cognoissoient ( ce disoient-ils) estre bonne enuers les Huguenots, disans que le Roy vouloit reconcilier l'Admiral avec le duc de Guise, pour se pouuoir mieux seruir de luy & de son conseil au maniemment des affaires d'estat de la France, donnant mesme ceste esperance, qu'avec le temps ceux de Guise seroyent aussi esloignez de la cour, qu'ils en estoient pres. Le seigneur de Biron fut enuoyé plusieurs fois vers la Royne de Nauarre, les Princes, & l'Admiral, & certains autres gentilshommes particuliers Huguenots, firent plusieurs allees & venues à la cour, le tout pour la negociation de ce que dessus. Le Roy cependant enuoya des commissaires en certains endroits du Royaume, pour informer des torts que lon faisoit aux Huguenots, cõtre ses Edicts, & fit chastier à Rouen & en quelques autres endroits, des meurtriers & seditieux, qui auoyent tué quelque nombre de pures hommes & femmes Huguenots, depuis la paix, au retour d'un de leurs presches.

Ceux de Montmorency, & les desputez, persuadez, persuaderent aussi (apres toute fois plusieurs resistances, repliques, difficultez, inconueniens, & solutions de tous costez alleguees) la Royne de Nauarre, les princes de Nauarre, & de Condé, l'Admiral, le comte de la Rochefoucaut, & tous les autres seigneurs, gẽtilshommes, & autres Huguenots de la France, de la bonne volonte, zele, & affection qu'ils pensoient cognoistre au Roy, & en la Royne sa mere, enuers eux.

Le Roy fit venir en sa cour le comte Ludouic  
de

de Nassau, frere du prince d'Orenge, qui depuis la paix derniere s'estoit tenu à la Rochelle, avec lequel il traicta de diuers moyens & desseins, qu'il desiroit exploiter contre le roy d'Espagne pour se venger des torts qu'il luy auoit faits: & l'entretenant avec douces caresses, resolut avec luy vne entreprise de tresgrande consequence, qui s'est du depuis executee en partie sur le pays bas, par le dict comte Ludouic, le seigneur de la Noue, & plusieurs autres François: au secours desquels estans assiegez dans Mons, le Roy enuoya le seigneur de Genlis, avec quatre mille soldats de pied ou de cheual: Si fut aussi ladicte menee du Roy avec le comte Ludouic, occasion & cause que le prince d'Orenge avec vne puissante armee entra dans le pays bas, qui se reuolta presque tout du roy d'Espagne, & print la Hollande (qu'il tient encores maintenant) avec la plus grande partie de Zelande, en danger de ne la quitter iamais.

L'Admiral, persuadé & conduit par le mareschal de Cossé, & pour satisfaire à la volonté du Roy, vint trouuer à Bloys sa maiesté: qui pour oster la crainte que l'Admiral auoit de la maison de Guyse, luy enuoya des lettres de congé, à mener cinquante gentils-hommes avec luy armez, pour sa seureté, iusques à la cour: où estant arriué, le Roy, & la Royne sa mere, le receurent de toute la plus courtoise façon qu'il leur fut possible: le Roy le voulut ouyr souuent en conseil secret & à part, és choses de plus grande importance, monstrant de se fier en luy de sa vie & de son Royaume, comme il eust fait en son pere propre.

En mesme temps le Roy fit demander pour Monsieur son frere, la Roynne d'Angleterre en mariage, ayant enuoyé à cest effect vn ambassade honorable à ladiète roynne d'Angleterre: avec laquelle aussi le Roy fit traiter d'une ligue, confederation & alliance, laquelle depuis fut conclue & resoluë, au grand contêtement des Huguenots, auxquels telle ligue sembloit seruir de gage, de l'amitié du Roy enuers eux.

*Als.* Je me souuiens bien, que le Roy apres les premiers troubles de France, enuoya le Marechal de Vieille-ville en Suyssë, pour traiter Ligue avec les seigneurs de Berne: mais ils n'en voulurent point faire avec luy, qu'il ne leur promist quant & quant d'observer estroitement son Edict de paix enuers les Huguenots: mais de ceste cy d'Angleterre, ie n'en ay rien ouy dire.

*L'hist.* Je ne sçay pas aussi comme elle est faite, ie ne t'en puis dire autre chose: mais en mesme tēps le Roy faisoit pareillemēt traiter vne ligue, d'entre luy, la roynne d'Angleterre, & les princes Protestans d'Allemagne: & vne autre ligue en particulier, du Roy avec le duc de Floréce, vers lequel il auoit enuoyé Iéan Galeas Fregoze Geneuois, qui en rapporta bonnes paroles & promesse que le duc de Florence presteroit deux cens mille ducats pour la guerre de Flandre, contre le roy Philippe: pour le moins le faisoit-il entendre ainsi à l'Amiral & aux desputez.

La Roynne de Nauarre vint trouuer à la fin le Roy, duquel (ce disoit-il) elle estoit la meilleure tante, la plus desirée, la mieux aimée & mieux venue,

nue,



nue, qui iamais fut en France: la Royne-mere la recueillit comme sa treschere sœur: toute la cour en somme s'en resiouissoit en double façon.

Le mariage du prince de Nauarre, avec Madame sœur du Roy, fut (apres plusieurs menees, & difficultez faites sur la forme des ceremonies) en fin conclu & arresté: & auisé que les promesses des espoux à venir, seroyent receues par le cardinal de Bourbon, hors des ceremonies de l'Eglise Romaine, pour ne point forcer la conscience du prince de Nauarre Huguenot. Quelque temps apres, la royne de Nauarre fort contente, partit de la cour, qui pour lors estoit à Bloys, pour s'en aller à Paris. L'Amiral aussi s'estoit retiré aupara-  
uant en sa maison de Chastilló, où il receuoit sou-  
uément lettres & messages du Roy, qui lui demâdoit  
son conseil es affaires occurrens, esquels il mon-  
stroit ne vouloir rien resoudre d'importance, sans  
son aduis.

La royne de Nauarre au partir de la cour, e-  
stant venue à Paris, tomba malade, & cinq iours  
apres mourut, en l'aage de 43. à 44. ans, d'un bou-  
con qui luy fut donné à un festin, où le duc d'An-  
iou estoit, selon que i'ay ouy dire à un de ses do-  
mestiques dont on ne voulut parler, de peur que  
ce fust occasion de rompre ledict mariage, desiré  
de tous les amateurs de paix & sans soupçon.

*Al.* Le Seigneur a accoustumé de retirer en vne  
façon ou en l'autre, ses bien-amez en paix, quand  
il veut faire venir quelque mal sur son peuple:  
Ainsi le promit-il & l'obserua à Iosias Roy d'Isra-  
el, pour un singulier benefice.

*Phi.* Je me doutay bien quand & quand, que quelque grand defastre nous auient, quand ie vey ceste bonne Princeſſe partie.

*L'hiſt.* Enuiron cetemps la, de diuers endroits de la France, eſtoient enuoyez pluſieurs aduertiffemens à l'Amiral, afin qu'il print garde à ſoy, & qu'il ſe retirast des dangers où lon diſoit qu'il eſtoit eſtant dedans Paris, ou à la cour: entre autres, vn ie ne ſcay qui, luy enuoya vn bordereau de memoires, où il eſtoit eſcrit,

**S O V V E N E Z V O U S Q V E C' E S T**  
vn article de foy reſolu & arreſté au Concile de Conſtance, auquel Iean Huz fut brulé contre le ſauf-conduit de l'Empereur, qu'il ne faut point garder la foy aux heretiques.

Ayez memoire, que les Romains, les Lorrains, & les Courtizans, tiennent les Lutheriens, les Huguenots, & tous ceux qui font vne meſme profeſſion de l'Euangile (de quelque nom qu'on les appelle) pour heretiques, bruſlables: Croyez que partant ils leur ont rompu, & leur rompront encores la foy iuree & promiſe, toutesſois & quantes que la commodité de les ruiner & deſtruire leur ſera offerte.

Sachez, qu'au ſecret conſeil tenu parmi les Peres, au dernier concile de Trente, il a eſté reſolu, qu'on peut & doit tuer, non ſeulement ceux de la France qui ſeront de ceste religion, ains auſſi tous ceux qui en ont eu quelque ſentiment, ſoit de la France, ou d'autre nation: n'eſtant iamais poſſible, que ceux qui ont vne fois eſté abbrenuez de ceste doctrine, ſe fient derechef en ce qu'on leur

a voulu par cy deuant faire entendre, de la part de sa saincteté, la vie & les abus d'icelle leur estans par trop descouverts & cognus.

Ne doutez pas aussi, que la Royne mere n'accomplisse ce qu'elle promet au duc d'Albe, pour le roy d'Espagne à Bayonne: de rompre les edicts de paix, & ruiner les Huguenots de la Frâce, avec la peau du lion, ou avec la peau du regnard.

Considerez, que le Roy depuis douze ans en ça a eu des maistres & instituteurs qui l'ont appris à iurer, blasphemer, se periurer, paillarder, dissimuler sa foy, sa religion, ses pensees, estre maistre de son visage, & qui l'ont sur tout nourri à aimer de voir du sang, commençant par des bestes, & acheuant par ses suiets.

Prenez garde, que le Roy a esté persuadé par la doctrine de Machiauelli, qu'il ne faut pas qu'il souffre en son Royaume, autre religion que celle sur laquelle son estat a esté fondé: de laquelle, voire de ses faux miracles, il faut qu'il monstre faire compte: Assurez-vous qu'on luy a enseigné & souuent repeté ceste leçon, que son Royaume ne peut estre paisible & assuré, cependant qu'il y aura deux religions.

Notez qu'on a plusieurs fois fait entendre au Roy, que les Huguenots le vouloyét tuer, & pour le luy mieux persuader, luy ont fait voir des lettres de menées & dessein, supposées & fausses: & au reste i'ay sceu de bonne part, que le iour que la royne de Nauarre arriua à Bloys, il dit à sa mere: Ne ioue-ie pas bien mon rollet, Madame? Ce n'est rien fait, respondit-elle, il faut acheuer. Par



la mort-Dieu, Madame, ce repliqua-il, ie les vous mettray tous au filé, si vous me voulez laisser faire.

Vous-vous trompez, si vous croyez qu'un Roy ou Prince permettre iamais, que son vassal ou suiet, qui s'est vne fois esleué en ligue contre sa volonté (pour quelque occasion que ce soit, iuste ou iniuste) vse & iouisse de la faueur des loix. Pensez plustost, que cecy est engraué d'as le cœur des Rois & des Princes, de venger par les armes, ce qu'ils estiment auoir esté fait contr'eux par les armes.

Faites vostre compte, que ce que les Rois & Princes (qui ne regardent à la conscience) pensent auoir fait par crainte ou necessité, ils se dispensent de le rompre, soudain que l'une ou l'autre de ces deux occasions cessent: & tiennent pour maximes d'estat, qu'il ne faut point garder les conuentions, faites par le prince, à ses suiets armez: Que pour regner, il est loisible de violer la loy, & que lon peut piper les enfans avec paroles & promesses, & tromper les hommes avec des iuremens solennels. C'est leur caballe: ce sont leurs loix inuiolables, qu'ils n'osent outrepasser, se souciant bié peu ou rien, de la force faite à toute autre loy, soit diuine, naturelle, ciuile, des gens, ou municipale, pour estre (ce disent-ils) ennemie de leur repos, estat, & grandeur.

Voici quelque traict & exemple, de leurs plus rares vertus.

Antonin Commode, faisant par fois treues avec sex voluptez, esquelles il estoit du tout plongé, pour employer le temps & fuir l'oisiueté, va-

quoit

quoit à contemplation, s'appliquant à proietter & executer des meurtres & cruantez contre la nobleſſe de ſon Empire: entre les autres, Iulian gouuerneur d'une prouince, qui eſtoit ſon plus fauorit, qu'il ſouloit baiſer & embrasser, l'appellant ſon pere & ſon mignon, fut par luy traitreuſement tué.

Antonin Caracalle, eſtant arriué en Alexandrie, irrité contre les Alexandrins, qui auoyent recité de luy quelques vers mal plaiſans, fit ſemblât de vouloir voir la monſtre des ieunes gens de la ville, les plus aſpres à la guerre: & les ayant fait appreſter pour la reueue, les fit tous mettre en pieces, commandât aux ſoldats Romains qu'il auoit menez avec luy, d'en faire ceſte nuit-là chacun autant à ſon hoſte: Il fit faire telle boucherie dans Alexandrie, qu'il n'oſa faire compter les corps morts, ains eſcriuant de ceſte execution au Senat de Rome, luy manda, Qu'il n'eſtoit ia beſoin ſe mettre en peine, pour ſçauoir quels & combien de gens y auoyent eſté tuez: que c'eſtoit aſſez de ſçauoir, que tous auoyent bien merité la mort.

Lyſandre colonel des Lacedemoniens, ayant ſous couleur d'amitié, fait venir à ſoy huit cens Mileſiens, les fit tous tailler en pieces.

Seruius Galbe, ayant conuoqué & aſſemblé le peuple de trois citez de Portugal, pour traiter avec eux les choſes qu'il diſoit leur appartenir, en choiſit neuf mille d'entr'eux des plus gaillards & robuſtes, qu'il deſarma, en fit tuer une partie, l'autre partie vendit.

Antoine Spinole, gouuerneur pour les Ge-

neuois de l'isle de Corse, ayant iuré & donné sa foy aux Princes, seigneurs, & grans personnages de Corse, qu'il appella au conseil, & de là au banquet, leur fit à tous trencher la teste.

Charles septieme, roy de France, apres plusieurs guerres & tumultes arriuez en son Royaume, ayant fait alliance, & contracté affinité avec le duc de Bourgogne, & promis d'oublier toutes iniures & inimitiez passées : & pour le mieux asseurer, ayant tout cela iuré sur son hostie consacrée, le fit venir pour le festoyer à Montereau fault-yonne, & en le caressant, il le tua sur le pont d'Yonne.

Et plusieurs autres, desquels le recit seroit long & ennuyeux, les exemples desquels on ramentoit ordinairement au Roy, avec le chapitre dixhuitieme du liure du prince de Machiauelli, où il traite comme c'est que les princes doyuent garder la foy: surquoy ses maistres d'escole (aussi peu soucieux de sa conscience que de sa reputation) font des additions & gloses plus dangereuses, que le mesme texte : Partant soyez diligent à prendre garde à vous, n'y ayant autre remede d'eschapper qu'en fuyant hors de la cour, que ie puis appeller Sodome.

L'Amiral ayant veu cest escrit, fit fort mauvais visage à celuy qui le luy bailla : Et renuoya pour toute responce, dire à celuy qui luy auoit enuoyé, Que si par le passé il auoit eu, & les autres Huguenots aussi, occasion de ne se fier pas legèrement en des promesses que, Dieu merci, telle peur ou des fiance estoit alors sans fondement.



Que la prouidence de Dieu , laquelle guide & conduit iufques aux plus petites chofes de cefte vie, auoit changé le cœur du Roy : de forte, qu'il y auoit de quoy bien & mieux eſperer.

Qu'il ne croiroit iamais, que dans le cœur de fon roy, peult loger vne péeſee ſi meſchâte, n'y approchante à ce qu'on luy eſcriuoit.

Que tout au contraire il croyoit, que dès que la France a eſté erigee en regne , il n'y auoit eu vn meilleur roy , que Charles neuſieme l'eſtoit pour lors.

Qu'il eſtoit bien vray , que Monsieur frere du Roy n'aimoit pas les Huguenots, & qu'on leur faiſoit tout plein d'outrages en diuers lieux du Royaume : mais qu'il eſperoit de voir Monsieur vn iour adoucy, pour les bons ſeruices que les Huguenots lui pourroient faire, & s'attendoit bien (le mariage de Madame fait & conſommé) que le Roy feroit faire iuſtice des ſeditieux, & perturbateurs de paix.

Que la ligue qui eſtoit fraiſchement faite avec la Roynes d'Angleterre, ſeruoit d'aſſez bon teſmoignage aux Huguenots, de l'affection du Roy enuers eux.

Et la ligue qu'il fait rechercher avec les Proteſtans d'Allemagne, confirmera du tout cefte bonne opinion.

Que le Roy portant meilleure affection à monsieur l'Electeur Palatin , qu'à nul des autres princes Proteſtans, auoit choiſi le duc Iean Caſimir ſon fils , pour le faire penſionaire, & le duc Chriſtoſle ſon ainé , pour le retirer en ſa cour , avec

entretienement digne de sa qualité.

Qu'il desiroit aussi auoir de l'Angleterre, le myllord de Lycestre, & le myllord Burgley, ou l'un d'eux, pour les festoyer & traiter, comme il desire de caresser tous les loyaux seruiteurs de sa sœur la royne d'Angleterre, en signe de vraye alliance.

Que le Roy auoit enuoyé sa foy au prince d'Orenge, & l'auoit donnée au comte Ludouic son frere, de leur aider & les secourir en tout & par tout, contre le roy d'Espagne : & que sans cela, iamais ils n'eussent rien entrepris de remuer en l'estat de Flandres.

Que combien que monsieur de Genlis, & ses gens qu'il leur menoit eussent esté desfaits, le Roy ne lairroit à leur enuoyer de nouveau, & biē tost, vn braue & puissant secours.

Que Iean Galeas Fregoze asseuroit, que pour ceste guerre de Flandres, le duc de Florence presteroit au Roy, ou au prince d'Orenge, deux cens mille ducats.

Que les affaires vont si bien en Flandres, que l'Agent du Roy pres le duc d'Albe, donne continuellement auis au prince d'Orenge, & communique avec lui par lettres & messages, tous les desseins qu'il peut entendre du duc d'Albe, & le prince d'Orenge à l'Agent tous les siens : tellement que quand il n'y auroit autre chose que ceste bonne intelligence, elle est suffisante à faire bien esperer aux plus timides.

Mais qu'il y a bien plus, c'est que l'armée de Stroffy, & du Baron de la garde, ne sont pres de la Rochelle, que pour attēdre la flotte venant d'Espagne,

pagne, la combattre, & de là singler à Flessinghe, pour se ioindre au Prince d'Orenge, & faire la guerre à ieu descouuert.

Qu'à ceste occasion, le prince d'Orenge a enuoyé par l'auis du Roy, de l'argent pour payer les nauires & galeres à Strossy, qui est de la meilleure volonté du monde.

Quant à son faict, & querelle particuliere avec le duc de Guyse, le Roy les auoit mis d'accord, & fait iurer l'un & l'autre entre ses mains, de ne sere chercher que d'amitié. Mais que ce miraculeux mariage de Madame, que le Roy donne (ce dit-il) nō pas au prince de Nauarre, ains à tous les Huguenots à femme, pour se marier comme avec eux, estant le comble de toute seureté & repos: le faisoit prier ce gentil-homme & tout autre, que s'ils luy vouloyēt faire plaisir, qu'ils ne luy parlassent plus de ces fascheuses choses du passé, qu'ils se contentassent de prier Dieu, & le remercier de la grace qu'il leur auoit daigné faire, d'amener les choses à vn si paisible estat.

Or le prince de Nauarre (fait Roy par la mort de sa mere) & le prince de Condé en ces entrefaites, sollicitent & asseurent de toutes parts de venir à la cour, vindrent à la fin trouuer le Roy à Paris, où il s'estoit remué, pour y faire celebrer les nopces de sa sœur: Plusieurs Seigneurs, Barons, & gentils-hommes Huguenots y accompagnerent le roy de Nauarre, & le prince de Condé, au deuant desquels presque toute la cour y alla: Ils y furent recueillis du Roy, de sa mere, & de ses freres, & des autres Princes, de Madame, & des prin-



celles, comme ils le pouuoient desirer en apparence.

Quelques iours se passerent en festes & banquets, attendant le iour des nopces, que lon dilayoit pour diuers respects d'un iour à l'autre: entre autres, pource que le cardinal de Bourbon, qui deuoit receuoit les promesses du mariage, n'y osoit toucher sans dispense du Pape, qu'il luy auoit enuoyé demander: laquelle apres estre venue, & à son gré n'estant assez ample pour sa conscience, il fallut renuoyer à Rome, pour en auoir vne à sa fantasie: Et sur ce, le Roy faisant semblant de se fâcher de tant de remises, blasphémant & despitant, iura, qu'il vouloit que le mariage se conformast sans plus tarder: que si le cardinal de Bourbon ne les vouloit espouser, il les meneroit luy-mesme à un presche des Huguenots, pour les y faire espouser à un ministre: Et que par la mort-Dieu il ne vouloit pas que sa margot (car ainsi appelloit-il sa sœur) fust plus long temps en ceste langueur.

*Ali.* La bonne dame n'auoit garde d'auoir si long temps attendu: Monsieur son frere sçauoit bien qu'il auoit eu son pucelage.

*L'hist.* Je ne sçauois pas cela: Mais i'auois bien ouy dire qu'elle estoit presté d'accoucher dès lors que la Royne fut à Xainctes.

*Ali.* Il est ainsi ie t'asseure. Et tu vois que ces beaux Princes ne font maintenant que le cerf de despucceller leurs parentes. Regarde moy un Roy d'Espagne, & un Archeduc Charles, chacun d'eux n'a-il pas sa niepce?

*L'hist.*

*L'hist.* Voire. Mais aussi le Pape leur en a baillé la dispense.

*Ali.* Comme si l'homme pecheur pouuoit rompre la loy de Dieu & en dispenser les autres. Quel seruiteur des seruiteurs de Dieu ! Tu verras tu verras amy quelque iour que ce mariage du Roy d'Espagne avec la fille de sa sœur & de son cousin germain l'Empereur , qui luy fait naistre des enfans, fils, neveux & cousins ensemble, sera cause s'il plaist à Dieu de l'entiere ruine de Rome , du Pape & de sa papauté.

*L'hist.* Comment cela, Bon dieu ?

*Ali.* Le Roy d'Espagne mourant, les enfans masculles de l'Empereur sont appelez à la couronne d'Espagne (car de la fille nee d'Izabel de France, l'Espagnol n'en veut point & ne croit pas qu'elle soit legitime) Les enfans de ce mariage de la niece diront que la Couronne leur appartient. Les legitimes neveux leur repliqueront qu'ils sont incestueux & bastards: partant ne peuvent succeder: voire mais, ce diront les autres, le Pape en a dispensé, Le seruiteur, diront les legitimes (à fin que nous ne flattions plus ) n'est pas par dessus le maître, Dieu la defedu, le Pape ne le doit permettre, c'est l'Antechrist tât attendu. En somme, par ce moyen là la puissance de ce faux pasteur sera mise en dispute, ses abus serôt cognus, on ne les pourra plus souffrir, & Dieu sçait le beau mesnage qu'il y aura pour ce seducteur.

*L'hi.* Dieu nous vueille estre en aide, cela n'a que trop d'apparence, on a bien fait autrefois la guerre pour moindre chose que n'est la couronne d'E-

Espagne : mais, pour reuenir à mon discours, les nopces (pour le faire court) du roy de Nauarre, & de Marguerite sœur du Roy, se celebrerent en tresgrande pompe, le lundy dixhuietieme iour du mois d'Aoust dernier passé : les Princes, Comtes, Barons, & autres seigneurs, & gentils-hommes de marque Huguenots, y assistoyent presque tous, dont aucuns y auoyent amené leurs femmes & enfans : Et pouuoient estre en tout, enuiron mille gentils-hommes.

Le mardi, mercredi, & ieudi suyans, furēt employez en toutes sortes de ieux & passe-temps à rechange, esquels l'Amiral souuent assistoit, allant le bon visage du Roy à l'accoustumé.

Le mercredi, l'Amiral voulāt entretenir le Roy de quelques affaires de grande importāce, le Roy en riant, le pria de luy donner quatre iours pour s'esgayer & esbatre, promettāt à foy de Roy, qu'il ne bougeroit de Paris, qu'il ne l'eust rendu content, & tous ceux qui auoyent affaire à luy.

Peu de iours auparauant, outre les aduertissemens susdicts, l'Amiral auoit esté aduertit de certain homicide, fait par des Catholiques seditieux de Troye, sur certains Huguenots reuenans de leur presche.

Que ceux de Rouen, & d'Orleans menaçoient les presches de prendre fin, les deux ans apres la pacification derniere, passez.

Et parmi les gentils-hommes courtizans, on sentoit souuent murmurer entre leurs dents, que dās la fin du mois d'Aoust, on interdiroit les presches aux Huguenots, mesmes que plusieurs gentils-hommes



tils-hommes Catholiques vouloient faire gageure avec des Huguenots, que deuant quatre mois ils iroyent à la messe.

Qu'on sentoit courre vn bruit d'entre les principaux du peuple de Paris, qu'en ces nopces, se resspandroit plus de sang, que d'eau.

Que les Commissaires, Centeniers, & Dixeniers de Paris, brassoyent quelque entreprise, facile à estre descouuerte à qui y regarderoit de pres.

Qu'un fameux Aduocat Huguenot du palais de Paris, auoit esté aduerti par vn President, de se retirer pour quelques iours avec sa famille hors de Paris, s'il vouloit conseruer sa vie, & celle des siés.

Qu'un Italien engageoit sa teste, au cas que ces nopces s'accomplissent: Et vn autre Italien à la table de Iean Michael & Sabalin ambassadeur de la seigneurie de Venise, se vatoit de sçauoir le moyen pour ruiner les Huguenots en vingt-quatre heures.

Autres semblables choses se resspandoyent parmi le vulgaire, desquelles aussi l'Admiral estoit aduerti.

On adioustoit à cela, que la faction des seditieux, desiroit la ruine des Huguenots sur toutes choses, Que le lieu & le temps la facilitoient: La voulant donc, & la pouuât mettre à effect, qu'on ne deuoit attendre autre chose d'eux.

A tout cela, l'Amiral sans peur, tousiours semblable à soy, tousiours cōstant & asseuré sur la bonté du Roy, ne pouuoit prédre occasion d'alarme,

Le ieudi il fut dict au conseil priué du Roy, qu'on auoit veu certains hommes à cheual,

au pré aux clerks, & par les places de Paris, avec des pistoles & harquebouzes à l'arçō de la seelle, cōtre les deffenses du port des armes: à quoy quelqu'un du conseil respondit, que ce pouuoient estre quelques vns qui se preparoient & s'exerçoient pour la reueue, qui se deuoit faire, pour la recreation de la cour.

Le vendredi 22. iour d'Aoust au matin, fut tenu conseil au Louure, pour remedier aux plaintes des Huguenots ( Monsieur frere du Roy qui y presidoit, s'estant leué & sorti plüstoit que de coustume ) l'Amiral qui y estoit pareillemēt, sortit avec les autres seigneurs du conseil: & comme il alloit en son logis, ayant trouué le Roy qui sortoit d'une chappelle qui est au deuant du Louure, le ramena iusques dans le ieu de paulme (où le Roy, & le duc Guyse ayant dressé partie, contre Teligny & un autre gentilhomme, & ioué quelque peu) l'Amiral en sortit pour s'en aller disner à son logis, accompagné de douze ou quinze gentilshommes entre lesquels i'estoy: il ne fut point cent pas loin du Louure, que d'une fenestre ferree, du logis (où logeoit ordinairement Villemus precepteur du duc de Guyse) luy fut tirée une harquebouzade avec trois balles, sur le poinct qu'il lisoit une requeste ( allant à pied par la rue ) l'une des balles luy emporta le doigt indice de la main droite: de l'autre balle, il fut blessé au bras gauche pres du carpe, & sortit la balle par l'olecrane.

Lors qu'il fut blessé, le seigneur de Guerchy estoit à son costé droit, d'où luy fut tirée l'arquebouzade

bouzade, & à son gauche, l'aisné des Pruneaux. Ils furent fort esbahys & esperdus, & tous ceux qui estoient en la compagnie.

L'Admiral ne dict iamais autre chose, sinon qu'il mōstra le lieu d'où on luy auoit tiré le coup & où les balles auoyent donné: priant le capitaine Pilles, qui furuint là, avec le capitaine Monins, d'aller dire au Roy ce qui luy estoit aduenü: qu'il iugeast quelle belle fidelité c'estoit (l'entendant de l'accord fait entre luy & le duc de Guyse.)

Vn autre gentil-homme voyant l'Admiral blessé, s'approcha de luy, pour luy soustenir son bras gauche, luy ferrant l'endroit de la bleffeur avec son mouchoir: le seigneur de Guerchy luy soustenoit le droit: & en ceste façon fut mené à son logis, distant de là enuiron de six vingts pas: En y allant, vn gentil-homme luy dit, qu'il estoit à craindre que les balles n'eussent empoisonnées: à quoy l'Admiral respondit, qu'il n'aduiendroit que ce qu'il plairoit à Dieu.

Soudain apres le coup, la porte du logis d'où l'arquebouzade auoit esté tirée, fut enfoncée par certains gentils-hommes de la suite de l'Admiral. L'arquebouze fut trouuée, mais non l'arquebouzier: ouy bien vn sien laquais, & vne seruāte du logis: l'arquebouzier s'é estoit soudain enfuy par la porte de derriere, qui sort sur le cloistre de saint Germain l'Auxerrois: où lon luy gardoit vn cheual prest, garni de pistoles à l'arçon de la selle: sur lequel estant eschappé, il sortit hors de la porte saint Antoine, où ayāt trouué vn cheual d'Espagne qu'on luy tenoit en main, descendit du pre-



mier, & monta sur le second, puis se mit au grand galop.

Le Roy entendant la blesseure de l'Amiral, quitta le ieu, où il estoit encores iouant avec le duc de Guyse: ietta la raquette par terre, & avec vn visage triste & abbattu, se retira en sa chambre: le duc de Guyse sortitaussi peu apres le Roy, du ieu de paume.

La chambriere du logis interroguee, respondit, que le seigneur de Chailly ( qui est maistre d'hostel du Roy, & superintendant des affaires du duc de Guyse) le iour auparauint auoit mené l'arquebousier dans le logis, & l'auoit affectueusement recommandé à l'hostesse.

Le laquais interrogué, respond que ce iour-là bien matin, son maistre l'auoit enuoyé à Chailly, pour le prier de faire en sorte, que l'escuyer du duc de Guyse, tinst les cheuaux qu'il lui auoit promis tous prests: Quant au nom de son maistre, il n'y auoit pas long temps qu'il estoit à lui, & ne l'auoit ouy appeller que Bolland, l'un des soldats de la garde du Roy: mais à la verité dire, c'estoit Mont-reuel de Brie, celui qui aux guerres passées tua en trahison le seigneur de Mouy.

Le roy de Nauarre, le prince de Códé, le comte de la Roche-foucaut, & plusieurs autres Seigneurs, Barons, & gentils-hommes Huguenots, aduertis de la blesseure, vindrent incontinent visiter l'Admiral: il y vint aussi plusieurs autres seigneurs, & gentils-hommes Catholiques, amis de l'Amiral, tous bié fort marris de ce qui lui estoit aduenu.

Les playes penſees par les plus experts chirurgiens, le roy de Nauarre, & le prince de Condé alerēt trouuer le Roy, auquel ils firent leurs plaintes ſelon le merite du faiēt : remonſtrans qu'il ne faiſoit pas ſeur dans Paris pour eux, & le ſuppliāt treſhumblement de leur donner congé d'en ſortir, & de ſe retirer ailleurs.

Le Roy ſe complaignant auſſi à eux du deſaſtre auenu, & les conſolant, iura & promit de faire du coupable, des conſentans & fauteurs ſi memorable iuſtice, que l'Amiral & ſes amis auroient de quoy ſe contenter : cependant il les prie de ne bouger de la cour, & qu'ils lui en laiſſent la punition & vengeance, & ſ'aſſeurent qu'il y pouruoirra bien toſt.

La Royne mere qui là auſſi eſtoit, monſtroit d'eſtre bien fort marrie du cas aduenü : Que c'eſtoit vn grand outrage fait au Roy, qu'à le ſupporter auourd'huy, demain on prendroit la hardieſſe dans faire autant dans le Louure, vne autrefois dans ſon liēt, & l'autre dedans ſon ſein, & entre ſes bras. Par ceſt artifice, le Roy de Nauarre, le prince de Condé, les autres ſeigneurs & gentils-hommes François Huguenots, furent arreſtez dans Paris. Mais pource qu'il ſembla bon à aucuns d'entr'eux, de faire conduire l'Amiral en ſa maiſon de Chaſtillon ſur Loin, diſtant deux iournees de Paris : le Roy pour empéſcher ce deſſein, luy offrit chambre dans le Louure pour s'y retirer : Que ſ'il ne pouuoit pour la douleur des playes remuer de logis, il lui enuoiëroit vne compagnie des ſoldats de ſa garde, pour la ſeureté de ſa perſonne & de ſes logis.

L'Admiral entendant les honestes offres que le Roy luy faisoit, l'en remercia beaucoup de fois treshumblemēt, & se recognoissant estre assez asseuré en la protection du Roy, apres Dieu, il disoit n'auoir besoin d'aucune autre garde: toutefois il y eut ce iour-là enuiron cent soldats posez en garde deuât son logis, par le commandement du Roy.

Cependant on poursuiuit le criminel, lequel s'enfuyât & passant par Ville-neufue saint George (où il print vn autre cheual) alloit disant tout haut, Vous n'avez plus d'Admiral en France.

Le Roy en ces entrefaites commanda à Nancé, l'vn des capitaines de ses gardes, d'aller saisir Chailly: & le mener en prison: mais il auoit desia gagné le haut, ou pour le moins il s'estoit caché si bien, qu'on ne le vouloit trouuer.

Ce iour là, le Roy escriuit des lettres à tous les gouuerneurs des prouinces, & des principales villes de son Royaume, & aussi à ses ambassadeurs estans pres des princes estrangers: par lesquelles il les aduertissoit de ce qui estoit aduenü, & promettoit de faire en sorte, que les auteurs & coupables d'vn si meschât acte, seroyent descouuerts & chastiez selon leurs demerites. Cependât qu'ils fissent entendre à tout le monde, combien cest outrage luy desplaïsoit. La Royne mere ce mesme iour escriuit des lettres de mesme sustâce ausdicts gouuerneurs & ambassadeurs.

Le Roy ce iour-là apres son disner) qu'il fit court) enuiron deux heures apres midy, & avec luy la Royne sa mere, ses freres, tous les Maref-  
chaux



chaux de France (excepté celuy de Montmorency, qui le iour auparauant estoit allé à la chasse) le cheualier d'Angolefine, le duc de Neuers, Chauiigny, & plusieurs autres capitaines, alla visiter l'Amiral, qui mouroit d'enuie de luy parler: le Roy l'ayant ouy, & faisant du pleureux, confessa librement, que l'Amiral s'asseurant sur sa foy & bienvueillance, estoit venu à la cour: & partant quoy que la douleur des blessures fust à l'Amiral, que l'iniure & l'outrage estoit fait à luy, & qu'il estoit resolu de tout son cœur, d'en auoir la raison, & en faire iustice si exemplaire, qu'il en seroit memoire à iamais.

L'Amiral repliqua, qu'il en remettoit la vengeance à Dieu, & au Roy le iugemēt: quant à l'auteur du faict, qu'il estoit assez bien cognu. Et pource qu'il ne scauoit s'il auoit encores longuement à viure, il supplioit treshumblement le Roy de l'ouyr sur certaines choses qu'il luy vouloit communiquer, qui estoient tresnecessaires à l'estat de son Royaume.

Le Roy à ceste demande, ayant fait semblant de vouloir ouyr l'Amiral en secret, commanda que chacun sortist de la chambre, quand la Royne-mere, qui n'abandonnoit le Roy d'un pas empesché (ie ne sçay pourquoy) que ce colloque secret ne se fist.

Le samedi suyuant 23. iour d'Aoust, les playes se portoyent assez bien, tellement que les medecins & chirurgiens disoyent, que la vie de l'Amiral n'é estoit en aucun danger: que le bras, en perdant bien peu de sa force, seroit aisément guéri.

Ce iour-là de samedi, le Roy enuoia visiter l'Amiral par diuers gentils-hommes. La nouuelle espousee l'alla aussi visiter.

Ce mesme samedi, dás le conseil priué du Roy, furent examinez certains tesmoins touchant l'arquebouzade, le tireur, & les coupables: tellement que l'Amiral & ses amis, croyans que la voye à iustice leur fust ouuerte, se resiouissoient grandement, s'asseurans de pouuoir facilement conuaincre les auteurs du faict: dequoy ils aduertirent leurs amis en plusieurs endroits du Royaume, par des lettres qu'ils leur escriuirent, les prians de ne bouger, & ne se fascher de ce qui estoit aduenu à l'Amiral: Que Dieu & le Roy estoient puissans d'en faire la vengeance: que desia on commençoit à proceder contre le coupable & ses fauteurs par iustice, & les blessures n'estoyent pas, Dieu merci, à mort: que combien que le bras fust blessé, le cerueau ne l'estoit pas. En ceste façon les consolant par lettres, les aduertissoient de se tenir coys, en attendant l'issue telle qu'il plairoit à Dieu d'enuoyer.

Ce iour-là Monsieur frere du Roy, & le cheualier d'Angoulesme, se pourmenoyent dans vn coche par la ville de Paris, enuiron les quatre heures apres midy. Dès ceste heure-là il courut vn bruit par Paris, que le Roy auoit mandé le mareschal de Mont-morency, pour le faire venir à Paris, avec grand nombre de caualerie & d'infanterie: que partant les Parisiens auoyent occasion de se prendre garde: mais ce bruit-là estoit faux.

On vit

On vit entrer ce iour-là six crocheteurs chargez d'armes dans le Louure : de quoy Teligny auerti par le trompette de l'Amiral, respondit, Que c'estoyent des peurs qu'on se donnoit sans occasion : qu'il estoit trefasseuré de la bonne intention du Roy, qu'il cognoissoit fort bien son cœur & ses affections : qu'on ne deuoit pas se faire accroire des choses tant hors de propos. Le croy, que Teligny n'y pensoit aucun mal, d'autant que le iour deuant la blesseure de l'Amiral, on auoit ordonné certain combat & assaut, qu'on deuoit donner à vn chasteau, qui pour cest effect deuoit estre dressé, à quoy les courtisans estoient conuiez de se preparer.

Le Roy, pour assembler les seigneurs & gétils-hommes Huguenots en vn quartier, leur fit à tous marquer logis pres celuy de l'Admiral, pour luy estre plus pres & à poinct : quelques vns y allerent loger, les autres ne peurent si tost changer de logis.

Le comte de Montgomery, Briquemaut le pere, & quelques autres gentils-hommes, auoient mandé à Teligny, que s'il vouloit, ils iroyent volontiers veiller au logis de l'Amiral : mais Teligny les remerciant, leur manda qu'il n'estoit ia de besoin.

Cependant les autres veilloient : le Cheualier d'Angoulesme (qui ne se voulut point aller coucher) entretenant ses plus intimes amis, leur donnoit bon courage, les assœurât qu'il seroit ce iour-la Amiral de France : mais il fut trompé, d'autant que l'estat vaquât fut dōné au marquis de Villars.



La Royne-mere, peu apres la minuiet du samedi passée, fut veue entrer dans la chambre du Roy, n'ayât avec elle qu'une femme de chambre quelques seigneurs qui y furent mandez, y entre-rét peu de temps apres, mais ie ne sçay pourquoy ce fut. Bien est vray que deux heures apres on donna le signe du temple de saint Germain l'Auxerrois, à son de cloche : lequel ouy, soudain les soldats qui estoient en garde deuant le logis de l'Amiral, forçant la porte du logis, y entrerent facilement, leur ayant esté aussi tost ouuerte, que le nom du Roy ( duquel ils se van-toient ) y fut ouy. Le duc de Guyse y entra aussi tost apres a cheual, accompagné d'une grande troupe de ses partizans : il n'y eut que peu ou point de résistance, n'estans ceux de la famille, & suite, de l'Amiral, aucunement arméz.

L'Amiral oyant le bruit, & craignât qu'il y eust quelque sedition, commanda à vn sien valet de chambre ( qu'on nommoit Nicolas le Trucheman ) de monter sur le toict du logis, & appeller les soldats de la garde, que le Roy lui auoit baillez, ne pensant à rien moins que ce fussent ceux qui faisoient l'effort & violence : quant à lui, il se leua, & s'estant affublé de sa robe de nuit, se mit à prier Dieu, & à l'instât vn nommé le Besme Alleman, seruiteur domestique du duc de Guyse, qui avec les capitaines Caussens, Sarlaboux, & plusieurs autres, estoit entré dans sa chambre, le tua, toutefois Sarlaboux s'est vanté, que ce fut lui.

Les dernieres paroles de l'Amiral, parlant au Besme,

Besme, furent : Mon enfant , tu ne feras ia pourtant ma vie plus briefue.

On ne pardonna à pas vn de ceux de la maison de l'Amiral, qui se laisserent trouuer, que tous ne fussent tuez.

Le corps mort de l'Amiral fut ietté par Sarlaboux par les fenestres de sa chambre, en la cour de son logis, par le commandement du duc de Guyse, & du duc d'Aumale ( qui y estoit aussi accouru) & le voulurent voir mort deuant que partir de là.

Le iour de la blessure de l'Amiral, le Roy auoit baillé aduis à son beau frere le roy de Nauarre, de faire coucher dás sa chambre dix ou douze de ses plus fauoris, pour se garder des desseins du duc de Guyse, qu'il disoit estre vn mauuais garçon. Or ces gentils-hommes là, & quelques autres qui couchoyent en l'antichambre du Roy de Nauarre, furent menez hors desdictes chambres, apres la mort de l'Amiral, & desarmez de l'espee & dague qu'ils portoient, par les mains de Nancé, & des soldats de la garde du Roy, & menez iusques à la porte du Louure, là ( le Roy les regardant par vne fenestre) furēt tuez en sa presence: Entre ceux-là estoient le baron de Pardillan, le capitaine Pilles, saint Martin-Bourfes, & autres dont ie ne sçay le nom.

Alors on amena le roy de Nauarre, & le prince de Condé au Roy, lequel les voiant leur dit, qu'il n'entendoit supporter d'oresenauāt en son Royaume, plus d'vne religion: partant il vouloit qu'ils vesquissent à la façon de ses predecesseurs,

à ſçauoir qu'ils allaſſét à la meſſe, ſi leur vie & leurs biens leur eſtoient en quelque recommandation.

Le Roy de Nauarre ( ſas touteſois condeſcendre à la propoſition du Roy ) lui reſpondit fort humblement : & le prince de Condé, qui eſt d'une nature vn peu plus bruſque, ayant reſpondu auſſi vn peu plus aſprement, ne fut menacé par le Roy de moins, que de la perte de ſa teſte, ſ'il ne ſe rauifoit dans trois iours, que le Roy luy bailloit pour tous delais, l'appellant opiniaſtre, obſtiné, ſeditieux, & fils de ſeditieux.

Les autres Huguenots qui eſtoient dedans le Louure, auſquels à prix ou priere on auoit iuſqu'à lors ſauué la vie, promettoyent de faire tout ce que le Roy commanderoit : Entre autres, Grammont, Gamache, Duras, & certains autres, eurent d'autant plus facilement leur pardon, que le Roy ſçauoit fort bien, qu'ils n'auoyent iamais eu que peu ou point de religion. A l'inſtant on ſonna le toxin du Palais, à fin qu'on ſe ruaſt ſur les autres Huguenots (de toutes qualitez & ſexes) qui eſtoyent dás la ville: leur pretexte eſtoit, vn bruit qu'ils firent courre, qu'on auoit deſcouuert vne conſpiration faite contre le Roy, ſa mere, & ſes freres, par les Huguenots: leſquels auoient deſia tué plus de quinze ſoldats de la garde ( ce diſoient ceux qui eſtoient morts ) partant le Roy commandoit qu'on ne pardonnaſt à pas vn Huguenot.

Les Courtiſans, & les ſoldats de la garde du Roy, furent ceux qui firent l'exécution ſur la Nobleſſe, finiſſans avec eux (ce diſoient-ils) par fer & deſ-



& desordre les proces, que la plume, le papier, & l'ordre de iustice, n'auoient iusqu'alors sceu vider: De sorte, que les chetifs, accusez de conspiration & d'entreprise, tous nuds, mal-aduisez, demi dormans, desarmez, & entre les mains de leurs ennemis, par simplicité, sans loisir de respirer, furent tuez qui dans leurs lits, qui sur les toicts des maisons, & qui en autres lieux, selon qu'ils se laissoient trouuer.

Le comte de la Roche-foucaut, qui iusques apres onze heures de la nuict du samedi, auoit deuisé, ris & plaizanté avec le Roy, aiant à peine commencé son premier somme, fut resueillé par six masques, & armez, qui entrèrent dans sa chambre: entre lesquels cuidant le Roy estre, qui vint pour le fouetter à ieu: il prioit qu'ó le traitast doucement, quand apres lui auoir ouuert & saccagé ses coffres, vn de ces masques (valet de chambre du duc d'Aniou) le tua, par le commandement de son maistre.

Bien est vray que le capitaine la Barge, qui estoit l'vn des masquez, auoit eu commandement du Roy de l'aller tuer avec promesse d'auoir la compagnie de gendarmes du comte de la Roche-foucaut, n'y estant autrement voulu aller qu'à celle condition. Et quoy que le valet, comme on m'a dit, l'ait anticipé à tuer, si n'a-il pas pourtant moins eu la compagnie du comte meurtre.

Teligny fut veu de plusieurs courtisans, & quoy qu'ils eussent charge de le tuer, ils n'eurent

oncques la hardiesse de ce faire en le voyant, tant il estoit de douce nature, & aimé de qui le cognoissoit : à la fin vn qui ne le cognoissoit pas, le tua.

Le marquis de Renel fut chassé tout en chemise, iusques à la riuere de Seine, par des soldats & le peuple, & là fait monter sur vn petit bateau, fut tué par Bussy d'Amboyse son cousin.

Monsieur frere du Roy, pour gratifier à l'Archan capitaine de sa garde, amoureux de la Chastegneraye, enuoia tuer par les soldats de sa garde, le seigneur de la Force son beau-pere: & cuidant auoir tué deux des freres de la Chastegneraye, il ne s'en trouua qu'vn mort, l'autre estoit seulement blessé, & caché sous le corps mort de son pere qui lui estoit trebuché dessus, d'où sur le soir il se despestra se glisât iusques dedás le logis du seigneur de Biron son parent: Ce que sçachant la Chastegneraye sa sœur, marrie de ce que tout l'heritage ne lui pouuoit demeurer, vint trouuer le seigneur de Biron à l'Arcenal, où il estoit logé, feignant d'estre bien aise que son frere fust eschappé, & disant qu'elle desiroit le voir & le faire penser: Mais le seigneur de Biron qui s'aperceut de la fraude, ne le luy voulut descouurir, luy sauuant par ce moyen la vie.

Le president de la Place, homme fort docte, & rare, fut à coups de hallebarde mené iusques à la Seine, tué & ietté dans l'eau: autant en fut fait à Pierre Ramus, lecteur publique du Roy. A l'Auocat de Chappes aussi, & à l'Omenie secretaire du Roy, apres luy auoir fait faire ( sous promesse de  
lui

lui sauuer la vie) donaison du plus beau de son bien,& resignation de son estat de secretaire: plusieurs autres furent massacrez de mesmes, desquels ie ne scauroy' dire les noms.

Les commissaires, quarteniers, & dixeniers de Paris,alloient avec leurs gens de maison en maison, là où ils cuidoient trouuer des Huguenots, se faisant ouurir les portes par le Roy,& vengeât sur pources artisans, ieunes, vieux, femmes & enfans Huguenots,leur conspiration pretédue,sans auoir esgard à sexe, aage ou condition quelconques: Estans à ce faire animez & induits par les ducs d'Aumale, de Guyse, & de Neuers, qui alloiét par les rues disans, Tuez tout, le Roy le commande. Les charrettes chargees des corps morts de damoiselles, femmes, filles, hommes & enfans, estoient conduits a la riuere.

De bon-heür, le seigneur de Fontenay, frere de monsieur de Rohan, le Vidame de Chartres, le comte de Mont-gomery, le seigneur deCaumôt, l'un des Pardillans, Beauuois la Nocle, & plusieurs autres seigneurs & gentils-hommes Huguenots, estoient logez aux fauxbourgs saint Germain, vis à vis du Louure, la riuere entre deux: Et Dieu voulut que Marcel, preuost des marchas de Paris, aiant dès le samedi au soir eu commandement du Roy, de lui tenir mille hommes armez prests sur la minuiet du Dimanche, pour les bailler à Maugiron (auquel il auoit donné charge de depescher ceux des faux-bourgs, aiant aussi commandé au commissaire du quartier & au Contrerolleur du Mas, de le guider avec sa trou-



pe par les logis des Huguenots) n'eut pas ses gens prests, & que du Mas Commissaire s'endormit plus de l'heure assignee : & cependant vn certain homme (qu'on n'a pas veu ni cognu depuis) qui estoit passé dans vne nacelle de la ville aux fauxbourgs sainct Germain, aiant veu tout ce qui auoit esté fait toute la nuict sur les Huguenots en la ville, aduertit enuiron les cinq heures du Dimanche matin, le conte de Montgomery de ce qu'il en sçauoit. Le conte de Montgomery en bailla aduertissement au Vidame de Chartres, & aux autres seigneurs & gentils-hommes Huguenots logez aux fauxbourgs : plusieurs desquels ne se pouuans persuader que le Roy fust (ie ne dy pas auteur, mais seulement consentant de la tuerie) se resolurent de passer avec barques la riuere, & aller trouuer le Roy : aimant beaucoup mieux se fier en lui, qu'en fuiant, monstrier d'en auoir quelque deffiance : d'autres y en auoit, lesquels cuidans que la partie fust dressée contre la personne du Roy mesme, se vouloient aller rendre pres de sa personne, pour lui faire treshumble seruice, & mourir si besoin estoit à ses pieds, & ne tarda gueres qu'ils virent sur la riuere, & venir droict à eux (qui estoient encores és fauxbourgs) iusqu'à deux cens soldats armez de la garde du Roy, crians, Tue, tue : & leurs tirans harquebousades à la vene du Roy, qui estoit aux fenestres de sa chambre, & pouuoit estre alors enuiron sept heures du Dimanche matin. Encores m'a-on dict que le Roy prenant vne harquebouse de chasse entre ses mains, en reniant Dieu, dit :

Tirons,

Tirons, mort-Dieu, ils s'enfuyent. A ce spectacle ne scachás les Huguenots des fauxbourgs que croire, furent contrains qui à pied, qui à cheual, qui botté, & qui sans bottes & espérons, laissant tout ce qu'ils auoyent de plus précieux, s'enfuir pour sauuer leur vie, là où ils cuidoient auoir lieu de refuge plus asseuré. Ils ne furent pas partis que les soldats, les Suysses de la garde du Roy, & aucuns des courtisans, saccagerent leurs logis, tuans tous ceux qu'ils trouuerent de reste.

Encores vint-il bien à propos, que le duc de Guyse voulant sortir par la porte de Buffy, se trouua auoir esté pris vne clef pour l'autre, ce qui donna tant plus de loisir de monter à cheual aux paresseux. Et ne laisserent pourtant d'estre poursuivis par le duc de Guyse, le duc d'Aumale, le cheualier d'Angoulesme, & par plusieurs gentils-hommes tueurs, enuiron huit lieues loin de Paris, le duc de Guyse fut iusques à Montfort, où il s'arresta, & manda à saint Legier & autres gentils-hommes d'alentour, de son humeur & partisans siens, de faire en sorte, que lesdicts seigneurs & gentils-hommes qui se sauuoient de viffesse, n'eschappassent point: autant en enuoya-il dire à ceux de Houdá & de Dreux. En ceste chasse d'hómes, il y en eut quelques vns de blesez, & bié peu ou point de tuez.

Les ducs de Guyse & d'Aumale quelque semblant qu'ils fissent, s'y deporterét assez doucemét, & comme si leur cholere fust appaisée apres la mort de l'Amiral: ils sauuerent à beaucoup la vie, mesmes en leur maison de Guyse, où le seigneur

d'Acier, & quelques autres Huguenots se retirèrent à sauueté : tellement qu'à leur retour de la poursuite, & quelques iours apres, le Roy leur en fit mauuais vilage, croyant que ceux qui estoient reschappez, n'estoient sauuez, que par leur faute.

Tout ce iour de Dimâche 24. d'Aoust, fut employé à tuer, violer, & saccager: de sorte, qu'on croit que le nombre des tuez ce iour-lâ dans Paris & ses faux-bourgs, surpassa dix mille personnes, tant seigneurs, gentils-hommes, presidens, conseillers, aduocats, escoliers, medecins, procureurs, marchands, artisans, femmes, filles, qu'enfans, & prescheurs. Les rues estoient couuertes de corps morts, la riuere teinte en sang, les portes & entrees du palais du Roy peintes de mesme couleur: mais les tueurs n'estoient pas encore saoulez.

Le Roy, la Royne sa mere, & messieurs ses freres, & les dames sortirent sur le soir, pour voir les morts l'un apres l'autre : Entre autres, la Royne mere voulut voir le seigneur de Soubize, pour scauoir à quoi il tenoit, qu'il fust impuissant d'habiter avec sa femme.

Vers les cinq heures apres midy de ce Dimanche, il fut fait vn ban avec les trompettes de par le Roy, Que chacun eust à se retirer dans les maisons, & que ceux qui y estoient, n'eussent à en sortir hors : ains fust seulement loisible aux soldats de la garde, & aux cômmissaires de Paris avec leurs troupes, d'aller par la ville armez, Sur peine de grief chastiment à qui feroit au contraire.

Plusieurs ayans ouy ce ban, pensoient que l'affaire



faire se mitiguerait : mais le lendemain & iours suyans, ce fut à recommencer.

Ce iour mesme de Dimanche, le Roy escriuit des lettres à ses ambassadeurs pres les princes estrangers, & aux gouuerneurs des prouinces, & villes capitales du Royaume, les auertissant que l'homicide de l'Amiral son trescher & bien aimé cousin, & des autres Huguenots, n'auoit pas esté fait de son consentement, ains du tout contre sa volonté: Que la maison de Guyse, ayant descouuert que les amis & parens de l'Amiral, vouloyent de sa blesseure faire quelque haute vengeance: pour les anticiper, auoyent assemblé des gentils-hommes & des Parisiens leurs partisans, en tel nombre, qu'ayans premierement forcé la garde que le Roy auoit donnée à l'Amiral, & estans entrez en son logis le samedi de nuict, ils l'auoyent tué, luy & ses amis qu'ils auoyent peu rencontrer, au tresgrand regret du Roy, de la Royne sa mere, & de ses freres, estant contraint de l'endurer, & pour la crainte qu'il auoit de sa propre personne, se contenir dedans le Louure, où il auoit avec luy son trescher frere le Roy de Nauarre, & son bien-aimé cousin le prince de Condé, qui iouiroient de pareille fortune que luy: Ce qu'il vouloit bien que tout le monde sceust, & entendist le desplaisir qu'il auoit eu, de voir qu'ayant tant de fois tenté la sincere reconciliation du duc de Guyse, & de l'Amiral, c'estoit neantmoins pour neant.

Avec ces lettres, le Roy enuoya ensemble des patentes, par lesquelles il estoit deffendu de porter armes illicites, de faire assemblees illicites, ou

chose aucune en fraude , & alencontre des Edicts de paix , sous le benefice desquels il commandoit à tous ses suiets de se comporter & viure paisiblement l'un avec l'autre. Ces lettres estoient signees par Pinart secretaire d'estat, le 24.d'Aoust.

La Roynes-mere escriuit aussi des lettres auxdits gouuerneurs & ambassadeurs, de mesme substance que les lettres du Roy. N'en l'une n'en l'autre de ces lettres, il n'estoit faite aucune mention de la cōspiration de l'Amiral, ne de ses consorts. Mais cōbien que ces lettres fussent enuoyees par les prouinces de la France , dans Paris on n'oyoit parler de chose qui en approchast, ne qui tendist à appaiser la furie des seditieux.

Le lundy 25.d'Aoust, les Parisiens ayans assis des gardes aux portes de leur ville , par commandement du Roy , qui en voulut auoir les clefs , afin (ce disoit il) que nul Huguenot eschappast par cōpere ou par commere , apres auoir moissonné le champ à grand tas & à pleine main , ils alloient cueillant çà & là les espics restans du iour precedent: menaçant de mort quiconque receleroit aucun Huguenot , quelque parent ou ami qu'il luy fust: de sorte, que tāt qu'ils en trouuerēt de reste, furent tuez, & leurs meubles baillez en proye, cōme aussi les meubles des absens.

Le Roy donna aux Suysses de sa garde, pour le bon deuoir qu'ils auoyent monstré en cest affaire le sac & pillage de la maison d'un tres-riche lapidaire, nommé Thierry Baduere : i'ay ouy dire, que ce qu'on luy a pillé, valoit plus de deux cens mille escus.

Le pillage des seigneurs, gentilshommes, marchands, & autres Huguenots tuez, estoit fait par autorité priuee, ou donné & departi par le Roy à ses courtisans, & autres siens bons seruiteurs: desquels les aucuns trouuâs quelque chose de singulier parmi la despouille des morts, le venoyent offrir & presenter au Roy, à sa mere, ou à quelque autre des Princes à qui ils estoient plus affectionnez.

En ces entrefaites le Roy assembla son conseil, auquel furent monstrees par Monsieur frere du Roy, certaines lettres du Marechal de Montmorency, à Teligny, du Vendredi 22. d'Aoust apres la blessure de l'Amiral, en response de celles que Teligny luy en auoit escrit: & furent lesdictes lettres trouuees dâs les coffres & entre les papiers de Teligny mort: Par icelles, le mareschal de Montmorency monstroït ouuertement le desplaisir qu'il auoit receu, entendant la blessure de l'Amiral son cousin: Qu'il ne vouloit pas en pourfuyure moins la vengeance, que si l'outrage eust esté fait à sa propre personne, n'estant pas pour laisser en arriere, chose qui peult seruir à cest effect, scachant combien vn tel acte estoit desplaisant au Roy.

Or auoit-il esté conclu au secret conseil d'entre le Roy, la Royne-mere, Monsieur frere du Roy, le duc d'Aumale, le duc de Neuers, le comte de Rets, Lansac, Tauanes, Moruilliers, Limoges. & Villeroy ( tenu quelques iours auant la tuerie) qu'aussi tost que l'Amiral & les Huguenots seroyét despeschez dans Paris, le duc de Guyse, & ceux



de sa maison vuideroyent & se retireroient hors de Paris en quelqu'une de leurs maisons: afin qu'il semblaît mieux à toute la France, & aux regions voisines, que c'estoyët ceux de Guyse qui auoyent fait le tout, sans le sceu du Roy: pour venger sur l'Amiral & autres Huguenots la mort du vieux duc de Guyse, qu'un Huguenot auoit tué aux premiers troubles de la France. Voila pourquoy en ses lettres du Dimanche, il auoit le tout ietté sur ceux de Guyse. mais ceux de Guyse voyäs l'atrocité du faict auenu, & considerans qu'ils attiroyët sur eux & leur posterité l'ire de tous hommes, à qui l'humaine societé est chere: & par consequent se mettoyent en butte, à laquelle chacun viseroit, comme sur les seuls auteurs & coupables: preuoyans, di-ie, le mal qui leur en pouroit auenir, estans retournez dans Paris, n'en voulurent sortir, n'abandonner la cour, demandans au contraire instamment, que le Roy aduouast le tout.

Le Roy avec le mesme conseil que dessus, tant à l'occasion des lettres du mareschal de Montmorency (qui prenoit pretexte sur la volonté du Roy de se vouloir venger) que par ce que ceux de Guyse ne vouloyent sortir hors de Paris, ny se charger de la faute, fut contraint le tout aduouër: Car disoyent ceux de son cōseil, si le mareschal de Montmorency, seulement pour la blesseure de l'Amiral son cousin, c'est si fort piqué, & menace tant: que fera-il quand il entendra la mort & de tant de gés qu'il aimoit? & si la maison de Guyse ne s'en charge, comment couurira-on le faict?

Partant, le Roy par l'auis de sondict conseil,  
rescriuit

rescriuit des lettres à les ambassadeurs, & aux gouuerneurs des prouinces, & villes principales de la Frâce: par lesquelles il les auertissoit, q̃ ce qui estoit auenu à Paris, ne concernoit aucunement la religion, ains auoit esté seulement fait pour empescher l'executiõ d'vne maudite cõspiration, que l'Amiral & ses alliez auoyent faite, contre luy, sa mere & ses freres: partant vouloit que les Edicts de pacification fussent obseruez: Que s'il auenoit que quelques Huguenots, esmeus des nouuelles de Paris, s'assemblassent en armes en quelque lieu que ce fust, il commandoit à sesdicts gouuerneurs de tenir la main qu'ils fussent dissipéz, & rompus, Et afin que par les studieux de nouueauté, quelque sinistre cas n'auint, il entendoit que les portes des villes de son Royaume fussent bien & diligemment gardees, remettant sur la creance des porteurs, le surplus de sa volonté.

Ces lettres ne furent pas si tost receues à Meaux, Orléans, Tours, Angiers, Bourges, Thoulouze, & en plusieurs autres citez, que les Huguenots par le commandement des gouuerneurs, y furēt tuez. Quelques gouuerneurs moins cruels, cõme Mandelot à Lion, & Carrouges à Rouen, se contenterent pour le commencement de faire emprisonner les Huguenots de leurs villes: mais peu de iours apres, aussi bien furent-ils tuez.

Le mesme iour du lundy au matin, le Roy enuoya quelques capitaines & soldats de sa garde à Chastillon sur Loin, pour luy amener les enfans de l'Amiral, & de son feu frere d'Andelot, de gré, ou par force: mais on trouua les aisnez partis, &

desia sauuez à la fuite.

Le duc d'Anjou enuoya pareillement des soldats de sa garde à la campagne, és enuiron de Paris, visiter les Huguenots dans leurs maisons aux champs, & les y tuer: Et afin que nul n'y fust espargné, il enuoioit à poinct nommé en diuers quartiers, ceux de ses soldats qui n'y cognoissoient personne, tellement qu'aussi ils n'en espargnerent pas vn, exceptés quelques vns qui furent prins à rançon par ceux qui estoient plus frians de l'argent. Et si ne laissoient pas pourtant de tuer les prisonniers apres leur rançon payee.

Ces iours de dimanche & de lundy, le temps fut beau & serein à Paris, & és enuiron: tellement que le Roy s'estant mis aux fenestres du Louure, contemplant le temps, dit, Qu'il sembloit que le tēps se resiouist de la tuerie des Huguenots.

Enuiron le midi du lundy (hors de toute saison) on vit vn aubespın fleuri au cemetiere saint Innocent: Si tost que le bruit en fut espandu par la ville, le peuple y accourut de toutes parts, criant, Miracle, miracle, & les cloches en carrillonnerent de ioye. On fut contraint pour empescher la foule du peuple, & afin que le miracle (qui estoit comme il a esté sceu, fait par l'artifice d'un bon vieux homme de cordelier) ne fust descouuert, & auilé: on fut, di-ie, contraint d'asseoir des gardes à l'entour de l'aubespın, pour empescher le peuple de s'y approcher de trop pres. Il n'y eut pas faute de gens qui interpretoient ce miracle, ne vouloir de noter autre chose, sinon que la France recoueroit sa belle fleur & splendeur perdue. Le peuple  
s'en



s'en retournant de la veuë de l'aubespain content & satisfait, pensant que Dieu par vn tel signe approuuast toutes leurs actions; s'en alla droict au logis du defunct Amiral : où ayant trouué son corps mort, le prindrent, & l'ayans trainé par les rues iusques au bord de la riuere, luy couperent le membre, & puis la teste, qu'un soliat de la garde ( par commandement comme il disoit ) porta au Roy: le tronç avec dagues & couteaux laceré, & deschiqueté en toutes sortes par la populace, fut à la fin trainé au gibet de Montfaucon, & là pendu par les pieds.

Le mardi 26. d'Aoust, le Roy accompagné de ses freres, & des plus grands de sa cour, s'en alla au Palais de Paris ( qu'on appelloit iadis la cour des Pairs de France, & le liët de iustice du Roi ) Là seant en plein senat, toutes les chambres assemblees, il declara tout haut, que ce qui estoit auenu dans Paris, auoit esté fait non seulement par son consentement, ains par son commandement, & de sô propre mouuemēt. Partant entendoit il, que toute la louange & la honte en fussent reiettees sur lui.

Alors le premier President, au nom de tout le Senat, en louant l'acte, comme digne d'un si grand Roy, luy respondit, que c'estoit bien fait, & qu'il l'auoit iustement peu faire.

Que qui ne scait bien dissimuler, ne scait regner.

*Le pol.* C'estoit bien loin de faire comme la Vacquerie, iadis President en mesme lieu & charge, lequel, comme Pasquier le recite en son liure des

recerches, Estant pressé par le roy Loys II. d'emologuer vn Edict qui n'estoit point de iustice, & pour ce qu'il ne le vouloit faire estant menacé par ce Roy là de la mort, & tout le parlement aussi, s'habilla & avec luy tous les Senateurs de Paris de robes rouges, & en cest equippage s'en alla trouuer le Roy qui estoit courroucé outre mesure. Le Roy esmerueillé de les voir en vn tel habit hors de saison, les enquit de ce qu'ils cerchoyent: Surquoy la Vaquerie respondant pour tous, Nous cerchons la mort (dit-il) Sire, de laquelle vous nous auez menacez si nous ne confirmions vostre Edict. Estans tous appareillez de la souffrir plustost que de faire chose contre nostre deuoir & conscience.

*L'hist.* Cestuy-cy n'auoit garde de faire le semblable, il prend trop de plaisir à toute sorte d'injustice pour s'y vouloir opposer. Mais pour retourner à mon histoire, Ainsi que le Roy alloit au palais, vn gentil-homme fut reconnu en la troupe pour Huguenot, & aussi tost tué, assez pres du Roy (qui en se reuirant pour le bruit, ayant entendu que c'estoit) Passons outre, dit-il, pleust à Dieu que ce fust le dernier!

Ce iour de mardi, & autres iours suyans, il y eut peu de Huguenots tuez dans Paris, car aussi y en auoit-il peu de demeurez de reste.

Quelques Catholiques prindrent la hardiesse de sauuer la vie à aucuns de leurs anciens amis & parens. Entre autres, Feruaques la voulut sauuer au capitaine Monins, pour lequel il alla prier le Roy, & pour tous ses seruices passez, de luy donner

ner la vie qu'il luy auoit sauuee iusques à l'heure: mais ce fut en vain, car le Roy luy commanda de tuer Monins, si luy-mesme ne vouloit mourir de la main de Charles. Feruaques eut horreur du faict (quoy qu'il fust fort aspre ennemy des Huguenots & qu'il en eust tué & saccagé plusieurs de sa main les iours precedés) pour l'amitié particuliere qu'il portoit à Monins: toutefois il fut contraint de descendre où il estoit caché, auquel aussi tost fut enuoyé vn tueur qui le depescha.

Le semblable est auenu à quelques autres Huguenots, lors qu'ils cuidoyent estre eschappez.

Le Ieudi 28. iour d'Aoust, fut celebré dans Paris vn Iubilé extraordinaire, avec la procession generale, à laquelle le Roy assista. ayant premierement sollicité (mais en vain) le roy de Nauarre par douces paroles, & le prince de Condé par menaces de s'y trouuer.

Le mesme iour furent publiees des lettres patentes du Roy, par lesquelles ouuertement il declaroit, qu'il ne vouloit plus vser de paroles couuertes, ny de dissimulations: Que la tuerie des Huguenots auoit esté faite par son commandement: à cause d'une maudite conspiration faite par l'Amiral contre luy, sa mere, ses freres, & autres princes & grans seigneurs de la cour, n'entendât pourtant que les Edicts de pacification fussent moins que bien obseruez: avec tel si toutesfois, que les Huguenots ne feroient faire aucuns presches, ny assemblees, iusques à ce qu'autrement y fust pourueu.

Au premier exemplaire desdictes lettres, le roy



de Nauarre n'y estoit pas compris: mais scachant bien qu'on tireroit de luy tout le tesmoignage qu'on voudroit, il sembla bõ au conseil de l'y nommer.

Ces lettres patentes furent enuoyees par courriers expres à tous les gouuerneurs de la France, avec d'autres lettres particulieres du Roy de mesme substance: Excepté qu'il y estoit adiousté vn commandement, Qu'incontinent les lettres receuës, les gouuerneurs fissent tailler en pieces tous les Huguenots que l'on trouueroit hors de leurs maisons. Aucuns Huguenots ( que la peur auoit fait sortir hors de leurs maisons) entendans ce mandement, se retournoyent mettre dedans: les autres qui ne s'y osoyent fier, & se trouuoient dehors, soudain estoient tuez, autres prins à rançon. Mais à la fin, ceux qui obeissans au mandement s'estoyent retirez en leurs maisons. ne furent pas de meilleure condition que les autres. Et toutefois les gouuerneurs ayans receu lesdictes lettres, donnoyent à entendre, qu'ils ne recerchoyent d'entre les Huguenots, que les coupables de ceste dernière conspiration de l'Admiral: que quant au passé, ils n'y vouloyent pas seulement toucher, n'y s'en souuenir.

Mais pource que peu de iours apres fut adiousté ausdictes lettres, que les prisonniers fussent deliurez, & que nul ne fust fait d'oresenauant prisonnier, excepté ceux qui és guerres ciuiles de la France, auoyent eu quelque charge pour les Huguenots, manié affaires, ou autrement en auoyent eu intelligence: desquels si aucun estoit pris, on l'eust  
à re-

à remettre entre les mains du gouuerneur de la ville, ou du pais, qui entendroit du Roice qu'il lui plairoit d'en ordonner. Et toutefois on voioit que les prisonniers n'estoient point deliurez, ains tous les iours en emprisonnoit-on de nouueaux. Plusieurs d'entre lesdicts Huguenots moins credules que les autres, ont pensé faire plus sagement de sortir vistement hors de France que d'y demeurer plus longuement: mais ils n'ont pas si tost esté hors du Royaume (combien qu'ils se soient retirez és terres confederées au Roi) que ses officiers en beaucoup d'endroits, leur ont saisi & annoté leurs biens, les ont confisquez, vendus les meubles d'aucuns, & d'aucuns autres saccagez & pilez.

Or pour retourner aux choses de Paris, le Roy le 5. iour du mois de Decembre, aiant fait venir à soy Pezou Bouchier (l'un des conducteurs des Parisiens) lui demanda, s'il y auoit encores dans la ville quelques Huguenots de reste: A quoi Pezou respondit, qu'il en auoit ietté le iour auparauât six vintgs dás l'eau, & qu'il en auoit encores entre ses mains autant pour la nuit venant: Dequoy le Roy grandement resiouy, s'en print à rire si fort, que ne le scauriez croire.

Le 9. iour de Septembre, le Roy esmeu de peur, & de cholere tout ensemble, iurant & blasphemant qu'il vouloit tuer de sa main propre tout le residu des Huguenots, commanda qu'on luy apportast ses armes, se fit armer, & fit venir à soy les capitaines de ses gardes, disant que par la mort-Dieu, il vouloit commencer à la teste du prince

de Condé. Adonc la Royne regnante s'agenouillant deuant luy, le supplia qu'il ne fist point vne chose de si grande consequence, sans l'auis de son conseil. Le Roy aucunement vaincu des prieres de sa femme souppa & dormit avec elle: Le matin venu (ce feu luy estant vn peu passé) il fit venir le prince de Condé, auquel il proposa trois choses, la messe, la mort, ou prison perpetuelle: & qu'il aduifast laquelle des trois luy agreeroit le plus. Le prince de Condé respondât luy dit, Que moyénât la grace de Dieu il ne choisiroit iamais la premiere: les deux dernieres, il les laissoit (apres Dieu) à l'arbitrage & disposition du Roy.

Vray est qu'ayant entendu qu'on luy preparoit vne chambre à la Bastille (où lon a accoustumé d'emprisonner les Princes) i'ay ouy dire, que ce ieune prince de Condé a changé du depuis d'avis.

Peu de iours apres, on à imprimé avec priuilege du Roy, certains liures mordās & pleins d'inuires, contre l'Amiral: esquels nommément est disputé & maintenu, qu'il a esté loisible au Roy de traiter ainsi ses suiets, pour la religion violee, ne plus ne moins que furent chastiez les sacrificateurs de Baal. Mais de la coniuration de l'Admiral, point de nouuelles, ces liures n'en disent rien de particulier: & les conseillers & courtisans à qui i'en ay parlé auant mon depart (entre autres messieurs de Foix, & de Mal-afsise) s'en moquent: disans par leur foy, que ç'a esté vne galante couerture, recognoissant le faict si barbare & diaboliquement cruel, qu'on ne luy peut dōner autre titre.



tre (toutefois il est mal caché, à qui le cul paroist.) Mais quoy qu'il en soit, ils disent, que le Roy veut qu'on croye, qu'il y a eu de la coniuration. Et tout ce qu'il y a de bon c'est, qu'ils ont nommé le roy de Nauarre, entre ceux que les Huguenots vouloyent tuer.

*Le pol.* C'a esté vne sottie inuention que celle-la, pour faire croire la conspiration : & encore me semble plus estrange, puis qu'il se vouloyent seruir de ce pretexte, pourquoy le Roy a mandé à tous ses officiers, que quoy qu'il en puisse aduenir, il ne veut qu'il y ait autre religion que la siene en son Royaume : & cependant il veut faire croire aux Princes estrangers, qu'il veut entretenir l'Edict de pacification.

*Ali.* Je ne trouue cela estrange : car le diable, ny ses enfans, ne se scauroyent aider que de leurs outils : à scauoir, du mensonge, ce qui est vne grande consolation pour les esleus, scachant que la verité surmonte.

*Phi.* Tu vois cependant Alithie, quel blasme on nous met à sus, & la façon dont on nous traicte, & le tout pour l'amour de toy.

*Ali.* Ce n'est pas chose nouuelle, de voir mes amis hays, blasmez, calomniez, batus, & le plus souuent tuez. Vne infinité d'histoires tant prophanes qu'ecclesiastiques & sainctes, nous font tresentiere foy, que ce n'est que leur ordinaire. La verité (ce dit l'autre) engendre haine : La croix est comme collee à l'Euangile. Vous pleurerez, dit Iesus Christ en vn mot, & le monde rira.

*Lhist.* Pour conclusion, par toute la France où le

Roya pouuoir, qui ne veut aller à la messe, faut qu'il meure, ou qu'il fuye secretement hors du Royaume: Et croit on que depuis le 24. d'Aoust iusques à maintenant, il y a eu plus de cent mille personnes Huguenotes tuees par toute la France, sous pretexte de leur conspiration:Encores ne sont ils pas saoulez, leur cholere n'est point assouuie.

*L'egl.* O Dieu tout puissant, ô pasteur d'Israel,iusques à quand fumeras-tu contre l'oraison de ton peuple ? Tu l'as repeu de pain de larmes, & l'as abreuué de pleurs. Tu nous as mis en querelles contre nos plus proches, & en moqueries parmi les nations. Tu as transporté ta vigne d'Egypte, tu l'as plantee,& luy as préparé le lieu, afin qu'elle y prinst racines & s'estendist, en remplissant la terre: Pourquoi donc as-tu rompu sa haye,la bailant en proye aux passans? pourquoi a elle esté consumée par le sanglier, & deuoree par les bestes sauuages? Les gens sont entrez en ton heritage, ils ont baillé les corps de tes seruiteurs en viande aux corbeaux,& la chair des biens viuans aux bestes de la terre. Ils ont espars le sang des tiens, & n'y auoit aucun qui les enseuelist. Iusques à quand Seigneur,te courrouceras-tu? ton ire sera-elle pour iamais embrasée? Respan Seigneur tes indignations, sur les gens qui ne te cognoissent point, & sur les royaumes qui n'inuoquent point ton Nom: car ils ont presque esteinte toute la posterité de Iacob,& ruiné sa demeure. Que la vengeance du sang de ceux qui te reclamoyent espandu contre tout droict, soit connue par toute la terre

terre. Vueilles, grand Dieu, auoir esgard aux cris & gemitsemens de tant de pources vefues, & de pources enfans orphelins. Souuienne-toy des plainctes des prisonniers. Referue en vie selon la grandeur de ta force tes enfans destineez à la mort. Et rends à nos voisins sept fois au double, l'outrage duquel ils t'ont diffamé, Seigneur.

*Phil.* Amen.

*L'h<sup>st</sup>.* Encore n'est-ce pas tout: Car comme ie disois tantost (lors que tu m'as interrompu) quelque grande tuerie qu'il y ait eu en France, la cholere du Roy ne passera iamais, pendât qu'il y aura vn Huguenot en vie. Encore iure-il par le ventre Dieu, qu'ils ont beau faire, que la Messe ne les sauueraia.

*Ali.* Iamais en sa vie il n'a dit parole plus veritable: Mais comment l'entend il, ie te prie?

*L'h<sup>st</sup>.* Il n'a garde de l'entendre comme les Huguenots l'entendent, qui mainiennent que le Pape, nostre bonne intention, nos bonnes œuures, les merites des Saints, le bois de la sainte croix, les grans pelerinages, l'eau beniste, la sainte & digne messe, & tout cela ensemble, & chacun d'eux seul & pour le tout, ne nous peut sauuer: ains seulement Dieu par sa pure grace, & par la misericorde qu'il fait à ceux qui esperent en luy, despouillez de toute arrogance & fierté, humiliez & abbatus par le sentiment de leurs fautes, & appuyez sur le seul merite de la mort & passion de nostre Seigneur Iesus Christ. Il n'a di-ie, garde de parler de ce salut-là. il n'y pense pas.

*Ali.* Ie le croy. Il appert euidentement par ses



œuvres, qu'il n'en a ny soin ny cure: Et toutefois si y faut il penser, Historiographe mon amy, & y entendre continuellement: ce doit estre nostre principal but. Mais s'il plaist à Dieu, nous en parlerons à loisir, deuant que nous nous laissions l'un l'autre. Tu entendras possible, ce que tu n'asiamais appris, quoy qu'il semble que tu en ayes ouy parler quelque fois: Pour maintenant il est question de poursuyure ton histoire, & de nous dire (si tu le scais) comme c'est que le Roy entend ce que tu as dit.

*L'hist.* Je te le diray tout à ceste heure, & t'escouteray quand tu voudras: aussi bien ne scay ie dire (quand il est question de salut) où c'est que i'en suis. L'ignorance de nos curez, & la nostre, nous a logez touchant cela, chez Guillot le songeur (comme on dit.)

*Le pol.* Je feray s'il te plaist de la partie, Alithie, aussi bien ne voy-je point de religion, ne de voye de salut, ains plustost tout atheïsme, & chemin de perdition parmi nous. On a beau se dire cresp-chrestien, il est tout clair qu'on ment fausement.

*Ali.* Je suis bien aise de vous voir en chemin de vouloir apprendre, nous en parlerons plus à plein Dieu aidant: Pour ceste heure oyons l'Historiographe sur son interpretation, & le reste de son discours.

*L'hi.* Comme ie vous ay dit, il y a des Huguenots en grand nombre, qui sont eschappez de la tuerie, tous lesquels peuuent estre repartis en deux especes: l'une sera de ceux qui s'en sont fuyz hors

la France, l'autre de ceux qui y sont demeurez. Ceux qui sont sortis, se sont retirez en Suyssë, en Allemagne, en Angleterre, & és Isles qui luy sont suiettes. A ceux-cy le Roy ne touche que par lettres, messagers, & autres menees: taschant (comme bon pere de famille qui a soin de ses enfans) de les faire reuenir en lieu où il les puisse trouuer quand il voudra: pour la pitié qu'il a des disettes & necessitez qu'ils endurent estans hors de leurs maisons, esquelles il desire (ce disent ces lettres) qu'ils reuiennent, pour pouuoir iouyr de leurs biens en se conformant à sa volonté, & faisant ce qu'il commandera. Ceux qui sont demeurez en France, outre les morts, sont de diuerses conditions. Les vns se sont retirez dans des villes fortes, comme vous diriez dans Montauban, Sancerre, Nyfmes, la Rochelle, & dans certaines autres villes. Contre ceux-ci le Roy a enuoyé ses freres pour les exterminer s'il le peut faire: pource qu'ils n'ont pas voulu laisser entrer dans les villes où ils sont, ceux qui y alloient pour les tuer de par le Roy, & qu'ils leur ont fermé les portes.

*Ali.* O poures gens! leur condition sera-elle doncques pire que des bestes, à qui nature apprend de se conseruer, les armant en diuerses sortes pour leur deffence? seront-ils pirement traictez que l'esclau, à quoi outre le droict de nature, celuy des gens, voire la loy ciuile, permet de fermer l'huis au nez de son maître, s'il cognoist qu'il le vueille tuer?

*L'hyst.* Je ne scay qu'en dire: mais sur toutes les villes, il en veut à celle de la Rochelle.

*Le pol.* Elle l'a eschappé belle ceste pource Rochelle: Car si tu ne le sçais, iet'ose dire pour certain, que l'armee de mer de Strossy, & du Baron de la garde, qui estoit en Brouage pres de la Rochelle il y auoit plus de quatre mois, pour attendre (ce disoyēt-ils en secret) la flotte d'Espagne, & la cō-batre (comme aussi l'Amiral le pensoit) & de là, singler à Flessinghe, ne tachoit qu'à surprendre la Rochelle à poinct nōmé & plus de deux mois auant la tuerie de Paris; la Roynemere auoit enuoyé à Strossy vne lettre escrite de sa main propre, biē cachetee, lui deffédāt par vne autre lettre qu'il receut la premiere, de ne point ouuir ceste-la, iusques au 24. iour d'Aoust: Or les mots de la lettre que Strossy ouurit le 24. d'Aoust, estoient.

STROSSY, ie vous auertis, que ce iourdhu y 24. d'Aoust, l'Amiral, & tous les Huguenots qui estoient icy avec luy, ont esté tuez Partāt auisez diligemment à vous rendre maistre de la Rochelle & faites aux Huguenots qui vous tomberont entre les mains, le mesme que nous auons fait à ceux cy. Gardez vous bien d'y faire faüte, d'autant que craignez de desplaire au Roy, Monsieur mon fils, & à moy. Et au dessous, CATHÉRINE.

le te laisse à penser, si Dieu les a bien gardez. *L'hist.* I'auoy, bien tousiours creu, que l'armee de Strossy n'estoit pas pres de la Rochelle pour neant: & que les soldats qui estoient à l'entour par mer & par terre, mangeans, forçans, & pillans le bon homme, ne taschoyent qu'à se rendre plus  
forts



forts dans la Rochelle, pour la surprédre, & y mener les mains basses, & scauoy' bien qu'ils y auoyét failli deux ou trois fois: voire mesmes i'ay bié sceu, que le iour du massacre fait à Paris, il estoit entré dans la Rochelle, plus de deux cens soldats de Strossy, avec armes, faisans semblant de faire racoustrer leurs arquebouses, ou d'acheter quelques viures, & munitions: lesquels pour quelque frayeur qui les surprit, craignans que ceux de la Rochelle (ialoux des priuileges & libertez de leur ville qui les exemptent de garnisō) ne se doutassent des desseins de Strossy, s'enfuyrent en tapinois tout bellement hors de la ville. Mais ie n'auoy' encores rié sceu de ceste lettre, ie n'ay garde d'oublier à la mettre en mes memoires. Voila de merueilleux traicts. On a raison de dire qu'il y a eu coniuration: Mais ç'a esté contre les Huguenots. Pources misérables! il faut bien dire que la deliurance de ceux qui sont demeurez de reste, est miraculeuse, ayans esté si subtilement trahis! Mais pour retourner à eux: outre ceux qui se sont retirez és villes & lieux de seureté, il y en a d'autres qui ne s'y sont pas retirez, ou pource qu'ils n'ont peu, ou pource qu'ils n'ont voulu, ou osé s'y retirer.

De ceux-cy, les vns (mais en petit nombre) se tiennét coys & couuerts en leurs maisōs, & sans aller ny à messe ny à matines, priét Dieu vn chacun chez soy: bien secretement toutefois, de peur d'estre surpris, attendans qu'on les accommode (c'est le mot dont vsent les tueur.)

Les autres, s'en vont à la Messe de gayeté de

cœur, & comme à l'enui l'un de l'autre, blasphemement, despitent, & renient mille fois le iour, pour monstrier qu'ils n'en sont plus, faisans en tout le surplus, des vilenies, & des maux, plus que ie ne t'en scauroy reciter: vne grande partie de ceux-cy porte les armes contre les autres Huguenots, mais le Roy ne s'y fie pas beaucoup. Et les autres vont aussi à la Messe, mais contre leur gré, & par force, comme il est aisé à iuger à leur mine & contenance, tant ils sont abbatus & contristez, & si n'osent bonnement parler l'un à l'autre, ny se laisser rencontrer par les rues, ou en leurs maisons deux à la fois. I'estime que c'est de ceux-cy desquels le Roy parle; quand il dit, Que par la mort-Dieu, la messe ne les sauera pas, & possible entend-il aussi parler des autres qui monstrent d'y aller de plain gré, & par despit:

*Alith.* Je ne doute pas qu'il ne parle de tous les deux. Quel pitieux & miserable estat, ne se contenter point de tuer le corps, si on ne perd l'ame quād & quand: & ne se contenter point de tuer l'ame, si le corps n'est aussi meurtry!

O Seigneur, iusques à quand?

*L'egl.* Benit sois-tu, Seigneur Dieu de nos Peres, ton nom est louable, & digne d'estre glorifié à iamais. Tu es iuste en toutes les choses que tu as faites: tes voyes sont droites: tous tes iugemens par lesquels nous sont aduenues toutes ces choses, sont droituriers. Nous auons contreuenü à tes loix, nous n'auons point escouté ny gardé tes commandemens. Nous nous sommes par trop desbordez en delices, & auons cherché en la cour  
des

des grans (d'où par Edi&ct solennel ta verité auoit esté bannie) les honneurs & les alliances.

Tu as vſé d'un vray iugemēt, en toutes les choses que tu as fait venir sur nous, nous liurant aux mains de nos ennemis, qui sont sans loy, & tres-meschās traistres, & à un Roy iniuste, & tres-mauuais, par dessus ceux de toute la terre. Nous sommes liurez à mort pour l'amour de toy tous les iours, & sommes estimez cōme brebis de la boucherie: Nous te prions que tu ne nous liures pas ainsi à tousiours. A cause de ton Nom, ne disipe point ton alliāce. ne nous cōfonds point du tout, mais fay-nous selon ta douceur, & selon la grandeur de ta misericorde, afin que la semence des tiens que tu as reseruez, croisse, vegete, & multiplie, en nombre, zele & vertu. Seigneur, tu t'es serui autrefois de l'instrument de persecution, pour l'accroissement & augmētation de ton troupeau, qui venoit seulement de naistre & s'assembler en Ierusalēm, lors que tu l'espardis par la Iudee & Samarie: fay, Seigneur, que le reste des tiens que tu as espars maintenant en regions lointaines & peregrines par ceste horrible dissipation, continue tousiours en ton seruice, servant d'exemple & edification aux nations qui les ont recueillis, & portans doucement l'exil: recognoissent que toute la terre t'appartient, qu'elle toute n'est qu'une seule cité, de laquelle l'hōme est bourgeois passager, en quelque climat qu'il habite: ou plustost Seigneur, donne leur de cognoistre, que nous n'auons point ici de cité permanente, afin que cerchans la cité à venir, ils perseuerent en l'esperāce de la vie bien



heureuse, que tu nous as acquise par le precieux sang de Iesus Christ ton Fils nostre Seigneur. Et en rendans leur vocation certaine, par bõnes œuvres & la saincte conuersation ( que tu as ordonné aux tiens, afin d'estre glorifié en eux) qu'ils cõsiderent les fascheuses & frequentes peregrinations d'Abrahã, d'Isaac & de Iacob: qu'ils iettent l'œil sur ton Fils vnique, ton Bien-aimé, fuyant de nuict, tost apres sa naissance, en Egypte, avec sa Mere-vierge, sous la conduite de Ioseph, pour eschapper les mains d'Herode, qui cerchoit la vie de l'enfant. Fay entendre à tous les tiens, que tu chasties ceux que tu aimes, afin qu'il ne leur semble estrange, comme si quelque chose nouuelle leur arriuoit, quand ils seront par feu, par glaue, ou exil, examinez pour faire preue de leur foy: que plustost estans faits participans des passions de ton Fils Iesus Christ, & iniuriez pour son Nõ ils s'en resiouissent, en attendant que ceux qui cherchent l'ame de l'enfant, soyent morts. Cependant donne-leur iugemēt & prudēce, afin qu'ils ne se laissent plus endormir ne piper à la voix de ce Pseudor pere de fami'le, aux larmes de ce Crocodile, qui sous vne feinte pieté, ne cherche qu'à les deuorer & destuire. Garni-les aussi Seigneur, de bon courage, & de force, par lesquels surmontans en vraye foy & charité toutes les difficultez qui leur seront presentes, eux qui sont eschappez du naufrage, s'efforcēt de tout leur pouuoir & moyens d'en retirer leurs freres: d'aider & secourir ceux que les dangers de mort enuironnent, que l'armee de Pharaο, que ce nouueau Sennacherib, & Rab-

& Rabfaces le prophane pourfuyuent.

Seigneur, nous auons ouy de nos oreilles, nos peres nous ont raconté les œuvres que tu as faites en leurs iours en Egypte, aux deserts, en la terre où tu les auois introduits: comment tu as de ta main dechassé les nations, & abbatu les plus grâs qui empeschoyent lestiés de iouyr du repos promis.

Ils ne conquesterent point la terre par leur glaiue, leur bras ne les a point sauuez: mais ta dextre, ton bras, & la lumiere de ta face les deliura, pourtant que tu les auois prins en amour. Il est bien vray Seigneur, que par leur deffiance t'ayans irrité grandement, plusieurs d'entr'eux moururēt au desert, voire ton seruiteur Moyse, que tu leur auois donné pour liberateur: mais tu ne laissas pourtant d'accomplir en leurs enfans par Iosué, tout ce que tu auois promis à leurs peres par Moyse.

O Seigneur, nous auons peché, nous t'auons offensé: tu nous as aussi deboutez, tu nous as dissipez, & t'es courroucé amerement, nous mettant comme en vn train de ruine irreparable. Tu as traité ton peuple rudement, & l'as abreuvé de vin d'estourdissement: mais depuis, tu as donné vne baniere à ceux qui te craignent, afin de l'esleuer en haut, pour l'amour de ta verité. Fay Seigneur, que tes Israelites n'esperent plus au bras de la chair, en leurs armes, ou autre puissance humaine, ains en toy seul, Dieu des armées, le fort des forts: sachant que c'est en vain qu'on edifie la maison si tu n'y mets la main, & que c'est en vain

qu'on veille, si tu ne gardes la cité. Toy qui par les raines, par les poux, par les sauterelles, & autre telle gendarmerie, as fait trembler cest anciē Pharaon dans son liēt, & luy faisant sentir ta main forte, lors qu'il poursuivoit tes enfans, l'as enseucly dans les eaux avec toute son armee, faisant passer les tiens à sec.

Toy Seigneur Dieu d'Israel, qui es assis sur les Cherubins, tu es le seul Dieu de tous les Royaumes de la terre, tu l'as faite, & le ciel aussi. Seigneur, incline ton oreille, & oy: ouvre les yeux, & regarde. Escoute les paroles de Sennacherib, & de ce ieune Rabfaces confit en blasphemes, qui en t'appellant au combat demāde, Où est le Dieu, le Fort, Gardien de ce petit troupeau. Il est vray, Seigneur, que les Rois des Assyriens ont destruit les Gētils & leur terre, & ont mis au feu les dieux d'iceux: Car ils n'estoyent point dieux, mais ouvrages des mains des hommes, bois & pierres, pourtant ils les ont destruits: mais ceux-cy, Seigneur t'iniurient, ils te blasphement & despitent, esleuant leurs voix contre toy, saint d'Israel, se vantās qu'ils raseront toutes les villes sur lesquelles ton Nom est inuoqué, & qu'ils en effaceront la memoire de dessus la terre. Seigneur, si les astu faites & formees, & as planté au milieu d'icelles le sceptre de ta parole, pour lequel arracher, on les poursuit. Ne les meine pas donc à desolation, deffen-les plustost, Pere saint, à cause de tō honneur & gloire, qui est conibinte à leur deliurance.

Enuoyeton Ange Seigneur, l'Ange que tu enuoyas



noyas contre ce Sennacherib , ou fuscite vne Iudith contre cest Holoferne, pour la deliurance de ta Bethulie. Ne te tiens plus arriere de nous , & ne te cache point au temps de tribulation : Car le meschant avec orgueil poursuit le poure , & s'esgaye quand toutes choses luy succedent à souhait. Il est tant fier , qu'il ne se soucie point de ta maiesté , Seigneur , ains toutes ses pensees sont , qu'il n'est point de Dieu. Sa bouche est pleine de maudisson , de fraude , & de tromperie, sous sa langue gist moleste & nuisance : Il se tient aux embusches, il occit l'innocent aux lieux cachez:ses yeux aguettent le desolé , & dit en son cœur , Dieu l'a oublié , & a caché sa face afin que iamais ne le voye. Leue toy doncques Seigneur , hausse ta main , casse le bras des meschans , pren le bouclier & la targe, pour secourir ceux qu'on persecute pour tō Nom. Tire hors la lance , & serre le passage à ceux qui les poursuyuent : qu'ils soyent comme la paille exposee au vent , leur voye soit tenebreuse & glissante, & que ton Ange les poursuyue à iamais. Et pour autant Seigneur, qu'il y a encores quelques vns de tes enfans, qui comme Daniel en Babylone t'adorent & t'inuoquent, mais non point avec telle hardiesse de foy, craignans comme vn Helie d'estre demeurez seuls en toute la terre : Toy Seigneur, qui es pres de ceux qui sont rompus de cœur , & sauues ceux qui sont brisez d'esprit , Qui as ton œil fiché sur ceux qui te craignent , & qui s'attendent à ta bonté , afin de retirer leur ame de mort & les preseruer en vie au temps de l'aduersité. Tien-les tousiours en ta reserue, avec les sept mil

hommes qui n'ont pas flechi le genouil deuant Baal. Fortifie-les, Seigneur, comme tu renforças iadis par ton Esprit ton seruiteur Daniel. Preserue-les comme les trois enfans en la fournaise, afin qu'ils n'adorent l'image de ce grand Nabuchodonosor. Chasse-le plustost Seigneur, arriere des hommes, son habitation soit avec les bestes des champs. Qu'on le païsse d'herbe comme les bœufs, iusqu'à ce qu'il te recognoisse pour souuerain dominateur, Roy des Rois, & Seigneur des Seigneurs, establisant les dominations, & les donnant & ostant à qui & quand bon te semble. Quant à ceux, Pere de misericorde, qui comme brebis sans pasteur entre les loups affamez, pour l'infirmité de la chair & foiblesse de leur foy, font de leur corps vn hommage contraint à ce morceau de paste transsubstantié en chair, à cest accident sans suiet, forcez (par l'erreur commun qui a obtenu lieu de loy) d'aller à la Messe, pour sauuer leur vie & leurs biens: Monstre-leur, Seigneur, & leur fay sentir viuement & à bon escient en leur cœur, combien ta gloire & ton honneur nous doyuent estre plus recommandez que nostre propre vie. Fay-leur cognoistre l'outrage qu'ils font à ta maiesté, adherant tant soit peu au seruice des faux dieux, que Dauid ne vouloit pas seulement nommer par sa bouche.

Que l'impudicité est trop grande de la femme, qui apres s'estre oubliee, lors que son mari la chastie, recourt soudain à son paillard.

Que tu vomis les tiedes, & ne prens point plaisir à ceux qui clochent des deux costez.

Que

Que qui aime sa vie, son pere, sa mere, ou ses biens, plus que ta gloire & ton honneur, n'est pas digne d'estre des tiens. Toy Pere, qui nourris les corbeaux, & donnes robbes somptueuses aux lys des champs deuant nos yeux.

Qui as nourri ton peuple au desert de la manne tresprecieuse, les entretenant vestus comme tes mignons & tendrets. Arrache de tes enfans la des fiance de disette, que le diable, le monde, & la chair, impriment dans le cœur des hommes. Ramentoy-leur Seigneur, les merueilles que ton Fils nostre Seigneur Iesus Christ fit, en repaissant abondamment ceux qui oublians eux-mesmes, le suuyoyent, pour ouyr sa voix, comme les brebis leur pasteur.

Monstre-leur que ton bras puissant est tousiours semblable à soy-mesme, sans diminuer ou accourcir: sinon autant que nostre ingratitude & des fiance, diuertit ou empesche le cours de tes benedictions & graces. Et pour autant que la faute que les tiens commettent en cest endroit, est grande & detestable, Toy Pere, qui ne veux point la mort du pecheur, ains demandes qu'il se conuertisse & viue.

Conuerti les à toy Seigneur, ne leur imputant point leurs fautes. Touche leur le cœur comme tu fis à Pierre te reniant, afin que recognoissans l'horrible faute qu'ils commettent, ils s'humilient deuant toy, gemissent & pleurent pour leurs pechez: & ainsi releuez par ta main, qu'ils se monstrēt forts & puissans, à sousleuer leurs freres infirmes. Ouvre leur aussi la voye Seigneur, afin qu'ils puissent



bien tost sortir de Sodome , deuant que ceux qui leur font quitter l'heritage du ciel pour vne escuelle de lentilles , executent leur coniuration & desfeins. Qu'ils n'ayent point regret de laisser les aulx & les oignons d'Égypte , sachans combien plus vaut vn peu de pain avec ioye & contentement de conscience , qu'une maison pleine de richesses avec vne inquietude & continuel tourment d'esprit.

Que trop mieux vaut en toutes sortes  
 Vn iour chez toy, que mille ailleurs:  
 Et sont les estats trop meilleurs  
 Des simples gardes de tes portes,  
 Qu'auoir vn logis de beauté,  
 Entre les meschans arresté.

Qu'ils ayent memoire (en considérant leur miserable condition) de ce pource enfant prodigue, & qu'à son exemple, ils laissent la viande aux porceaux : s'asseurans que toy grand Pere de famille, es prest à les recueillir , & à les traicter & entretenir, tout ainsi que ceux-là qui n'ont bougé de ta maison. Les autres qui d'une gayeté de cœur ont delaisié ton saint seruice, communiquans à toutes infametez: voire Seigneur, en te faisant la guerre , se sont adioints à ces tueurs , s'il y a encores quelque reste de misericorde pour eux , si parmi ceux-cy se trouuent quelques vns de tes eleus, aye pitié Seigneur, aye compassion d'iceux , les faisant retourner en ta sainte famille , de laquelle ils sont foruscis. Abba les Seigneur , & les atterre , comme iadis tu fis Saul , qui persecutant ton fils en ses membres, seruit apres sa conuersion de bon tef-

moin

moins à ta verité eternelle : afin qu'après l'estonnement, estans par toy releuez & soustenus, ils seruent plus ardemment à ta gloire, qu'ils n'ont fait par cy deuant. Que si c'est malicieusement contre ta verité cognue qu'ils se bandent, s'obstinans à leur escient à te faire outrage, mon Dieu, fay les semblables à la rouë, & au tourbillon: poursuy-les par terreur & espouuamment : rempli leurs faces de mespris, & darde sur eux ta colere : fay pleuvoir charbons sur leur teste, feu, soulfre & vent de tempeste soit la portion de leur hanap, afin que toute la terre cognoisse, que tu es nostre Dieu & Sauueur.

Et nous alors ton vray peuple & tes hommes,

Et qui troupeau de ta pasture sommes,

Te chanterons par siecles innombrables,

De fils en fils preschans tes faits louables.

*Ali.* Je m'esmerueille grandement, seigneur politique François, considerant le piteux estat de la France (si tu as ta patrie en quelque recommandation) maintenant qu'elle a plus de besoin de ses vrais amis & bons conseillers qu'elle n'eut oncques, comme c'est que tu as eu le courage de l'abandonner: au lieu de t'employer à guairir sa playe, à la penser, de la frenesie & de la rage qui la mene.

*Le pol.* Je n'en suis parti qu'en pleurant, avec vn regret incredible, preuoyant la prochaine & inuitable ruine, où va tomber ce poure Royaume, pour l'extreme confusion où il est : laquelle i'ose asseurer estre irremediable, au iugement de tous bons esprits : car (ie me ray de la religion des Huguenots en laquelle ie n'ay iamais peu mordre,



quelque bonne vie & changement de mœurs que j'aye apperceu en mes proches voisins qui en faisoient profession, & ie laisse à part ceste barbare tuerie que l'Historiographe a recité) tout y est tellement conuait, qu'il n'est pas possible de voir vne plus grande masse de meschancetez, ny vn chaos plus horrible, soit que tu regardes la Iustice, ou que tu contemples la Police; depuis vn bout iusques à l'autre. Que dy-ie, si tu les regardes: tu aurois beau y regarder, tu ne les y sçauois voir: elles n'y sont pas, pieça qu'elles s'en sont aillees: on ne les y trouue plus qu'en escrit, on n'y voit que leurs noms & leurs masques. Quant au seruice de Dieu que nos peres nous auoyent appris à bonne intention, nos Princes d'aujourd'hui, leurs courtisans, & à leur imitation vne infinité d'autres gentils-hommes & de bourgeois & marchands, ne s'en font que rire & moquer. Le soldat le despire & deteste: la cour pour le dire en vn mot à l'exemple du Roy, & la plus grande partie de France à l'exemple de la cour est pleine de blasphemés, d'atheïsme, & parmi eux l'epicureïsme, l'inceste, la sodomie, & toute autre sorte de lubricité, est vulgaire & familiere. Tu as ouy combien de fois la foy publique (qui deust estre vn lien indissoluble pour entretenir la société humaine) y a esté violee, tellement qu'on ne sçait plus à qui lon se doit fier. Nous pensions qu'après tant d'Edicts rompus, celui de la Pacification derniere, fait au mois d'Aoust en l'an 1570. seroit à la fin obserué. Nostre pource France commençoit d'auoir quelque relasche à ses miseres:

nous



nous voyions, ce nous sembloit, l'entree de mieux esperer. Les Huguenots se comportoyent fort modestement, quelques outrages qu'on leur sceust faire : ils aimoyent mieux les endurer, que d'vser d'aucune reuenge. Il est vray qu'ils recouroient au Roy & à son conseil, pour la punition de ceux qui les offensoient : mais combien que le Roy ne fist que le semblant de leur en vouloir faire raison cela les contentoit. Ils remirent les villes que le Roy leur auoit baillé pour leur seureté & retraite durant les deux ans, beaucoup plustost que le terme assigné, entre les mains de ceux qu'il pleut au Roy d'ordonner : qui fut cause que le Roy là dessus, enuoya par tout son Royaume, des lettres patentes de confirmation de son Edict de paix, n'oubliant rien de ce que luy & son bon conseil se pouuoient aduiser pour les appriuoiser : & faisant comme le bon faulconnier qui veille les oyseaux, & vse de toute la diligence qu'il peut pour leur faire oublier leur liberté, & les accoustumer au chapperon. Les principaux d'entre les Huguenots vindrent à la cour au mandement du Roy, se resigner entre ses mains, monstrant d'auoir agreables les tresbōs & tresnotables seruices qu'ils luy faisoient : & est bien certain que si le Roy eust poursuyui à se seruir d'eux comme il auoit commencé, il seroit auourd'huy patron de Flandres : & s'il eust sceu entretenir ce parti de religion, il estoit pour estre esleu Roy des Romains, & son beau pere mourant appelé à l'Empire. Nous pensios que ce tragique mariage du roy de Nauarre & de la sœur du Roy, qui auoit osté toute des-

fiance aux Huguenots, seroit vne confirmation de paix entre nous : quand ce mal-heureux coup d'arquebouse ( qui fut tiré à l'Amiral, le mesme iour, comme ie croy, que l'Edict de pacification derniere, à scauoir le 22. iour d'Aoust, & par ainsi le dernier iour des deux ans de retraicte asseuree) me fit penser & à beaucoup de mes amis aussi, qu'il y auoit dès long temps de la menee secrette cōtre luy & les autres Huguenots, & que ce coup traineroit apres soy quelque dangereuse queüe.

Ainsi comme ie le pensoy' il aduint non pas ainsi, la Dieu ne plaie que i'eusse iamais pensé, qu'un si meschant œuf deust estre ponnu, couné, & esclos, en la France! Mais tant y a que ie me doutay bien quand & quand, que les choses estoient preparees à quelque grand & insigne malheur: to l'as ouy reciter, sinon du tout, au moins en partie. Je te laisse à penser maintenant qui est l'homme de bien, qui voulust habiter tant soit peu en France. Quant à moy, & beaucoup de mes amis (bons Catholiques François ie t'en asseure) voyans la desloyauté & bizarrerie du Roy (puis qu'il faut que ie le die) ensemble de son conseil, composé d'une femme Italiene Florentine, de la maison de Medicis, de pensionnaires du roy d'Espagne, de pensionnaires & creatures du Pape, d'Italiens, de Lorrains, & non d'autres, & le mal sans remede : craignās que demain ou l'autre il ne nous en eust fait autant qu'aux Huguenots, si dauenture il en venoit enuie au Roy, ou à ses premiers conseillers qui nous en veulent, comme à ceux qui cognoissent leurs desseins & menees, & portent quelque affection



affection au bien de la France. Craignant, dy-ie, quë tout à vn coup ils ne nous iettassent le chat aux iambes & la rage sur le dos, comme font ordinairement ceux à qui il prend enuie de tuer leur chien, & que sur cela ils nous fissent nòstre proces apres la mort, comme on a fait à l'Amiral : nous auons mieùx aimé nous en sortir de bonne heure, que d'y demeurer trop longuement. Sur tout quand nous auons consideré, que de tous les Princes voisins, les vns ne s'en soucient pas beaucoup, les autres sont bien aises de la ruine de tant de François, de si grands personnages & de si bons seruiteurs du Roy, & prennent plaisir de voir le Roy, se couper du bras droit le gauche, & autres membres de son corps. Ie dy notamment qu'ils y prennent plaisir: car s'ils en estoient marries, s'ils auoyent regret de voir vn si piteux spectacle, ils s'y opposeroyent de fait, & l'empescheroient par force de passer outre à se deschirer soy mesme, tout ainsi qu'on fait à l'amy frenetique qui se veut precipiter, lequel on veille & on retient à force, le liant pieds & mains, quand il blesse, bat, ou tue. Mais quand ie voy que les Potentats voisins n'en tiennent compte, non pas seulement de luy faire entëdre par lettres & ambassades, le tort qu'il se fait, & aux liens, de les massacrer de la sorte : ie dy qu'ils en sont bien aises, & que c'est le doigt de Dieu qui est courroucé contre France: que de quelque costé que le bast viue, il faut que ceste grande & florissante maison de Valoys prenë fin, & que ce braue & puissant Royaume, soit transporté à quelqu'autre Prince, où reparti entre



pluseurs. Là dessus, ie scay que le roy d'Espagne entre autres Princes voisins, a de si bonnes intelligences en la France: il y a de longue main, de si bons seruiteurs: ses ducuz de Castille luy ont tant acquis de partizans & seruiteurs en France, voire mesme au conseil du Roy (ie ne veux pas dire que le comte de Rets, Lansac, Moruilliers, Limoges, & Villeiroy, en ayent pension ordinaire, car on les cognoist bien: ne que la maison de Gonzague ne fut iamais qu'Espagnole) Que s'il veut seulement employer le prince d'Orenge & le comte Ludouic son frere, avec leur credit & leur force (comme il luy sera bien aisé de les auoir à commandement, autant fideles seruiteurs qu'ils luy furent onques, en leur laissant & à ses autres suiets la liberté de leur conscience, & les remettant en leurs biens, priuileges & estats) ie m'assure que non seulement ils luy rendroyent tous les pays bas raf-fermis & paisibles, mais aussi en moins d'un an la France (distraicte & alienee pour le iourd'huy de l'amitié de son Roy) toute paisible & à sa deuotion.

Et ne faut ia douter que le prince d'Orenge, & son frere, ne s'y employassent volontiers, tant pour le tour que le Roy leur a ioué les mettant en besongne sur sa parole, & les laissant apres au danger, que pour l'enuie qu'ils doiuent auoir de rentrer en grace par quelque bonne occasion avec leur prince naturel, & pour le bien & honneur qui leur reuiendrait d'une si belle entreprise. Quant au roy d'Espagne, il a occasion de se les reconcilier, non seulement pour attraper ceste belle ter-

re qui branle : mais aussi pour raffermir & affermer son estat de Flandres , qui autrement est en voye d'estre perdu , pour la bonne conduire de ce vieil resueur le duc d'Albe. Que si le roy d'Espagne ne se veut seruir en cest affaire du prince d'Orange, aimant mieux perdre tout à plat son estat de Flandres, que de le conseruer par son moyen, & en acquerir vn autre : cela s'appelle se courroucer contre ses morceaux. Mais quoy qu'il en soit, s'il aime mieux y employer monsieur de Sauoye, en luy laissant pour son partage, le Lyonois, Dauphiné & Prouence, contigus à son estat : ie ne doute pas que ce Prince, qui a occasion de se ressentir des torts que la France a fait à son feu pere & à luy-mesmes, luy qui est guerrier & sage, & qui a la reputation de garder inuiolablement la foy à ses sujets Huguenots, n'acquiere facilement & en peu de temps, sinon tout, au moins la plus grande partie de France : Surquoy (pour les difficultez & messeances procedantes d'alliances & affinitez que quelques vns pourroyent alleguer, pour desguiser le mal qui est à la porte) ie diray que les grands n'ont point accoustumé de pardonner à loix d'amitié, d'affinité, ou d'autre confederation quelques anciennes qu'elles soyent, quand il est question d'amplifier & d'estendre leur Empire : ains plantent tousiours les limites de leur terre, là où la poincte de leur espee peut arriuer.

Au demeurant, quant au roy d'Espagne, il n'a pas faute de prises suffisantes sur le Roy. Pour auoir suborné les villes de son obeissance au pays bas voulu subuertir ses estats par pratiques: entretenu



ses rebelles en sa cour, gratifié & honoré en toutes sortes. Auoir communiqué avec le comte Ludouic plusieurs fois, & approuué ses entreprises, avec grande attention, contentement & promesses. Luy auoir baillé aide de ses suiets, & permis d'entrer grande troupe d'iceux es pays bas, marchâs à enseigne desployee par le royaume de France. Fait faire plusieurs voyages à saint Remy, & autres, qu'il enuoyoit vers le duc d'Albe, pour l'amuser & tromper, cependât que le Roy donnoit moyen à l'exécution des entreprises: & mesmes en pratiquoit vne sur Arras, par le moyen du petit Refuge, qui est mort à Paris, luy estant venu dire qu'il enuoyast gens, & qu'il estoit temps, & qu'il ne doutast nullement du moyen de la prendre. Pour auoir donné seur accez en ses haures aux Pirates, qui ont depredé ses suiets. Commandé à ceux de la Rochelle d'administrer viures aux nauires du prince d'Orenge, & librement les laisser descharger leurs prises, & les vendre. Permis au veu & sceu de tout le monde, que les Capitaines de marine dudict Prince, fissent leurs equipages de François, tant de mariniers que soldats. Pour auoir fait des menees & pratiques sur la Franche-comté. Auoir enuoyé le capitaine Minguetiere, recognoistre les descentes du Perou, avec nauire desguisé en marchandise, plein toutefois de soldats, qui fut prins à la Spagnole. Auoir voulu traicter la paix des Venitiens avec le Turc, pour faire tomber toute la guerre sur l'Espagnol: Et pour auoir depuis la mort mesme de l'Amiral, pratiqué par lettres & messages le prince d'Oren-



ge, chaudement & à bon escient: & plusieurs autres, qu'il seroit long à deduire. Voila quant au roy d'Espagne.

Maintenant la royne d'Angleterre, laquelle tiér la mesme religion en son royaume, que les Huguenots de France: qui a tant de prises nouvelles sur le Roy (afin que ie taife les prises anciennes, que la ligue d'entre elle & le Roy auoit assopies, comme ceste tuerie les peut auoir refueillees) laquelle peut bien cognoistre aujourd'huy, que ceste ligue ne se fit, que pour esblouir les yeux à l'Amiral, & aux autres Huguenots de la France, afin qu'ils se laissassét mieux prèdre à la pipee. Laquelle cognoist maintenant, comme c'est que le Roy scait garder sa foy promise. Laquelle fait que deux estats voisins ayans quelque cõtrepoids l'un avec l'autre, ne peuuent auoir amitiè ne ligue ensemble autre, que celle que la necessité ou la force y entretient: & que l'une ou l'autre y defaillât, il ne faut pas qu'elle s'attende aux promesses de son voisin. Elle qui scait bien, que le Roy demandoit les Myllords ses plus speciaux conseillers, de les festoyer) comme vous pouuez penser) en sa cour. Laquelle doit auoir cognu, que tout ainsi que par les nopces de la sœur en France, aussi par celles du frere en Angleterre (s'il y eust peu paruenir) on se fust efforcé d'y mettre bas le parti de la Religion, & par consequent son Royaume en ruine. Qui scait bien que le Roy a tenu & tient iournellement la main à la royne d'Escoffe sa belle sœur, non seulement pour la faire euader. mais possible pour plus haut dessein & affaire. Que le

Roy a voulu & tafché, comme il tafche encores faire enleuer en France le petit roy d'Escoffe, pour mettre vn iour à venir toute la grande Bretagne en vn acceffoire dangereux: & qu'il entretiët la guerre par forces & par menees le plus qu'il peut en Escoffe. Elle qui est bien aduertie d'une entreprife faite n'agueres par le commandement du Roy, fur l'Isle de Gerfay, pour y furprédre & tuer ceux qui y estoyent refugiez sous sa protection. Ceste Princeffe, à laquelle sans doute tous les Huguenots regardent attentiuement, luy adreffans leurs prieres & vœus. Je scay fort bien que toutes les fois qu'elle voudra, il luy sera fort aisé (y employant vn des Myllords que le Roy demandoit, ou autre tel des grands de son Royaume qu'elle voudra choisir) de se faire maistresse de la terre, dõt elle ne porte que le nom & les armes. Quant aux Princes & Estats de l'Empire, ne doutez pas s'ils veulent (comme ils doiuent) qu'ils ne puissent recouurer maintenant les terres de Mets, Verdun, & Thou, que le Roy a vsurpé sur l'Empire: & avec ce, passer outre pour se rébourser des despës que l'Empereur Charles leur fit faire deuât Mets, & de ceux qu'ils feront au recouurement de ces terres. A vostre auis, l'Electeur Palatin entre autres Princes de la Germanie, n'a-il pas occasiõ de se ressentir de ce que le Roy tafchoit d'attirer en sa cour le duc Christofle, & d'édormir le duc Iean Casimir, par des pësiõs qu'il luy offroit, pédât qu'il faisoit sõ apprest pour perdre tous ceux de la religiõ: & particulièrement l'Amiral, que l'Electeur aimoit singulierement? Je diray cela, que quãd ce Prince seul se voudra esuertuer & ressentir de



de l'outrage fait à l'Amiral & aux autres Huguenots, & qu'il y voudra employer seulement le côté de Mâsfeld (auquel, & à ses Reistremaîtres est due grande somme de deniers par le Roy) le faisoit avec une mediocre armee (sous couleur d'aller querir leur argent) entrer un peu avant en France (comme la chose luy est aisée) on ne vit jamais telle confusion qu'il y auroit: tout le monde crieroit le haro & au meurtre, contre ceux qui sont cause de ces maux. Voila quant aux princes estrangers, lesquels me semblent auoir un beau suiet d'entrer en France. Mais ce que j'apperçoy au dedans, est ce qui me trouble le plus. Je ne doute point que la maison de Montmorécy, leurs parents, amis, alliez, & partisans, qui se feroient vilainement interesser en la mort de l'Amiral, & de plusieurs autres seigneurs & gentilshommes qui leur appartenoyent de sang, d'alliance, ou d'amitié: ne taschent de se venger en une façon ou en l'autre, du Roy, de sa mere, de son frere, de ceux de la maison de Guyse, & des autres conseillers, qui ont dressé & fait executer ceste tragedie en la France: ou s'ils ne le font, ils sont les plus laches, les plus couards, & les plus desloyaux à leur sang (afin que ie ne parle de leur patrie) que gentilshommes furent onques. De moins ne peuvent-ils faire, que de se joindre eux & leurs partisans, au premier Prince estranger qui brâssera pour entrer en France: aussi bien scauent-ils que c'est fait d'eux, & de leur maison à jamais, celle de Guyse ne la lairra ia debout: le Roy mesmes à ce que j'ay entendu, parlât ces iours passez à sa mere, à bien s'excuser, que par le corps, Dieu il n'a rien fait, s'il n'a les quatre fils Aymon, parlât des 4. freres de Montmorécy. Ils ont beau se tenir



escartez, l'un en Languedoc, l'autre à l'isle-Adam, l'autre çà, l'autre là, l'on a beau faire semblant de n'auoir souci que de la chasse & de la vrollerie: les voyages qu'il a faits en cour, ny tout le visage qu'il y reçoit y estant, ne le garantiront non plus que l'Amiral: & s'il se souuient de l'aduis qu'il donna au comte d'Aiguemont allant en Espagne, & de la faute qu'il fit à ne le croire, il ne s'y fiera. L'autre a beau s'employer à ce qu'on luy commande, & les autres ont beau contrefaire les fats & les mitouards: le Roy ne croira iamais qu'ils puissent oublier l'iniure qui a esté faite à leur maison: son conseil est trop fin & rusé, pour se laisser persuader vne si grande asnerie.

La maison de Guyse, maintenant qu'elle se voit depestree de ceux qui s'opposoyent à sa grandeur, & lesquels seuls pouuoient empescher ses desseins, n'ayan plus que ceux-cy de Montmorency à tuer, pour pouuoir dire, Tout le reste m'aime: à vostre aduis s'elle se scaura bien venger des traicts, que la maison de Montmorency luy a faits: de ce beau liure des marchands de Paris, que le mareschal de Montmorency fit faire à la Planche contre leur maison: de la peur & honte qu'il fit receuoir au cardinal de Lorraine à son entree dans Paris, dont la chanson de fy fy a prins son origine. Et ie m'asseure s'il ne gagne le deuant, qu'il sera accommodé comme les autres.

Au reste, à quoy tient-il que ceux de Lorraine (qu'on scait bien estre descendus de Charlemagne, & pruez de la couronne de France) ne la recourent maintenant? Il ne tient ia qu'à vne habilité

bilité de main : Que s'ils y veulent aller à force ouuerte) mais qu'il n'en desplaise au Roy) mesieurs de Lorraine mettront deux fois plus de gés en campagne, qu'il n'en scauroit mettre. Ils ont plus d'amis, & plus de villes partizantes qu'il n'a. Et tenez-vous pour tout asseurez, qu'à tout euenement, si la couronne de Frances en va perdre, ou changer de maistre, ils l'aimeront mieux sur leur teste, que sur celle d'un Prince estranger. Pour ma part, ayant veu le peu de seureté qu'il y a sous le regne d'à present, ie l'aimeroys' beaucoup mieux (puis qu'il faut que ie le die) en la maison de Lorraine, que là où elle est. Et diray vne chose, que le Huguenot (despité pour iamais, & desgouté en toutes sortes de la maison de Valois) seroit bien aise, voire s'employeroit à mon aduis) à ce que la maison de Lorraine recouurast ce qui leur appartient; s'assurant bien qu'elle lairroit la conscience du Huguenot libre & l'exercice de sa religion, & luy garderoit la foy qui luy auroit esté promise: se souuenant du malheur que la desloyauté auroit apporté à son maistre. Desia ont-ils donné quelque occasion aux Huguenots, de croire qu'ils ne leur sont pas si aspres comme on crioit. Ils en ont sauué, comme a dit l'Historiographe, beaucoup, & en sauuent secretement tous les iours.

Au reste, ils ont fait porter la marote au Roy (si vous y auez prins garde) de toute ceste tuerie, tant pour n'en auoir le blasme, que pour moyenner que la furie des petits ou des grans s'esleuant, elle se descharge sur celuy qui se vante de l'auoir fait faire. Ils se sont bien gardez, d'en vouloir pré-



dre le faix sur eux.

Mais voyons le traict qu'a faict Monsieur frere du Roy, & la Royne sa mere, en ceste tragedie de Paris. Le samedi au soir, deuant le Dimanche du massacre, ils vindrēt tous deux trouver le Roy: Ils luy remonstrent, ils le prient qu'il haste l'exécution de leur entreprise: ils scauoient bien que si ceste occasion se perdoit, qu'ils ne la recourent iamais telle, comme ils l'auoyent lors sur les Huguenots: qu'ils les tenoyent tous dans le filé qu'il leur auoit promis: que le moyen que ils auoyent tant de fois tenté (mais en vain) de les exterminer, estoit tout prest & present: qu'il ne falloit donc plus songer, qu'il estoit temps de s'en resoudre: que le roy d'Espagne (si les affaires du prince d'Orenge alloient mal, comme ils sembloient decliner depuis la route de Genlis) scauroit bien tout à temps se venger sur la France, du mal qu'il auoit receu par son moyen & support en ses estats du pays bas. Partant le supplioient qu'il y fist mettre la main à bon escient & soudainement, dès ce soir la sans plus tarder: qu'ils auoyent donné ordre avec le duc de Guyse, le duc d'Aumale, le duc de Neuers, & le comte de Rets, que toutes choses fussent prestes & disposees. Que si le Roy vouloit retarder plus longuement l'exécution, la Royne sa mere le prioit avec larmes, & son frere fort affectueusement de leur donner congé, en recompense des seruites qu'ils luy auoyent faits: qu'ils estoient resolus de se retirer hors de France, & de s'en aller en part où ils n'en ouyssent iamais parler.



Par ceste chaude alarme, ils esmeurent si bien le Roy qu'il fut contraint de s'accorder qu'on executast dès la nuict mesmes, ce qu'il auoit designé de differer encore: pour voir cependant le train que prédroit son esperance de Flandres, par le seruice que les Huguenots luy feroient en ce pays-là. Je vous laisse à penser, quel traict la mere fit en cela pour son fils bien aimé, contre le bien de celuy qui pieça l'auoit despitee, & qu'elle n'aime que bien peu dès quelque temps. En lui faisant pratiquer vne des leçons de Machiaueli, qui est de ne garder aucune foi, qu'autāt qu'on la cuidera tourner à son aduantage, elle lui a fait rompre l'autre (que Denys de Sicile entendoit mieux) entretenant pres de soi le plus meschant hōme du monde, sur qui le peuple voulāt reconurer sa liberté, peust vomir toute sa cholere. Et par mesme moyen la mere ayant attiré l'ire de Dieu & des hommes sur l'aisné de ses enfans, elle a armé le m'aisné d'une grande & puissante armee, qui lui est venue entre mains, comme lieutenant general, sous couleur de vouloir raser les Huguenots de dessus la terre. A vostre aduis, est-il maintenant à cheual? a-il beau moyen d'accomplir ses desseins, lui qui de si long temps abboye à la couronne?

*L'hisl.* Je n'auoy' pas entendu ce traict: Il est vray que ie scauoy' bien, que Monsieur auoit belle enuie d'estre Roi, de quelque Royaume que ce fust: & que le Roi & sa mere, pour le contenter ayans perdu l'esperance du mariage & du Royaume d'Angleterre, auoyent depesché en Poloigne

pour tascher de le marier avec la Reginelle sœur du roy de Poloigne, toute vieille qu'elle estoit, estimans que ce seroit vn bon moyen pour le faire paruenir à ce Royaume là apres la mort de Sigismond lors regnant. I'auois bien sceu aussi qu'apres ceste despesche, le Roy & la Roynes eustent aduertis que le roy Sigismond estoit mort sur ces entrefaites, auoyent enuoyé en ambassade Monluc euesque de Valence, par deuers les Polonois avec des bien belles memoires & charge bien ample de richement mêtir de beaucoup promettre, & de rien tenir: pour essayer par cest artifice, de faire eslire Monsieur à ce beau Royaume vacquât. Maintenant tant plus ie pense à ce stratageme que tu m'as recité, tât plus ie le trouue remarquable & digne d'estre logé en son reng au liure de mes memoires. Mais ie m'asseure bien si le Roy y aduise de pres, qu'il empeschera bien le dessein de l'autre.

*Le pol.* Tout aussi bien comme l'autre se peut garder d'estre attrapé, anticipant son compagon, par vn gaillard contrantidote.

*L'hist.* A bon chat, bon rat.

*Le pol.* Or ie veux laisser ces grands iouer leurs tours, comme mieux ils l'entendent: & acheuant mon discours dire en vn mot, ce que ie pense de la portee des petits. Je suis tresasseuré que quand tous les autres se tairoyent, les vrais Catholiques François & quelque nouveau Bodille, que les Historiens nous recitent auoir iadis tué Childeric roy de Frâce, ainsi qu'il reuenoit de la chasse, pour ce qu'il l'auoit fait fouetter publiquement attaché

ché à vn pal: & qui tua aussi(outré de mesme despit ) Vlcide la Royne enceinte, sont bien gens pour dōner escher-& mat à la maison de Valois, s'ils entrent vn coup en furie.

*Ali.* Tum'as remis à la memoire ce que Ronfart en fort bons termes, & sans en rien dissimuler, a mis en escrit de Bodille dans sa Franciade, remise en lumiere depuis le massacre de Paris, quand en parlant de trois Rois freres, il dit tout à propos,

Trois fait-neants, grosses masses de terre,  
Ny bons en paix, ny bons en temps de guerre,  
La maudisson du peuple despité:  
L'vn pour souiller son corps d'oisiuete,  
Pour n'aller point au conseil, ny pour faire  
Chose qui soit au Prince necessaire:  
Pour ne donner audience à chacun,  
Pour n'auoir soin de soy ny du commun,  
Pour ne voir point ny palais ny iustices,  
Mais pour rouiller sa vie entre les vices:  
Traistre à son peuple, & à soy desloyal,  
Sans plus monter en son throne royal.

& peu apres,

De ses suiets comme peste hay,  
A contre-cœur des seigneurs ob.y:  
Chaud de cholere, & d'ardeur inutile,  
Fera fouëtter le Cheualier Bodille  
En lieu public, lié contre vn posteau,  
Tout deschiré de veines & de peau:  
Bodille plein d'vn valeureux courage,  
Tousiours pensif en si vilain outrage,  
Ne remaschant que vengeance en son cœur



Lairra couler quelque temps en longueur:  
 Puis si despit, la fureur les poinçonne,  
 Que sans respect de sceptre ou de couronne  
 Tout allumé de honte & de courroux,  
 Ce Roy peu sage occira de cent coups.  
 Luy de son prince ayant la dextre teincte,  
 Pres le Roy mort tuera la Royne enceincte  
 D'un mesme coup (tant son fiel sera grand)  
 Perdant le pere, & la mere & l'enfant  
 Qui se cachoit dedans le ventre encore.

Et suyuant adressant son langage au plus  
 ieune frere, que lon dit n'auoir rien sceu de ces  
 desseins sanguinaires, pour le contenir en office,  
 il dit,

Seigneur Troyen, le Prince ne s'honore  
 De felonnie, il faut que la fierté  
 Soit au lions: aux Rois soit la bonté,  
 Comme mieux nez, & qui ont la nature  
 Plus pres de Dieu que toute creature.

Et reprenant la description de ce Roy, il ad-  
 iouste,

Ce Roy doit estre abuse par flatteurs.  
 Peste des rois, courtizans & menteurs:  
 Qui des plus grans assiegeans les oreilles  
 Font les discrets, & leur content merueilles.

& peu apres,

Le plus souuent les Princes s'abestissent  
 De deux outrois, que mignons ils choisissent:  
 Vrais ignorans, qui font les suffisans,  
 Qui ne seroyent entre les artizans  
 Dignes d'honneur, grosses lames ferrees,  
 Du peuple simple à grand tort honorees:

Qui

Qui vivent gras des impôts & des maux,  
Que les Rois font à leurs pources vassaux:  
Tant la faueur qui les fautes efface,  
Fait que le sot pour habile homme passe  
Quelle fureur! qu'un Roy pere commun  
Doiue chasser tous les autres pour vn,  
Ou deux ou trois! & bleffer par audace  
Vn masse cœur issu de noble race,  
Sans regarder si le flatteur dit vray!  
Ce Childeric doit cognoistre à lessay  
Le mal qui vient de croire à flaterie,  
Perdant d'un coup & vie & seigneurie.

*Le pol.* A ce que ie voy, vrayemēt, Ronfard triom-  
phe de dire, & touche de merueilleux poincts. Je  
n'eusse iamais pensé, qu'il eust osé mettre ces cho-  
ses si clairement en auant du viuant de ce Roy,  
quoy qu'il les couche sous d'autres noms feincts.

*Phil.* Or confère, ie te prie, maintenant ce que nous  
auons veu, avec ce discours.

*Ali.* Certes c'est vn pietux estat, ie ne scay qu'en  
dire.

*Le pol.* Comment est-il possible que Ronfard ait  
publié cela?

*Ali.* Il en dit bien d'auantage : Il décrit bien en-  
cores plus particulièrement ce Roy & son re-  
gne, sous le nom de Chilperic : l'impudicité de  
la cour, les meurtres, l'estoille nouuelle qui appa-  
roist, & autres signes: l'obstination du Roy, iusqu'à  
predire qu'il estouffera sa femme pour espouser  
sa putain.

*Le pol.* He ie te prie, si tu te souuiens de ce qu'il en  
dit, recite-le moy.

*Ali.* Je n'ay pas retenu le tout : mais voicy ce que  
i'en scay.

C'est Childeric indigne d'estre Roy,  
Mange-suiet, tout rouillé d'auarice,  
Cruel tyran, seruiteur de tout vice:  
Lequel d'impôts son peuple destruira,  
Ses citoyens en exil bannira.  
Affamé d'or, & par armes contraires,  
Voudra raur la terre de ses freres.  
N'aimant personne, & de personne aimé,  
Qui de putains vn ferrail diffamé,  
Fera mener en quelque part qu'il aille:  
Soit temps de paix, ou soit temps de bataille,  
En voluptez consumera le iour,  
Et n'aura Dieu que le ventre & l'amour,  
Du peuple sien n'entendra les complaints,  
Toutes vertus, toutes coustumes saintes  
Des vieux Gaulois, fuyront deuant ce Roy:  
Grand ennemi des pasteurs de sa loy.  
Les escoliers n'auront les benefices,  
Les gens de bien les honneurs des offices,  
Tout se fera par flatteurs eshontez,  
Et les vertus seront les voluptez.  
Iamais d'enhaut la puissance celeste,  
Ne monstra tant son ire manifeste,  
Et iamais Dieu le grand Pere de tous  
Ne monstra tant aux hommes son courroux:  
Signes de sang, de meutres, & de guerre,  
De tous costez vn tremblement de terre  
(Horrible peur des hommes agitez)  
De fonds en comble abbatra les citez.  
Iamais les feux la terre ne creuerent



En plus de lieux, iamais ne s'esleuerent  
 Plus long cheueux de Cometes aux cieux.  
 Iamais le vent (esprit audacieux)  
 En fracassant & forests & montagnes,  
 Ne fit tel bruit: le ballay des campagnes,  
 Les pains coupez, de sang se rougiront,  
 En plein hyuer les arbres fleuriront:  
 Et toutefois par ces menaces hautes,  
 Ce meschant Roy n'amendera ses fautes:  
 Mais tout superbe, en vices endurcy,  
 Contre le ciel esleuant le sourcy  
 Au cœur bruslé d'infame paillardise  
 Estouffera contre sa foy promise,  
 En honnissant le saint liét nuptial,  
 Sa propre espouse, espoux tresdesloyal,  
 Ioincte à son flanc, le baisant en son liét,  
 Seure en ses bras, l'estranglera de nuët.  
 Cruel tyran! à qui dessus la teste  
 L'ire de Dieu pend desia toute preste.

Puis en parlant de ie ne scay quel Clotaire, &  
 de la vengeance qu'il fera de la Royne-mere,  
 qu'il entend sous le nom de Brunehaut, il adioute  
 apres,

Sage guerrier victorieux & fort  
 Qui pour l'honneur mesprisera la mort,  
 De Brunehaut princesse miserable  
 Fera punir le vice abominable,  
 Luy attachant à la queue d'un cheual  
 Bras & cheueux: puis à mont & à val  
 Par les rochers, par les ronces tirée,  
 En cent morceaux la rendra deschirée:  
 Si qu'en tous lieux ses membres diffamez,

Seront aux loups pour carnages femez.

& peu apres,

Les Lestrigons, les Cyclopes, qui n'ont  
Qu'un œil au front, en leurs rochers ne font  
Si cruels qu'elle, à toute peste nec:

Qui en filant menée sur menée,  
Guerre sur guerre, & debats sur debats,  
Fera mourir la France par combats:  
Mais à la fin sous les mains de Clotaire  
Doit de ses maux recevoir le salaire.

*Le pol.* Mon Dieu, qu'est-ce là? qui vit iamais des-  
crire mieux les choses dessous noms conuerts?  
He que ces Poëtes font grands ouuriers! il y en a  
mille & mille qui liront cela sans l'entendre, & ce-  
pendant on n'en sçauroit dire dauantage en peu  
de mots.

*Al.* Le bon est, que Iamyn qui a fait les argumens  
de la Franciade de Ronfard, & qui cognoist bien  
le sens caché sous l'escorce, & l'intention de l'Au-  
teur, l'a esclarcy en l'argument du 4. liure, quand  
en parlant de l'erreur Pythagorique, touchant la  
transmigration des ames, il dit que Ronfard se-  
sert expres de ceste fausse opinion, afin que cela  
luy soit comme vn chemin & argument plus fa-  
cile, pour faire venir les esprits des vieux Rois en  
nouveaux corps: car sans telle inuention, il eust  
fallu se monstrier plustost Historiographe, que  
Poëte.

*Le pol.* Voila qui va bien. Mais si seroy'-ie bien  
marri que la prophetie de Ronfard aduint tou-  
chant ceste pource Princesse la Royne regnante,  
qu'elle fust estouffée par son mari: quant à Brune-  
haut,

haut, il ne me chaut quoy qu'il lui puisse aduenir. Que pleust à Dieu qu'elle ne fust iamais venue en France, nous ne serions pas és peines où nous sommes. Mais ie te prie, considere vn peu quel argument Ronfard baille à tous François quand il monstre l'entreprise executée par Bodille, contre le Roy Childeric, sa femme, & son enfant, pour auoir esté seulement fouetté. A ton aduis, n'est-ce pas autāt que s'il disoit, en argumentāt du moindre au plus grand: Vous tous qui auez esté en dix mille sortes plus inhumainemēt traictez que Bodille, en vos personnes, honneurs & biens, de vos femmes & enfans: Vous, desquels les plus proches parens, alliez, amis & voisins ont esté meurtris & violez, contre tout droict, contre la foy publique: s'il y a quelque cœur masse issu de noble race, s'il y a quelque generosité de reste entre vous, que ne la monstrez vous à ceste fois contre ce traistre à son peuple, & à foy desloyal: cōtre ce mange-suiect, cruel tyran, affamé d'or, n'aimant personne: ce meschant Roy, en vices endurcy (car voila vne partie des titres qu'il luy baille) Ne voyez-vous pas ses deportemēs, ceux de sa mere, de son frere, de ses autres conseillers que ie vien de descrire: attendez-vous à voir d'auantage de signes du ciel? ou plus de tesmoins en la terre de son infame desloyauté? comme s'il disoit, Vous ne sçauriez. Aseure-toy Alithie, que Ronfard est merueilleusement subtil, il sçait bien pinser sans rire.

*Ali.* Ouy pour le seur: Que ie seroy' aise qu'on entendist bien son discours, pour estre esmeus



chacun en son deuoir. Mais ie ne vouldroy pas que le tyran sceust qu'il eust escrit quelque chose de luy, sous quel que escorce que ce soit: sans doute il le feroit mourir, ou pour le moins il l'en feroit desdire par force, cōme il a fait escrire à monsieur de Puybrac par viue crainte, & avec la promesse d'une abbaye, vne epistre en Latin à Stanislaus Heluidius Polonois, pour donner couleur à sa trahison du 24. d'Aoust.

*Le pol.* Tu dis vray, l'ay veu ceste lettre dont tu parles, ie ne pensoy pas que ce fust Puybrac qui l'eust faite: il ne s'est osé nommer de honte le poure homme. Mon Dieu, que ie le regrette! il n'a gueres profité iusqu'à present, avec tous ses escrits enuers les Polonois: tout le monde cognoist desja par trop la trahison de celuy, à la louange duquel il s'est efforcé d'escrire. Il ne faut auourd'huy que les traicts que tu m'as recité de Ronfard, pour faire deuiner que c'est, & de qui il parle: & si l'Historiographe met en lumiere ce qu'il en sçait, comme il nous le vient de racompter, cela est trop plus que suffisant pour mōstrer à tous gens de bien, la preudhommie des meurtris, & la felonnie des meurtriers.

*L'hist.* Ne doute pas que ie ne le publie, avec toutes les circōstances des tours qu'ils ont ioué pour surprendre ces pources gens: les lettres, les menees plus secretes, les larmes feindtes, les mots couuerts: tout sera deduit par le menu. L'arrest du parlement aussi qu'ils ont donné contre l'Amiral long temps apres sa mort: & celuy contre Briquemaut & Cauagnes, ie n'en oublieray rien  
Dieu

Dieu aidant.

*L'egl.* Que dis-tu de l'arrest contre l'Amiral, & de celuy contre Briquemaut & Cauagnes?

Je ne t'entens pas: y a-il quelque arrest donné contr'eux?

*L'hist* N'en scauez vous autre chose?

*L'egl.* Non.

*L'hist.* Je vous diray. Apres la mort de l'Amiral, & le massacre fait sur les Huguenots dans Paris le 24. d'Aoust: le 26. ensuyuant le Roy (comme ie vous a y dit) alla au palais de Paris: & là faisant, aduoua tout le massacre auoir esté fait par son aduis, & propre mouuement, commandant que lon informast de la conspiration qu'il auoit fait mettre à sus à l'Amiral, avec les tesmoins qui seroyent trouuez les plus propres. Ce commandement & arrest fait, la cour de Parlement (apres auoir dit que le Roy auoit bien & vertueusement fait, en faisant meurtrir les Huguenots) deputa commissaires, fit informer parmi les tueurs, forma le procez au meurtri, & pareillemēt à Briquemaut & à Cauagnes (qui furent faits prisonniers en ces iours-la de massacre, & reseruez pour seruir de bonne couuerture à quelque solénelle execution, qu'il leur sembloit deuoir estre faite par les voyes de iustice ordinaires.) Il s'ensuyuit en fin arrest, par lequel (veues par la chambre ordonnée par le Roy en temps de vacations, les informations faites apres la mort, interrogatoires, confessions & denegations de quelques prisonniers, & les autres papiers qu'ils voulurēt dire auoir veus) ledict Amiral fut declaré auoir esté crimineux de



lese maieſté, perturbateur & violateur de paix, ennemy de repos, tranquillité, & ſeureté publique: chef principal, autheur & conducteur de ladiſte conſpiration, faiſte contre le Roy & ſon eſtar: Sa memoire damnee, ſon nom ſupprimé à perpetuité. Et pour reparation deſdicts crimes, ordonné que le corps dudiſt Amiral ( ſi trouuer ſe pouuoit, ſinon en figure) ſeroit prins par l'executeur de la haute iuſtice, mené, conduict & trainé ſur vne claye, depuis les priſons de la conciergerie du Palais, iuſques à la place de Greue: & illec pendu à vne potence, qui pour ce faire ſeroit dreſſee & erigee deuant l'hoſtel de ville, & y demeureroit pendu l'eſpace de vingt & quatre heures: Et ce faiſt, ſeroit porté & pendu au gibet de Montfaucon, au plus haut & eminent lieu. Les enſeignes, armes, & armoiries dudiſt feu Amiral, trainez à queues de cheuaux par les rues de Paris, & autres villes, bourgs & bourgades où elles ſeroyét trouuees auoir eſté miſes à ſon honneur, & apres rôpues & brisees par l'executeur de la haute iuſtice, en ſigne d'ignominie perpetuelle, en chacun lieu & carrefoux, où lon a accouſtumé faire cris & proclamations publiques. Toutes les armoiries & pourtraictures dudiſt feu Amiral, ſoit en boſſe, ou peinture, tableaux, & autres pourtraits en quelque lieu qu'ils ſoyent, caſſez, rafez, rompus & lacerez: Enioignant à tous iuges Royaux, de faire executer chacun en ſon reſſort pareille laceration d'armoiries, & à tous ſes ſuiets du reſſort de Paris, de n'en garder ou retenir aucunes: Tous les biens feudaux dudiſt feu Amiral mouuans de  
la



la couronne de France , reunis & incorporez au domaine d'icelle , & les autres fiefs & biens tant meubles qu'immeubles , acquis & confisquezz au Roy declarant les enfans del'Amiral, ignobles, vilains, roturiers, infames, indignes & incapables de tester, ne tenir estats, offices, dignitez & biens en France : lesquels , si aucuns en ont , ladicte chambre declaroit acquis au Roy : Ordonnant que la maison seigneuriale & chastel de Chastillon sur Loin , qui estoit l'habitation & principal domicile dudit Coligny, ensemble la basse cour, & tout ce qui depend du principal manoir, seroient demolis, rasez, & abbatus, & deffendu de iamais y bastir, ny edifier : & que les arbres plantez es environs de ladicte maison & chastel, pour l'embellissement & decoration d'icelle , seront coupezz par le milieu : & en l'aire dudit chasteau, vn pillier de pierre de taille erigé, auquel seroit mise & apposee vne lame de cuyure, en laquelle seroit graué & escrit ledict arrest : & que doreseuuant par chacun an le 24. iour d'Aoust, seroyent faites prieres publiques & processions generales dans Paris, pour rendre graces à Dieu de la punition de la conspiration faite contre le Roy & son estat. Le semblable & pareil arrest (excepté quant à ceste derniere clause, touchant le demolissement de la maison) fut donné contre Briquemaut & Cauagnes. Si furent lesdicts arrests prononcez & executez le 27. & 29. d'Octobre, 1572. l'vn sur vn fantosme au lieu du corps del'Amiral (lequel auoit pieça esté emporté de Môtfaucou, & dependu par quelques vns qui l'auoyent re-

ueré en son viuant.) Et fut l'autre arrest executé sur les personnes propres desdicts Briquemaut & Cauagnes, en la presence du Roy qui les voulut voir mourir: eux protestâs du tort qu'on leur faisoit, & en demandant vengeance à Dieu.

*L'egl.* Je puis bien dire maintenant avec Dauid, parlant de la meschanceté des ministres de Saul, & de leur iniquité & iniustice.

Entre vous conseillers, qui estes  
Liguez & bandez contre moy,  
Dites vn peu en bonne foy,  
Est ce iustice que vous faites?  
Enans d'Adam, vous meslez-vous,  
De faire la raison à tous?

Ainçois vos ames desloyales  
Ne pensent qu'à meschanceté,  
Et ne pesez qu'iniquité,  
En vos balances inegales.

Car les meschans dès qu'ils sont nez  
Du Seigneur sont alienez.

*Ali.* Les iugemens de Dieu sont grands: Mais ie veux bien dire en passant (sans entrer aux particulieres occasiōs de courroux que tous hommes donnent à Dieu par leurs pechez, & sur tous, ceux qui scauent la volonté du maistre & ne la font, car cela est immense) qu'il ne se pouuoit faire, que le Seigneur ne fust merueilleusement emeu à ire, de ce que les Huguenots (comme s'ils eussent perdu toute souuenance des bien-faits de Dieu, qui seul les auoit iusqu'à lors conseruez: voire tant de fois & par miracles tant extraordinaires retirez d'extremes perils) n'auoyent les yeux ny l'espe-  
rance

rance d'aucun repos ou felicité, que sur le mariage du roy de Nauarre (comme s'il eust esté le sauueur de l'Eglise) ayans bien quelque peu, voire trop legerement insisté sur la forme, mais sur la matiere nullement.

*L'egl.* Il est certain: Et ceste faute me poise beaucoup: Mais cependant j'ay tant d'assurance de la loyauté de mon espoux, qu'il ne laissera d'accomplir le contract de nostre alliance: ce qu'il a esté, il est, & sera à iamais.

*Ali.* Il faut tenir ceste resolution, & s'y consoler: que Dieu est tout sage, tout bon, tout puissant, & ialoux de sa gloire, & partant qu'il ne veut rien perdre du sien: & qu'estant la mesme verité, il ne defaudra vn seul iota de sa parole, à sçauoir de ses promesses enuers ses enfans, & de ses iugemens enuers ses ennemis, & le temps est pres.

*L'egl.* Mais surquoy est-ce ie vous prie que ces meschans ont pris leur argument pour tout rauager & destruire, qu'elle occasion en auoyent-ils? car de ceste conspiration qu'ils ont imposée aux mieux, c'est vne couuerture si sotté qu'on y voit le iour au trauers.

*Ali.* Je ne sache point qu'ils ayent eu autre occasion de ce faire, que celle que Cain eut en tuant Abel, celle d'Herode en faisant meurtrir les enfans. Et tout pour ensuyure les loix qui estoient bien au long couchees dans les memoires qu'on bailla à l'Amiral deuant les nopces, que pleust à Dieu qu'il les eust creues, & que quelque iour tout le reste des gens de bien y prene garde pour euitier à leurs surprises.



*Le pol.* L'historiographe sçait bien les principaux poincts sur lesquels la Royne-mere, qui tient ses enfans dans la manche, & la France dessous ses pieds, auoit voulu prendre subiect de se forger vne haine irreconciliable contre les Huguenots.

*L'hist.* Pource qu'il seroit trop long de reciter à present tous les particuliers incidens de ceste matiere, ie remettray à les deduire ailleurs amplement: & pour ceste heure vous diray, que rien ne l'a tant piquee contre les Huguenots, que la publication de ses lettres en pleine diette de Francfort (en la presence de l'Empereur Ferdinand, & de son fils à present Empereur) Je dy l'original, escrit & signé de sa main, par lesquelles elle auoit fait prendre les armes au prince de Condé aux premiers troubles, & dont par consequent il estoit tout apparent, qu'elle auoit allumé le feu en France.

Et pour de tant plus legitimer sa vengeance, elle s'est voulu persuader, qu'autres que les Huguenots n'auoyent publié son impudicité: Et que la reputation qu'elle auoit d'estre forcieri venoit d'eux, ce qu'elle ne pouuoit souffrir escouler de sa memoire: mesmement que par leurs escrits elle cognoissoit bien, qu'il ne tiendrait à eux qu'ils ne luy tiraissent le gouuernement & autorité des poings: Qu'elle cognoissoit bien aussi, que l'Amiral n'oublieroit iamais les tours qu'elle luy auoit faits, & partant le vray expedient de leur oster (aux vns en general le moyen de luy mal faire, & à l'autre en  
par-

particulier de se ressentir) c'estoit de tout exterminer, par les voyes que nous auons touchées au commencement de nostre discours, se confirmant en ce dessein par plusieurs autres impressions, qui d'elle-mesme & d'ailleurs luy suruenoyent tous les iours : mais sur toutes, celle qui est successiue & à sa maison, & à sa nation, à sçauoir, de hayr à mort ceux qu'une fois ils ont offensés, & qu'il ne se faut reconcilier à vn ennemy, que pour le destruire.

Ce qui l'irrita aussi bien fort, fut vn tableau de quatorze seruiteurs secrets de la Royne, entre lesquels le Peron tenoit le premier reng peints au vis avec elle. Lequel le Cheualier de la Batteresse supposa vn iour (ainsi que l'on m'a dict) au lieu d'un dessein de sa maison des Tuyleries, qu'il trouua sur le liçt de l'antichambre de la Royne, & l'enleua subtilement, logeant en sa place le tableau, lequel tost apres fut veu au grand regret de la Dame & detrimet de sa bonne renommee.

*Le pol.* Mais pourquoy est-ce que la Batteresse fit ce tour-là.

*L'hist.* On m'a dict que ce fut par despit, & à cause de la ialousie qu'il auoit conçu de se voir postposé à tant de vilains, de voir (di-ie) qu'il n'auoit peu estre receu en mesme charge avec ces quatorze, luy qui comme bon & beau estalon pensoit l'aucir mieux merité.

Ceste supposition de tableau enuenima fort la Royne contre les Huguenots, qu'elle cuydoit luy auoir ioué ce tour.

Pareillement elle s'est fort offensée de certaine Rithme, parlant des Roynes Fredegonde & Brunehaut, & de Iezabel & Catherine, & la monstrant estre pire que Iezabel ne fut iamais: pour ce qu'elle a tousiours creu que ces bons offices luy estoient faits de la part des Huguenots: Je m'en vay te reciter les vers,

Si France pure de loix,  
 Pleine d'equité & droiture,  
 A souffert tout à la fois  
 Ruine & desconfiture  
 Par la Royne Fredegonde  
 Mastinant le François monde  
 Auec son Landry infect,  
 S'elle a esté en effect  
 Foulee par Brunehaut,  
 Iezabel qui moins ne vaut  
 Et son estalon Gondy  
 Qui de plein sault a bondy  
 Plus haut que nul de nos Princes,  
 Pourquoy parmy nos prouinces,  
 Maintenant qu'il n'y a loy  
 Ne coustume qui se garde,  
 Maintenant qu'il n'y a foy  
 Ny estats qui les engarde,  
 Ne feront-ils de rauage  
 D'oppression & carnage?  
 Parle qui parler voudra  
 Tant que Iezabel voudra,  
 Mais que dy-ie Iezabel,  
 I'entens dire Catherine  
 Qui la grand tour de Babel

Confu-



Confusion & ruine  
De la maison de Valois  
A basty comme tu vois  
Aux quatre coings de la France,  
Et qui est mille fois pire,  
Ainsi que tu m'orras dire,  
Que ne fut onc Iezabel,  
Qu'il soit vray, le fait est tel.

Sympathie de la vie de Catherine & de Iezabel,  
avec L'antipathie de leur  
mort.

S'on demande la conuenance  
De Catherine & Iezabel,  
L'une ruine d'Israel,  
L'autre ruine de la France:  
Iezabel maintenoit l'idole  
Contraire à la sainte parole  
L'autre maintient la Papauté  
Par trahison & cruauté:  
L'une estoit de malice extreme,  
L'autre est la malice mesme:  
Par l'une furent massacrez  
Les prophetes à Dieu sacrez:  
L'autre en a fait mourir cent mille  
De ceux qui suyuent l'Euangile:  
Iezabel pour auoir son bien  
Fit mourir vn homme de bien:  
L'autre n'est encor' assouuie  
S'elle n'a les biens & la vie:  
En fin le iugement fut tel,  
Les chiens mangerent Iezabel,

Par vne vengeance diuine:

La charongne de Catherine,

Sera differente en ce poinct:

Les chiens mesmes n'en voudront point.

Voila à mon aduis les choses qui ont ainsi fait enrager ceste bonne dame. Et penfes-tu si elle ne sçauoit au vray que Ronfard a faict les autres vers qu'Alithie recitoit tantost d'elle & de ses enfans, qu'elle ne creust que c'est quelque Huguenot qui la gallope de la forte, quoy qu'elle donne avec les siens par trop d'argument aux Papistes de crier aux armes contre eux.

*Al.* Je le croy bien. Mais encore ne touchez-vous point à la vraye matiere qui l'a reduite à ces furieuses idees. Tenez pour certain, que ceux qui vomissent comme elle, le don celeste (à sçauoir la cognoissance de Dieu en son Fils Iesus Christ qui est sa parole) & malicieusement se bandent contre la verité qu'ils cognoissent, ne trouuans aucun lieu de repentance, sont tellement abandonnez de Dieu, qu'ils entrent aisément en ceste rage canine, qui les fait mordre & deuorer tout ce qu'ils rencontrent.

*Phil.* Vous m'avez fait souuenir d'un sonnet qui fut fait pour elle y a enuiron cinq ans, sur ce subiect, lequel i'ay retenu par cœur, & ie le vous reciteray presentement:

Lors qu'un zele bastard, enfant de l'ignorance

Ton Henry furieux incitoit à pourluyre

Par feu, sang & tourmens, ceux qui desiroient  
viure

En la crainte de Dieu sous son obeissance,

Lors

Lors d'une voix commune on bruyoit en la France  
Que (du monde caduc ta pensée deliure)  
Des mains, des yeux, du cœur, sans cesse au sacré  
Lure

Tu recherches de Dieu la vraye cognoissance:  
Mais ayant saouuré par ton libre vefuage,  
L'imperieux honneur, nay de ton mariage,  
Il ne faut s'estonner (aussi n'est-il estrange)  
Si lon t'a soudain veu deschoir de telle grace:  
Car la truye a de propre & tient cela de race,  
De retourner au baing de sa premiere fange.

*Le pol.* Je vous laisse à penser de quel naturel peu-  
uent estre ses enfans, qui sont nourris de son lait,  
& dressez de sa main. Et en cela remarquez la lourde  
faute que firent ceux qui auoyent puissance d'y  
pouruoir apres la mort du roy Henry, qui au lieu  
de s'en saisir (pour les faire instituer en toutes ver-  
tus) luy en laisserent le gouuernement, pour en fai-  
re des exemplaires de toute desloyauté & execra-  
tion: & pour le comble de tout malheur, elle les a  
faits instrumens de leur ruine, de l'estat & de la  
couronne dont elle a receu tant d'honneur.

*Phi.* C'est vne chose estrange, que d'ouyr les pro-  
pos que le Roy tient, & de l'endurcissement que  
Dieu a mis en luy: en sorte que si Dieu ne luy re-  
tardoit ses malheureux desseins, le sang de son peu-  
ple regorgeroit iusques aux sommets des monta-  
gnes, si tant il en pouuoit respandre.

*Ali.* Dieu pour certain est courroucé, & pour l'ap-  
paizer, faut s'humilier deuant luy, autrement qu'on  
n'a fait par le passé: & que les discours & iugemens  
humains cedent aux siens, se resignant & ayant



recours à sa bonté & prouidence, par prieres continuelles & ardentes, avec assurance qu'il a la volonté & la puissance de deliurer les siens quand il sera temps.

*L'egl.* O Seigneur, mets ce tyran en la puissance d'un meschant, qui ne s'estudie qu'à le tourmenter: Que Satan soit tousiours à ses costez. Fay que luy & ses bourreaux conseillers & satellites, soyent par toute la terre recognus pour tels qu'ils sont. Accourcy leurs iours, & pouruoy, ô Dieu, en leur place, de gens qui soyent selon ton cœur. Que leurs enfans soyent orphelins, leurs femmes veufues: Les leurs vagabons & errans soyent dechassez de leurs maisons, cerchans leur pain, sans que personne s'auiſe d'estendre sa misericorde sur eux. L'vsurier attrape leurs biens, & l'estranger leur substance. Leur posterité soit ostee du monde, le nom, dy ie, de ce tyran soit aboli de la terre. Que l'iniquité de ses peres soit continuellement deuant toy, & n'efface point les pechez de sa mere: d'autant que tant s'en faut qu'ils ayent eu souuenance d'aider le poure en son aduersité, qu'au contraire ils n'ont tendu qu'à tourmenter les personnes oppressees, lassees, chetiues, & angoissees, iusques à leur pourchasser la mort, voire apres la mort les poursuyure.

Ils ont aimé la mal-encontre,

Fay donc, Seigneur, qu'ils la rencontrent:

La bonne-encontre ils ont haye,

Que d'eux bonne-encontre s'enfuye.

Soyent entortillez de tous maux ainsi que d'un habillement: Mais aide moy mon Dieu, mon Roy,  
& par

& par ta bôté sauue moy : Car Seigneur, ie remets en toy & moy & mon affaire ; n'ayant esperance qu'en ta bonté, & attendant ta iustice sur les peruers & iniques. Accompli & parfay ton œuvre, Seigneur. Mets en veue la preud'hômie des tiens, afin que leur innocence & bonne vie reluise & apparoiſſe comme tu l'as promis. Que ſi (comme il peut eſtre, & toy ſeul le cognois Seigneur) il y a quelques vns de tes enfans meſlez parmi ces deſloyaux, comme nous auons iadis veu Paul tō vaiſſeau eſleu perſecuter les tiens auant ſa conuerſiō: Abbrege les iours, Seigneur, haſte le tēps de leur vocation, afin que paraenture ils ne ſoyent compris ſous meſmes iugemens, & periſſent parmi les faux vieillards de Suſanne. Suscite ton Daniel, Seigneur, pour la iuſtification de ta ſeruante, & nous exauce pour l'amour de Ieſus Chriſt ton Fils noſtre Seigneur.

*Ali.* Adonc tous pleins d'eſiouiffance

Tes enfans qu'on a oppreſſez,

Voyans deſrompus & caſſez

Les peruers par iuſte vengeance,

Dedans le ſang ſe baigneront

De ces meſchans, & puis diront:

L'innocent ne perd point ſa peine,

C'eſt vn poinct du tout arreſté,

Quoy que le iuſte ait endure,

C'eſt vne choſe bien certaine

Qu'il eſt vn Dieu, qui iuge icy,

Les bons & les mauuais auſſi,

*Dan.* Ie ſuis innocēt de cē ſang reſpandu : Et pour dire ce qu'il me ſemble d'vne telle perſidie &



cruauté & d'un si peruers iugement : Apres auoir  
veu pieça (cōme aussi tout le monde a peu voir)  
la confession de foy de ces vieux Lutheriens Frâ-  
çois qui aimoyent mieux endurer tous tourmens  
que de rié quitter de la cognoissance que le saint  
Esprit leur auoit donné, de Dieu le Pere en nostre  
Seigneur Iesus Christ, laquelle ils recognoissent  
estre le souuerain bien de l'homme, le salut eter-  
nel, sans lequel la condition des hommes seroit  
plus miserable que celle des bestes brutes : Et a-  
uoir veu que nul ne leur pouuoit arracher ceste e-  
sperance, Que nulle tribulation, angoisse, persecu-  
tion, faim, nudité, cousteau, ny feu, ne les pouuoit  
separer de l'amour de Christ, quoy qu'ils fussent  
pour ceste seule occasion tous les iour tuez, re-  
putez comme brebis de la boucherie, voire sans  
comparaïson plus rudement traitez : estans iour-  
nellement bruslez tous vifs à petit feu, & leurs lâ-  
gues coupees, pour les garder de donner gloire  
à Dieu deuât le peuple, estans en tout & par tout  
pour le dire en vn mot, mastinez en leur honneur,  
vie & biens, comme les plus detestables hereti-  
ques qui furent onques, & declarez criminels de  
leze maïesté diuine & humaine, ainsi que plus à  
plein appert tant par les procès, procédures & ar-  
rests sur ce faits, reseruez iusques à maintenât rière  
les greffes des Parlemens, & des autres iuges de  
la France, que par les actes & confession de foy  
d'un grand nombre d'eux redigez par escrit es li-  
ures des martyrs & tesmoins de la verité.

Auoir veu aussi que pour vn de ces Lutheriens  
qu'on brusloit, vn grand nombre d'hommes, fem-

mes



mes & enfans garnis de meſme foy & eſperance, en eſtoit ſuſcit   iournellement: tellement que les cendres de leurs corps bruſlez & leur ſang reſpandu, ſembloit ſeruir    veue d'  il de ſemence    l'E-gliſe : Et que nonobſtant cela, on ne laiſſoit pas de touſiours bruſler iuſques    ſ'en prendre    la Sainte Eſcriture, au vieil & nouveau Teſtament, qu'on n'auoit pas honte de bruſler ſ'il eſtoit trouu   eſcrit en langage que le peuple peult ent  dre, penſans arracher par ce moyen    aucuns d'eux les armes du po  ing, le bouclier de leur foy & le heaume de leur ſalut : & aux autres, en empeſcher du tout la cognoiſſance.

Ve   pareillement la confeſſion de leur foy, que le prince de Cond   ayant compaſſion d'eux, pour les tourmens qu'on leur donnoit & les blaſmes qu'on leur mettoit    ſus, voulut preſenter en eſcrit au Roy Fran  ois ſecond    Amboyſe, afin qu'elle fuſt examinee de gens doctes par la ſainte Eſcriture, & que la rigueur des feux qu'on allu-moit iournellement contr'eux fuſt moderee & faite ceſſer.

Ve   auſſi la confeſſion de foy que les Hugue-nots pr  ſenterent au Roy Charles 9. au colloque de Poiſſy, laquelle fut diſputee & maintenue publiquement par les miniſtres du ſainct Euangile, contre les Cardinaux, Eueſques, & Docteurs de la Papaut  , en la preſence dudit Charles, & ſa mere, ſes freres, des Princes & Seigneurs de ſon conſeil, laquelle fut traduite & imprimee en pluſieurs langues, & qui eſt entre les mains de tous ceux qui la veulent voir, conforme en tout & par tout   

la parole de Dieu, contenue au vieil & nouveau Testament, & au symbole des Apostres.

Auoir veu aussi l'Edict fait tost apres ce colloque de Poissy au mois de Ianuier en l'an 1561. par Charles, du conseil de sa mere, de tous les Princes & Seigneurs de son conseil, & d'un grand nombre de Presidents & Conseillers de toute la France, qui pour ce furent assemblez: par lequel Edict les feux & recherches cõtre ces pources gens furēt cessez, leur conscience delaissee en liberte (selon la confession de leur foy) à eux permis de faire prescher l'Euangile & administrer les Sacremens en leurs assemblees, es fauxbourgs des villes de France, par leurs Ministres à ce appelez, ordonnez, & esleus, comme plus à plein, es patentes sur ce faites (qu'un chacun a peu voir) est escrit & contenu.

Consideré aussi le massacre fait à Vassy contre la teneur de cest Edict sur les Huguenots, iouyssans en paix du benefice d'iceluy: La requeste que le duc de Guise, le Connestable, & le Marechal saint André presenterēt peu de temps apres (les armes au poing) au Roy Charles, tendant à exterminer ceste religion-là, & ceux qui en faisoient profession: les lettres que la Roynie, mere du Roy, en ces entrefaites rescriuit de sa main au feu prince de Condé, luy commandant de s'armer & faire armer le plus d'hommes qu'il pourroit pour s'opposer aux desseins de ces trois, & de leurs adherans, qui tenoyent l'enfant & la mere captifs: Le secours que la Roynie d'Angleterre & les princes d'Allemagne donnerent lors aux Huguenots, & tout ce qui s'en est ensuiuy iusques au mois de

Mars



Mars 1561. Veu & considéré aussi l'Edict de pacification alors fait, confirmatif de celui de janvier, leur permettant outre plus, qu'ils peussent avoir l'exercice de leur religion d'as quelques villes : Les restrictions & violemens dudit Edict de Mars faites en apres par le Roy & son conseil, sous titre de declaration de l'Edict : Les menees faites durant cinq ans par la mere de Charles, les Lorrains, & autres de leur faction : L'obeissance des Huguenots : La creance, nourriture & leçon, que la mere a donné & fait donner ce temps-pendant à ses enfans : L'entreueue & parlemēt de la mere, de sa feu fille d'Espagne, & du duc d'Albe à Bayonne, leur deliberation & promesses : Les leues de Suysses faites par Charles en l'an 1567. Le peu de compte qu'il tenoit des plainctes & remonstrances des Huguenots, qu'on tuoit & outrageoit en beaucoup d'endroits de la France : La guerre ouuerte pour les exterminer : Le secours que les princes d'Allemagne Protestans leur enuoyerent, sous la conduite du duc Jean Casimir : Ce qui s'est passé en ceste guerre-là : L'Edict fait & publié pour la pacifier au mois de Mars 1568. La rupture de cest edict tost apres faite par Charles & ses forces : La fuite du Prince de Condé, de plusieurs autres Huguenots, & de leurs familles, qui faillirent à estre attrapez dans leurs maisons par les infracteurs des Edicts de la paix & foy publique : Le secours que le duc de Deux-pōts pour le commun lien de religiō d'ōna aux Huguenots : Les batailles donnees en toutes ces guerres-là, principalement la bataille de Jarnac, où le prince



de Condé fut fait prisonnier, & puis tué de sang froid, par commandement du duc d'Anjou : La charge de l'armée des Huguenots par eux remise (après la mort du Prince de Códé) entre les mains de l'Amiral, sous l'autorité des ieunes Princes de Nauarre & de Condé. L'Edict de pacification de ces troubles fait par Charles & son conseil, avec toutes les solemnitez requises le 22. iour d'Aoust 1570. Les promesses & iuremens solénels faits par Charles, les Seigneurs de son conseil, tous les parlemens, gouuerneurs & ministres de la iustice de France, de le garder inuiolablement & à iamais: Les outrages, violences, & iniustices faites presque par toute la Frâce aux Huguenots, durant deux ans depuis ledict Edict : Le semblant que Charles faisoit de vouloir faire chastier les seditieux & perturbateurs de paix & repos: Les menées que luy & sa mere ont fait, pour faire venir à leur cour la royne de Nauarre, son fils, ses nepueux, l'Amiral, & autres seigneurs & gentils-hommes Huguenots : Les nopces du Roy de Nauarre avec Marguerite sœur de Charles : La blessure de l'Amiral faite le dernier iour des deux ans après la paix dernière : Le meurtre d'iceluy Amiral, & de tant de seigneurs gentils-hommes, & autres, tant hommes, femmes, que petits enfans Huguenots, massacrez inhumainement dans Paris, le Dimanche 24. iour d'Aoust 1572. & autres iours ensuyuans: les cruels massacres, violences, & rauissemens faits en plusieurs villes & endroits de la France, & ceux qu'on fait iournellement, sur la cōscience, honneur, vie & biés des Huguenots:

les

les armées & forces que Charles assemble , pour en exterminer la memoire dessus la terre.

Veu pareillement l'arrest donné par Charles & par son parlement de Paris , contre l'Amiral: l'arrest contre Briquemaut & Cauagnes, & tout ce qui fait à voir : ayans ouy sur beaucoup d'autres particularitez l'Historiographe , le Politique , & plusieurs autres tesmoins dignes de foy: & sur tout cela, escouté les plainctes , requestes , & prieres treshumbles de l'Eglise , laquelle nous scauons auoir tousiours auparauant prié bien & affectueusement pour la conuersion de ses ennemis, conseruation & accroissement de leur estat & grandeur, pendant qu'elle y a veu quelque esperance d'amendement. Le tout bien considéré, Nous auons dit & disons, que les Lutheriens & Huguenots de la France, n'ont tenu, comme ils ne tiennent, aucun erreur ne proposition fausse en matiere de la foy & religion: ains tiennent la pure, vraye, & sainte doctrine Chrestienne, que la vraye Eglise catholique ( de laquelle Iesus Christ est le chef ) a tenu & confessé, tient & confesse, avec tous les saints martyrs qui sont morts pour la sceller de leur sang : la mesme ( à qui bien l'entend ) que les Eglises d'Allemagne, d'Angleterre, d'Ecosse, de Suede, de Dannemarc , de Noruege , de Suyse , & tous autres esleus & enfans de Dieu tiennent & confessent, ayans ensemble mesmes marques & sacremens, ainsi qu'il appert suffisammēt à tout homme, qui sans passion, pour seulement donner gloire à Dieu, y regardera de pres. Qu'ils ont puisé & tiré ceste doctrine des saintes Escritures du



vieil & nouveau Testament, lequel les ennemis de Dieu ont tasché & taschét iournallemēt (mais en vain) d'abolir & esteindre: Ayant esté arresté au conseil eternal de Dieu, que les cieux & la terre passeront, mais sa parole demeurera eternellement, quelque persecution que les ennemis de Dieu, en haine de la verité, dressent à l'encontre de ceux qui en font professiō, lesquels plus on les pressera, plus ils croistront, comme vn Israel en Egypte: & au contraire, Toute plante que le Pere n'a plantee, toute fausse doctrine, & ceux qui la maintiennent & fauorisent, seront arrachez de dessus la terre. Partant sont exhortez tous enfans de Dieu, de constamment perseuerer; & continuer en mesme foy & esperance iusqu'au dernier soupir de leur vie, en adioustant autant que faire se pourra à ces deux, la charité pour compagne, sans laquelle la foy est incognue & morte.

Ce faisant qu'ils ne doutent nullement, quoy qu'il leur auiene de sinistre en ceste vie, que le Pere celeste ne les face participās en l'autre, des choses que l'œil ne sçauroit voir, l'oreille ne sçauroit ouyr, & l'entendement de l'homme ne pourroit comprendre, que Dieu a preparees deuant la constitution du monde à ceux qui l'aiment & le craignent: là où au contraire, les iniques, infideles & desloyaux, serōt logez és prisons perpetuelles, où il y aura tenebres, grincement de dents, & peines (pour le dire en vn mot) infinies: lors qu'ils diront, Ne sont-ce point ceux-là desquels la vie nous sembloit tant infame, & leur fin tāt malheureuse? Nous insensēz! He, comment sont-ils logez



gez en telle gloire? comme leur est escheue leur portion parmi les Saints?

Quant aux arrests de Charles & de son parlement de Paris, dōnez cōtre l'Amiral, Briquemaut & Cauagnes, nous les auons declarez & declarōs iniquement, injustement, & desloyalement faits & donnez, & sur fausses, desloyales & impudētes calomnies, lesquelles les peruers ont accoustumē de prendre pour pretexte de leurs cruantez, ainsi qu'il appert euidemmēt en yn seul exemple pour tous: sçauoir est, en la mort cruelle & ignominieuse que les Prestres de la Loy, les Scribes & Phariſiens, voire le grād Sacrificateur mesme, & le peuple de Ierusalē, ont fait souffrir à nostre Seigneur Iesus Christ autheur de vie, le pendāt entre deux larrons en croix, lui imposant qu'il estoit yn seducteur & perturbateur d'estat, & qu'il se vouloit faire Roy, quoy qu'il marchast en toute mansuetude & de bonnairētē, faisant au beneficc de la nation des Iuifs des continuels miracles deuāt leurs yeux, & n'estant venu que pour leur conuersion & salut. Or le disciple n'est pas par dessus le maître, s'ils l'ont persecutē, aussi vous persecuteront-ils. Au reste, entant que touche ceste persecution (du mois d'Aoust & depuis en çà, faite sur l'Amiral & sur les autres fideles) nous auons dit & disons, que c'est la plus horrible, la plus estrange & detestable conspiratiō, la trahison la plus poltrōnemēt menee, la desloyautē proiettee de plus loin & le massacre le plus barbare, qui ait esté ouy dēs que Cain en trahison tua son frere Abel le iuste iusques à maintenant. Et ne sçachant trouuer

nom propre & conuenable à Charles, à sa mere, son frere, à ses conseillers, fauteurs, iannissaires, & autres seruants : Nous disons pour maintenant (en attendant qu'ayons rencontré des termes assez significatifs pour exprimer le fait) qu'ils ont effacé la gloire de tous les tyrans les plus horribles : & des traistres les plus felons qui ont esté, sont, & seront à iamais, comme tels les auons banni & bannissons à iamais eux & toute leur posterité, de toute la société humaine. Ordonnant que d'oresenauant sera faite tous les vingtquatriesmes iours des mois de l'an, memoire solennelle (en execration de leur abomination) du massacre fait le 24. d'Aoust & autres iours ensuyuans, sur les Eglises Françoises, vrais membres de l'Eglise catholique, de laquelle ces tyrans se vantent en vain n'en tenás ny marque ny enseigne, & n'ayás pour toute religion, que le blasphemé en la bouche, & l'atheisme enraciné en leur cœur.

**QVE** ledict iour du massacre 24. d'Aoust sera à iamais nommé, La Journée de la Trahison, Et le Roy (comme plusieurs de ses predecesseurs ont esté surnommez l'un debonnaire, l'autre pere du peuple &c.) sera appelé Charles le Traistre, & aura pour blason par l'anagramme de son nom, Chasseur Déloyal.

Et faisant droit sur la requeste & priere de la dicte Eglise, touchant Charles, son parlement, & autres mancipés de sa tyrannie, nous osons hardiment asseurer, que sadicte requeste, & toute autre qu'elle a fait & fera, sera exaucée, pour l'amour de sô chef le Fils de Dieu, lequel ne pourfuyura pas moins,



moins cest outrage, que s'il estoit fait à sa propre personne: ayant vne fois déclaré, que qui la touche, touche la prunelle de son œil. Partant est enjoint à l'Eglise, & à tous ses membres suruiuans, d'attendre en toute patience l'aduenemēt du Seigneur, Ayans souuenance que Ierusalem, apres le meurtre fait en la persōne de nostre Seigneur Iesus Christ (d'autant que la végeance tardoit à venir, cuidant estre eschappee & à deliure) se sentit raser iusques aux fondemens, & vit dissiper & destruire sa nation quarante ans apres, par l'armée des Romains, desquels neantmoins (en mettant à mort Iesus Christ) ils sembloient pourchasser l'amitié & la bonne grace. Qu'ils se souuiennent aussi que le premier monde moqueur & prophane, apres auoir mesprisé par l'espace de plus de cent ans les admonitions de ce bon patriarche Noé, fut submergé, lors qu'il y pensoit le moins: quand l'Eglise de Dieu (laquelle toute consistoit lors en huit personnes) fut garantie & conseruee, au milieu des flots & des vagues. Qu'Achab & Iezabel sa femme, apres auoir quelque téps regné en persecutant l'Eglise, furēt destruits, eux & toute leur race, par Iehu, que Dieu suscita à cest effet: & d'une infinité d'autres exemples, par lesquels on voit à l'œil que le Seigneur apres auoir fouetté ses enfans, iette les verges au feu. Et pource que (comme le peuuet cōsiderer toutes personnes qui ont quelque sentiment, solide iugement & bon discours) la ligue du Pape, du Roy d'Espagne, & de tous les catholiques Romains, & la particuliere intelligence qui est entre l'Empereur & ses deux



gédres Rois, ne tendét qu'à exterminer tous ceux qui se sont retirez de l'obeissance de l'Eglise Romaine: S'il est ainsi que Iesus Christ n'a qu'une Eglise, dont la pluspart des Allemagnes, d'Angleterre, d'Escolle, Dannemarc, Suede, Noruege, Pologne, Suyse, & generalement tous ceux qui font vraye profession de l'Evangile par toute la terre, sont les membres: s'il est ainsi, dy-ie, qu'ils soyent tous freres en vn mesme esprit, tous d'un corps, membres l'un de l'autre, selon l'intention du Seigneur, qui distribue vne mesme vie à tous les seruiteurs d'un maistre, suiets & soldats d'un Roy & Capitaine Iesus Christ, qui n'a point fait de difference ou distinction des nations en la communication de son salut eternal. Qu'ils sont ensemble la maison du Seigneur, edifiee sur le fondement des Prophetes & Apostres, en vn temple saint, duquel Iesus Christ est la maistresse pierre du coing: Et si derechef il est ainsi, que les bras, les mains, les iambes, & les pieds d'un mesme corps doyvent seruice au chef, & particulierement, secours les vns aux autres, Que les Princes, Princesses, & Potétats qu'il a cōstituez sur les pays ci dessus nommez, qui se disent de l'Eglise Chrestienne, auissent de s'employer tous, à cōposer d'un costé les differens qu'en particulier les vns d'eux ont avec les autres, & d'autre part, à traicter entr'eux tous chaudement (sans marchander à qui cōmencerà, à rechercher les autres, car cela n'est point de l'Esprit de Dieu) & par bonne negociation, vne ligue generale, d'eux, leurs suiets, & pays pour se maintenir les vns les autres, s'opposer aux entre-

prises

prises de l'Antechrist & ses supposts: & se ressentir autrement que par le passé, des outrages faits à leurs freres à l'occasion de la religion, quelque autre pretexte qu'on y puisse auoir donné, Reconnoissans ( avec vsage relatif ) que Dieu ne les a couronnez, ny constituez sur les autres & ( qui plus est ) receus en son Eglise pour leurs beaux yeux, ny pour les entretenir oisieux, gras & en bon point, mais pour seruir à sa gloire, & au soulagement de leurs freres ( ie ne dy pas selon la chair ) Ne doutans nullement que Dieu ne benisse, fortifie, & rende stable, la ligue qui aura vn tel fondement: & en ceste assurance, employent leurs forces & moyës à maintenir l'Euangile & tous ceux qui en font profession, contre la rage de Satan & les siens: & sans tarder ny perdre temps, considerans les langueurs & miseres extremes dont sont poursuivis ceux qui sont sous la tyrannie de l'Antechrist & ses enfans. Et s'il y en a de si aueuglez par l'enforcellement du monde, qui ne vueillent entendre à ceste ligue, le leur annonce au nom de Dieu, qu'ils ne scauroyent par leurs subterfuges charnels & prudences mondaines, euitier vn aspre & horrible sentimēt de iugemens de Dieu ( lequel n'a riē de cōmū avec la chair & le sang, & ne veut point que ceux qui mettent la main à la charrue regardent derriere eux ) & moins avec leurs subtilitez & astuces aux affaires d'estat, euitier ce que leur brasse la ligue cōtraire, de laquelle ils ne peuvent ignorer le but, & la haine cōceüe cōtr'eux: & en fin, fuir qu'ils ne cōparoissent deuant le grand Iuge, deuant lesquelles maximes de Machiaulli,



ny de ses semblables ou disciples, n'ôt aucune valeur. Que pour les defaillans, les autres ne laissent à la faire : & si du tout elle ne se peut, ceux auxquels Dieu aura reserué la plus saine volôté & zele, s'employent autant que leurs moyens se pourront estêdre, à donner tesmoignage de leur pieté: sachans que ( sans rompre la liaison de ce bastiment de l'Eglise, sans offenser la symmetrie de ce corps esleu & precieux, sans en somme commettre vne horrible lascheté ) ils ne peuuent differer de donner à leurs freres, le secours qu'ils voudroyét en pareil cas leur estre dôné. Et si le comâdement qui leur est fait d'assister principalement aux domestiques de la foy, & les exemples des anciens, & de ceux qui en moindre necessité ont secouru aux guerres passées les fideles de la France, ne les esmeuent: qu'ils se souuiennent des menaces qui sont faites en l'Escripture, contre les froids & contre les tiedes. Qui fera l'oreille sourde à la clameur du poure (dit l'Escripture) il criera au iour de la tribulation, & ne sera point exaucé. Allez (dira ce grand Roy au dernier iour) maudits de Dieu mon Pere, au feu eternel qui vous est preparé: J'ay eu soif, i'au eu faim, i'ay esté nud, vous ne m'avez point soulagé, &c. Qu'ils sachent, qu'outre la ruine qu'ils en peuuent receuoir en leurs estats & en leurs maisons priuees, le Seigneur leur redemandera tout le sang de leurs freres qui aura esté respandu deuant leurs yeux, faute d'aide & de secours, par leur nonchallance, dès l'heure qu'ils ont sceu l'affliction de leurs freres, y ont peu remedier & ne l'ont pas fait.

Quant



Quant aux fideles François suruiuās, nous leur auons establi & establissons par le present arrest & iugement, les loix & ordonnances politiques qui s'ensuiuent,

1 Premièrement, que comme les Niniuites à la voix de Ionas, les fideles aussi à la voix de Dieu courroucé, parlant par ses seruiteurs, & ses verges & menaces, publient & obseruent estroitement & sans hypocrisie, par autant de iours que l'Eglise auisera, en chacune cité ou ville, où Dieu les aura retirez, vn saint & chrestien ieusne, qui serue à les humilier, abbatre & matter la chair, & eleuer l'esprit à Dieu.

2 Que par prieres publiques & trefardentes avec vn continuel amendemēt de vie, du plus grād iusques au plus petit, ils facent (comme de nouueau) ainsi qu'au temps de Iosias, paix & alliance avec ce grand Pere de famille irrité pour leurs pechez: & sur ce l'vn avec l'autre conioints par vraye foy & charité, ils annoncent la mort du Seigneur, celebrans sa memoire en l'actiō de la sainte & sacree Cene.

3 Que cela fait, en chacune ville estans assemblez en lieu public, ils iurent pour eux & leur posterité, d'accomplir inuiolablement les loix qui s'ensuyuent, à sçauoir:

4 Qu'en attendant qu'il plaise à Dieu (qui a les cœurs des Rois en sa main) de changer celuy de leur tyran, & restituer l'estat de France en bon ordre, ou susciter vn Prince voisin qui soit manifesté (par sa vertu & marques insignes) estre libérateur de ce pource peuple affligé.

Après le serment fait, ils eslisent avec voix & suffrages publiques en leur dicte ville ou cité, vn chef ou Maieur pour leur commâder, tant au fait de la guerre ( pour leur defense & conseruation) que de la police ciuile, afin que le tout y soit fait par bon ordre.

5 Qu'à chacun desdicts Maieurs ils eslisent vn conseil de 24. hommes, lesquels & pareillement le Maieur, seront pris & choisis sans acception de la qualité, soit des nobles, où d'entre le peuple, tant de la ville que du plat pays, comme ils seront cõgnus propres pour le bien public.

6 Qu'outre lesdicts 24. conseillers qui seront ordinaires avec le Maieur qui sera le 25. y ait 75. hommes esleus, lesquels avec le nombre de cent, qui seront pareillement indifferemment pris tant des habitans des villes, que du plat pays : par deuant lesquels pourront appeller les parties és causes criminelles seulement, c'est à sçauoir, où y auroit condemnation de mort, bannissement, ou mutilation de membres.

7. Que sans le conseil des 24. le Maieur ne puisse resoudre ny faire aucune chose de la guerre ou de la police ( qui peuuent tomber sous deliberation) Et és choses de plus grande importance, le conseil des 25. ne puisse aucune chose determiner sans le conseil des cent, comme pour loy nouuelle, ou abrogation d'ancienne, ordonnance des monnoyes, leuee de deniers, accord de trefues ou paix, & choses directement touchantes au public, & d'importance.

8. Que les choses ordonnees par les chefs & conseils

conseils soyent diligemment exécutees & volontairement, sans aucune cunctation (comme deuant Dieu) sur peine de correction exemplaire.

9 Que tous les ans aux calendes de Ianuier, les 25. se deposent de leurs charges en l'assemblee des cent, & puis demeurans personnes priuees (si non du nombre des cent) par l'aduis d'eux tous, on procede à nouuelle election d'autres : à sçauoir d'un Maieur & 24. conseillers, qui seront choisis comme est dict cy dessus, & dont ne seront exclus ceux qui se seront nouuellement deposez s'il est trouué bon à la pluralité des voix, excepté le Maieur qui ne pourra estre appellé à mesme charge, qu'il n'y ait deux ans d'interualle pour le moins : mais demeurera du nombre des 24. conseillers pour ceste annee, en sorte qu'il n'y en aura que 23. à eslire de nouveau : & puis le nouveau Maieur qui sera le 25. & aduenant la mort de quelqu'un d'eux dans l'an, seront assemblez les cent, qui y pouruoiront pour le reste de l'annee, selon qu'ils veront bon estre.

10 Que ces 25. le iour ensuyuant leur election cassent les 75. & en eslisent autant en leur place comme dessus, dont seront exclus ceux qui en auront esté l'annee derniere seulement, & soit ainsi poursuyui cest ordre tant que besoin sera.

11 Que si quelqu'un dudit conseil des cent est appellé à quelque charge ciuile ou militaire, soit deposeé d'entre les cent, sinon qu'il fust enuoyé en qualité de commissaire pour traiter de paix, guerre, ou autre affaire publicque, avec Princes ou Republiques.



12 Que ceux qui seront comptables ne puissent estre appelez à charge aucune quelle qu'elle soit, iusques apres la reddition & closture de leurs comptes, & qu'ils ayent payé le reliqua s'ils sont redevables : & si aucun donnoit voix ou suffrages à vn comptable, soit condamné à vingt escus d'amende qu'il payera promptement à peine de prison.

13 Que les officiers ordinaires de la iustice s'ils sont cognus gens de bien, demeurent en leur premier estat, pour l'exercer comme de coustume, & iuger absolument des causes de leur iurisdiction, avec conseil de douze de la qualité requise. Et si lesdicts officiers ordinaires, ne sont gens qui ayent accoustumé de s'acquitter de leur deuoir, & hors de toute chiquanerie: en les desmettant, le Maieur & conseil de chacune ville en pourra establiir d'autres, de la qualité requise & necessaire pour exercer l'estat de iudicature: & seront lesdicts officiers suiets à censures, reprimendes, & chastiemens s'il y eschet.

14 Qu'entre tous lesdicts chefs & conseils particuliers, ils eslisent vn chef general, à la façon de Dictateur Romain, pour commander en la campagne: auquel aussi ceux des villes & citez obeiron en tout ce qui sera de sa charge, pour le benefice commun de leur conseruation.

15 La façon d'eslire ce chef general seroit bonne, (si comme les Ioniens, Dorien, Beotien, Achéen, Dolope, & autres peuples des douze florissantes villes de Grece, qui pour aduiser à leur estat, s'assembloyent deux fois en l'an: ou comme le conseil des Amphictyons du temps de Pausa-

nias) les Maieurs & Confeils des villes se pouuoient assembler en quelque lieu & ville commode pour toutes: Mais pour ce que cela leur est mal-aisé pour maintenant, ils pourront apres vne sainte priere, chacun Maieur & conseil assemblée endroit soy, proceder à l'election d'un chef general, & enuoyer chacun Maieur & conseil son vœu & suffrage à celuy de la ville, qui (par un aduis courant) sera trouuee plus propre à recueillir tous les aduis des autres: afin que là, selon la pluralité des voix & suffrages qui y seront enuoyez de dehors, joints avec celuy de dedans, celuy soit solennellement déclaré & prononcé chef general d'entre les membres, à qui Dieu, par le plus de voix, l'aura voulu accorder.

16 Et combien que les necessitez des guerres n'attendent pas tousiours le conseil, & que (comme lon dit) la guerre se face à l'œil: neantmoins, qu'il soit esleu par mesme moyen & establi par la mesme voye que dessus, un conseil au chef general, du quel il soit tenu de prendre aduis, toutefois & quantes que l'occasion s'y presentera, & que la necessité du temps & des affaires le permettra.

17 Que par mesmes moyens soyent esleus cinq ou six lieutenans au General, qui luy succederont (selon qu'ils seront nommez) un, apres la mort ou desmise de l'autre, en mesme ou semblable charge: pour euitier toute confusion, desordre, & incōuenient qui pourroit aduenir, par l'entreprise que les ennemis pourroyent faire en trahison, ou autrement, contre le General, pour priuer les membres de conduite par sa mort.



18 Que tous lesdicts chefs & lieutenans soyent gens qui ayent (tant que faire se pourra) la crainte de Dieu, son honneur, sa gloire, & son Eglise, en souveraine recommandation : Et avec la prudence, soyent accompagnez de quatre choses, que lon sçait deuoir estre en vn grand capitaine, sçauoir est, de science militaire, de magnanimité & hardiesse, de reputation & creance, & de prosperité en ses entreprises.

19 Que les conseillers des chefs des villes & de la campagne, outre la cognoissance de l'art de la guerre, & de la police, soyent de ceux que Iethro beau-pere de Moysé luy conseilloit d'auoir pour soulagement, hommes vertueux, qui craignent Dieu, hommes veritables, qui ayent en haine l'auarice.

20 Qu'ils prennent garde à ce que dit le Sage: Que la repentance suit de pres le conseil leger, & que la plus part des fautes en la guerre & en l'estat, ne se peuuent faire qu'une fois: Partant qu'ils n'oublient se garder d'en faire, & n'oublient à remedier à tout ce que par conseil se pourra remedier & pouruoir.

21 Que sur les deniers & thresor publicque (qu'oy qu'il ne doye estre en cest affaire de religion & necessité commune à se conseruer, appelle le nerf de la guerre) soyent commis par lesdits chefs & conseils chacun endroit soy, en chacune cité, gens de bien & sans fraude, tant pour receuoir que pour deliurer, & autres pour contreroller : & sur tous eux, vn receueur & vn contrerolleur general, establi au lieu où ils auiseront le mieux  
& gens



& gens superintendans avec finances : tous comptables au conseil , pour euitier à toute fraude & mal-versation.

22 Et pour euitier aux calomnies , lesquelles souuent sont esparfes & mises à sus aux Chefs & principaux membres du corps , par l'artifice des ennemis, ou par enuie, ambition, ou autres semblables pestes que le diable fait souuent glisser, & cherche d'introduire en l'Eglise , ou qui naissent de quelque soupçon legerement pris par les soldats ou par le peuple: & pour empescher les desordres qui en aduiennent bien souuent : qu'il soit loisible en chacune ville à vn chacun, d'accuser pardeuant le Maieur & son conseil tous ceux (soit de la noblesse, ou autres chefs, ou membres) qu'ils penseront machiner , pratiquer, ou faire quelque chose contre le bien public de la religion, & de la defense commune du corps. Et s'il aduenoit que le soupçon fust sur le chef & le cōseil ou partie d'iceluy, l'accusateur pourra requerir que les cent soyent assemblez pour le bien public (à quoy seront tenus satisfaire le Maieur & le conseil) & là par deuant eux tous proposer son accusation, afin d'y estre pourueu comme ils verront bon estre. Et ne se tiēne pourtant aucun de ceux qui seront ainsi accusez, pour offensé, de l'accusateur (qui ne doit estre mené que d'une bonne conscience) ains plustost l'accusé soit aise & ioyeux , que Dieu face à tous ses compagnons paroistre son innocence (s'elle y est.)

23 Que suyuant les iugemens qui s'en ensuyuront, soit faite punition cōdigne des coupables,

sans auoir esgard en telles fautes, ny és autres, aux seruices passez que les coupables, leurs parens & amis peuuent auoir faits : afin que la vertu (à laquelle parmi les hommes est deuë recognoissance & guerdon) ne soit satisfaite de ses merites (au preiudice de la gloire de Dieu & de la seureté commune) avec la remission de la peine deuë à la faute : ains soit l'une tousiours guerdonnée, & l'autre chastiee & punie : & qu'aussi aux faux accusateurs soit imposée peine, suyuant les loix, ordonnances, ou coustumes des lieux.

24 Que la necessité de tenir armee en campagne passée, le General en remettant sa charge entre les mains du conseil, ne desdaigne point (ny les autres chefs inferieurs pareillement leur temps accompli) de retourner comme auparauant personnes priuees, ou auoir moindre charge.

25 Que l'on introduise & obserue tres-estroitement, depuis le chef general iusques au moindres chefs & membres, la discipline ecclesiastique & religieuse, ordonnée & introduite par cy deuant par les Synodes tenus en la France, auant la dernière dissipation des Eglises, par les Ministres & Anciens d'icelles : afin que par ce moyen on voye à l'œil, le regne de Dieu & le sceptre de sa parole, établi & entretenu : & le regne de Satan, avec la cohorte des vices, que le monde & la chair entretiennent, destruits, chassés, & abolis d'entre les fideles, comme il appartient à vrais enfans de lumiere : Estans asseurez qu'en ce faisant, ils seront benits à la ville & aux champs : ils habiteront en toute seureté, rien ne les espouuantera : le cousteau  
meur-



meurtrier ne passera point par leur terre: Cinq d'entr'eux pourfuyront cent de leurs ennemis, & cent, dix mille. Le Seigneur establiera son alliance avec eux, & les fera croistre & multiplier en paix & abondance de toutes choses necessaires: là où au contraire, s'ils mesprisent les ordonnances du Dieu viuant, s'ils laissent regner les vices & desbauches parmi eux, la peur, le tremblement, les maladies, & autres langueurs, & toutes sortes de maledictions les pourfuyront: Le Seigneur tiendra tousiours sa face courroucée contr'eux: Ils mourront par la main de leurs ennemis, & fuyront sans que nul ne les pourfuyue. Le Seigneur adiousterá aussi (s'il n'y voit vn amendement) sept fois au double de leurs playes, comme il en a menacé son peuple d'Israel, en la place duquel ils ont sans doute esté plantez.

26 Qu'à l'execution d'une si sainte œuvre, qui est l'establissement & obseruation de la discipline ecclesiastique, à vn frein tant saint & necessaire, les Magistrats tiennent la main aux Consistoires dans les villes: & à la campagne, le General, son conseil, ou autres capitaines, & tant qu'il y aura de gens de bien en l'armée.

27 Qu'on introduise aussi & qu'on pratique le plus exactement que faire se pourra, entre tous les capitaines, chefs mineurs, & soldats, la discipline militaire, de laquelle ne sera ia besoin faire beaucoup d'articles & ordonnances: estant la multitude d'icelles (si les chefs font leur deuoir) superflue, & ne le faisant point, pernicieuse & dommageable. Il suffira que toute la discipline militaire soit puissante



d'enseigner (sous la loy de Dieu) & de faire pratiquer aux soldats l'art & mestier des Lacedemoniens, lequel en somme consistoit en trois choses: A bien obeir à leurs officiers, à porter gayement les trauaux de la guerre, & à vaincre ou mourir au combat.

28 Qu'ils se souuient de ce que Iudas Machabeen respondit aux cœurs faillis, Que la victoire ne gist pas en la multitude, & au grand nombre de soldats, ains la force est du ciel: Partant, qu'en inuoquant continuellement le Seigneur, ils suyuent en leurs entreprises l'exemple de ce bon Machabeen, contre Nicanor, & autres ennemis du peuple de Dieu: Et n'oublient ce que Gedeon, assisté du Seigneur, fit de beau & de gaillard avec trois cents soldats, contre les Madianites: Car (à vray dire) tout ainsi que les ennemis au temps du Machabeen, aussi bien auourd'huy les meschans assaillent-ils ce pource peuple, confus par leur iniustice, trahison, & desloyauté, voulans abbatre le seruice de Dieu, & destruire hommes, femmes, & enfans: Et au contraire, les fideles combattent pour la gloire de Dieu, pour la defense de son Eglise, & pour leur vie & conseruation.

29 Que les capitaines s'estudient à faire exercer les soldats aux armes, au combat, à l'escarmouche, à soustenir ou liurer vn assaut, Et que le General en particulier s'estudie à apprendre à toute l'armee, de se renger en vn clein d'œil (si besoin est) en bataille, en plusieurs & diuerses sortes, à garder leurs rengs, à se rallier, selon le lieu, les gens ou selon les ordres, reng, & constitution de batail-

le de l'ennemi, ou autre necessité occurrente.

30 Que les chefs, & principalement le General, harengue souuent l'armee & les particulieres compagies, pour encourager, retenir, louer, blâmer, ou autrement renger le soldat, selon l'occasion qui se presentera.

31 Que les soldats Chrestiens ayent honte qu'il se trouue entr'eux querelles, brigues, & debats, n'ayans iamais esté trouuez entre les soldats (quoy que prophanes) de l'armee d'Annibal, en vn si long temps qu'il fit la guerre aux Romains, bien que son armee fust composee de soldats de diuerses nations, & langues: qu'ils considerét quelle vergongne ce seroit à vn homme, si ses mēbres s'entrequereloient l'vn l'autre. Quel reproche ce seroit à vn pere de famille, si on voyoit ses enfans s'entrepiquer: Et partant, qu'ils aduisent de combattre en toute vnion & concorde la querelle du Seigneur, comme deuant sa face.

32 Et pource qu'il a esté enseigné tant par theorique, que par pratique & experiēce: que des trois voyes du traictemēt qu'on peut faire aux ennemis, la moyene est tousiours dommageable, cōme celle qui n'acquiert point d'amis, & ne priue point d'ennemis: que tous les chefs & conseils se resoluent, à faire pratiquer exactement ces deux extremes: sçauoir est, toute rigueur enuers les traistres & seditieux armez, & toute la douceur qu'il sera possible enuers les catholiques paisibles.

33 Que de ceux là, nul ne soit espargné: & qu'à ceux cy, ne soit fait aucun outrage ne force, en leur conscience, honneur, vie, & biens, ains



soyent conseruez en amitié & en paix, cōme cō-patriotes & freres bien-aimez: en leur communiquant de la doctrine de salut avec toute charité & affectiō Chrestienne, autant qu'ils se voudront rendre capables & dociles pour la receuoir: sans vsfer en leur endroit pour regard de la foy que d'un bō exemple, que chacun s'efforcera de leur donner en bien viuant, suffisant moyen (s'il plaist à Dieu le benir) avec la predication de l'Euangile, pour les amener à la cognoissance du souuerain bié de l'homme.

34 Vray est, quē pour autant que l'estat a ffligé des fideles pourroit auoir besoin de viures, munitions & deniers, les Catholiques François (ainsi traictez que dit est) pourront estre priez de les en secourir: & aduenant qu'ils refusassent de le faire, y-pourront en cas de grande necessité estre contrainsts, par tous les plus honnestes moyens dont on se pourra auiser: ce qui ne se pourra tourner à blasme, si on considere que Dauid en la necessité s'est serui des pains de proposition.

35 Surquoy les Chefs & Conseils seront aduertis, de bien & songneusement mesnager tout ce qui pourra tōber en mesnage, & profit publique, pour ne rien despendre superfluemēt, & n'auoir à charger les amis plus que de besoin: Prenās garde à ce que Tite Liue dit, que la guerre se nourrist elle-mesme, comme l'enseigne tresbien le lōg temps que Annibal a mené la guerre en Italie, sans auoir aide, ou argent frais de la republique de Carthage.

36 On sçait bien que quand on sera contraint  
de



de camper, si le soldat est instruit & cōmandé de se cōtenter de l'ordinaire du bon-hōme avec toute modestie & crainte de Dieu, (ce qui auindra aisement, si outre la parole de Dieu, & les loix militaires qui leur doyent seruir de bride & cōduire, le capitaine ou soldat cōsidere le traictement qu'il voudroit luy estre fait, s'il estoit en la place du bon-homme, voire tout le village en corps, sera bien aise de dresser estappe, fournir munitions, argent & autres commoditez, entre les mains de ceux qui seront establis pour les receuoir.

37 Ceste bonne & modeste façon de loger, outre que c'est le deuoir du soldat Chrestie d'ainsi le pratiquer, contentera infiniment le cœur du peuple des villes & du plat pays, qui sçait combien ceste querele est iuste, & la deffense contrainte : au contraire, le parti des ennemis, meschant traistre, desloyal, & volontaire : tellement qu'au lieu que par le passé, les desbauches & desordres auoyent aliené le bon-homme, des fideles, en sorte qu'en vn bien grand village, quand on alloit pour y loger, à peine y trouuoit-on à qui parler, maintenant avec vn tel deportemēt, le bon-homme s'efforcera de recueillir le soldat, & de faire au reste tous les bons offices qu'il luy sera possible, cōtre les ennemis de la paix & societé ciuile des Frāçois.

38 Qu'il y ait vn ou plusieurs bons preuosts de camp accompagnez de bon nombre d'archers pour punir à la rigueur & promptement, les fautes que le soldat desbauché pourroit faire, contre la loy de Dieu, & la police de l'armee.

39 Que les Chefs se souuiennent de ce que

Polibe dit, que la partie la plus requise en vn grād Capitaine est, qu'il cognoisse les cōseils & le naturel de son ennemi: & partāt ne soyent iamais sans vn bon nombre d'espies (desquels ils doyuent & peuuent auoir à rechange) de toutes parts.

40 Qu'ils ayent entre toutes leurs maximes de negociation, ceste-ci en singuliere recommandation, De ne se fier iamais en ceux qui tant de fois & par si insignes & prodigieuses trahisōs, ont violé & rōpu la foy, le repos, & la paix publique, ny iamais se desarmer tant qu'ils feront poursuite contre la doctrine de salut, ou cōtre la vie de ceux qui en font profession: se gardans bien de faire iamais de ces paix, qui seruent d'instrumens à massacres. Que s'il aduenoit de tomber en quelques termes d'accord, ce seroit avec telles conditions, qu'auant toute œuure, soit resolutement establi ce qui est expedient pour la gloire de Dieu: & apres cela, si bien aduisé à la seureté des poures Eglises, qu'elles ne soyent plus à la merci des loups & tygres.

Que si (comme dit est) il plaist à Dieu de toucher le cœur des tyrans, & les changer, comme il en a la puissance, lors de bonne volonté ils se submettent à ceux que Dieu leur a ordonnez pour Princes naturels, & leur rendent tout deuoir de bons & obeissans suiets. Mais si le mal est venu iusques au comble, & que la volonté de Dieu soit de les exterminer: s'il plaist à Dieu susciter vn prince Chrestien vengeur des offenses, & liberateur des affligez, qu'à cestuy ils se rendent suiets & obeissans, comme à vn Cyrus que Dieu leur aura enuoyé.



enuoyé,& en attendant ceste occasion, qu'ils se gouuernent par l'ordre cy dessus establi par forme de loix.

Lesquelles loix, auis, & ordonances, & autres qu'ils pourront deux-mesmes selon l'occurrence des choses, dresser & bastir, conformes aux presentes selon la parole de Dieu: Nous leur auons ordonné & ordonnons d'observer & entretenir de poinct en poinct, selon leur forme & teneur, & de lignee en lignee: se gardans bien de permettre, qu'elles ressemblent (comme Anacharsis disoit à Solon) aux toilles d'araignee, dans lesquelles si quelque chose de leger tombe, il est retenu, là où le pesant fardeau passe au trauers en deschirant la toille: Enquoy faisans, nous les auons asseurez & asseurons, que quand bien ils ne seroyent iamais secourus par leurs freres des autres nations (ce qui seroit trop indigne, & ie ne le veux seulement imaginer) ils se pourront conseruer, (moyenant la grace de Dieu) en son pur seruice, exercice de la religion Chrestienne, pleine liberte de leurs consciences, & en toute seureté & repos, autant que les euenemens d'une guerre iuste, bien fondee, bien conduite & ordonnee, le peuuent souffrir & endurer, sous la garde de ce grand Dieu des armées, du Roy des siecles, immortel, inuisible, seul Dieu sage & puissant, auquel soit tout honneur & gloire à iamais.

*L'egl.* Ainsi soit il. Et certainement ie le croy, ie m'en tien tout asseurez, & souscris fort volontiers à ton auis & iugement.

*Ali.* Et moy.



*Phil.* Et moy aussi.

*L'h'ist.* Je trouue que ce Daniel a dit si sainct, que non seulement ie soubſcris à la verité du faict, à l'aduis qu'il dōne à tous Princes qui ont receu l'Euangile, & à l'ordre qu'il donne aux pources François. Mais aussi (par la grace de Dieu, qui m'a touché en l'oyant discourir du faict des Huguenots) pour beaucoup de circonstances, en la consideration desquelles il m'a fait entrer, ie croy qu'ils sōt gens de bien, & qu'ils tiennent la vraye pureté de religion Chrestienne: mesmement quād ie me remets en memoire de leur confession de foy (qui est imprimee au bout des Pseaumes de Dauid) laquelle i'ay leuë & releuë plusieurs fois: Mais pour ce que deuant qu'y mettre le nez, ie m'estoy' tousiours proposé de ne rien croire de ce qui y est cōtenu, de peur d'estre surprins, comme nostre curé nous a tousiours dit, qu'il est mal-aisé de lire vn liure des Huguenots sans le deuenir: Je n'y auoy' pas prins garde de si pres, mais ie suis content d'estre trompé de ceste sorte. Et au surplus ie m'asseure, comme Daniel a dit, que Dieu ne laissera impunie (quoy qu'il tarde) la meschanceté qui a esté faite aux pources Huguenots François: Et les meschans ont beau en rire, car ils ne sçauroyent attacher au bout de leur vie celle des Huguenots, qu'ils leur ostent si licencieusement, comme s'il n'estoit point de Dieu. Or à luy soit louange, de la grace qu'il me fait de m'ouurir les yeux, me communiquer sa lumiere, & m'eslōgner des tenebres: le priant qu'il me fortifie, pour pouuoir, si besoin est, souffrir & endurer pour le tesmoignage de sa verité,

verité, avec le surplus des fideles.

*Le pol.* Et moy, i'en dy, i'en croy, & en prie tout autant : estant prest & appareillé de faire tout ce qui sera aduisé expedient pour la gloire de Dieu, & la conseruation de son Eglise, autant qu'il me sera possible, par sa grace.

*L'egl.* Loué soit l'Eternel à iamais, qui a manifesté sa vertu & puissance conioincte à sa bonté & grace en ces deux bonnes gens icy. Vous soyez les tresbien receus en la maison du Seigneur. Je tascheray de faire que vostre conuersion y soit connue de tous, afin de nous en resiouyr ensemble, & en rédre graces solénelles au Seigneur. Ce fait, vous Historiographe, irez par deuers les Rois, Princes, & Nations, qui ont receu l'Euangile : leur faire entédre tout ce qui s'est passé en France cōtre les Chrestiens, & l'arrest que Daniel en a donné, afin qu'ils aduisent de pres à leur deuoir. Et vous, Politique, irez trouuer nos freres & membres François, pour leur declarer l'arrest, l'aduis, & ordonnances, que Daniel a donné sur ce faict. Et tiendrez la main avec eux, à ce que le tout s'effectue pour la gloire de nostre Dieu, & conseruation de ses enfans.

*L'bist.* Je le veux bien.

*Le pol.* I'en suis content.

*L'egl.* Le bon Dieu vous benie & conduise tousiours par son saint Esprit, pour l'amour de son Fils Iesus Christ nostre Seigneur. Amen.

F I N.





DIALOGUE

SECONDDV

REVEILLEMATIN

DES FRANCOIS, ET

DE LEURS VOISINS.

*Composé par Eusebe Philadelphie Cosmo-  
polite, & mis de nouveau en  
lumiere.*



A E D I M B O V R G,

*De l'imprimerie de Jaques Iames.*

Avec permission.

1574

## ARGVMENT DV SECOND

### Dialogue.

Le Politique & l'Hiftoriographe François, reuenans par diuers chemins de leur charge, se rencontrent (comme Dieu veut) logez en vne meſme hoſtellerie à Fribourg en Briſgoye, & apres s'eſtre recognus, careſſez & recueillis, ils recitent l'un à l'autre le ſuccez de leurs voyages, l'eſtat preſent de la France, & par occaſion quelque trait de celuy d'Angleterre. Ils traitent auſſi de la puiffance des Rois, de la tyrannie, & de la ſeruitude volontaire, & pluſieurs autres belles matieres tres-neceſſaires en ce temps, reſeruant au lendemain ce qu'ils ont à dire de plus.

DIA-

# DIALOGVE SECOND.

Interlocuteurs.

Le Politique.                    l'Historiographe.

*Le Politique commence en chantant le Pſalme  
C X X I I I I.*

*Le pol.* Or peut bien dire Iſrael maintenant,  
Si le Seigneur pour nous n'eust point eſté,  
Si le Seigneur noſtre droict n'eust porté,  
Quand tout le monde à grand fureur venant  
Pour nous meurtrir, deſſus nous s'eſt ietté:

*L'hiſt.* Je ſuis deceu ſi ce n'eſt la voix de celuy que  
ie deſire le plus de voir en ce monde.

*Le pol.* Pieça fuſſions viſs deuorez par eux,  
Veu la fureur ardente des peruers:  
Pieça fuſſions ſous les eaux à l'enuers,  
Et tout ainſi qu'un flot impetueux,  
Nous euſſent tous abyſmez & couuerts.

*L'hiſt.* Ou ie reſue, ou c'eſt l'amy ſans nulle dou-  
te, Mon Dieu où peut-il eſtre entré? Seroit-ce  
point en ceſte chambre? Hola he, Ouurez vn peu,  
ie vous prie.

*Le pol.* Qui eſtes-vous, qui ainſi heurtez?

*L'hi.* Gens de paix, ouure l'amy.

*Le pol.* O Seigneur, C'eſt l'Hſtorigraphe. Eſt-il  
poſſible!

*L'hi.* Cel'eſt vraiment, mon grand amy.

*Le pol.* Que ie t'embrasse, He qu'il y a de temps  
que ie ſouhaite d'auoir le bien que ie reçoÿ!

*L'hiſt.* Il m'auient tout ainſi qu'à ceux qui ont lō-  
guement attendu, apres quelque bien rare cho-  
ſe, qui mal à peine peuuent croire lors qu'ils l'ont



en leur puissance, que ce soit ce qu'ils desiroient. Ainsi dy-ie m'auient-il de te voir maintenant icy.

*Le pol.* Je t'assure mon grand amy, qu'il m'auient aussi tout de mesme, en t'y voyant.

*L'hst.* Si n'est-ce fable, ny fantosme, nous voicy tous deux, Dieu merci.

*Le pol.* Dieu soit loué, qui nous a conduits à sau-  
neté, & nous a fait entrer encontrer lors que nous  
y pensions le moins. S'il te semble nous en remer-  
cierons ensemble nostre bon Dieu, de tout nostre  
cœur, & puis apres nous entretiendrons l'un l'autre  
tout à l'aise du succez de nos voyages.

*L'hst.* Nous ne pouuons honestement laisser pas-  
ser ceste occasion, de remercier bien humblement  
nostre grand Dieu, sans encourir le vice d'ingra-  
titude, l'un des plus desplaissans à Dieu, & moins  
souffrable entre les hommes. Mais il nous faut te-  
nir la porte close, pour euitier l'inconuenient qui  
nous pourroit suruenir, veu le lieu où nous som-  
mes: où le pur seruice & l'inuocation du nom de  
Dieu (comme en tout le reste de la Papauté) est  
deffendue.

*Le pol.* J'espere que bien tost (comme il nous est  
commandé de Dieu, expedient pour nos misere  
& necessaire pour nostre deuoir) il nous sera aussi  
permis de seruir Dieu par tout ouuertement. A  
pres que sa Maiesté aura fait iustice de la grand  
Paillardé, qui a corrompu la terre par sa paillar-  
disse, & qu'il aura vengé le sang de ses seruiteurs de  
la main d'icelle: lors que les Rois de la terre, qui  
ont paillardé avec elle, & ont vescu en delices  
pleure

pleureront & se lamenteront à cause d'elle, quand ils verront la fumee de son bruslement: Lors dy-ie, qu'il n'y aura plus nuls Chananeens en la maison du Seigneur des armées. Et que tous ceux qui seront demeurez de reste, de toutes les nations qui auront fait la guerre à l'Eglise de Dieu, adoreront le Roy le Seigneur des armées. Ainsi que la predict Zacharie en sa Prophetie.

*L'hist.* Je l'espere aussi tout ainsi. Cependant nostre deuoir est, de marcher en tout prudemment, & d'attendre en toute patience ce temps là que le Pere a mis en sa puissance.

Bien le pouuons nous prier qu'il abbrege ces iours là, & qu'il haste la vocation de ses esleus.

*Le pol.* Tu dis vray. Or le prions donc à genoux, s'il te plaist de faire les prieres ie te suyuray de tout mon cœur.

*L'hist.* Je le veux bien. Prions,

Seigneur Dieu Pere eternal & tout puissant, Nous tes pources seruiteurs, ayans esté transportez par ta grace, du Royaume tenebreux, au Royaume de lumiere, & tost apres employez par ton Eglise en des charges importantes à ton seruice: Te rendons graces, nous te louons, nous te magnifions Seigneur, pour les biens infinis (& qui, à dire vray, nous sont incomprehensibles) que tu nous distribues journellement de ta liberale & infatigable main, de ce que par ton bras fauorable tu nous as conduits & ramenez nous ayant administré les choses necessaires à nostre voyage, & nous deliurant des dangers auxquels nous sommes exposez le plus souuent pour nos pechez. Nous

te supplions Seigneur, qu'il te plaife en nous pardonnant nos fautes, continuer tes benedictions & graces sur nous, & sur tes autres enfans & seruiteurs, comme tu cognois estre expedient pour le bien de ta gloire. Sur tout Pere & Sauueur, fay nous tousiours fermement esperer és promesses du salut eternel qui nous a esté acquis par le sang precieux de ton Fils ton bien aimé. Et nous fait continuellement dependre de ta prouidence, par laquelle iusqu'aux plus petits d'entre les oyseaux, sont nourris & soustentez, & les cheueux de nos testes comptez & gardez, iusques à tant Seigneur, que tu nous retires de ces miseres, pour nous faire iouyr de l'immortalité bien-heureuse, de laquelle iouyssent ceux que tu as retirez en paix. Cependant Seigneur, nous te supplions de prouoir en general & en particulier, à toutes les necessitez de ton Eglise, de hastier le temps de la uocation des tiens, & abbreger les iours de la restauration des choses. Et de nous faire en particulier la grace que nous puissions bien tost estre rendus en sauueté, à l'Eglise qui nous a enuoyé pour luy pouuoir rendre fidelement compte de la charge qu'elle nous a donnee: fay-le Seigneur, pour l'amour de Iesus Christ ton Fils nostre sauueur. Ainsi soit-il.

*Le pol.* Ainsi soit-il. Or il faut que ie te dye deuant que passer outre, que ie me resiouy grandement, & m'esmerueille quand & quand, considerant la peine que tu as eue, & les dangers par où tu as passé en faisant vn si long voyage, de l'embon poinct que tu nous en rapportes.



*L'hist.* J'ay eu de la peine vraiment pour la longueur du chemin, & diuersité des Regions, par où il m'a conuenu passer. Mais la gayeté de cœur, de laquelle j'ay marché, m'a fait trouuer tout le labeur facile: Quant aux dangers, tu scay bien que celuy pour lequel ie marchois est bon & fort pour garder ceux qui se retirent en sa garde: aussi m'a-il tellement guaranty que les dangers ne m'ont approché que de bien loin. Le plus d'ennuy que j'ay senty, ç'a esté (afin que ie n'en dissimule rien) les Karhous & autres insolences où lon m'a voulu contraindre d'entrer par plusieurs fois en trauersant les Allemagnes: Les coups de coude pareillement & les brocards de Franche dogues, dont les Anglois vsent souuent, conioints avec la vaine & superbe contenance, & autres desbauches qu'on voit en Angleterre, m'ont merueilleusement offensé.

*Le po.* Il y auoit assez dequoy se fâcher: mais l'ennuy seroit grand au double, si ces sottises estoient pratiquées par quelques Chrestiens & gens de marque. Et ie me doute bien que les Karhous Allemans ne se trouuent que parmy quelques vieux yurongnes Papistes, és tauernes & hostellerics où il seroit bien aisé de se faire seruir à part pour fuyr la violence de ces Sacs-à vin. Quant aux cours des Princes & Seigneurs Protestans, où tu auois le plus affaire, ie m'assure que tu n'y as rien veu de semblable, ny pareillement parmi les Anglois de bonne estoffe (si leur contenance ne trompe mon iugement) rien que courtoisie & douceur, accompagnée de toute modestie.

*L'hist.* Pleust à Dieu qu'ainsi fust l'amy comme c'est pour la plus part, tout au contraire. Les plus grans y font les plus lourdes fautes, voire les plus religieux sont plus qu'il ne seroit à desirer, embrenez de ces ordures.

*Le pol.* Que me dis-tu?

*L'hi.* Il est ainsi iet'en assure, & nul ne leur vient au deuant, ils s'en dispensent à leur gré.

*Le pol.* Et les Pasteurs, quoy cependant? ne reprennent-ils pas ces vices?

*L'hi.* La plus part sont des chiens muets, presque tous compagnons d'Hely, il n'y a point de discipline.

*Le pol.* Si est-ce que i'ay ouy dire qu'il y auoit en Angleterre plusieurs Ministres bons Pasteurs, qui desirans la reformation de la vie & mœurs des hommes, & de quelques ceremonies externes qui sont demeurees de reste de la Papauté, ne cessoyent de faire tout deuoir par escrit & de viue voix, pour mettre la discipline Ecclesiastique au dessus: Et quelque bon Prince Protestant qui la vouloit mettre en ses terres.

*L'hist.* Tu dis vray: Mais son bon vouloir n'a pas eu l'effet desiré: Et quant à ces bons personnages Anglois, du temps mesme que i'ay esté en Angleterre, ils ont esté merueilleusement trauallez par les Ministres de la iustice: Les vns ont esté bannis, les autres deposez de leurs ministres: Et leurs escrits parlans de reformation, condamnez comme seditieux.

*Le pol.* Est-il possible?

*L'hist.* Il est ainsi.

*Le pol.* Quant au dessein de ce bon Prince, ie ne m'esbahi pas par trop qu'il s'en soit allé en fumee, veu la tiedeur & lentitude de laquelle les Princes marchent, quand il est question de repurger les Eglises qui leur sont commises : Considerât aussi la malice des Peuples qui abusent le plus souuent du bon naturel de leurs Princes. Mais de ce fait-là d'Angleterre : i'en demeure tout estonné. Quelle iniustice ! Quelle desloyauté ! Ie me doute bien d'où cela peut venir, il ne peut proceder que de la bobance, ambition & insolence des Prelats Anglois, fauorisee de la Chattemiterie de quelques vns du conseil que ie te pourrois bié nommer. Mais qu'ils oyent (outre les passages de l'Ecriture) ce que dit quelque grand personnage de nostre temps, parlant de la discipline Ecclesiastique. S'il n'y a (dit-il) nulle compagnie, ni mesmes nulle maison quelque petite qu'elle soit, qui se puisse maintenir en son estat, sans discipline : Il est certain qu'il est beaucoup plus requis d'en auoir en l'Eglise, laquelle doit estre ordonnee mieux que nulle maison, ny autre assemblée.

Pourtant comme la doctrine de nostre Seigneur Iesus est l'ame de l'Eglise, aussi la discipline est en icelle, comme les nerfs sont en vn corps pour vnir les membres & les tenir chacun en son lieu & en son ordre. Pourtant tous ceux qui desirent que la discipline soit abbatue, ou qui empeschent qu'elle ne soit remise au dessus, soit qu'ils le facent à leur escient ou par inconsideration, cherchent d'amener l'Eglise à vne dissipation extreme.

*L'hyst.* Cela est tant bien dit que rien plus : Mais



quel remede quand les principaux d'entre les gés d'Eglise qu'on appelle, qui deussent porter le flambeau deuant les autres, se contentans d'auoir receu la doctrine, n'ont cure de reformatiō. Et quel bon exemple que leurs voisins Escossois & autres peuples qui l'ont receuë, leur en sachent dōner, n'ont pas honte de se monstrier ennemis ou uerts de toute discipline, cependant la feinte simplicité du surpelis plié menu comme celuy d'un prestre, la sottise & superflue clarté des chandelles en plein midi, le son sans intelligence des Orgues, La gaye musique gringotee ne manque point de dans leurs temples, en leurs seruices ordinaires. Là dessus Monsieur l'Archeuesque, Monsieur le Primat, Mōsieur l'Euesque, & autres tels officiers accompagnez de pages, laquets, estaffiers, & autres falots, iusques à 20 30 40 100, & tel y en a iusques à 200. cheuaux.

*Le pol.* O Seigneur, iusques à quand y aura il de tels Maistre-d'hostels en ta maison! Quels vigneronns, quels moissonneurs! ils ont prins l'Euangile en vain les paillards & s'en sont fait riches.

*L'hi.* Bellement ie te supplie, tu es trop prodigue censeur, ils ne sont pas tous ainsi Dieu mercy, & pour le moins la doctrine est pure parmi eux.

*Le pol.* Voire dea! Mais où sont les fruiçts de la vigne du grand Seigneur? Ne sont-ce plustost des lambrusches que bons raisins? Et ne craignent-ils pas, ie parle à ceux que le Seigneur a establis guettes sur Israel, que le Seigneur leur redemande les brebis qui perissent par leur faute: Voire & les vns & les autres ne craignēt-il pas que le Seigneur oste

oste son Chandelier du milieu d'eux, & leur face souffrir la faim, ie dis la faim de sa parole vraye pasture des ames, puis qu'ils en abusent ainsi? Et ceste Princesse leur Royne, qui a la reputation d'estre tât sage & vertueuse, qui porte le titre de chef de l'Eglise en son Royaume, & de deffésatrice de la foy. Est-il possible qu'elle & les seigneurs de son Conseil endurent vne telle desbauche en la maison du Dieu viuant? *L'hi.* Ce n'est pas là tout, Il y a biẽ encore pis à craindre. *Le pol.* Nostre Seigneur! qu'y pourroit il auoir de pire, entre ceux qui ont receu l'Euangile, que de n'ẽ vouloir (par maniere de dire) que la moitié, à sc. la seule doctrine? *L'hi.* Ne seroit-ce pas chose plus déplorable, si encores de ceste moitié-là ils en faisoient si peu d'estat, qu'ils ne se souciaffent, quand biẽ auourd'huy ou demain elle leur seroit ostee.

*Le pol.* Cela est bien certain. *L'hi.* Or sont-ils presque sur le point de la perdre s'ils ne s'auisent.

*Le pol.* Je serois extremement marri, quoy que le peuple qui en abuse soit digne d'en estre priué, si ce que tu dis auenoit: Mais dy moy comment ce peut estre. *L'hi.* Il ne faut que la seule mort de la Royne, pour tout chāger & réuerser. *Le pol.* Cōment, Bon Dieu! En 14. ou 15. ans qu'elle a regné, n'a-elle sceu establir telles loix & ordōnāces que la doctrine de l'Euangile puisse demeurer pure apres sō despart bō gré mal gré la Papauté? A-elle si peu profité en la lecture des bōs liures, que i'entens luy estre tāt familiers? Faudra-il qu'un Cicero luy enseigne sa leçon, surpassant de zele enuers la Republique Romaine, le zele de ceste Royne enuers l'Eglise de Dieu?



Quand il afferme n'auoir moins de soin de l'estat auenir que de l'estat present de sa Republicque: he Dieu, quelle lascheté voila.

*L'h.* Je t'asseure l'amy que si la Royne & son Cōseil ou le Parlement d'Angleterre ny remedie, qu'ils sont venus comme à la veille de voir la subuersion de leur estat & de la Religion ensemble.

*Le pol.* Ha miserables ! Et que tardent-ils, qui les empesche d'y mettre la main deuant la main ?

*L'bist.* Rien ne les en destourne que la desbauche & la vanité de la cour, les delices des Prelats, la superbe des nobles : Et pour le dire en vn mot le peu de zele que la plus part des Anglois a enuers le seruice de Dieu. Et Dieu par son secret iugement, pour se venger de telle lascheté tient cōme en lessé vne royne d'Escoffe, que chacun cognoist assez plus proche de la Couronne d'Angleterre, pour la lascher tout aussi tost apres la mort de ceste-cy. Et Dieu sçait quel remuement on y verra s'ainsi aduient.

*Le pol.* O Seigneur ! Et vit-elle encore ceste fatale Medec ? Qui eust iamais cūy dé cela ? Catherine de Medicis, & ses enfans ont bien surpassé en luxure, en cruauté & perfidie trestous leurs deuanciers tyrās, ils les ont dy-ie, iustifiez, & aboly le plus de leur renom : Mais apres ceux là, ie croy certes qu'on doit l'honneur à ceste-cy, d'auoir couché à toutes restes son estat, honneur & grandeur, & rafraieschy en plus de sortes le ieu tragique malheureux. Il sembloit bien que sa prison la deuoit auoir priuee des moyēs de continuer ses deportemens ; Mais à ce que l'on a veu la violence de cest esprit



esprit, n'a peu estre retenue ny empeschée qu'elle n'ait rēté le dernier effort desō destī, traināt avec son defastre la ruine de tous ceux qui s'en sont accostez. L'infortuné duc de Northfolc a esté le dernier, qui par son supplice nous sert de bon tefmoin, qu'elle n'a laissé peril à essayer. **Ayant fait** la plus hasardeuse entreprise qui se peut faire, qui est, d'attenter sur la vie de celle qui a la sienne en sa puissance, & de contraindre ceux qui ont sa vie en leurs mains, de n'estimer point leur vie estre asseuree s'ils ne luy ostēt la sienne: Mais qu'attendēt ils ces Anglois? N'y a-il ame qui remonstre à la Royne & à son Conseil la necessité qu'ils ont de s'oster vne telle espine du pied?

*L'hi.* Voire dea: Il y en a eu des plus doctes & plus zelez qui n'ont rien oublié à luy dire sur ces arguments: Mais la royne d'Angleterre est si bonne, elle est tant pleine de clemence & douceur quelle ne prent point de plaisir à voir respendre le sang.

*Le pol.* Quelle douceur nostre Seigneur, & quelle clemence est celle-là, qui traine avec soy la ruine d'un estat si beau & si grand, & de la Religion ensemble! N'est-ce plustost la cruauté la plus extreme qu'on vit onques? Si vne telle calamité se peut eüiter par moyēs iustes & licites: Celay qui ne l'empeschera ne sera-il pas coupable de tous les malheurs qui en aduiendront: Sera-ce pas vne cruelle clemence pour espargner le digne de mort, faire mourir tant d'innocents, & vne double charge de conscience à vn Prince de ne vouloir faire iustice, ne procurer le salut de tout son Royaume. Dieu presēte ce choix à la royne d'An-

gleterre de faire iustice, & asseurer son estat de la Religion en Angleterre, ou refusant iustice, y ruiner l'estat & la religion ensemble. Car on ne peut dire qu'apres le decez de la Royne d'Angleterre, les choses estant en l'estat qu'elles sont, il y ayt moyen d'empescher que la royne d'Escoffe ne vienne à succeder, & par consequent tout l'estat du Royaume à renuerfer, & la Religion à changer: tous ceux qui ne voudront estre si meschans que de quitter le ciel pour la terre, & renier leur religion, pour le moins bannis, chassez, eux & leurs enfans miserables, cōme on a ia veu le pourtraict au regne de la Royne Marie.

*L'h.* Cela est certain: Et beaucoup de gēs de bien Anglois, avec lesquels i'ay deuise de cest affaire, ne s'attendent pas à mieux. Encore dernièrement la royne Elizabeth, estant tombee malade (craignant que pire luy auint) il y en auoit desia plusieurs qui pensoyent à trousser leurs quilles.

*Le pol.* Ha poures gens! Et comment est-ce qu'un Parlement (duquel l'autorité est si grande, comme tu scay) ne fait ouuertement resoudre ceste Royne en cefaiēt cy, en ce fait dy-ie, auquel il n'est pas question seulemēt de punir le passé, mais aussi d'euiten le mal present & aduenir. Dieu aura bien puny d'auuglement, ceux qui ne verront clair en cest affaire. Ceux qui ont remis vn pareil forfait autrefois, l'ont remis à ceux de qui ils n'auoyent occasion de douter semblable conspiration: mais de pardonner à ceux qui retiennent la mesme volonté, & mesmes moyens pour mal fai-



re, c'est plustost temerité que douceur.

L'Angleterre tient (commel'on dict) le loup par les oreilles, ils ne le peuuēt tenir long temps, & encores moins le lascher, que en l'vne & l'autre sorte il ne leur face beaucoup de mal. Le peril y est tout euident, & ia essayé : vouloir encores choquer au mesme escueil où l'on vient de faire naufrage, ce seroit à tort, comme dit le proverbe, qu'on accuseroit Neptune.

Cela est bien certain, que tant que la royne d'Escoffe y sera, elle ne cessera de troubler cest estat, par conspirations intestines: Et si elle en est vne fois hors (comme Charles de Valois s'essaye iouruellement de l'en tirer) par guerre externe.

Il n'y a rien de si pernicieux à vn Royaume que d'y auoir vn successeur, ayant des qualitez si pernicieuses à vn estat, que la royne d'Escoffe. Car en premier lieu, C'est vn successeur ennemy, elle l'auoit assez monstté par les guerres passees. Mais en la conspiration derniere elle a descouuert la plus capitale haine qui se peut monstter.

L'ambition & cupidité de ceste Couronne, ne luy permet point d'attendre le temps de la succession. Elle a autrefois vsurpé le titre & les armes.

A present par ceste conspiration, elle a monstté d'en vouloir auoir la possession & la commodité.

Dauantage, elle est estrangere de nation, tellement que l'affection naturelle, comme seroit



en vn autre successeur qui seroit fils. ne peut arrester l'ambition qu'elle a d'empieter le Royaume.

Item elle est estrangere de religion, qui est la pire qualité de toutes, d'autant mesmes, qu'elle a (comme i'ay entendu dire, les partis pieça dressez dans le Royaume, tellement qu'il n'y escherroit que le coup de l'execution.

La retention donques d'un tel successeur ne peut estre que tresdangereuse à tout estat : Et au contraire l'extermination fort vtile & au grãd repos & tràquillité d'iceluy, de sorte qu'on ne peut douter que ce ne fust vn grand biẽ à ce Royaume de luy oster ceste espine du pied, qui ne cesse de le troubler & picquer: Et de s'exposer au peril, qu'õ peut facilement & par moyens licites euitier, pour après essayer d'estre sauuez par quelque voye miraculeuse de Dieu, & aimer plustost demourer tousiours en danger, en retardant ou refusant iustice, que s'asseurer de son salut avec la iustice. Cela s'appelle en bõ François, Tenter Dieu trop vilainement.

*L'hi.* Tu en parles bien à ton aise & ainsi comme tu l'entens : Mais ie me doute bien l'amy que si tu rendois vne oreille à l'accusée & à ses droits, que possible tu pourrois faire vne toute autre conclusion.

*Le pol.* Ia à Dieu ne plaise que ie rende l'oreille à ceste bonne Dame-là : l'entens qu'elle a trop de moyens pour corrompre les plus parfaits. Mais si serois-ie bien aise d'estre en lieu où son faict fust traité, pour en dire ce qu'il m'en semble,

*L'hi.* Tu en as desia dict assez pour te garder d'en estre

estre iuge. Et nous auons ( comme tu sçais ) à traiter d'vne autre matiere: toutefois pource que cest affaire importe tant à l'Eglise de Dieu, si tu veux, afin que faute de raisons, on ne laisse plus lo guement vne punition si necessaire en arriere, ie tiendray le parti de la royne d'Escoffe ( par forme de deuis ) & t'allegueray au mieux-mal qu'il me sera possible. tout ce que ces partizans alleguent, pour l'exempter de son dernier supplice, toy au contraire debattras ce qu'il te semblera estre raisonnable, selon l'estat & la conscience pour le bié de ce peuple-là. l'ay bon moyen d'en aduertir des Myllords qui me sont amis. Apres cecy, ie te feray entendre le succez de tout mon voyage.

*Le pol.* Ie le veux bien, & si ne fay point de doute que ie n'en puisse bien refoudre ceux qui sans passion avec vn iugemēt pur & net, voudrōt mesurer mes raisons. Mais deuant que passer outre, ie suis d'auis qu'en ce fait-cy ( comme en toute autre matiere d'estat ) nous ayons deux considerations conioinctement, L'vne, Si ce qu'on propose est honnesté, l'autre, S'il est vtile. Ceux qui en matieres d'estat, dient qu'il ne faut cōsiderer que l'vtilité, monstrent qu'ils n'ont guere l'honneur, & encores moint la conscience, en recommandatiō. Le populace d'Athenes suffit pour leur faire hōte au iugement qu'il donna, du conseil que Themistocles leur vouloit bailler sās le declarer qu'à vn. Ils esleurent ( comme tu sçais ) pour l'ouyr non point le plus affectionné à l'amplification de leur Republique, ains Aristides le plus iuste, auquel apres qu'il leur eut rapporté que le cōseil de The-



mistocles estoit fort vtile, mais, ~~tres~~-iniuste: Ils dirent tous d'une voix qu'ils n'en vouloyent point: Nous auons donc en ce faict-cy obligation & deuoir de regarder autant la iustice & honesteté, cōme l'vtilité publique du royaume d'Angleterre. De ce biē public s'il y a interest ou non, i'en ay desia, ce me semble, parlé assez: reste seulement à vuyder, si le fait est aussi iuste & honeste, comme vtile & necessaire. Il est bien certain & ne se peut nier, que c'est vn des plus grans crimes qui se peuuent commettre enuers les hommes que de conspirer contre le Roy en son royaume, contre son estat & rauissement d'iceluy: l'exemplaire punition de Coré, Dathan, & Abiron le tesmoigne assez: Dauid ordonné & esleu de Dieu pour estre Roy apres Saul, s'est contenté de se deffendre & se garentir sans iamais attenter sur la personne de Saul, à qui neantmoins il estoit destiné successeur de la bouche de Dieu. Et combien que Saul luy fist guerre mortelle & iniuste, si est-ce que Dauid se condamnoit comme digne de mort, s'il eust attenté contre Saul, & fit mourir celuy qui l'osa entreprendre, quoy qu'il se couurist du commandement & de la necessité de Saul. Ce seroit vne superflue & vaine ostentation de s'amplifier en long discours sur la preuue d'une maxime si indubitable: Que celuy qui veut renuerser l'estat & attenter sur la vie du Seigneur souuerain d'iceluy (i.e. ne parle pas du tyran ny de la tyrānie aussi) est digne du supplice de mort: & est permis, voire cōmandé aux Peres de massacrer leurs enfās, & aux freres leurs freres qui conspirent contre l'estat. Aussi qui regarde combien de maux & de crimes



font trouuez en ce seul crime,combié de personnes y sont offensees : les ruines & calamitez qui s'en ensuyuent:la lōgue misere qu'un tel fait traîne apres soy,il s'en trouuera tant d'expres,& en si grād nōbre, dōt chacū est seul digne de mort qu'il n'y a pas assez de supplices pour vne telle hydre de crimes. Il ne faut que se figurer l'image d'une desolatiō vniuerselle de tout le royaume,la cruauté des proscriptions & calamiteux spectacle des pros crits, pour iuger le merite de celui qui en aura esté cause.Et iettant les yeux plus loin considerer qu'il faut abolir toute espee de Republique & d'estat,& rēdre les hōmes brutaux sans societé ne iustice, si tel crime n'est condāné, d'autāt qu'il n'y a estat qui puisse subsister, si telles cōspiratiōs demeurēt impunies. Et d'autre part leuant encores les yeux plus haut , considerer de qui procede l'authorité & puissance que Dieu a mise aux Princes souuerains , qui leur rait le sceptre resiste à la puissance de Dieu , & viole ce qu'il a voulu estre sainct & inuiolable par dessus autres choses humaines. Ce seroit chose trop ridicule de pēser excuser ce fait , pour dire que le crime n'a pas esté effectué,ny par cōsequēt tous les susdits maux ensuyuis. Car en vn tel crime, si on attēd l'executiō, il ne reste plus moyē de le punir:il faut que l'ētreprise soit punie cōme le fait: autrement iamais il n'y auroit punitiō.Car si le crime eust reussy,qui eust puny les coupables? il n'y eust eu ny loy,ny iuge pour les cōdāner. Au cōtraire ils eussēt eu le pouuoir sur la loy & iustice. Les exēples de ceux qu'on lit auoir esté punis ne sōt pour auoir executé:ains

feulemēt pour auoir attenté. Reste donc pour vn principe confecty & indubitable par toutes les nations de la terre, & par toutes loix diuines & humaines. Que vne telle conspiration est digne de plus de morts & supplices que le coupable ne scauroit souffrir: & par consequent sensuit que la punition n'est pas moins iuste & honeste, qu'elle est vtile & profitable.

*L'hi.* Je t'accorde cela simplement: Mais aussi il faut que tu me confesses, par l'aduis de Ciceron mesmes, que si l'on propose deux honestes & deux vtils, quand & quand qu'il faut prendre le plus vtile, le plus honeste & mieux seant.

*Le pol.* Je l'auouē.

*L'hi.* Il y a plus: C'est qu'en toutes choses & sur tout en tous iugemēs, on traite premier des personnes, apres l'on traite de leur fait, ie dis notamment des personnes du iuge & de l'accusé.

*Le pol.* Je le confesse, mais que s'ensuyura-il pour tant?

*L'hi.* C'est que si nous considerons les qualitez de la personne de la royne d'Escoffe, nous trouuerōs pour la premiere, qu'elle est maistresse de sō Roy aume, de pareille puissance que la royne d'Angleterre n'est subiecte, & inferieure ny iusticiable. Qui es tu donc, dit l'Escripture, qui iuges le seruiteur d'autrui? Dieu a, comme avec vn cordeau, departy la terre entre les hommes qui tasche de l'outre passer, contreuient au dixieme commandement perpetuel & inuiolable. Et d'aller resusciter quelques vieux droits de souueraineté, que l'Angleterre pretend dessus l'Escoffe, & en vouloir vser,  
pour

pour rendre la royne d'Escoſſe iuſticiable de la royne d'Angleterre: Il n'y a homme de bon iugement, qui ne die que ce ſeroit des pretendues couleurs & recherches, pour ſe deffaire d'une Princeſſe à qui l'on veut mal. Car puis qu'elle a eſté auât ſa priſon en poſſeſſion, de ſe dire Monarque en ſon Royaume, elle ne peut eſtre par la contrainte tenue, qu'en la meſme condiô qu'elle eſtoit lors de la premiere heure de ſon emprisonnement.

Ce ſont les loix du grâd Empire Romain, en toutes les grandes guerres qu'ils ont eues par toute la terre: C'eſt la raiſon naturelle qui le perſuade aſſez à vn chacun. Et de pretendre auſſi qu'elle n'eſt plus Royne, qu'elle a eſté priuee du Royaume par ſa deſmiſſion, & par la deliberation des eſtats d'Escoſſe: Ce ſont des traits que la Royne d'Angleterre, ny autre Prince ne peut approuuer, ſans faire tort à l'autorité que tous les Princes ſouuerains vſurpent & pretendent auoir de iuger & donner la loy à leurs ſuiets, non point eſtre iugez ny receuoir la loy d'eux, ou eſtre cōtables de leurs actions qu'au ſeul Dieu quoy qu'ils facent. Tu ſçais bien que le noſtre ſ'en eſt ſouuent fait à croire. Et en telles occasions, il ſemble que les Rois ſont tous vnis à reprimer & cōbatre le faiô des ſuiets: Tant ſ'en faut que la royne d'Angleterre ſ'en puiſſe ſeruir pour ſ'approprier autorité ſur le royaume d'Escoſſe. Il reſte donc à la royne Marie Stuard, ceſte qualité de Royne ſouueraine, non inferieure de la royne d'Angleterre, laquelle par conſequent ne peut iuſtement cognoiſtre ny iuger ſur elle: d'autant que le fondement



plus grād & preallable pour solidier vn bon iugement, c'est d'establir la puissance & autorité legitime de celuy qui veut estre iuge.

Les ambassadeurs des Rois sont par toutes les plus agrestes nations, par toutes especes de religions, inuiolables, & ceux qui les offensent tenus pour execrables & violateurs du droict des gens: à plus forte raison ceux qui offensent les Rois, desquels les ambassadeurs n'ont que la reputation. Les Romains ont laissé vn exēple qui est en plusieurs points conforme au fait de la royne d'Escoffe. C'est des ambassadeurs venus de la part des Tarquins à Rome pour emporter leurs menbles apres leur reiection. Ces ambassadeurs firent vne conspiratiō avec aucuns Romains pour remettre les Tarquins & renuerfer la Republique, tuer les Consuls & principaux d'icelle: la conspiration est descouuerte: les Romains sont punis iusques à la que Brutus fit mourir ses propres enfans, quāt aux ambassadeurs, le fait est debatū au Senat, ou le droict de gens le gaigna, & furent les ambassadeurs enuoyez en seureté. Celuy qu'ils representoyēt qui estoit Tarquin estoit chassé de son Royaume, comme la royne d'Escoffe: les ambassadeurs auoyent faict la conspiration dans Rome, apres y auoir esté receus, comme la royne d'Escoffe a fait en Angleterre apres y auoir esté receue. Et toutefois il fut iugé qu'encore en cecas ils estoient inuiolables.

La seconde qualité que la royne d'Escoffe peut alleguer pour estre exempte de la generale cōdānation des conspirateurs, qu'elle est refugeie en Angle-

Angleterre:chacū scait cōme elle y est venue à refuge apres la desrouted d'une bataille,cōme elle y a esté receue à refuge & seureté de sa vie:à ceste heure la faire mourir, on dira que c'est l'acte le plus indigne d'un Prince qui ait esté fait iamais à autre Prince. Les plus barbares Princes ont eu ceste humanité de receuoir les rois deiectez de leurs thrones,& les maintenir en toute seureté les traiter avec hōneur & dignité:& ont pensé que c'estoit leur propre grandeur de secourir,ou pour le moins retirer les rois expoliez de leurs estats,soit par leurs suiets ou par autres Princes.Et n'y a eu iamais difference de religiō,inimitié passée ny autre occasion qui ait empesché ce respect deu à la maiesté des Rois & Princes souuerains,& à ceux qui leur appartiennent.On lit de Chilperic 4. roy de Frâce,que les François chasserent de son royaume qu'il fut receu à refuge par le roy de Lorraine Loys Alphonsero de Portugal chassé par son frere Scancho roy de Castille fut receu par le roy de Grenade Tilleda,biē qu'il fut Sarrazin:& quoi qu'il luy fust predit,qu'il ruinerait sa posterité: il le tint en seureté,& le laissa aller apres la mort de son frere en son royaume. Les rois Loys II.& Charles 8.receurēt Zizim ou Gemes Turc deieté d l'Empire par Baiazet son frere, voire mesmes e pape Innocēt le receut.Il est vray qu'Alexādre 6.sō successeur luy fit en fin vn trait de Pape.The mistocles fut receu par le roy des Perses,& quoy que sa sœur luy demādaſt punitiō,de ce qu'il luy auoit tué ses enfans à Salamine,iamais ne voulut violer l'Azyle & refuge,qui est es maisōs des Rois pour tous les Princes affligez.

Ily a bié eu en plusieurs Roys & Princes, cōme en tous estats, de la meschâceté & nō guere moins d'exemples de ceux qui ont enfreint & violé ce sainct droit d'hospitalité, mais le consêtemēt vniuersel de toutes les nations de la terre detesté ceste perfidie, la fin mal-heureuse de la plus part des perfides les condamne assez, les poetes s'en sont seruis pour suiets de leurs tragedies, & les ont logez en leur enfer fabuleux, parmi les plus cruels tourmens qu'ils ont peu excogiter. Les histoires en rapportent des exemples dignes plustost d'estre enseuelis que recueillis en la memoire des hōmes, si n'est pour la fin qu'ils ont eue miserable.

On n'a que faire de disputer si la royne d'Angleterre a donné la foy à la royne d'Escoffe, de la renir en seureté : Car depuis qu'elle est receue, la detenir vn si long temps, cela importe à ses promesses de seureté: autrement il eust fallu dès le commencement ne la recevoir point, comme on voit par les histoires Romaines, que quand ils ne vouloyent donner seureté aux estrangers qui venoyēt à eux : Ils leur commandoyent dedans dix iours de desloger de l'Italie, mais que depuis qu'ils les auoyent receus, ils les ayent recérchez de rien, on ne la veu iamais. Aussi n'y a-il homme qui ne blasme ceux qui de froid sang font mourir vn qu'ils tiennent en leur puissance, encores qu'il soit leur ennemy, & par eux prins en guerre, ce que n'a esté la royne d'Escoffe.

La troisieme qualité de la royne d'Escoffe est, qu'elle est prisonniere. Il sembleroit que ceste qualité luy deust preiudicier, par ce que par cela



on cognoist qu'elle n'a point esté receuë comme  
refugiee ny donné aucune foy : Mais c'est au con-  
traire : si elle auoit esté receuc à refuge & promes-  
se donnée , on luy pourroit imputer d'auoir con-  
spiré contre celle qui luy auoit vsé de ceste gran-  
de humanité : à présent n'ayant receu aucune hu-  
manité de la royne d'Angleterre, elle ne luy est de  
rien obligee , voire que pour luy auoir vsé de ce-  
ste rigueur & n'auoir exercé en son endroit, ceste  
generosité & beneficence royale, comme les Rois  
dont i'ay parlé, elle auroit occasion d'en prendre  
vengeance : Comme fit d'un roy d'Hongrie qua-  
trieme, Federic duc d'Austriche, qui ayant fuy vers  
luy apres la desroute d'une bataille gaignee sur  
luy par les Tartares : il le retint prisonnier, & le  
contraignit luy bailler d'argent & trois Comtez  
prochains d'Austriche. En fin estant deliuré, luy fit  
la guerre, & le tua à une bataille. Il est certain que  
la royne d'Ecosse a esté tousiours sous bonne &  
seure garde, i'amaïs n'a esté en liberté sous sa foy :  
un prisonnier qui n'est point sur sa foy & à qui on  
a baillé garde : il ne peut estre blasmé de rechercher  
sa retraicte par toutes les voyes qu'il est possible.  
Mesmement qu'elle dira auoir esté iniustement  
faicte prisonniere : Car où l'on pretend qu'elle  
soit prisonniere de iustice, ou de guerre : autre  
tiers moyen agile ne s'en peut trouuer : d'estre pri-  
sonniere de iustice, i'ay desia dit qu'elle n'est ius-  
tifiable de la royne d'Angleterre : Par ainsi elle  
ne peut estre prisonniere de iustice en Angleter-  
re, par ce que le fondement d'une vraye iustice y  
deffaut, c'est la puissance du Iuge : D'estre prison-

niere de guerre, on demande en quelle guerre les Anglois l'ont prinse. Que l'on se represente ce que Elizee dit au roy d'Israel, quand il amena les Syriens miraculeusement aueuglez au roy d'Israel, lesquels voulant faire mourir, le Prophete luy dit, qu'il ne les auoit pas prins par glaue: & par ainsi qu'il ne les pouuoit faire mourir, ny retenir: ains les deuoit laisser aller en paix: comme il fit.

Si on vouloit subtilizer sur les actions passees de la royne d'Escoffe, & dire qu'elle est chargee d'auoir fait mourir le feu roy d'Escoffe son mary, natif d'Angleterre: par ainsi qu'il estoit loisible à la royne d'Angleterre de cognoistre & iuger du tort fait à son suiet par vn estranger le trouuant en sa terre. Ce seroit entre gens de bõ iugemēt vne couleur recerchee, pour masquer vne charité de Cour: & ne fust-il que de ce que le feu roy d'Escoffe se faisant roy d'Escoffe, quitta assez par là sa naturelle patrie. Et la Royne mesme l'ayant approuué pour roy d'Escoffe, raisiblement abdica de soy son suiet: cōme ancienement les patrons leurs serfs. Par ainsi elle ne la peu tenir depuis pour son suiet.

Et quand bien la iustice, le droit & la raison, permettoient de faire mourir legitiment la royne d'Escoffe: encores proposera-on à la Royne d'Angleterre, pour l'esmouuoir à grace & commiseration: Premièrement que la royne d'Escoffe est sa prochaine parente. L'exemple de Dauid enuers son fils Absalon: du roy Charles 5. enuers le roy Philippe de Nauarre. Puis le naturel de la royne d'Angleterre ayant tousiours regné en telle douceur, qu'elle en est louee & admiree par toute la

terre

terre : d'oublier ceste vertu si recommandable aux Princes, que la debonnaireté par la cruelle effusiõ de sang de ses plus proches, les anciens Empereurs qui ont pardonné les coniurations cõtr'eux faites, luy serõt proposez, lesquels elle a surpassé iusques à present en ceste louange d'humanité & clemence. Dauantage la punition qu'on en feroit si ignominieuse: que si d'un costé on met deuant les yeux la maiesté Royale, en laquelle chacun à veu la royne d'Escoffe, estant royne d'Escoffe & de France des deux plus anciennes Couronnes de toute la terre, & apres le spectacle miserable, qu'elle fust liuree entre les mains d'un bourreau: il n'y a si felon & cruel cœur tant fust il seure & hardy en la condamnation, qui ne fust amolly & larmoyant à l'exécution. D'autre part le respect du fils du roy d'Escoffe sera de quelque valeur, pour respecter l'honneur de la mere inseparable de l'honneur du fils: lequel ne peut estre, s'il a bon cœur, qu'il ne se ressent de deshonneur que sa mere aura souffert par la main des Anglois: tellement que quand la mere en seroit digne, si on aime ou respecte le fils: il faut luy deferer en cest endroit qu'on ne deshonnore point la mere & luy en elle consequemment. Outre les points que j'ay traictez de la iustice & de la commiseratiõ, encore adiousteray ce point de l'utilité du royaume: car on dira si on vient iusques-là que d'entreprendre sur la personne de la royne d'Escoffe: les Rois voisins auront un beau pretexte, voire occasion, digne de Rois, protecteurs des Princes affligez, d'entreprendre une guerre contre la royne d'Angleterre: de sorte que



pensant affermer son estat elle le met en guerre & en danger: pour le moins le roy d'Escoſſe son fils, comme nous venons de dire, s'il deuiant grand: ne seroit pas vrayement fils s'il ne haïſſoit mortellement l'Angleterre, voyant l'outrage qui aura esté fait à sa mere: & quoy qu'il trouue bon d'estre Roy affermé par ce moyen, si est-ce qu'il fera comme Dauid de celuy qui auoit tué Absalon son fils, ennemy & conspirateur contre sa vie & son estat. Voila donc vne haine entre ces deux Royaumes qui sont à present de bon accord, & vne guerre mortelle preparée à venir.

Ie te laisse à penser maintenant l'amy, si ce ne sont pas là des raisons & circonstances de tel poids qu'elles peuuent bien emporter à vne iuste balance, tout ce que tu pourrois dire alencontre pour vouloir comprendre la royne d'Escoſſe en la condamnation que nous tenons tous estre tresiuste, sur les conspirateurs contre l'estat & la vie d'un Prince.

*Le pol.* Tes raisons ont quelque apparence, pour emporter les passionnez au party que tu auois prins à deffendre: Mais elles ne peuuent en rien esmouuoir vn cerueau bien fait, vn iugement cler, & vne conscience nette, qu'elle ne iuge le plus honeste, le plus iuste & vtile estre tousiours de mon party. Et qu'il soit vray, escoute vn peu en silence ce que j'en ſcay & ce que ie t'en veux dire.

Le premier poinct que tu as allegué de ce que la royne d'Escoſſe n'est iusticiable de la royne d'Angleterre, ains est egalle en puissance à elle, ſouueraine en sa terre comme elle, & que ce se-

roit

roit vsurper sur le sceptre d'autrui &c. Tout cela a lieu (afin que ie me taife de sa desmission) quand elle seroit en Escosse, ou qu'il seroit question de ce qu'elle a faict en son Royaume : Car alors la royne d'Angleterre n'y a que voir, & ne la pourroit iustement recercher en aucune façõ, sous quelque pretexte que ce fust (si ce n'est pour l'oppression & tyrannie qu'elle feroit à l'Eglise de Dieu & au royaume de Iesus Christ, lequel estant espandu au long & au large par toute la terre, n'est enclos dans aucunes limites. La deffense duquel est egalelement & indifferemmēt recommandee à tous Princes de la terre : Pour cecy dy-ie le Prince qui a esgard à son deuoir, peut recercher, chastier & combattre son compagnon qui fait la guerre à Dieu. Constantin sert de bon exemple qui rengea par armes Licinius à laisser en paix les Chrestiens qu'il persecutoit en ses terres. Mais de ce que la royne d'Escosse a fait estat en Angleterre, qui peut douter qu'elle n'en puisse estre iugee par la royne d'Angleterre? La souueraineté des Rois a lieu en leurs Royaumes: mais depuis qu'ils sont au royaume d'autrui, leur souueraineté n'a point de lieu. Car en la terre d'un souuerain, il n'y a personne qui ne luy soit inferieur, mesmes en ce qui concerne l'estat & la seureté de la Republique. L'on voit comme les Rois en ont tousiours vsé quelque autre Roy qui viene en leur terre, soit-il tant amy & parent qu'il voudra, quelle gratification qu'on luy vueille faire, iamaïs on ne permet qu'il commande souuerainement: si n'est avec autāt de puissance que par courtoisie on luy ottroye. C'est vne

choſe pleine de ialouſie que la ſouueraineté, qui ne ſe communique iamais à autrui, de ſorte que toutes les raiſons que la royne d'Eſcoſſe pourroit alleguer en ceſt endroit ſont contre elle. Car ſi pour eſtre ſouueraine elle pretend que nul ne peut ny doit attentet ſur ſa perſonne, par ce que ce ſeroit entreprendre ſur la perſonne & eſtat d'un ſouuerain. Pourquoi eſt-ce qu'elle a entrepris & coniuré contre la perſonne de la royne d'Angleterre & ſon eſtat meſmes en ſon Royaume? Et tout ce qu'elle peut dire pour extoller la ſouueraineté & exemption des Rois fait contre elle. Par ce que c'eſt la premiere qui l'a violee, par ainſi elle ne s'en peut plus ſeruir, non plus que celui qui enfreint vn priuilege, ne s'en peut plus aider, meſmes enuers celui enuers lequel il l'a rompu, Celui qui n'eſtoit reſpecté par le Conſul comme Senateur, diſoit qu'il ne le reſpecteroit auſſi comme Conſul. Je ne veux pas debatre ſi elle eſt pareille, ou ſubalterne à l'Angleterre: ſi elle eſt encores Royne ou priuee de ſon Royaume, cela eſt certain que les eſtats l'en ont peu deſmettre. Mais quand elle ſeroit plus aſſeuree royne ou monarque, quelle n'eſt, puis qu'elle ne craint en la terre d'un autre Roy faire des entrepriſes pour luy oſter la vie & la Couronne, ne peut-il pas inſolent dire? Pourquoi voulez vous que ie reſpecte la ſouueraineté que vous auez hors d'icy, que vous ne reſpectez pas la mienne en ma terre propre?

S'il n'eſtoit permis à vn Roy de cognoiſtre de tels faits ſur les eſtrangers Rois, le meſchant ſeroit de meilleure condition que l'innocét. Il ſeroit loiſible



sible de conspirer par prodicion contre les Rois:& les Rois ne pourroyét deffendre leurs vies & leurs estats par la iustice. Et tât plus doit il estre loisible à vn Roy de maintenir son estat par vne iuste punition sur vn autre Roy ou Monarque, que sur vn autre qui ne seroit souuerain: d'autant qu'encores pourroit-on desirer que le Roy offensé en requist iustice au superieur du coupable, pour n'estre iuge en sa cause propre. Mais où il n'y a aucun iuge par dessus le coupable: ou il faut que les Rois facent eux mesmes la iustice, ou bien qu'ils soyent en pire condition, que les plus infimes. Car à faute de iuge ils n'auroyent aucune reparation des torts qui leur seroyent faits. Et toutefois là où il n'y a point moyen d'auoir iuge, les loix permettent aux suiets mesmes de se faire iustice de leur main.

Au reste ie te confesse, que (comme tu as dict) les ambassadeurs sont inuiolables, mais c'est tant qu'ils se cōtienēt aux termes d'ambassadeurs: Mais quand ils sortent hors des bornes de leur estat, ils ne doyēt plus estre tenus pour tels. Les Romains ont attribué la prinse de Rome par les François au crime, qui auoit esté commis par Q. Fabius leur ambassadeur enuoyé aux François, où il tua hostilement vn François, & apres s'en alla à Rome. Les François demanderent aux Romains, qu'ils le leur baillassent, pour auoir le supplice que merite vn ambassadeur qui fait actes d'hostilité.

Les Fecialiens estoient d'auis qu'il le leur failloit liurer: autrement que les dieux en seroyent fort courroucez & desplaisans. Le peuple Romain au contraire sauua ledict ambassadeur:

dont apres l'ire des dieux ( comme ils disent ) fut telle contre Rome , qu'ils donnerent la Cité en proye aux François , & ne leur resta de tout leur Empire que la petite tour du Capitole. Demades ambassadeur des Atheniens à Antipater , escriuoit des lettres à Antigonus , pour venir prendre Macedoine & l'Empire de Grece qu'il disoit ne tenir qu'à vn filet vieil & pourry , pource que Antipater estoit vieil. Cassander le fit mourir comme traistre. Les ambassadeurs des Perses venus à Amyntas , roy de Macedone, voulurent violer ses concubines : Alexander son fils leur supposa des garçons qui les tuerent. Antonius fit donner les estriuières à vn ambassadeur de Cesar , & apres le luy enuoya, disant qu'il auoit parlé trop superbement. Que si le senat Romain a iugé les ambassadeurs des Tarquins estre inuiolables par le droict des gens , combien qu'ils eussent conspiré contre la Republicque : çà esté parce qu'ils ne faisoient autre , que la charge que leur maistre leur auoit baillee : mais ils en voulurent bien punir le maistre de ce qu'ils pouuoient : Car combien que auparauant ladicte conspiration descouuerte ils les declarerent confisquees & execrables : Aussi la consequence n'est pas bonne, ce qui est permis à vn ambassadeur , sera permis au maistre : car les ambassadeurs ne sont pas inuiolables, pource qu'ils representent leurs maistres : Ains au contraire , les ambassadeurs qui viennent de la part de ceux qu'on voudroit le plus offenser

ne



ne laissent pas d'estre inuiolables : Et toutefois si on tenoit leurs maistres, on les traiteroit hostilement : Mais le priuilege des ambassadeurs est fondé sur vn droit de gens, par ce que s'il n'y auoit franchise & immunité pour telles personnes, toute seureté humaine seroit perdue, & ceux mesmes qui les offenseroyent sont interessez à les conseruer, autrement on en feroit autant des leurs. Les Consuls Romains respondirēt à Hanno ambassadeur des Carthaginiens, que leurs maistres meritoient qu'on ne leur tint point la foy nō plus qu'ils l'auoyent tētie à leurs ambassadeurs : mais ils ne vouloyent pas punir au seruiteur ce que le maistre meritoit, non pour autre chose que pour la foy publique. D'ailleurs il y a des faicts, qui sōt excusables, voire louables aux seruiteurs, freres, enfans & femmes pour vne fidelité & affectiō seruiable & officieuse, qui toutefois seroyent bien punis aux maistres, peres & meres. Les histoires des seruiteurs qui ont hazardé leur vie pour sauuer la vie de leurs maistres iustement condamnez, sont vulgaires & en louange à chacun. Mais si les condamnez eussent fait de mesme, ils eussent esté doublement punis.

La seconde qualité & circonstance de ce que la royne d'Escoffe est refugiee en Anglererre, & par ainsi ne peut estre offensee sans reproche & note de perfidie, fait pareillement contre elle. Car d'autāt sō ingratitude est plus punissable, d'auoir voulu oster la vie à celle qui luy conseruoit la siene. Si celuy qui n'a rien meritē enuers le Prince qui le reçoit à refuge, veut que pour le seul respect



d'humanité on le conferue : à plus forte raison doit il rendre le mesme deuoir à celuy , qui luy a fait desia vn bon office de protection, Si ceux qui ont violé le droict d'hospitalité aux Princes refugiez vers eux, sont detestables: combien le meritent dauantage ceux qui l'ont violé aux Princes qui les ont receus?

Je tiens la foy & seureté donnee par la seule reception de la royne d'Escoffe, & accorde que ce feroit rompre la foy, d'offenser celuy qui a esté receu à refuge : mais c'est vne perfidie detestable d'offenser celuy qui le reçoit.

Les poetes ont encores plus abondé en tragedies composees sur ce suiet, de la punition de telles perfidies, que des premieres. Les histoires pareillement n'en rapportent que trop d'exemples: la seule histoire de l'euerfion de Troye pour la perfidie commise par Paris à Menelaus, le consentement de toute la Grece à la punir & si obstiner dix ans, avec toutes les incommoditez & malheurs qu'il est possible.

Cleomenes roy de Sparte receu à refuge par Ptolomee, fuyant Antigonus, & ayant apres conspiré contre luy se tua. Ptolomee l'ayant descouuert fit pendre ignominieusement son corps, comme indigne de sepulture. Mais qui est celuy là qui voudroit deffendre vne telle desloyauté, d'un qui auroit esté recueilly en sa misere par vn autre, & apres auroit conspiré contre sa vie? Qui tient vn tel fait impuny oste tout le lien de la societé humaine, & fait perdre tous les offices d'humanité entre les Rois, s'ils pensent qu'ayant receu

ceuvn autre Roy à refuge, il luy seroit loisible cōspirer contre celuy qui luy fait bon office, sans crainte d'aucune punition. Il n'en faut faire iuges que ceux mesmes qui sont refugiez chez autrui, ceux-là detesteront comme pernicleux & dommageables à tous les Princes, tant à ceux qui reçoivent, que aussi à ceux qui ont besoin d'estre receus.

Pour la derniere qualité & circonstance: Tu dis que la royne d'Escoffe estant prisonniere & mal traictee pour sa condition & dignité Royale, peut licitement tenter tous les moyens pour eschapper & recouurer sa liberté. Ceste opinion est veritable, mais qu'elle soit bien entendue: c'est à dire qu'on ne peut point imputer desloyauté à celuy, que l'on tient sur garde, & ne se fie-on en rien à sa foy, s'il cherche quelques moyens pour euader.

Mais que si vn prisonnier pour eschapper cōmet quelque crime qu'on ne l'en puisse punir: il s'ensuyuroit que pour estre prisonnier, il auroit toute licence de mal faire.

Le plus vrgent argument en ce faict, est, de ce que la royne d'Escoffe pretend estre iniustement, & sans legitime occasion detenue prisonniere par la royne d'Angleterre, comme n'ayant esté prinse en guerre ou autrement.

Et par ainsi, comme entre les Rois, le glaive est le vray iuge pour punir, & venger leurs faits: Si elle a voulu faire tous apprests, pour venger par vne guerre le tort qu'elle pretend que la royne d'Angleterre luy faict, elle ne fait que ce

que tous les Rois feroient en semblable cas, & cōme ce duc d'Austriche fit enuers le roy d'Hongrie duquel tu as parlé. Je te responds que la Royne d'Angleterre a si bien iustificié son faict enuers tous les Princes Chrestiens, & monstré que tant par les loix & conuenances des deux royaumes d'Angleterre, & d'Escoffe, que par l'vsage obserué entre les predecesseurs Rois de l'vn & de l'autre royaume, il luy estoit loisible de retenir la royne d'Escoffe, & luy estoit impossible de la lascher sans faire tort aux loix ancienes & à son estat, qu'il n'est besoin de faire plus grande instance sur ce point.

Et mesmes quand bien la royne d'Escoffe eust peu pretendre auoir esté iniustement faite prisonniere apres auoir faicte ceste conspiration, lon ne peut dire qu'elle ne le soit iustement: comme il aduient souuent que d'une bonne cause, la poursuyuant par meschans moyens l'on la rend mauuaise.

Pompee, Caton & le Senat Romain faisoient tort à Cesar de luy refuser le triomphe si iustement acquis: toutefois par ce qu'il le poursuyuoit par conspirations contre la patrie, il n'y a homme qui n'ait iugé, qu'il auoit fait de sa bonne cause vne mauuaise. Si on considere toutes les conspirations qui se font à vn estat, elles sont la plus part accompagnées de quelque tort, que l'on faict à ceux qui viennent iusques à ceste extremité & hazardeuse entre prinse: mais ne s'ensuit pas pour cela, qu'ils soyent innocens & non punissables.

La royne d'Angleterre mesmes suffira pour exemple,



ple, en ce faict: y eut-il iamais Princeſſe plus in-  
iuſtement & tyranniquement retenue priſonniere,  
plus ſeucrement traitée, plus ſouuent expoſée  
au danger de mort qu'elle fut par ſa ſeue ſœur: cō-  
bien qu'elle ne l'eut iamais offenſée: Si eſt-ce que  
iamais n'entreprint, ne conſpira contre elle: &  
quand elle l'eut entrepris, il eſt ſans doute quel-  
le eut eſté iuſtement condamnée, combien qu'elle  
eust peu pretendre droit à la Couronne. Auſſi  
Dieu a ouy ſa iuſte plainte, & luy a fait iuſtice de  
ſa main.

Quand la royne d'Eſcoſſe auroit eu ſeulement  
ce but de recouurer ſa liberté, & employer les  
moyens tendans à ſ'eſchapper, elle ſeroit excuſa-  
ble: mais d'auoir voulu vſurper l'eſtat de la royne  
d'Angleterre & attenter ſur ſa perſonne: c'eſt biē  
indignement reconnu, ce que la royne d'Angleter  
re a fait en ſon endroiēt. Elle a eu puiſſance ſur la  
Royne d'Eſcoſſe, ſur ſa vie, (il eſt certain) ſur ſon  
eſtat. Les occasions en ont eſté ſi propres, ſi ſou-  
uent par tant de guerres ciuiles & partialitez qui  
ſont en ce Royaume-là, qu'il n'y a homme qui par  
discours humain ne le reconnoiſſe: ſi eſt-ce qu'elle  
n'a iamais voulu attenter ſur ſa vie, ny la liurer  
és mains de ceux qui la vouloyent faire iuger par  
les eſtats: encores moins faire entrepriſe ſur le  
Royaume. Mais au contraire elle a taſché par  
tous moyens à le pacifier & le conſeruer pour ſon  
ſils: toutefois à preſent elle luy rend tout le con-  
traire.

Ce que l'on peut alleguer pour attirer à cle-  
mence la royne d'Angleterre à pardonner ce fait,

est bien considerable pour auoir compassion de la royne d'Escoffe. Aussi vraye iustice doit estre accompagnee de compassion ; & vuide de toute cholere, malice & cruauté. Mais que pour vne pitié, il faille au lieu de iustice faire iniustice : & s'il faut auoir pitié, en auoir plus d'une seule personne, que de tout l'estat vniuersel, ce seroit mesurer à fausse mesure, & poiser à fauts poids la clemence, & l'humanité, car s'il faux estre pitoyable, ce seroit plustost estre cruel, que humain, pour sauuer vn particulier, que on n'aye point de pitié de tout vn peuple, de tant de noblesse, de tât de familles, desquels la mort, le pillage, la ruine, & la misere estoit toute proiettee par ceste conspiration, & ne scauroyent estre assurez que par la punition du chef de la coniuration.

Il y a eu des Empereurs qui ont pardonné les conspirations: Vespasien les mesprisoyent routes, parce qu'il s'estoit persuadé, qu'il scauoit le iour, heure, & espee de sa mort.

Ce sont des exemples d'agereux à imiter : comme de ce pere, qui ayant descouuert que son fils le vouloit tuer, & le mena en lieu où il estoit seul, luy baille l'espee, luy dit qu'il le tuaist, s'il vouloit. Il y a plus de temerité en tels exēples, que de clemence.

Mais en ce fait: il y a vne consideration plus importance, que en tous les exemples qui se peuvent proposer: & qui met du tout la Royne hors de puissance d'vser de clemence en cest endroit, sans offenser Dieu: Car il n'est pas icy question, d'une conspiration qui n'apportast autre changement,

ment que d'estat, & regne temporel, mais elle importoit changement de la Religion, en laquelle, quand les Princes voudroyent quitter leur offense, negliger le soin qu'ils doyuent du salut, & repos des suiets que Dieu leur a baillé en protection, encore ne peuvent-ils quitter l'offense, qui tend à renuerfer le regne de Dieu, son honneur, & gloire, & son vray seruice.

Il est certain, que si la conspiration eust sorty son effect, la Religion eust changé en Angleterre: l'intelligence du Pape, du roy d'Espagne, & du duc d'Albe le descouurent assez.

Que la royne d'Angleterre donques se represente, le iuste iugement que Dieu fit sur Saul, pour auoir sauué la vie à Agag Roy d'Amalec, Roy qui auoit coniuré la ruine du peuple, & du seruice de Dieu. Ceste clemence le fit reietter de deuant la face de Dieu, rendit inutiles les prieres de Samuel, iusques là, que Dieu luy deffendit de prier pour Saul: & fit que le Royaume fust transporté de luy à son prochain, ainsi qu'en parle l'Escripture.

Acháb ayant donné la vie à Benadab, ennemy & contempteur de la puissance de Dieu, fut condamné par la sentence de Dieu, prononcee de la bouche du Prophete, qui luy dit que son ame seroit pour la siene. Dieu a voulu que les hommes fussent clemens & doux à pardonner leurs iniures, & si ueres à pardonner les sienes.

Et si on regarde bien l'histoire sainte, en laquelle les iugemens de Dieu se cognoissent au vray, & par certitude: (Car aux prophanes, ils ne



se cognoissent que par coniecture.) On verra plus de punitions sur les Rois qui ont voulu estre clemens, aux despens de l'honneur de Dieu, que sur ceux qui ont esté trop cruels. Saul est puny pour clemence: Salomon est loué de la seuerité: Iosué, ayant sans aucune humanité tué trente vn Roy, est loué: Saul, & Achab, pour en auoir laissé échapper vn, sont condamnez à mort: c'est vne vertu fort recommandable aux Princes que clemence, mais le zele de la Religion, est plus commandé que la clemence.

De vouloir persuader qu'il n'est point vtile, de prendre punition de ceste conspiration sur la royne d'Escoffe, & vouloir faire peur à la royne d'Angleterre des Rois voyns, elle a desia essayé, que les entreprinſes des Rois voysns ne cesseront pas pour reseruer la royne d'Escoffe: Mais au contraire, il n'y a rien qui ait donné courage, volonté, ny moyen aux Rois voysns, pour entreprendre sur son estat, que la reserue qu'elle a faict iusques à ceste heure, de la royne d'Escoffe. Il est certain que tous les troubles passez en Angleterre, ont esté brassez par elle, & fondez sur l'esperance de la faire royne d'Angleterre. Les Rois qui s'esmouuoient de sa mort, sont ia esmeus: tant sous pre-texte de la seule detention, & du zele pretendu de leur Religion, que, pour dire plus vray, pour l'en- uie qu'ils ont de ce beau Royaume si riche, & si opulent, qu'ils estimēt vne proye bien aisee, pour estre entre les mains d'une femme, n'estant appuyee de personne, & de laquelle ils imputent la clemence à timidité, & crainte de n'oser chastier  
ceux

ceux qui troublent son estat. La punition de ceste conspiration, n'adiousterà rien à leur mauuaise-volonté: mais l'impunité adiousterà bien aux moyens de l'executer. Le Pape, le roy d'Espagne, ny le duc d'Albe, quelle parentelle, ny confederation, ou amitié si estroicte ont ils à ladicte royne d'Escoffe, que pour son respect ils ayent iamais voulu s'armer contre la royne d'Angleterre? c'est plustost la haine que le Pape, le roy d'Espagne, & le duc d'Albe, portent à la royne d'Angleterre, l'enuie qu'ils ont de la voir si heureuse, au plus fort des malheurs de tous ses voisins.

L'ambition qu'ils ont de ce Royaume si florissant, & encores l'indignation qu'a le Pape, de voir le Religion plantee, tant en ce Royaume, qu'en celuy d'Escoffe, de voir ses reuenus, & son autorité du tout perdue, sans espoir de recouurement. La royne d'Escoffe ne leur sert que de couleur, & de leur fournir de moyens à pratiquer troubles, & remuemens en tous les deux Royaumes: Quand la royne d'Escoffe ny sera plus, leur malice demeurera, mais leurs moyens cesseront, & entre autres celuy qui est le plus specieux, & auantageux pour leur party: C'est que la royne d'Escoffe ne peut faillir d'estre royne d'Angleterre, par le droit de prochaineté, & cours de son aage.

Ceste consideration apporte de grands malheurs à l'Angleterre: car les ennemis de la Religion & de la Royne, en ont le cœur enflé, voyant la saison de leur regne si proche: Ses plus affectionnez seruiteurs, en sont au contraire intimidéz, voyans leur ruine d'autant approcher: & les Prin-

ces estrangers sont retenus à s'affocier à la royne d'Angleterre, si ce n'est pour mieux la trahir (comme nostre Tyran souhaite) sachans bien que l'amitié qu'ils contracteront avec elle, sera autant d'inimitié avec son successeur : tellement que ce seroit contracter avec la personne , non point avec le Royaume: par ce qu'elle estant moins, tout le Royaume sera renuersé.

On ne peut gueres bastir sur vn fondement, qu'on voit ne pouuoir long temps durer:& (comme dit le prouerbe) Il y a plus de gens qui adorent le Soleil leuant, que le couchant. Il est certain que ceste consideration , desfaurise infiniment tous les desseins de l'Angleterre: Mais la facilité que la royne d'Angleterre a, de se priuier d'un tel successeur, & de s'en eslire vn proche, qui soit capable & suffisant , peut couper broche à tous leurs desseins.

Quant à l'indignation que le Roy d'Escoce pourra auoir à l'aduenir, ou contre ceux qui auront fait mourir sa mere , ou contre sa mere, qui a fait mourir son pere. S'il regarde la raison , il a plus d'occasion de se ressentir du meurtre de son pere, auquel n'y a ny occasion, ny pretexte, ains vn parricide, & perfidie detestable: que de celuy de sa mere, qui est accompagné de toute la raison, & iustice, qu'il est possible de desirer à vn iuste iugement: Toint, que c'est vne peur de si loin, & si incertaine: à scauoir de ce que fera vn enfant quand il sera grand , qu'elle ne merite d'estre reputée , au prix d'un danger present & euident.

Outre ce que la comparaizon est fort inegale,  
de



de la crainte d'une guerre extreme, à une conspiration intestine.

Nous avons dit qu'en affaires d'estat, il faut regarder si ce qu'on propose est iuste, & utile au public: les autres respects de clemence, de liberalité, de generosité particuliere, doyvent tousiours ceder à l'utilité publique: mais il y a encores un tiers, qui surmonte tous autres: C'est une necessité publique. Celle-la est preferee quelquefois aux loix diuines ceremoniales. Les Machabees qui ne voulurent combattre au iour du Sabbath, demourerent enseigneurs à leurs successeurs, de faire ceder les ceremonies diuines, à la necessité.

Les Romains disent, que leurs maieurs auoyent souuent preferé la necessité, à la Religion: Les loix politiques luy cedent. Caton qui en a esté le plus rude obseruateur, le persuada au Senat en la question Catilinaire: aussi le salut du peuple, est la souveraine Loy d'un estat: car alors, la necessité publique fait licite ce qui autrement ne l'estoit point: A plus forte raison sera elle preferee à une douceur, qui n'est que volontaire: & à une clemence, qui traine avec soy la ruine de l'estat.

Que la necessité, & salut publique soit en cest endroit, il est assez aisé à iuger, par ce que dessus, où il a esté monstré que ceste conspiration n'apportoit pas seulement changement d'estat, mais ruine de Religion.

Il ne reste donques, que de bien fonder la verité, & certitude du delict: Et auoir intention

droiſte, & ſincere. N'apporter haine, ny paſſions à ce iugement: ains cherchant la verité, deſirer pluſtoſt trouuer l'innocence, que la coulpe. La coulpe eſtant verifiée, auoir compaſſion du malheur auquel le coupable eſt cheu; Mais auoir vne balance, & meſure iuſte à ceſte pitié, qui eſt, comme la haine particuliere, ne doit iamais nuire au public, auſſi la particuliere amitié, ou commiſeration, ne doit iamais faire contrepoids, à la pitié que le prince doit auoir, de la ruine publique, & generale de ſon Royaume: & encores moins, au zele qu'il doit à la conſeruation, & amplification du regne de Dieu.

Le Prince qui refuſe la iuſtice à vn ſien ſuiect, eſt coupable deuant Dieu: à plus forte raiſon celuy qui la refuſe à tous ſes ſuiets d'un coup, & notamment à ceux deſquels on ſcait que leur mort eſtoit iurée par ceſte conſpiration: leſquels (à ce que i'ay entendu) ſont des plus illuſtres de ſon Royaume. Et qui par les fideles ſeruices qu'ils ont fait à la royne d'Angleterre, meritent qu'elle leur octroye, ce qu'elle doit au moindre de ſes ſuiets, qui eſt la iuſtice des machinations qu'on fait contre leurs vies.

Il eſt certain qu'il n'y a fidele ſeruiteur de la royne d'Angleterre qui n'aye fait, & deu faire tous les offices qu'il a peu, de deſcouvrir, accuſer, & condamner (chacun ſelon ſa vocation & qualité) vne ſi malheureuſe conſpiration, & qui par là ne ſoit expoſé, à la haine de tous les conſpirateurs, & de leurs complices: & plus ils y auront fait leur deuoir, plus ils en feront hays de ceux qui ſont les  
plus

plus principaux de ceste conspiration : de façon, que venant la royne d'Escoffe à la succession du Royaume, ceux qui ont descouuert à la Royno d'Angleterre ceste conspiration, sont exposez eux, & leurs familles, à la haine d'icelle, si on la laisse impunie. Qu'est cela sinon pour sauuer le conspirateur, & ennemy, laisser en proye en ses mains, le fidele suiet, & avec ce, donner vn tres-mauuais exemple, à tous ceux qui doreseuuant scauront quelque semblable conspiration (comme il est à craindre, puis qu'on s'accoustume à telles factions en vn Royaume, que ceste-cy ne sera pas la dernière) à n'estre si volontaire à la descouurir, voyant la ruine qui leur est, & à leur posterité toute certaine, pour auoir voulu sauuer la vie, & l'estat à leur Royn.

Il ne faut pas aller gueres loin, pour voir les inconueniens, qui arriuent de pareils faits. Qu'est-ce qui a rendu le roy d'Escoffe dernier, delassé des siens, exposé à la cruauté de ses ennemis, que pour auoir quitté ses amis, lesquels luy auoyent descouuert ce qui touchoit à son honneur, & à sa vie, s'estans monstrez ses bons, & fideles seruiteurs, & s'estans par là rendus ennemis de la royne d'Escoffe, & des ministres de sa lubricité? Il voulut appaiser ses ennemis, & laisser ceux qui luy auoyent voulu faire seruice: il luy aduint que depuis, il n'y eut homme qui voulust, ou osast luy vser de pareils offices, lors que le besoin en estoit plus grand: aussi est ce vne fidelité, & resolution bien rare aujourd'huy, quand vn suiet decouure vn forfait, duquel il voit deux euuenemens tres-cer-



tains devant ses yeux: à scauoir que celuy qu'il accuse, pourroit estre quelque iour son Roy, & auoir sa vie, son honneur, ses biens, & de tous les siens en sa puissance: & l'autre, Que quoy qu'il sache dire & verifier, l'accusé n'en souffrira rien.

Si le conspirateur estoit quelque personne infame, de laquelle ils n'eussent occasion de craindre sa haine, & inimitié, on pourroit dire qu'ils ont interest particulier à ceste douceur, & clemence, & qu'il n'y auroit que l'exemple publicque qui fust frustré: Mais estant celle qui est la plus proche à estre leur Royne, contre laquelle ils ont descouuerte ceste machination, & les laisser en proye entre ses mains, il n'y a pas vn de ceux qui s'en sont meslez, qui ne doine penser, que c'est fait de sa vie, de ses biens, & de tout ce qu'il a de plus cher en ce monde, si la royne d'Escoffe vient à estre leur Royne.

Il est à esperer, que ceux qui ont esté fideles à la royne d'Angleterre, à la descouuerte, & verification de la coniuration, perieuereront tousiours en la mesme fidelité, quelque danger qu'ils se voyent proposé devant les yeux. Or c'est vne tentation bien dangereuse, qu vn Prince pour garantir vn qui est digne de punition, mette en telle espee de desespoir ses plus loyaux seruiteurs.

Le refus de iustice fait par le Prince à ses sujets, mesmement à ceux qui sont les principaux, pres de sa personne, a esté tousiours dommageable

ble au refusant. L'exemple de la mort de Philippe, pere d'Alexandre, suffira pour tous : Le desespoir où tous les suiets se voyent sans esperance de protection de leur Roy, les contraint d'aller chercher leur seureté ailleurs.

Or est-ce le pire conseil qu'un Prince peult auoir, de delaisser en desespoir ses principaux seruiteurs, & les contraindre d'aller chercher leur protection, ailleurs qu'à son Prince naturel.

Si l'on s'amuse à l'opinion que l'on aura de la punition qui se feroit : C'est chose trop vaine, que les opinions, & rumeurs des hommes, pour les mettre deuant le salut. Fabius Maximus n'en estoit pas d'auis : Aussi, quiconque s'arreste à cela, il monstre n'auoir guere droicte intention. Ce bon Empereur d'Antonin, aduertissoit les Proconsuls qui alloient aux prouinces, de n'affecter en la iustice, reputation ny de seuerité, ny de clemence : car l'une, & l'autre affection, desuoyent du droict sentier de la iustice.

Ceux qui iugeront sainement, & sans passion de cest affaire, ne pourront estimer la royne d'Angleterre que tres-iuste Princesse, tres-sage, & bien zelee au salut de tout son peuple, & à la deffense & propagation de la vraye Religion Chrestienne.

Ceux qui en iugeront par affection, & contre la raison, ne meritent qu'on se soucie de leur iugement, ny qu'on dispute avec eux par raison, veu qu'ils la bannissent de leur iugement, par leur passion particuliere.

Pour conclusion , la punition de ceste conspiration sur la royne d'Escoffe, supposé qu'elle soit véritablement coupable , quoy que sachent dire & alleguer ses partizans, est tres-iuste, & legitime, par toutes loix diuines, & humaines : vtile, voire tres-necessaire, pour le salut, & conseruation de la personne de la Royne , & de tout l'estat d'Angleterre, & mesmes de ceux, que la Royne a occasion d'aimer le plus. Au contraire, l'impunité, est vn vray refus de iustice , & de protection à ses suiets, vn mespris du salut de son peuple , & (ce qui est plus à regretter) vne desertion , & contemnement de la conseruation de l'Eglise de Dieu , & de son seruice, lequel , comme tu as dict au commencement, y seroit de tout point renuersé, si la mort de la royne Elizabeth aduenoit , deuant le supplice deu à la royne Marie.

Dieu n'aura faute de moyens pour garantir son peuple esleu , & amplifier son regne : mais malheur au Pasteur , qui aura nourry le loup dans le troupeau : & au laboureur , qui n'a chassé le sanglier de la vigne du Seigneur. Et comme dit Ezechiel, au 33. chapitre: Celuy qui oit sonner la trompette, & ne reçoit point l'aduertissement, si l'espee vient, & l'occit, son sang est sur luy : & encores apres il adioute. La guette qui oyt le son de l'ennemy venant , & n'aduertit, si l'espee vient, & occit vn autre , le sang de celuy-là est sur luy: Car il est mort en son peché. Mais il redemandera (dit le Seigneur) son sang de la main de la guette. Il ne faut point dire, ce danger est loin de nous, ce sera apres la mort de la Royne : Dieu luy face la grace  
de



de viure longuement : tout bon fidele le doit souhaiter: mais c'estoit le prouerbe des enfans d'Israel, duquel le Prophete crie tant, vous auez dit, la prophetie est prolongee, ou sera d'icy à plusieurs iours, & apres long temps: Non, dit le Seigneur: l'auanceray le iour, & ma Prophetie sera auancee, non pas prolongee. Dieu vueille diuertir ce malheur, comme il monstre bien le vouloir : veu qu'il en donne les moyens si iustes, honestes, vtils, profitables, necessaires, aisez, & faisables. Amen.

Voila l'amy en somme, ce que ie pense qu'on peut dire sur ce faict, pour l'esclarcir, & pour refoudre, & desueloper les nœuds de toute la matiere. C'est à toy maintenant, si tu le trouues bon d'en aduertir les grands de ta cognoissance: afin que rien ne les empesche, de demander iustice à haute voix, & crier tant, que les plus sourds l'entendent.

*L'hist.* Ie suis tant satisfait en ton discours gracieux, & prudent: Ie l'ay tellement imprimé au liure de ma memoire: j'ay si bonne enuie qu'il soit veu, & entendu, de tous les zelateurs du bien public de l'Eglise de Dieu, & ay de si bons moyens, Dieu mercy, pour les en aduertir, que ie ne voudrois pour rien, que nous eussions employé ceste heure, à autre deuis quel qu'il soit. Maintenant, ie te diray plus gayement comme il me semble, tout le succès de mes voyages.

*Le po.* Ie t'en prie beau sire, mais que ce soit sans digression, le temps me dure, que ie ne sache comme c'est que Dieu a beny tes saints laqueurs.

*L'hi.* Certes amy, ie te puis dire, que i'ay presque trauaillé en vain, & ie te diray en deux mots comment reseruant toute fois à dire quelques particularitez à l'Eglise qui nous a enuoyé.

Tu dois scauoir amy , qu'au despartir d'auec toy, i'ay tant fait par mes iournees, que ie me suis rendu, par grace de Dieu , en la Cour de la plupart des princes Protestans , i'ay esté en celle de l'Electeur Palatin , du duc Auguste de Saxe, du Marquis de Brandebourg , des Lantgraues de Hesse, du duc de Vvitemberg , du Marquis de Baden, (Ie te les nomme ainsi qu'ils me viennent à la bouche, & non selon leurs degrez, ou l'ordre de mon voyage) I'ay esté à la Cour du duc de Prusse, du duc de Melzelbourg , du duc Iules de Brunzuich, du Prince d'An-halt, du duc de Lunebourg, des ducs de Pomeranie, du comte de Oldembourg, du comte de Hansbach, de l'Archeuesque de Magdebourg, du Roy de Suedde, du Roy de Dannemarc, des ducs de Olfstian: & finalement en la Cour des Comtes de Emden, I'ay aussi parlé aux Seigneurs du Conseil des principales republiques d'Allemagne, qui ont receu l'Euangile, ie leur ay bien au long fait entendre , à chacun en particulier, l'histoire tragique du Massacre de Paris. I'en ay trouué aucuns d'entre eux, qui estoient desia auertis , par des Estaffiers de Charles, qui, donnans leur ame au Diable, pour l'amour de leurs maistres, auoyent voulu persuader à ces Princes, que l'agneau auoit troublé l'eau au loup. Mais, pas vn d'eux n'auoit esté si mal auisé de le croire.

Ie leur ay fait entendre, autant comme i'ay peu, & sceu, le surplus de la perfidie de Charles de Valois, & des siens, leurs desseins, leurs entreprises, la calamité de l'Eglise Françoisse, le besoin qu'elle a d'aide, le deuoir qu'ils ont de la secourir en sa necessité, comme membres de l'Eglise Catholique, que nous croyons tous n'ayant qu'un seul chef Iesus Christ: ie leur ay remonstré le bien qu'il leur en reuiendra, s'ils le font, & le mal ne le faisant pas: ie leur ay dit là dessus, ce que Daniel en auoit prononcé en l'arrest que tu scay, i'ay accompagné mon dire d'autoritez de l'Escripture, des saints Docteurs, d'exemples anciens, & modernes, de la raison diuine, & humaine: ie l'ay mesmes entrelardé de quelques fables seruans à ce propos: entre autres, ie leur ay recité bien à point (comme ils me l'ont par apres confessé) la fable que tu scay du bon homme Mercier.

*Lepo.* Ie ne scay quelle fable tu veux dire, ie l'orrois volontiers dire, s'il te plaist en prendre la peine.

*L'hi.* Ie pensois que tu la sceusses mieux que moy, elle est assez vulgaire, mais fort conuenable à nostre fait. Escoute. Il y auoit vne fois un bon homme de Mercier, trafiquant & frequentant les foires, monté d'un bon & beau courtaut, qui menoit apres soy un asne, chardé des balles de sa marchandise: Auint un iour, ou pource que l'asne estoit trop dru, frais, & gaillard, qu'il s'esgaroit à trauers champs, ne se souuenant plus des coups de baston qu'il en auoit receu au parauant, ou pour quelque autre occasion secreete, qu'auoit le maistre d'ainsi faire: il auint dis-ie, qu'il s'auisa de charger



son asne, d'un ballot, d'environ cent liures pesant, plus que sa charge accoustumee, vn iour, auquel, par grand defastre les chemins estoient empirez, pour l'iniure du temps de la nuict : tellement que le pource asne, n'auoit garde de regimber, plustost ahanant sous le faix, esmouuoit à pitié tous ceux qui regardoyent sa contenance, le seul cheual ne faisoit que s'en rire. Le Maistre estant contraint de s'arrester en vn village, pour payer le peage, enuoya son courtaut deuant, & l'asne aussi qui le suyuoit, au moins mal qu'il estoit possible, iusques à ce qu'estans arriuez en vn mauuais passage, duquel l'asne preuoyoit bien qu'il luy estoit impossible d'eschapper, ny de passer outre, sans se rompre ou bras, ou iambe, & paraenture aussi le col, pria lors affectueusement le cheual de luy assister, & l'aider à passer ce mauuais chemin, ne luy demandant pour tout secours autre chose, sinon qu'il print sur soy le ballot d'extraordinaire, iusques à ce, tant seulement, qu'il eust passé par delà ce mauuais passage, promettant le reprendre apres tres-volontiers dessus son dos : mais il craignoit autant ce borbier-là, comme sa ruine presente. Le cheual, se moquant de l'asne, au lieu de luy vouloir aider, le menaçoit fierement du rude baston de son Maistre, qu'il disoit ne pouuoir tarder: que d'obligation, il n'en auoit point à l'asne, & quand bien il en eust quelqu'une, elle ne s'estendoit point iusques-là, que de luy persuader, de faire le vil office de Baudet, qu'il estoit cheual de nature, plus genereux qu'on ne pensoit, qu'il s'estoit trouué maintesfois entre les reings des grans cheuaux:

Som-

Somme, que quoy qu'eux deux n'eussent qu'un Maistre, que leurs offices estoient separez, & qu'à chacun le sien n'est pas trop : s'assurant d'auoir bien tost son passe-temps à tenir compte des bons petits coups de baston. Baudet, se voyant esconduit du cheual, craignant les menaces du Maistre, voire, & s'assurant des coups, autant, dit-il lors, me vaut-il mourir icy, que plus attendre : mon Maistre me tuera de coups. Si se mit sans plus marchander, à deuoir de bien passer outre : mais le boubier par trop profond, luy ayant rompu son dessein l'arresta tout court, & de sorte, qu'il luy fut force d'y mourir, le col cassé sous la charge. Le cheual aussi mal-enseigné, que beaucoup de gens de nostre aage, qui ne rient iamais mieux, qu'alors que quelque mal s'adresse, se print à rire aussi grassement, comme s'il eut fait quelque grande conqueste : mais le Maistre arriué, ayant demandé nouuelles de Martin, le voyant mort sous la charge, fit bien tost changer contenance, à ce beau monsieur le cheual, luy remonstrant, qu'il estoit force, de luy charger le bast dessus, qu'il ne vouloit pas laisser perdre sa marchandise, ny la laisser illec plus longuement.

*Le pol.* Hé que i'eusse volontiers veu la contenance du cheual!

*L'hist.* Il faisoit lors (ce dit le compte) vne bien piteuse grimasse, & n'allegant rien que ses droits, ses qualitez, & ses merites, disoit, qu'il n'estoit coustumier à porter rien plus que la selle. Ce qu'il faisoit bien volontiers, s'offrant à mieux porter son Maistre, qu'il n'auoit fait par le passé : mais au re-



ste, qu'il le prioit de ne luy parler point du bast, que c'estoit le mestier des asnes, qu'on en trouueroit bien vn autre, qui vaudroit trop mieux que Martin : mais, le maistre, ne voulant prendre ces raisons en payement, ayant attaché le cheual à vn arbre, & retiré le bast, & les balles du boubier, avec vn regret indicible de la mort du poure Martin, chargea le tout, à l'aide de quelques passans, sur le dos du seigneur Cheual: lequel, se rauissant bien tard, de la faute qu'il auoit faite, refusant d'aider à Martin, regretta tout le reste de sa vie, la mort du bon poure Baudet.

*Le pol.* Je t'assure, que voila vne fable autant à propos, que nul autre qu'on eust peu forger de ce temps. Hé qu'il fut bien employé à ce vilain, & cruel cheual, de luy charger le tout dessus.

*L'hi.* Il le confessoit bien luy-mesmes, & qu'il en pouuoit (ce dit la fable) eschapper à meilleur marché, s'il eut esté bien auisé, ou si la compassion de l'asne, luy fust peu entrer dans le cœur : mais c'estoit trop tard.

*Le pol.* Il estoit du naturel de ceux, qui sont sages apres le coup, il auoit appris des François, à ne cognoistre point sa faute, qu'alors que le remede estoit loin.

*L'hist.* Ainsi donc, comme ie t'ay dit, pour retourner à mon propos, ces bons Princes, & Seigneurs, trouuoient ceste fable de fort bon goust, & recognoissoient facilement, que c'estoit vne pierre, que ie iettois en leur iardin. ie passay encore plus outre: Je leur dis, tout ce que Daniel auoit auisé estre bon de faire, pour les vnir & liquer en vn corps, comme



comme ils le font , ou doivent estre en vn esprit, les vns, avec les autres , & tous ensemble avec nous. le leur discours de beaucoup de petites choses , que la concorde a faict croistre , & surgir : & de beaucoup d'autres bien grandes, que la discorde a fait cheoir, & perir. le leur dis aussi là dessus, l'histoire de ce bon vieux Prince , qui ayant vingt & deux enfans, luy vieux, cassé, estant au liect malade, les ayant fait venir à soy , leur commanda de rompre en sa presence, vn fagot de cheneuotes qu'il auoit fait lier tout expres : mais , comme du plus grand, iusques au plus petit, ils s'y fussent essayez en vain, luy seul, ayant deslié le fagot , romp t, & fort aisément, toutes les cheneuotes , vne à vne: leur remonstrant par là, fort dextrement, combien l'vniõ estoit puissante, au prix d'vne folle discorde. le leur dy, que ceste vniõ, & estroicte amitié, & intelligence qui deust estre entre les Chrestiens, c'est à dire, ce consentement des choses humaines, & diuines, conioinct avec vne beneuolence, & charité, estoit le seul lien pour conseruer & eux, & nous, & toute l'Eglise de Christ espandue par tout.

Que les choses qui assemblent les gens en vn, sont facilement trouuees entre nous , qui desirons mesmes choses , haïssons mesmes choses , & craignons mesmes choses : que c'est ce qui contracte les amiries parmi les bons, comme aussi c'est la cause des factions & ligues parmy les meschans.

Pour tout cela pas maille ( comme lon dit ) & t'assure, que, me souuenant de la prophetie de

Daniel parlant de cest Empire des Romains, il m'a semblé, afin que ie ne mête, parler aux vrais doigts de terre, desquels Daniel le Prophete, fait mention, tous separez les vns des autres : aisez à rompre, & à froisser, ou bien, ainsi que disoit l'autre, tous prests à vendre, s'ils trouuoient quelqu'un qui les voulust acheter.

Voyant que ie ne profitois de rien enuers eux, ainsi comme nous tombions d'un propos à l'autre : ie leur ay mis les iugemens de Dieu deuant les yeux. Je leur ay dit, que ce n'est pas le Iuif, qui tue Iesus Christ : car il attend son Messie. Que ce n'est pas aussi le Turc : que le Papisste ne tue non plus (par maniere de dire) Iesus Christ en ses membres : Il pense (comme dit l'Escripture) faire un sacrifice à Dieu, en ce faisant : qu'il n'y a personne qui tue plus veritablement Iesus Christ en ses membres, que les Rois, Princes, Potentats, & peuples, qui cognoissent Iesus Christ, qui l'ont receu : & laissant neant moins à leurs portes, & comme en leur presence, massacrer leurs freres, combourgeois, & concitoyens, sans leur donner aucune aide ne secours.

En somme, l'amy, ie t'asseure, que ie n'ay, Dieu mercy, rien laissé à dire, de ce que j'ay estimé pouuoir seruir, à promouuoir vne si bonne cause. Pour tout cela, comme si le fait ne les eust en rien touché, pas un d'eux n'a fait semblant de vouloir donner un brin d'aide. Bien ont-ils confessé chacun à son tour, que l'acte estoit tres-inhumain : la trahison tres-detestable : Charles de Valois, & tout son Conseil, le plus desloyal de la terre : qu'ils  
ne



ne s'y fieront iamais: Qu'ils s'esbahissent comme c'est que les defuncts, (desquels la memoire leur est honorable) apres auoir esté tant de fois trahis, s'estoyent, encores à ceste fois, osé fier aux mesmes traistres. Qu'ils donnent par aduis aux suruiuâs de nos freres, de ne iamais plus s'endormir aux paroles de Charles, ny des siens, & ne iamais plus mettre bas les armes (que Dieu, & vne iuste, & legitime deffense leur ont mis en main.) Que quant à eux, ils s'armeroyét volontiers pour nous: mais leurs gens ne marchent pas sans argét, & nous n'auons pas les moyés d'en fournir: qu'ils seroyent bien aises de trouuer de l'argent, pour faire vne bonne leuee de Reystrs: mais ils ne scauoient où en prendre, & leurs gens sont mercenaires, regardans moins à Dieu, qu'à l'argent, comme nous auons peu voir és troubles passez de la France, où il y auoit des leurs assez, d'une mesme religion, seruans sans aucune conscience, ne honte à deux maistres diuers, & contraires.

Pour le dire en vn mot, apres beaucoup de paroles, ils m'ont traité, comme l'on traite communément les pources, mendians l'aumosne à la porte des riches: Le vois bien qu'il y a pitié en vous, (ce leur dit-on) mais ie n'ay pas que vous donner. Allez de par Dieu, Dieu vous soit en aide: Voila comme ils m'ont renuoyé, à mon grand regret, à bast vuide. Voyant cela, apres les auoir menacez derechef des iugemens de Dieu, qui ne peut longuement souffrir vne telle lascheté, en ceux qui se renomment siens, qui ne peut souffrir, l'Empire de ceux-là demourer de bout, qui laissent fouler



le sien aux pieds : ie les ay laissez là : & ay passé de Emden en Angleterre, où i'ay trouué les nouvelles que i'allois annoncer de la verité des Massacres, espādues au long, & au large par toute l'isle : les Ecclesiastiques , les Nobles, & le peuple, tous eschauffez à les vouloir venger , ne demandans, que congé de la Royne, pour pouuoir guer leurs fossez. I'ay trouué, en somme, les choses si bien disposees , qu'il m'a semblé, de prime face, qu'il ne seroit ia besoin de leur faire plus grande instance, ny poursuite de secours, que d'eux-mesmes sans estre pressez d'auantage , ils s'y achemineroient assez.

Ce neantmoins i'ay fait la reuerence à la Royne & aux seigneurs de son Conseil, ie leur ay fait entendre l'ocasiõ de ma venue : & la charge que l'Eglise m'auoit donné : ie leur ay dit là dessus que quivoit brusler la maison de son voisin, doit auoir peur de la siene : que ces fossez qui separét la grãd Bretagne du reste du mōde, ne sont pas suffisans à empescher la flamme de la cruauté de la maison de Valois, de voler sur les Anglois. Qu'on a accoustumé de porter de l'eau, à la maison du voisin qui brusle, encore que ce fut la maison de son ennemy. Ie leur ay aussi auācé les mesmes autoritez de l'Escriture, les exemples & raisons , allegues aux princes Protestans, ie leur ay remōstré qu'il ny escheoit qu'à bailler congé à quelques Myllords, qui s'offroyent d'aller à leurs despens, à vn nombre de noblesse, & de peuple volontaire pour voir bien tost vengé, l'outrage fait à Dieu, & à son Eglise François.

Sur cela, la Royne, & la plus part de son Conseil, ne m'a sceu que dire, ny opposer autre chose, que la ligue, qu'elle auoit freschement, faite avec Charles de Valois, enuers lequel, quoy qu'elle le recognoisse pour tyran, traistre, & meschant, elle estoit resoluë de garder sa foy promise. Qu'elle voudroit bien qu'il fust mort, & que Dieu en fust la vengeance, qu'elle l'en prie de bon cœur: mais, que d'aller contre sa promesse, qu'elle ne le fera iamais. Surquoy, apres luy auoir repliqué, que telle promesse peut estre à bon droit comparee à celle d'Herodes, à Herodias, & autres semblables, qui ne meritent pas d'estre gardees, au detrimēt de la gloire de Dieu: Qu'il y a des promesses lesquelles sont bonnes à leur naissance, mais (comme Ciceron le dit) par traitt de temps viennent à estre dommageables, & pernicieuses: comme d'un prest, qu'on aura promis faire, à un qu'on tient estre bon citoyen, auquel, si d'auenture il se rendoit ennemy de la Republique, on n'est nullemēt tenu d'accomplir la promesse: qu'ainsi en est-il de la ligue.

Que sa Maiesté, a promis foy, & homage dès le Baptisme, au Dieu viuant, souuerain Roy, duquel Charles de Valois est ennemy iuré. Que dès lors qu'elle fut introduicte en l'Eglise de Dieu, elle contracta avec les autres membres de l'Eglise de quelque region qu'ils soyent, ligue, & cōfederatiō inuiolable: que Dieu la sōme de sa foy, & toute raison diuine, ciuile, & des gens la dispense de celle qu'elle a donnee au Fideirage: lequel, comme elle peut cognoistre, n'a iamais contracté

ligue avec elle, que pour la decevoir, & tromper & trahir sous mesme manteau, les pources Huguenots François: Que Dieu, qui luy a fait tant de faueur, que de la tirer de la prison, à la Couronne d'Angleterre, luy demande presentement qu'elle tire hors de la presse, les membres de son Fils Iesus, & autres raisons pregnantes, tirees non seulement del'Escripture, laquelle nous monstre en mille passages, que ie luy alleguois, la symmetrie, & bõne intelligece, qui disoit estre au corps de Christ ains aussi, des raisons, tirees de la necessité, de l'estat, & d'autres que le sens commun simplement nous dicte, nous enseignant de nous opposer à ces vilains & execrables mōstres, & de les retrencher d'entre les hommes, comme ennemis iugez du gēre humain: Ainsi que Ciceron mesmes le nous enseigne, en son liure des Offices, duquel ie luy alleguay le passage, en langue Latine, que sa maiesté entend fort bien, qui dit, que nous ne pouuons ne deuons nous associer, ou auoir commerce avec les tyrans, plustost nous en esloigner, & distraire: & que ce n'est pas contre nature, de despouiller, si nous pouuons, celuy, que nous pouuons honestement tuer: que tout ce genre pestifere, & prophane, doit estre exterminé de la communauté des hommes, estant chose tresraisonnable, tout ainsi comme nous voyons, qu'on retrenche les membres estiomenez du reste du corps, de separer du conforce, & commune societé des hommes, ces bestes cruelles, & farouches.

Après (dis-ie) luy auoir remonstré cela, & plusieurs autres choses, touchant la charité Chrestienne,



ne, & la nature de la vraye magnanimité, compagne honorable des grands, qui ne se monstrent iamais mieux, qu'alors qu'on deffend en toute iustice, les foibles, & oppressez & ses alliez, des brigands, & volleurs: Trouuant sa maiesté aussi froide, & gelee à la fin, que ie l'auois trouuée au commencement, ie m'apperceu, que cela ne pouuoit proceder que de la couardie, & pusillanimité du sexe: & de ce, qu'elle voit son Royaume, despourueu d'un grand Capitaine, auquel elle puisse fier vne armee, pour en esperer vn bon succez: Aussi que le principal de ses Conseillers, qui gouuerne le temporel, & le spirituel (cōme l'on dit, en toutes ses terres) est vn vray couard, & recreu, sentant son clerc trop mieux que son gendarme: Et neantmoins (selon que quelques vns estiment) pour se dresser vn appuy apres la mort de sa maistresse, est aux gages de deux autres Rois: Voyant, dis-ie cela, ie m'adressay sans sortir hors de l'Angleterre, à d'autres Myllords mieux zelez, par le moyen desquels, & de l'Euesque de Londres, avec quelques gentils-hommes, & marchands, du sceu & consentemēt de la Royne, qu'elle prestoit sous main, & par l'etremise du Sieur, Apſter Ciampernon, on amassa, partie par forme d'aumosne, partie par forme de prest, dont quelques vns de nos freres de la Rochelle se sont obligez, enuiroin quarante mille francs: à l'aide desquels, le Comte de Montgomery, qui pour lors estoit en Angleterre refugié, du vouloir & commandement secret de la Royne, accompagné du ieune Ciampernon, del'un des Morgans, & de plusieurs au-

tres gentils-hommes, & soldats Anglois, & François, dressa vne petite armee, d'environ cinquante Nauires petits, & grans: entre lesquels, la Roÿne fournit vn sien nauire, nommé la Prime-rose, du port de quatre cens tonneaux: & eust baillé aussi le nauire Biscain de mester Hacquin, n'eust esté que mester Olstat, Vice-amiral Anglois, auoit environ ce temps-là, desualizé sur le nauire Biscain, plus de vingt nauires François, & Vvallons, qui estoÿēt és haures, & en la coste d'Angleterre, armez, & prests à accôpagner le côte de Môgomeri.

*Le pol.* Et cômement, bon Dieu! Vn seul nauire, pouuoit-il bien desualizer vingt nauires armez?

*L'hist.* Fort aisément, ainsi comme il les trouuoit dans les haures, où ils ne se doutoyent de rien, cômme n'estans en rien coupables, oyans que c'estoit par le commandement de l'Amiral d'Angleterre le Myllord de Clynton, les pources gens n'osoÿent point resister.

*Le p.* Voire, mais, quelle occasiō auoit le Myllord de Clynton, de cômmander que l'on fist vn tel vol?

*L'h.* Il n'é auoit du tout point: mais voicy son pre-  
texte. La Roÿne d'Angleterre, ne se contentant point d'estre liguee avec le plus meschât Tyrā de la terre, voulut aussi estre sa cômere, & presenter au Baptême la fille de ce desloyal: pour ce faire, el le luy enuoya en ambassade le Myllord de Vvencester, pour faire l'office de la part de la Roÿne.

*Le pol.* le m'esbahys, cômement c'est que le Myllord de Vvencester, ne supplia la Roÿne de l'excuser, veu qu'il ne pouuoit honestemēt & en bonne cōscience, ie ne dis pas presenter l'engeāce du Tyrā.

ains



ains vn autre enfant de quelque bõ Papiste que ce soit, deuât l'idole abominable, à vn ministre de Satan, ny voir prophaner le sainct Baptisme, par leur cresse, par leurs crachats, & autres telles execratiõs cõtraires à l'institutiõ, & pratique de Iesus Christ, des Apostres, & de l'ancienne Eglise.

*L'hist.* Il ne faut pas que t'esbahisses de cela, le Myllord de Vvencester est Papiste, Dieu luy face misericorde. Je m'asseure qu'un mylord d'Oktinc thõ, vn myllord de Bethford, le seigneur de Vval zingham, qui pour lors estoit ambassadeur en Frãce, ou quelque autre religienx Seigneur, n'auoit garde d'accepter telle charge, ny la Royne de la luy donner: mais il y a bien de quoy s'esbahir de la Royne, qui scait cõbien telle prophanation est desplaisante deuant Dieu. & cependãt elle se moque de la cognoissance receue, & semble n'en faire que le cerf.

*Le pol.* C'est merueille, de voir cõme les grãs (vers de terre neantmoins) se dispensent de desobeir à leur Souuerain, cõme si sa loy tresentiere ne les atouchoit en rien. A ce que tu dis, il semble, que tãt plus ce tyrã est meschãt, tãt plus elle l'honore.

*L'hi.* Elle le fait plustost pour crainte, que pour l'amour qu'elle luy porte: c'est cela qui l'a fait aussi vouloir estre sa belle sœur, pèsant eschapper bien par là, les embusches de son cõpere, & garãtir par ce moyen l'Angleterre de ses aguets: mais Dieu scait, si ce n'est pas plustost se perdre, se rẽdre malheureuse deuât le temps, & accelerer sa ruine par les noces du frere, comme la Frãce, par les noces de la sœur.



Or pour reuenir à mon propos, du vol, & desualifemēt de rāt de nauires. Ainsi que le Myllord de Vvencester 's'acheminoint en France, pour l'occasion que ie t'ay dit, trauersant de Douure, à Bologne sur vn bateau, n'ayāt lors que trois bateaux passagers avec lui, il fut assailly par quelques courfairés Anglois, Frāçois, & Vvallons en petit nombre, qui estoient dans vn petit nauire, nommé le Posté : assailly, dis-ie, de si pres, quē bien peu s'en salut, que le bateau où estoit le Mylord, ne fut mis à fons, tant y a, que l'vn des bateaux de sa suite, fut presque tout pillé, & quelques vns de sō train ruez. Aucuns disoyent, quē quelque inimitié particuliere contre le Myllord de Vvencester, auoit fait dresser celle partie: les autres, l'amour du butin, & du present que la Royne enuoyoit à son Compere, au lieu duquel ils vouloyent supposer vn licol: d'autres pensoient que c'estoit vn despit & vne enuie de rompre vn si vilain voyage, où Dieu estoit deshonoré. Comme qu'il en soit, cela fut cause que la Royne, lors irritée, dōna charge à son Amiral, d'enquerir bien au vray du fait, & de chastier les coupables.

L'Amiral qui ne demandoit pas plus beau ieu pour grobiner, comme il en a bonne coustume, enquit si à point de ce fait, par le moyē de ses supposts, qu'on ne laissa nauiré François, ny Vvallō, de ceux qu'ō peut attraper, qui ne fut mis à blāc. Les capitaines, Mariniers, tout l'equippage, voire quelques passagers, furent faits prisonniers, entre autres vn gentil-homme mien amy, Poiteuin de nation, à qui nostre France doit beaucoup, Histo

riographe diligēt & soigneux, & plein d'autres bonnes parties fut aussi detenu, & tous ensemble si bien traitez en leur prison, quoy qu'ils fussent innocens du fait, que le mieux traité d'entre-eux, a bonne occasion de s'en souuenir.

Ce trait fut cause que le comte de Montgomery alla plus tard d'un mois au secours de la Rochelle, & plus foible de ces vingt nauires, & du nauire Biscayn, que la Royne auoit promis, qui n'y osa aller, de peur qu'on n'vlast de reuēche sur son equippage : & fut ce vol cause en partie, que la Rochelle ne fust point secourue par l'armee du comte de Montgomery : lequel peu de temps apres, ayant singlé vers la Rochelle, à la veue, & port de canon des nauires, & galeres, & des forts de l'ennemy, qui tenoit le Canal, & entree de mer de la Rochelle gardez, apres luy auoir présenté la bataille, le voyant à son aduis foible, s'estonna : l'ennemy le voyant marchander l'abbord, au lieu qu'à la première veue, son armee de mer, & de terre, s'estoit (comme on dit) esbranlee, commença à se rasseurer, & à se renforcer par mer, faisant embarquer dans ses nauires, à la veue de celles du Comte, enuiron de mille harquebouziers, qui fut cause, que le lendemain, le comte de Montgomery apres s'estre présenté au mesme lieu en bataille, n'estant suiuy que d'une partie de son armee, rebrossa son chemin vers Belle-isle, qui est sur la coste de Bretagne, print le chasteau, & l'isle d'emblee, & là seiourna quelques iours. Vn des parens du comte de Rets, qui estoit Capitaine du chasteau de Belle-isle y fut fait prisonnier, & ainsi pris,



mené en Angleterre, où ie le vy chez le Seigneur de la Motte Fenelon, ambassadeur du Tyran.

*Le pol.* Puis que ce Capitaine estoit parent d'un si honeste homme, il ne pouuoit estre que braue, & bien excellent guerrier, on ne prent pas tels chats sans mouffles.

*L'hi.* Tu serois bien marri, si tu ne disois le mot en passant à ton accustumee, he dea ! cestuy-là n'estoit pas de ses parens de maintenant, qu'il est comte de Rets, encore moins des parens de Monsieur le mareschal de Rets, il luy appartenoit seulement du tēps que le pere d'Albert Gondy, Florentin, marchand en son viuant à Lyon, venoit de faire fraischement Banque-route, du temps aussi que le Peron, estoit un clerc de commissaire des viures, aux guerres de Mets: ou du temps qu'il estoit garçon de contouër chez Bonuisi à Lyon, & que sa mere, fille de Pierre Viue, marchand de Lyon, couroit l'esguillette par tout.

*Le pol.* Il ne paya donc gueres de rançon, le vilain, à celui qui le fit prisonnier.

*L'hi.* Ie te laisse à penser, chacun sçait bien qu'il n'auoit lors un seul double qui fust à luy, & au-iourd'huy, chacun sçait bien que pour auoir mōté la Mere, ce Landry a tout ce qu'il veut: commande par tout à baguette, fait changer le quarré en rond, & a luy seul plus de finances, qu'une douzaine des plus grands: Mais, pour reuenir à nos moutons, d'où ce bouc m'auoit destourné, le cōte de Montgomery estant à Belle-isle, les pources gens de la Rochelle, ayans veu que le secours auquel ils esperoyent le plus, apres Dieu ne les pou-

uoit



uoit en rien seruir, ny soulager, enuoyerét deuers le comte de Montgomery vn petit esquif, avec sept hommes dedans, qui passerent en despit de l'ennemy, au trauers de son armee, fauorisez des vents, & des vagues : pour remercier le comte de Montgomery, & le prier qu'il ne se mist aucune-ment en plus grand danger pour eux, ains se re-seruast à meilleure rencontre : qu'ils estoient re-solus par la grâce de Dieu, de se bien deffendre contre les assauts de l'ennemy, & de mourir tous l'vn apres l'autre, avec leurs femmes & enfans, plustost que se rendre à la mercy de ces perfides.

*Le pol.* Ce fut vn trait fort magnanime, que celui de ces bōnes gens. Au lieu que le cœur, comme il semble, leur deuoit faillir, & manquer : il leur est lors, tout au rebours, accru cōtre le sens cōmun. La necessité est puissante à faire resoudre les gēs : mais certes, Dieu les fortifie tousiours au besoin.

*L'hi.* C'est trèsbien dit. Or le comte de Montgo-mery voyāt le bon courage de ces pources Roche-lois, apres leur auoir enuoyé vn batteau à l'auētū-re, que l'on dit, avec deux milliers de poudre à ca-non, & quelque peu de muys de bled, qui par gra-ce de Dieu, arriuerēt à bō port, & si à point qu'ils trouuerēt ces bōnes gēs presque au bout de leurs poudres, & de leurs bleds, apres cela (dis-ie) crai-gnāt que l'ēnemy ne le vint charger à desprouueu à Belle-isle, où il n'auoit ny port ny fort, rōpit son armée, où (selon que la creāce en ce tēps est bon-ne parmy les Capitaines & soldats) elle se rōpit el-le mesme. Le Capitaine Hippi-ville, qui auoit vn fort bon, beau, & bien armé nauire, s'alla rendre à

l'ennemy en Normandie: d'autres tindrét la mer & l'escumerét. Le Comte s'en alla rendre en Angleterre, avec vn bié peu de vaisseaux, sur lesquels estoient deux de ses gendres, son aîné fils, le capitaine Poyet, Casaux, Maison-fleur, la Meaulse, des Champs, le capitaine Sore, & certains autres capitaines, gentils-hommes & soldats.

La Royne, & les seigneurs de son Conseil, qui s'estoyent promis de l'expedition du comte de Montgomery, vn secours de la Rochelle, & possible quelque chose de plus, commencerent à son retour d'en rabbatre iusques-là, que au lieu qu'au parauant ils l'auoyent chery & honoré comme vn demy dieu des batailles, en pleine cour à descouuert & presque tout ioignât la barbe de l'ambassadeur du Tyran, à peine le vouloyent-ils lors voir en secret & à cachette.

*Le pol.* Quelques vns accusent les femmes de charger souuent leur maintien, & sous couleur qu'elles sont legeres, taxent leur sexe à tous propos, d'vne inconstance insupportable: mais quád tout vn Conseil s'en mesle, c'est les iustifier de tout point.

Les Romains estoient bien d'autre auis au retour de leurs Capitaines: ne les fauorisans rien moins à la perte, qu'à la victoire: comme Varro nous est tesmoin, ayant perdu la grád bataille qui donnoit Rome à Annibal (s'il eult sceu vaincre, comme on dit.) Retournant ainsi tout battu dedans Rome bien desolee, on ne laissa pas de luy faire comme vn petit triôphe à demy: il leur sembloit bié que c'estoit assez de regret & de fasche-



rie à leurs Consuls , & capitaines , le desplaisir qu'ils receuoyét de la perte d'une bataille, & pensoyent estre mal seant, redoubler leur mal, par reproches, ou par quelque autre chastiment : aussi scait-on bien que les armes sont iournalieres le plus souuent, & que tel a bien fait sur le tyllac vn iour, qui s'en ira le lendemain cacher pres le lest du nauire: tel a rompu son ennemy, qui tost apres est mis en route. C'est presque comme vn ieu d'eschets, où les pions mattente souuent les Rois, prennent les Cheualiers : les Roynes forcent les Rocques, & chasteaux, par fois les fols qu'on loge pres des Rois , font aussi eux-mesmes l'office, ou iouent au Roy despouillé.

*L'hist.* Il est certain. L'autre disoit que tous les dieux iouent des hommes à la pelote, les esleuant pour s'en mocquer , tost apres les iettant par terre: mais en ce fait-cy dont nous parlons, c'est vne chose tres-certaine, que le Dieu des dieux, souuerain Dieu des armees & batailles, par son tressecret iugement, ayant retiré les meilleurs, a affady le cœur des autres arcs-boutans, ainsi qu'il sembloit de toute l'Eglise Françoise: l'a dis-ie osté entierement à la Noblesse, qu'on appelle) & l'a donné & fait à croire aux petits & humiliez: à fin qu'à son accoustumee, par les choses foibles , & basses il confondist les fortes, & hautaines: & que par là toute la gloire, & honneur de la deliurance de ses enfans luy fust rendu.

*Le pol.* C'est tresbien dit. Et pour certain, qui ne le voit est bien aueugle. Dieu a besôgné puissamment (ce dit la Vierge, au I. de S. Luc) par son bras



en dissipant les orgueilleux en la pensee de leur cœur. Il a mis bas les puissans de leurs sieges, & a esleué les petits, il a réply de biens ceux qui auoyent faim, & a enuoyé les riches vuides. Il a releué Israel son seruiteur, en ayant souuenâce de sa misericorde. Tu cognoistras cecy plus clairement, l'amy, quand ie te reciteray ce qui s'est passé dedans, & deuant la Rochelle & Sancerre pendant que l'ennemy les tenoit assiegez, & que tu entendras la deliurance miraculeuse que le Seigneur a fait de ces deux villes & de nos freres qui estoient dans Sancerre. Mais ie te prie poursuy, & te despeche de peur que quelcun suruenant, n'interröpe nos saints deuis.

*L'hi.* I'en suis cötét: i'auray fait en deux mots. Ainsi donc, quand ie vy ceste petite armée qui auoit esté dreslee, cöme tu as peu cöprendre, avec tåt de difficultez, que le Tyrá mesme auoit essayé de röppe auparauát, ayant enuoyé à cest effet par diuers iours en Angleterre la Mauuissiere, Chasteauneuf de Breragne, & Sainct Iean frere du cöte de Mötgomery, pour le destourner, mais en vain: voyant (dis-ie) ceste partie là röpue de tout point, säs esperance d'aucune ressource, & quoy que ie m'essayasse de la faire renouer, & de persuader à la Roynes, d'enuoyer des forces au double, luy remonstrant qu'autát valoit, comme disoit l'autre, bié batu, que mal batu: & que tousiours l'Anglois auoit meilleur marché du Traistre, l'allant chercher sur ses terres avec l'aide des offensez, que de l'attendre sur les siennes apres la desfaite des bons. Qu'il estoit à craindre que l'Anglois, qui n'auoit bon-  
men

ment osé faire semblât de s'en mesler, en fust à la fin recherché à plein fonds : & que ce n'estoit pas oster la guerre de dessus ses bras, ains seulement la differer. Voyant que tout cela ny seruoit de rié qu'à les fascher, qu'à troubler le repos de ceux qui aiment mieux ouyr vn diseur de bonnes nouuelles, qu'un Michee, qui leur annonce leur ruine, afin qu'ils auisent à eux. Apres que i'en euy recommandé au Seigneur avec nos freres refugiez, nos freres assiégez: ie partis de ceste Isle-là pour m'en venir par deuers les Seigneurs des ligues.

Là estant apres auoir fait entendre bien au lóg à quelques Seigneurs principaux nos affaires, & par conséquent, ce me sembloit, les leurs, ie pensois pour la conformité de la Religion, qui est entre quatre des plus puissans Cantons & nous, & pour la necessité de leur estat, qui à bon droit peut craindre l'entreprise d'un Prince tyran & perfide, ennemy de toute liberté ciuile & spirituelle: & pour le deuoir aussi que les Seigneurs des ligues ont à conseruer & maintenir les François, comme leurs alliez & confederez: ie pensois dis-ie, bien profiter de tant enuers eux tous que d'en arracher quelque braue & puissant secours contre l'oppression du Tyran.

Mais ie trouuay tout au rebours, que desia les Cantons Catholiques auoyent enuoyé au grand Boucher six mille de leurs pures hommes, pour luy aider à esgorger & massacrer le reste des brebis Françoises.

*Le pol.* Qui iamais eust creu que ces gens eussent fait vne si grande faute de fauoriser le party



d'un cruel tyran & perfide, eux grans amis de liberté, eux reputez entre les hommes pour gens qui gardent leurs promesses : & qui deussent par consequent hayr le Tyran qui les rompt au detriment de tout vn peuple, ie dis peuple leur allié: c'est vn dangereux paradoxe que l'opinion de ces gens-là.

*L'h.* La faim de l'or insatiable conduit les gens tout à son gré.

*Le pol.* L'odeur du profit (disoit l'autre) est soueue, d'où soit qu'elle sorte. Mais on n'ouyt iamais parler d'un tel profit si execrable, qu'un homme prene de l'argent d'un sien voisin confederé pour l'aller tuer quand & quand, pour le piller & le destruire.

Ils ont beau dire, c'est du Roy de qui nous receuons la solde. Car leurs pensions en temps de paix, & leurs gages en temps de guerre, ne sont tirez aucunement que du labeur du poure peuple, esclau de ce Roy tyran. Aussi ne sont-ils alliez au Tyran, tant qu'au Royaume, qu'ils vont tous les iours depredant: mais qui les a enforcelez encore à ce dernier voyage? veu qu'il n'y auoit pas vn viuant de ceux qu'ils s'estoyent fait à croire qui abbayoyent auparauant à la (Côrôna) qu'ils appellent: ils ne pourront à leur retour, si quelqu'un d'entre eux eschappe, se vanter comme aux autres fois, d'auoir seuls gardé la Côrôna, *Que lo Rey lor é byn tenu, que sen celou Monsioul Animal & Dendelou ly hesson ora la Corona de dessus la teta:* puis qu'on ne cherche encore à ceste fois que d'eschapper & se garder de la fureur des mains meurtrieres.

*L'hif.*



*L'hist.* Ils n'ont pas creu tousiours ce qu'ils ont dit: mais il falloit pour cacher leur folie, la couvrir de quelque manteau: partant prenoient-ils ce pre-texte, comme le plus specieux. Mais à dire vray la plus part n'y alloit que pour desfrober, l'autre pour viure simplement, l'autre pour dissiper l'Eglise: leurs Chefs cerchoient de s'aggrâdir, & d'appré-dre en si bõne eschole toute sorte de corruption, & le moyen de tout vouloir & de pouuoir tout ce qu'on veut: à fin qu'un iour suyuant l'exemple de leur beau compere Boucher par son moyen & sa faueur, qu'ils s'asseurent d'auoir propice, ils puissent aussi à leur tour gouster que c'est de commander absolument, & à baguette par dessus tous leurs Citoyens.

Ces seules raisons & non autres les ont fait marcher à ce coup, aussi bien comme és autres fois.

*Le pol.* Qui a manié leur leuee? Car Belieure n'y estoit plus: & ils croient ce bõ Apostre, plus que nul de leur Kalendrier.

*L'hi.* Ce Belieure, duquel tu parles, n'y estoit plus vrayement: mais il auoit fait establir son aîné frere en sa charge, & luy mesmes y vint à point, secõ-dé d'un bon costiller messire Pierre Carpentier, (tu cognois l'homme) & assisté d'un bon preu-d'homme le vieux secretaire Poulier.

*Le pol.* O Seigneur qu'est-ce que i'oyis dire de mon ancien amy Poulier? Que ie regrette ce bon homme!

*L'hi.* Aussi est-il à regretter. Car des autres passe sans flux. Carpentier a tousiours esté un maistre

frisson effronté, vn Tholozat, c'est à dire, vn double. Les autres deux sont entendeurs, ce sont des Huguenots d'estat: ceux à qui le Dieu de ce monde a cillé ou creué les yeux. Mais de Poulier, le cœur me fend, quand ie m'en souuiens, de regret.

*Le pol.* Mon Dieu que ie suis desplaisant, qu'il face si mauuaïse preuue de la cognoissance qu'il a!

*L'hist.* C'est sans doute que le pource homme a travaillé bien lourdement contre la verité connue. Mais Dieu qui sçait bien ramener ses brebis de peur de les perdre, le vint trouuer en ces iours-là, & luy fit sentir le petit doigt de sa main forte, trebuschât luy & son cheual, en vn chemin plain & facile: & pour l'arrester court sur cul, il luy cassa la iambe droite.

*Le pol.* Dieu vueille que ce coup de fouët luy face cognoistre sa faute. Mais quel pretexte proposoyent-ils, ces gens de bien aux Catholiques?

*L'hist.* Nul autre, sinon, quoy qu'il en fust, que leur Compere. vouloit estre maistre absolu en son pais: qu'il vouloit, tout couper & coudre à son plaisir: que nuls ne luy desplaisoyent tant que les Rochellois, qui ne vouloyent ouurir les portes à ceux qui les vouloyët tuer de par le Roy. Et ainsi tout honestement, comme qui conuie à des nopces, les pressoyët d'aller au pillage & carnage des gens de bien: qu'ils disoyent estre des rebelles, seditieux à tout iugement.

*Le pol.* Je leur nie bien cest article, qu'ils soyent seditieux ny meschans, & pourrois bien deuant tous iuges qui ne seroyët point passionnez prouuer tout outre le contraire.

*L'hi.*

*L'hist.* Je serois content de t'ouyr discourir sur ce ste matiere , s'il te plaisoit prendre la peine de la traiter naifvement , selon la conscience & l'estat. Tu sçais qu'il y a plusieurs consciences de timides scrupuleux, qui font estat de se laisser frapper & de tendre aussi tost l'autre ioue.

*Le pol.* C'est tresbien fait à des priuez , & pour des iniures priuees de patienter & de souffrir, plustost que de rendre la pareille, mais en ce fait il va bien autrement.

*L'hi.* Je le sçay bien, & ne suis pas si grue, que ie ne sçache comme il s'y faut porter. Et ne doute non plus qu'il ait esté & qu'il soit loisible à nos freres de se garder contre l'inuasiõ du Tyran , que contre brigands & volleurs , contre des loups & des sangliers, ou autre beste plus farouche.

Je dy d'auantage avec l'ancien peuple Romain: que d'entre tous les actes genereux , le plus illustre & magnanime est , d'occire le Tyran : estant, comme tresbien le monstre Ciceron , vn tel acte quand bien il sera executé par vn familier du tyrá, tout plein d'honesteté & de bien feance, conioincte avec le salut & l'vtilité de la chose publique. Mais ce qui me fait desirer d'entendre de ta bouche la resolution de ce faict : c'est pour me seruir des argumens, autoritez & exemples desquels ie sçay que tu abondes , à confermer les timides , & resoudre les scrupuleux.

*Le pol.* S'il faut que ie traite ce point, ie crain d'escgarer ta memoire de ton discours encommencé.

*L'hi.* Point, point, ne crain pas que ie laisse d'y reuenir, j'auray fait é deux pas & vn saut, Mais coméce



ie te prie de traiter vn peu clerement ceste matiere: elle n'est pas hors de propos.

*Le pol.* Je le veux bien: Escoute.

Premierement il faut establir ceste maxime: qu'il n'y a qu'un seul Empire infiny, sçauoir, celui de Dieu tout puissant, & par conséquent que la puissance de quelque magistrat & Prince que ce soit est enclose d'as certaines limites & barrières, hors desquelles le Prince ne doit sortir, ny le suiet, s'il les outrepasse, luy obeir, autrement ce seroit esgaler l'Empire du Magistrat à celui de Dieu souverain, blasphème par trop horrible seulement à le penser. Car quoy que le Magistrat représente l'image de Dieu, si se faut-il souuenir de ce que Dieu a dit par son Prophete, Je ne donneray pas ma gloire à vn autre. Les magistrats donques sont establis de Dieu, nō afin qu'en partageant avec sa Majesté ils se reseruent partie de la gloire: ains afin que comme Ministres & seruiteurs du Seigneur ils raportent entierement à leur maistre toute gloire & tout honneur.

Les Magistrats, s'ils n'auisent de pres à leur deuoir, peuuent commettre des fautes bien lourdes: soit en commandant ce qui repugne à la premiere table de la loy de Dieu, ou en deffendāt, ce qui est commandé par la premiere table, Tels commandemens & deffenses sont prophanes & contre toute pieté. Ils offensent aussi contre la seconde table, quand ils commandent ce qui ne se peut obseruer sans violer la charité deue au prochain: ou deffendent de faire les choses lesquelles nous ne pouuons delaisser sans violer celle charité qui

nous

nous doit estre inuiolable: tels edicts doyuent estre appelez iniques.

Ce fondement posé, que nous deuons au seul Dieu toute obeissance sans nulle exception, il s'ensuit, qu'il ne faut pour rien obeir aux edicts prophanes, ou iniques de quelconque magistrat ou prince que ce soit: & par consequent, que les sujets ne peuuent obeir en bonne cōscience au Roy commandant choses prophanes ou iniques. Il n'y a pas faute d'exemples en ce point.

L'edict de Pharaon, par lequel il commandoit l'homicide cruel & sauuage des petits enfans des Hebrieux estoit inique tout outre. Les sages femmes n'y obeissent point: elles en sont louees par l'esprit de Dieu en l'Ecriture: Dieu recompense la pitié de ces bonnes femmes, qui ont ainsi desobey au tyran, leur edifie des maisons, benist & accroist leurs familles.

L'edict de Nabuchadnezar commandant d'adorer la statue, estoit prophane & contre la premiere table de la loy. Les compagnons de Daniel n'y obeissent point: pourtant sont louez du Seigneur, & cōseruez de sa main forte au milieu des flammes du feu.

Les edicts de Iesabel ont esté prophanes & iniques tout ensemble, en ce qu'elle commandoit de meurtrir les Prophetes de Dieu, & les gens de bien. Voila pourquoy Abdias au lieu d'y obeir nourrissoit de tout son pouuoir les seruiteurs du Seigneur.

Les Iuifs entant qu'en eux estoit empeschoyé Iesus Christ d'annoncer la volonté de Dieu son



Pere avec defenes & menaces. Iesus Christ leur a resisté en l'annonçant. Et quoy que nous puissions dire qu'en la maison du Pere Eternel il a esté, est & sera à iamais fils Eternel de Dieu : toutesfois selon la dispensation du temps d'alors, sa cōdition & la police, il estoit cōme personne priuee : & toutesfois n'a-il point obey.

Les Apostres ayans receu commandement de se taire, & ne point annoncer Iesus Christ, n'auoyent garde d'y obeir.

Il ne seroit pas si tost fait si ie voulois reciter par le menu le nōbre des tesmoings qui ont souffert persecution, pour n'auoir voulu obeir aux edicts des Rois, Empereurs & autres Magistrats, ausquels tāt s'en faut que nous soyons tenus d'obeir, lors qu'ils commandent choses prophānes ou iniques : qu'au contraire comme nous pouuōs recueillir des exemples alleguez nous ne satisfaisons iamais à nostre deuoir, si en desobeissāt d'un costé, à tels Magistrats, nous n'obeissons de l'autre aux edicts & commandemens de Dieu souuerain, chacun de nous selon sa vocation : vocation dis-ie generale ou particuliere : generale par laquelle vn chacun est appellé à pratiquer la charité enuers ses prochains : particuliere selon l'estat & office auquel vn chacun est appellé.

Les sages femmes donques Egyptiennes ont fort vertueusemēt fait en n'obeissant point à Pharaon, & en s'acquittant de leur vocation particuliere ont de tout poinct accōply leur deuoir, conseruāt les enfans que l'edict du tyran auoit destiné



né à la mort.

Ainsi aussi Abdias, qui non seulement ne tua point, ains nourrit & sustenta les Prophetes du Seigneur. Pareillement les Apostres, qui tant s'en faut qu'ils se teussent, qu'au contraire ils annoncerent plus librement la parole du Seigneur. Aussi estoit-ce leur vocation particuliere, à laquelle ils ne pouuoient autrement satisfaire qu'en ce faisant.

Et partant auiourd'huy és terres des Princes prophanes, superstitieux & tyrans, desquels le nombre n'est que trop grand, qui deffendēt d'annôcer la Parole de Dieu, & commandent d'assister aux seruices des faux dieux cōtrouuez dans le cerueau des hommes: s'il s'y trouue quelque Chrestien, (comme Dieu mercy il y en a bon nombre) nous ne dirons pas qu'il se soit acquitté de son deuoir, quand seulement il se sera abstenu de communiquer aux faux seruices, si quand & quand il ne fait tout ce qu'il luy sera possible pour se trouuer és assemblees Chréstiennes, ouyr la parole de Dieu, & communiquer aux prieres & sacremens de l'Eglise Chrestienne.

Le roy Ozias ayant voulu vsurper l'office de Sacrificateur, fut dechassé hors du Temple par Azarias, & octante autres Sacrificateurs ses compagnons: desquels le fait fut approuué de Dieu, & celui d'Ozias condamné: de sorte qu'il en fut frappé de lepre de la main du Seigneur, & contraint de finir sa vie tout lepreux, & miserable, en vne maison sequestree & à part.

Cela est donc tout resolu que nous pouuons en bõne conscience desobeir aux edicts prophanes ou iniques des Magistrats, quels qu'ils soyent.

Reste à voir maintenant, s'on leur peut aussi pareillement resister en bõne conscience, & pour quelles raisons estant chose toute asseuree, que c'est plus leur resister, que leur desobeir simplement.

Ia n'auiene que ie fauorise en cest endroit le party de ces furieux & turbulens Anabaptistes, que nous confessons tous pouuoir estre dignement chastiez par le Magistrat.

Qu'on ne pense pas aussi, que ie vueille porter le party des Seditieux, pourtant, si ie viens affermer que les suiets sont tenus de resister par armes, si besoin est, au Magistrat commandant choses prophanes ou iniques, estant vne telle resistance, qu'o fait aux desseins d'un Magistrat seditieux, vn vray moyen d'oster la sedition, & faire mettre vne bonne paix parmy les peuples.

Mais afin que la question puisse estre plus clement traitee & desnouee, ie mettray en auant quelques maximes, comme preludes seruans à ce faict.

Premierement qu'il y'a vne mutuelle & reciproque necessitude & obligation d'entre le Magistrat & les suiets: comme il est aisé à cognoistre, s'on considere l'origine, la cause & la fin de l'institution des magistrats.

Cela est bien certain que les magistrats ont esté creez aux peuples & non les peuples aux magistrats: tout ainsi que le tuteur est créé à vn pupille

pille & le Pasteur à vn troupeau : non pas le pupille au Tuteur, ou le troupeau au Pasteur. Il falloit donc qu'il y eust quelques assëbles & troupes d'hommes deuant la creation des Magistrats. Encores peut-on bien trouuer auiourd'huy vn peuple sans Magistrat mais nullement vn Magistrat sans peuple : C'est donc le peuple qui a créé le Magistrat & non le magistrat le peuple : qui a, dis-ie, créé les premiers magistrats d'un commun consentement, pour la necessité qu'il se sentoient auoir pour sa conseruation d'un tel lien & conduite.

Aucuns peuples ont créé des Princes sur eux, pour estre gouuernez & regis en ceste façon ou en l'autre, tellement toutesfois qu'il demouroit tousiours par deuers le peuple vne bonne portió de la puissance & autorité. On voit cela en l'estat Democratique, auquel aucuns esleus en ceste charge demandent les auis & recueillent les voix du peuple, n'osans au reste rien ordonner sans son consentement. Ceux cy sont appelez Magistrats populaires.

Autres y en a, qui ayans mieux aimé le gouuernement Aristocratique, ont choisi & esleu vn certain nombre des meilleurs de leurs citoyens, auxquels ils ont cõmis toute la conduite de leur estat & chose publique.

Ceux qui ont plus prisé le gouuernement d'un seul, l'ont esleu & esleué sur eux pour les gouverner & conduire comme Monarque & souverain. Mais il ne se trouuera iamais, qu'il y ait eu vn peuple si sot & mal auisé qui ait esleué vn magistrat



sur les espaules, auquel il ait donné puissance & autorité absolue de commander indifferemmēt tout ce qu'il voudroit au peuple, qui l'auoit esleu. Au contraire tousiours le peuple en se soumettant au magistrat, la aussi lié & comme attaché à certaines loix & conditions, lesquelles il ne luy est permis d'enfreindre ny outrepasser.

On voit encores aujourd'huy ce la aux establissemens & couronnemens des Rois: où l'on leur offre certaine forme de iurement, qu'ils prestent deuant qu'estre establis: s'astreignans par iceluy aux conditions qui leur sont offertes.

Sous telles conditions le Magistrat regne, & sous telles conditions luy doit le peuple obeir, n'estant en rien honeste d'estendre le commandement ny l'obeissance hors ou par dessus icelles conditions, que nous pouuons appeller, vltro citroque, & reciproquement obligatoires.

Nous auons vn ancien exemple de cecy assez à propos au regne d'Israel. Dieu eslit Dauid & sa posterité pour regir & gouverner les Israelites. Ils se soumettent à son Empire, sous certaines conditions & formule de iurement, que l'on peut recueillir des passages de l'Escripture, où l'histoire du regne du roy Ioas est traitee: Là il est dit que Ioiada sacrificateur stipulant, l'alliance fut faite comme de nouveau entre Dieu, le Roy & le peuple.

Dieu tesmoignoit par la bouche du Sacrificateur, qu'il recognoissoit ce peuple là pour son peuple: & le peuple de sa part reclamoit Dieu pour son Dieu.

Item

Item le Roy de son costé promettoit de regner selon Dieu, & le peuple d'obeir au Roy selon Dieu.

Le mesme serment & alliance se trouue faite en l'Escripture sous Iosias & autres Rois. En somme jamais ne s'est veu qu'il y ait eu homme esleué en degré par dessus les autres, sans auoir premierement fait quelques promesses & sermens au peuple, ou à la nation à laquelle il estoit proposé.

On voit encores aujourd'huy les formules de iurement de l'Archeduc d'Austriche, du roy des Romains, du roy de France, quoy qu'elles ayent esté viciées, par l'entremise de Messieurs les Papes Romains.

Aprésauoir veu l'origine & forme de la creation des magistrats, voyons maintenant quelle est la cause & occasion, pour laquelle ils ont esté creéz. Nous trouuerons qu'il n'y en a point d'autre que le salut du peuple. Afin, ce dit l'Apostre, qu'ils soyent en terreur & espouuamment aux meschans, & en seureté & conseruation aux bons.

Aristote en ses Politiques dit tresbien: Que tout ainsi qu'au Pilote, l'heureuse & prospere nauigation: au medecin, la santé du patient: au Capitaine, la victoire: aussi au Roy le salut & conseruation du peuple doit estre tousiours deuant les yeux.

Et partant le peuple ayant esleu ou autrement esleué premierement, le Roy à ceste fin, le Roy aussi estant obligé à telle condition toutesfois &

quantés qu'il s'en desuoie : quand de bon prince il deuient Charles 9. quand seulement il prepose son priué au public: augmentant avec le detrimēt du peuple ses coffres & reuēnus: lors l'obligation du costé du peuple est rompue : lors est le peuple deliuré de ce qu'il deuoit à son Roy. Ne pouuant l'Empire & gouuernement estre dit iuste & legitime, auquel l'on a tellement esgard au bien particulier du Prince qu'on en vient à interesser le public de tout le Royaume.

Outre ce que dict est, il faut qu'un Roy soit legitimement appellé à la Royauté, selon les coutumes & loix du pays pour pouuoir estre dit Roi legitime. Autrement s'il vient à vsurper le sceptre, il se rend indigne du titre & des priuileges d'un Roy. Cecy soit dit tout en passant, en faueur de ceux de Lorraine: sur lesquels, comme tu sçais mieux, les predecesseurs de nos Valois ont vsurpé la Couronne.

Or les Rois sont appellez au royaume, ou par succession en lieux où le droit de regner est transmis aux heritiers : ou par election: ou par succession & par election tout ensemble. Ceste dernière façon de creer les Rois est merueilleusement à l'auantage & benefice du peuple : estant chose tout asseuree que là où le droit de succession est simplement obserué, le plus souuent la Royauté est transportée à personnes indignes, d'où sort vne infinité de malheurs & desastres, nous l'auons veu, nous le sçauons, nous le sentons si nous ne sommes ladres. Là où l'election seule est pratiquée, on baille entree aux seditions & partialitez, desquel-



quelles naissent le plus souuent des guerres ciuiles, ruine des peuples & estats. Mais quãd la chose est temperee, de sorte qu'on ne reiecte pas temerairement la famille sous laquelle le peuple a accoustumé d'estre conduit: ains enquiert-on diligemment, si c'est pour le bien du peuple de l'eslire ou reietter: c'est s'y conduire sagement de tout point. Telle estoit anciennement la façon d'eleuer les Rois. Ainsi a esté pratiqué en l'Empire de Dauid (duquel toutefois Dieu estoit l'auteur & en la famille duquel il vouloit conseruer le sceptre) où les aînez n'ont pas esté establis indifferemment Rois. Roboam apres la mort de Salomon fut appellé par droit de succession au Royaume: mais ce fut par l'auis des douze lignees, qui pour cest effet s'assemblerent.

Ces choses ainsi premises, ie vien à la question proposee. S'il est loisible aux suiets de resister au magistrat, & iusques où telle licence s'estend.

Mais deuant toute œuvre, il faut entendre, que les suiets ne sont pas tous d'une mesme condition. Car les vns sont simplement suiets priuez, les autres ne sont dits suiets qu'à raison du Magistrat souuerain: tels sont les Magistrats inferieurs.

Mais à sçauoir mon si le Souuerain magistrat ou Roy est tellement souuerain, qu'il n'ait nul fors que Dieu estably dessus luy. Il semble bien qu'on pourroit dire que apres Dieu le Roy est le premier, ie l'accorde, mais non pas absolument. Car, comme j'ay desia dit, les gens n'ont iamais esté si sots & mal auisez de donner à aucun tant de souueraine puissance, qu'ils ne se soyent tou-

siours reservez de tenir comme par les renes vne bonne & forte bride, de peur que la Royauté, cōme en vn chemin glissant, ne tombast tost en tyrannie.

Mais ils n'ont sceu si bien faire (tant le peuple est aisé à piper) que ce malheur, que ce desastre ne soit auenu mille fois.

L'autorité des anciens rois des Romains estoit souveraine, mais elle estoit retenue par le Senat.

Les anciens Rois dechassez par leur ambition, violence, & paillardise, l'autorité souveraine demeura au senat Romain: tellement toutefois que l'autorité des Tribuns du peuple leur seruoit de frein & de bride.

Les Lacedemoniens auoyent deux familles à Sparte, desquelles ils eslisoyēt leurs Rois: le frein & bride qui les tenoit en office estoeyēt les Ephores, c'est à dire les voyans ou regardans & observateurs. A ceux-cy estoit loisible de condamner & chastier les Rois, qui abusoient de leur charge, comme tu sçais qu'il auint à Pausanias.

Tel est auourd'huy en l'empire Romain le Sept-virat: sçauoir les Princes Electeurs. Ceux-cy n'ont pas seulement droit d'establiir les Empereurs, ains aussi de les desmettre. Telsmoin en est Vvenceslaus Empereur priué par eux de l'Empire l'an 1400. Munster recite la forme de l'abrogation.

Le mesme a esté observé aux Rois de France, du temps que l'autorité des Estats (que ceux de Valois ont abbatue) estoit en sa force: laquelle  
aussi

aussi s'estendoit iusques là, comme tu sçais, qu'il n'estoit permis aux Rois de declarer, ny faire guerre, ny d'imposer tribut ou subsides nouveaux sans le consentement des trois estats : esquels neantmoins les gens d'Eglise n'ettoient aucunement compris: ains seulement ceux de la Iustice, ceux de la Noblesse, & le Peuple. Et estoit leur autorité telle, qu'ils deposoient les Rois quand l'occasion le requeroit pour leur desbauche, insolence, faineantise, incapacité & autres semblables choses.

Nos histoires nous font mention, comme tu sçais trop mieux, de huit Rois de France desmis par l'autorité des Estats.

Childeric en est l'un, desmis en l'an 469. Eudon, l'autre desmis un peu apres. Un autre Childeric, l'an 679. Theodoric, l'an 696. Chilperic l'an 750. Charles le Gros, l'an 890. Odon, l'an 894. Charles le simple, l'an 926.

Quant à nostre Charles le traistre, ils ne l'eussent ia desmis: il n'est pas vray-semblable: ils eussent eu esgard à ses belles vertus, à sa pieté, à sa iustice: ils eussent porté respect à sa mere qui peut tout, & au Peron, qui la surmonte, & gouverne tout à son tour.

Mais si la liberté des Estats, n'eust esté opprimée, ils eussent bien desmis d'autres Rois, qu'on eust peu nommer bons, tresbons, les comparant aux moindres traits de ceux que Charles a ioué au pource & miserable peuple: comme les Romains demirent Tarquin à raison de ses outrages & violences.



En Angleterre les Parlemens, qui ont mesme puissance qu'auoyent les estats en France, ont souuent condamné leurs Rois.

Cela est hors de toute doute que ceux qui ont la puissance de deslier, ont aussi pouuoir de lier.

Et partant és lieux où cest ordre est estably qu'il y en a quelques vns qui seruent de bride aux Rois, & aux loix de seure garde: ie dis que ceux là sans faillir peuuent & doiuent resister aux iniques ou prophanes commandemens des Rois. Et ne peuuent ceux-là laisser la royauté & legitime gouuernement degenerer en tyrannie sans commettre vne manifeste trahison enuers le peuple: qui a esleu tels estats principalement à celle fin, qu'ils empeschent la tyrannie. Que si de malheur elle y suruiuent, (comme nous la voyons par nos pechez arriuee à son comble, disposant des biens & des corps, de l'honneur & de l'ame à son gré) c'est aux suiets prieuez de recourir au remede vers les estats: estant chose toute asseuree, que ces trois estats sont comme souuerains magistrats par dessus le Roy en cest endroit, quoy qu'ils soyent prieuez & au dessus du Roy pour vn regard ordinaire.)

Que si ce droit là des estats vient à descheoir & à se perdre: le te respons, & fort bié ce me semble: que les Rois qui ont si souuent en leur bouche, qu'on ne prescrit rien contre eux, nous enseignent aussi de dire, qu'il n'y a point de prescriptio contre les droits du peuple & des estats. Et que la loy ciuile de laquelle nous vsons, qui a la raison pour son ame, nous enseigne & apprét, qu'un possesseur

seigneur de mauuaise foy ne peut prescrire aucunement.

Les rois de France promettent & iurent à leurs Couronnemens, qu'ils conserueront, vn chacun en son ordre, reng & degré: quand ils font le contraire, qu'ils violent les bonnes loix & les bons edicts en quelque façon que ce soit, ils ne sont plus Rois, ains Tyrans.

S'ils repliquent: Il y a cent ans, deux cens, voire six cens ans que nous vsons de tel & de tel droit. (Car tel est nostre plaisir) & pour autant ce droit nous est prescrit.

Je respons, que si on fueillete les hystoires de nostre France, on trouuera qu'il n'y a pas plus de soixante ans que la liberté des estats y a esté opprimée, & que les Rois y ont esté comme l'on dit mis hors de page. Mais quand bien ce seroit de plus long temps, ie tourne dire, que la prescription contre les bonnes mœurs & contre les droits du peuple est inualide. Mais l'on me dira: Les estats ne peuuent ou ne veulent s'assembler, ou s'ils s'assemblent, la plus grand part emporte, tousiours la meilleure: ne sera-il donc permis à vne ou à l'autre partie des trois estats, ce qui est loisible à toutes les trois ensemble? Je respons que non, pour euitier aux partialitez qui s'en pourroyent souder: Ayans à ceste fin esté establis trois, que toutes choses se fissent avec bon ordre & sain iugement: & que le chemin soit couppé à la dissipation du peuple, qui autrement s'en pourroit bien ensuyure.

Qu'est-il donques besoin de faire quand vne

partie du corps est si extrêmement greuee , qu'elle ne peut plus supporter son mal? En tel cas il faudra diligemment considerer, quelle est la cause de ses plainctes , & le but auquel elles tendent.

Car il y en peut auoir qui se plaindront de la tyrannie, enuers lesquels toutefois on n'vsera que de iuste & legitime commandement.

Estans certains de la bonné & iustice des complainans , en se souuenant qu'il n'est pas permis à vne partie , soit en chasteau , ville ou prouince, ce qui est propre & appartenant au tout: après que celle partie greuee aura admonnesté & auerty les autres ses compagnons de leur deuoir & charge: & qu'ils n'y voudront entendre il luy sera permis & loisible par tout droit & raison diuine, humaine, politique & des gens: non de desmettre le tyran , iacq̃it que par le droit il deust estre desmis : mais fort bien de se soustraire de sa suiection , & de se deffendre contre la tyrannie, & violence de celuy , qui au lieu d'estre Pasteur & pere du peuple en est le volleur & brigand.

Cela peut-il faire en bonne conscience, & laisser perir cependant qui veut perir à son escient? N'estant aucunement raisonnable que pour la lacheté & nonchalance d'autrui mon droit, mon bien, mon honneur & ma vie, voire mon propre salut soit abandonné & perdu.

Par le droit Feudal , pour les mesmes cause que le vassal perd le fief , scauoir pour felonie pour icelles mesmes le haut Seigneur le perd pour



pource que, comme dit la Loy, l'obligation d'entre eux deux est mutuelle & reciproque. Le semblable est d'entre vn Roy & ses suiets, qui luy sont comme vassaux.

Chacun sçait combien la puissance des Seigneurs, ou maistres enuers leurs serfs & esclaves est grande : toutefois si le Seigneur ne prouuoit & subuient au serf en sa maladie, le serf sans autre manumission est déclaré libre par la loy : laquelle n'a esté ordonnée qu'à celle fin que ceux qui ont quelque autorité & puissance n'en viennent point à abuser.

La condition des suiets ne doit pas estre pire que celle des serfs. Que si le serf est fait libre, quand son Seigneur abuse de son pouuoir, pourquoy ne sera-il le semblable des suiets?

Les Suisses, desquels nous parlions n'agueres se sont soustraits, comme les histoires en font foy de la suiétion & obeissance de la maison d'Autriche, à laquelle ils s'estoyent obligez sous certaines conditions : pource que la maison d'Autriche ne les daignoit accomplir de sa part. Ainsi sont-ils auourd'huy libres, ayans secoué, non pas abbattu l'Empire de celle maison : laquelle cependant cognoissant sa grand faute à approuver leur subtraction & reuendication de leur liberté.

Quant à nos pources freres de la Rochelle, s'estans autresfois distraits de la suiétion des Anglois, ils se souismirent au Roy de France sous certaines conditions, que Froissard recite en son histoire.

Toutes les autres villes de la France pareillement sont soumises sous des conditions & avec speciaux priuileges, qu'on leur a iuré & promis. Puis que celuy à qui elles sont soumises, n'observe ce qu'il a promis, & qu'il n'y a point de moyen d'auoir vn iuge, pourquoy ne leur sera-il loisible de se distraire de telle suiection? Et de se faire à vn besoin iustice à eux-mesmes de tant de concussions, extorsions, violences, paillardises, cruautéz, trahisons & autres telles infamietez, desquelles les brigans & volleurs abusans du sacré nom de Roy, de Pieté & de iustice, commettent en leur endroiect.

Ioram fils de Iosaphat ayant succédé à son pere au royaume de Iuda, introduisit les dieux estranges & le seruice des Idoles parmi le peuple. Lobna ville sacerdotale en Iuda voyant cela, se retira de luy pour ne plus estre sous la main de Ioram: pource, ce dit l'Escripture, qu'il auoit delaisié Dieu le Seigneur de ses peres. 2.Chron.21.

Il n'y a nulle doute qu'entre nous, les loix diuines ne doiuent estre en plus grand poix & estime que les humaines.

Le Magistrat est estably pour estre en terreur aux meschans. Ceux-là sont plus meschans, qui violent les loix diuines, que ceux qui simplement contreuient aux loix humaines. Or s'il est permis de se soustraire du magistrat violant la police humaine, à plus forte raison de celuy qui a violé toutes choses saintes, voire l'humanité mesmes, qui a despouillé toutes affectations naturelles, seconé entant qu'en luy est tout ioug & cognoissance

sance de la deité, & corrompu & dissipé en toutes sortes la Religion, laquelle est le principal lien de la societé humaine.

Item s'il faut fuyr la sedition en la police humaine, à plus forte raison la faut-il fuyr en l'Eglise de Dieu & assemblée Chrestienne: laquelle est liee & conioincte estroitement par le tressainct & sacré lien du sainct Esprit. Cependant en la tyrannie Ecclesiastique du Pape, qui a corrompu toute doctrine & violé tout ordre en l'Eglise, n'ayant esté permis d'assembler vn Synode libre, qui eust esté comme les trois estats en la police, auquel il eust fallu recourir, n'ayant, dis-ie, esté loisible de l'assembler, par ce qu'il eust esté besoin le demander aux mesmes tyrans, & par consequent approuuer la tyrannie Papale: cependant, dis-ie, il a esté permis à vne partie, pendant que la plus grand part sommeilloit en profondes tenebres, de se distraire d'icelle tyrannie, sans encourir entre les bons le nom de schismatique. Pourquoy estimerons-nous ceux-là seditieux qui se retirent de la suiection d'un magistrat periure, perfide, cruel oppresseur de peuple, mangesuiet, de l'infameté duquel toute la terre est infectee?

*L'hist.* Mon Dieu que ie suis aise de t'auoir ouy auancer & deduire tant de bonnes & belles raisons pour la iustification de nos freres. Elles ne sont que trop suffisantes pour prouuer, qu'il a esté loisible à la Rochelle & autres villes & provinces oppressees du reng desquelles on peut mettre toute la France, au quatre coins & au milieu, de l'obeissance & suiection du tyran: & pour le



moins de se deffendre contre l'inuasion de ses satellites, concussion de ses officiers, oppression de ses gabelliers, violences & infametez de sa cour: Et, pour le dire en vn mot, contre tout ce qui procede de luy & de ses Iannissaires.

Et tant s'en faut qu'en se deffendant, ou retirant du tyran, on acquiere le nom de seditieux, qu'au contraire ceux-là sont tresmauuais concitoyens, compatriotes, & mauuais voisins, qui ne s'adioignent à eux.

*Le pol.* Cela est hors de difficulté, que ceux qui desirent la conseruation de la France, & sur tout de l'Eglise de Dieu, se doiuent ioindre à eux. Et assure toy, que ceux qui par couardie, ou autrement laissent les secourir, orront vn iour & à bon droit prononcer la sentence contre eux, que Debora donna contre la ville de Meros, pourtant qu'elle ne vint point à l'aide du Seigneur contre Iabin roy de Chanaan. Jug. 5. 22. & 23.

Cependant le Seigneur ne lairra point de faire son œuvre, pour paracheuer leur entiere deliurance, comme il a commencé, ainsi que ie te diray. Mais ie te prie paracheue ce que tu as à dire, & te despeche, afin que i aye aussi quelque peu de loisir de t'entretenir de ce qui s'est passé en mon voyage.

*L'hist.* Je le veux bien: que pleust à Dieu que les Seigneurs des cantons, Papistes t'eussent ouy discourir en plein Conseil de la iustice de la cause de nos freres, de la puissance des magistrats, & iusques où elle s'estend. Je m'assure que cela ioint avec les autres occasions qu'ils ont de tenir pour suspe-

suspectes les forces des tyrans, qui ne pardonnent iamais aux loix, aux confederations & ligues: ains plantent tousiours leurs limites là où le bout de leurs espees s'estend, les eust engardez de despeupler leurs terres, & de desgarnir leurs maisons de leurs gens. Cela, dis-ie, eust esté suffisant, pour faire que le Conseil eust arresté tout court les plus ambitieux & auares, & les eust engardé d'emmenner leurs combourgeois à la boucherie. Cependant cela est fait: il n'y a plus d'ordre, & ie m'assure qu'ils ne feront pas grand mal aux nostres pour ce coup cy.

*Le po<sup>l</sup>.* Ie t'en respons & te le iure: ils n'ont eu garde d'approcher plus pres que de l'artillerie les murailles de la Rochelle, que si aucuns ont passé outre, ils ont esté tresbien frottez. Mais voila le mal qu'ils ont fait: ils se sont fait battre & tuer, eux qui aiment leur liberté, pour nous vouloir ravir la nostre: & ont tousiours en ce faisant vescu dessus laques bon homme. Puis rapporteront au retour l'argent & sueur du bon homme, apres qu'ils l'auront bien pillé. S'ils apprenoyent vne fois à cognoistre la grande difference qui est d'entre vn tyran & la Couronne, qu'ils appellent, voire d'un Roy à son Royaume: ie m'assure qu'ils n'auroient garde d'outrager, d'offenser & perdre vn si grand & puissant corps, comme est celuy de France, à l'appetit d'un seul tyran, & pour les passions d'une femme.

*L'hist.* Certainement ie le croy. Mais, comme i'ay dit, c'en est fait pour ce coup cy: vne autrefois ils pourront estre possible quelque peu plus sages.

Quant aux Cantons de la Religion, ils n'ont garde d'y auoir enuoyé de leurs gens:pluſtoſt leur ont-ils deſſendu ſur peine de la vie d'y aller, & commandé de ſe tenir preſts & armez, tant ils ont craint és premiers iours apres le maſſacre, que quelque orage tombaſt deſſus eux,& ſur leur eſtat. Et cela a eſté cauſe, avec la crainte auſſi qu'ils auoyent de faire naiſtre vne guerre ciuile d'entre eux & les cantons Papiſtes, qui deſia, comme ie t'ay dit, eſtoient embarquez du coſté du tyran, qu'ils n'ont baillé aucun ſecours à nos freres: quoy qu'ils confeſſaſſent ingenuement d'y eſtre tenus & obligez par la loy de Dieu & des hommes.

Bien eſt vray qu'ils ont monſtré & tous leurs ſuiets auſſi d'auoir vn extreme deſplaiſir & compaſſion de noſtre fait: m'aſſurant en teſmoignage de leur bonne volonté que tous les François Huguenots foruſcis ſeront les tresbien venus & ſeulement conſeruez en leurs terres & qu'ils n'oublieront rien du deuoir de charité enuers eux:mais qu'ils ne pouuoient du tout rien plus que cela pour maintenant: deſia auoyent-ils recueilly à Baſle & bien fort honorablement les petits ſeigneurs de Chaſtillon,& de Laual. Meſdames d'Andelot & de Teligny, la damoiſelle de Laual,& pluſieurs autres gentilshommes & peuple François, & auſſi bon nombre de Miniſtres refugiez, qu'ils entretiennent çà & là à leurs deſpens deſſus leurs terres.

*Le pol.* Dieu ſoit loué, de ce que leur charité au moins ſe monſtre en cela qu'ils recueillent liberalement ſes ieunes Seigneurs & nos autres freres



res François : ils ne ſçauroyent mieux condamner toutes les actions du tyran , les proſcriptions & cruantez , qu'en vſant d'hospitalité enuers les pœures oppreſſez qu'ils iuſtifiant en les hebergeant.

*L'hiſt.* Je t'aſſeure l'amy, qu'ils le font fort volontiers. Le ſemblable auſſi (ce que j'auois oublié à te dire) font les Seigneurs Proteſtans : & de meſme la royne d'Angleterre par tout ſon Royaume & pais, recommandant les eſtrangers autant qu'elle peut à ſes ſuiets.

*Le pol.* Dieu leur vueille rendre , & à rous ceux qui vſent de telle charité , le guerdon qu'il leur a promis au nom de ſon fils Ieſus Chriſt noſtre Seigneur.

*L'hiſt.* Ainſi ſoit-il. Or ay-ie acheué de te dire tout ce peu que j'ay exploicté en mon voyage, excepté pour ne point mentir, quelques particularitez ſecretes , qu'on m'a chargé de faire entendre à ceux qui nous ont enuoyé. C'eſt maintenant à toy l'amy, à m'entretenir à ton tour de ton voyage.

*Le pol.* C'eſt bien raiſon. Sus donc, eſcoute.

Ainſi que j'approchois la France , par tout là où ie logeois j'oyois tant dire de nouuelles des volteries & inhumanitez qu'on exerçoit ordinairement par les chemins, emmy les champs & par les villes, & ie tenois cela pour ſi certain, qu'il me ſembloit bien que j'allois à vne mort toute preſente, ou bien à vn ſecond enfer: tellement que peu m'en fallut , tant mon infirmité fut grande, que ie ne rebroſſaſſe mon chemin avec vn vœu de ianais ny rentrer. Et n'eust eſté que noſtre Dieu, que ie me prins lors à prier , me fortifia & me fit

passer outre sur toutes ces difficultez , i'eusse fuy avec vn Ionas, plustost que de faire ma charge. A la fin ie m'y hazarday : mais ie ne fu pas si tost en France, que dés la premiere iournee ie m'apperceu trop clerement que i'estois au vray monde des miseres & dans vn royaume de bestes , ou bien plus tost de traistres & brigans. A la premiere hostellerie où ie logeay, i'entendy vn qui se plaignoit de la grande cherté de viures: l'autre disoit: les grosses tailles qu'on va redoublant tous les iours , ces grands impôts nous ruinent , nous mangent : & puis les inuentions nouuelles que ces bougres d'Italiens donnent au Roy pour arracher du peuple tous les deniers de sa sueur , nous achement à bon escient de peindre : au diable soyent les Atheistes : ils viennent la plus part en France pour nous aider à escorcher , pour nous gabeller & nous tondre , & pour succer iusques au sang les pources gens. Les autres y viennent avec vne main de papier , ou avec vn liure de raisons , Dieu scait quel liure: ils dressent apres leur banque dans Paris, dedans Rouen, ou dedans Lyon: & lors qu'ils ont bourse garnie, ils font le faut , la Banque route. C'est le vray moyen de gagner , voire de passer en credit les plus grands Princes de la France. Et qu'il soit vray qu'on le demande au Peron, au comte de Rets. Tu te trompes , repliquoit l'autre , il est parueniu autrement que tu ne penses le bon homme : ne scay tu pas ce qu'on dit en proverbe:

Pour bien seruir & loyal estre,  
De Maquereau on deuient traistre:

Traistre

Traistre, Maquereau & Ruffien

Ne peut faillir d'auoir du bien.

De par le gibet, c'est le moyen de paruenir. La Royne mere ayant receu cestuy-là, dont tu parles, entre ses premiers estallons, la reconnu estre vn digne instrument pour illustrer la grandeur de sa race, & la Maiesté de ses enfans, pour redresser les ruines de la France, & pour appuyer & soustenir ce pource Royaume, que ceux de Guyse auoyent tant esbranlé: qui, lequel donques? ce Landry, ce fils de putain du Peron: la male peste qui le creue avec sa dame Brunehaut, repliquoit vn autre pource homme: ils ont fait eux deux plus de mal que ne firent iamais ensemble tous les Lorrains & les Guisars: ce n'estoit lors que belles roses au prix des ronces, dont ceux-cy esgratinoient le pource peuple. Et puis les Lorrains, les Guisars, ce sont des Princes appartenans en plusieurs sortes à la France: & possible aussi que la France leur pourroit bien appartenir.

Mais ces deux-cy ces Florentins, avec l'asne qu'ils ont choisi, ce meschant bougre de Chancelier: ces trois Italiens tant fameux, chacun scait d'où ils sont venus: mais on n'entend pas leurs meenes.

Je ne scay pas s'on les entend, disoit vn autre, si scay-ie bien qu'on est bien ladre s'on ne les sent.

Ce sont ceux là qui nous ont remis avec le Gonsage, & Lansac, ainsi auant dedans les miseres & calamitez, qui nous accableront tous ensemble.



Adiouſtez y le Roy luy-mefmes, & fon frere le beau Monſieur : ne vous ſçauriez dire , lequel de tous ceux là vaut mieux que l'autre. Que pleuſt à Dieu qu'ils fuſſent tous chaſtrez comme ils le meritent. Le chaſtiment du Parricide, c'eſt de les ietter à val l'eau dans vn ſac de cuir , bien couſu avec vn ſerpent, ce me ſemble , vn coq & vn ſinge auſſi. O que cela conuiendroit bien à vn Charles le parricide! à Catherine la couleuvre, le coq ſeroit noſtre Monſieur, & le Peron ſeroit le ſinge : ce ſeroit aſſez de ces quatre, les autres auroient belle peur. On purgeroit toſt le Royaume de garnemens : ie m'aſſeure bien , diſoit l'hoſte, que ſ'ils s'en vont à la Rochelle , ils n'en reuiendront ia tous : ou il y aura de la iuſtice auſſi peu au ciel qu'en la France. Toutefois ceux-cy n'ont garde d'aller auant dans la meſlee, ils craignent les coups, les tyrans. Mais il y font aller les autres pour en auoir leur paſſe-temps. Hé que de braues gentilshommes, que de ſeigneurs, que de ſoldats y vont mourir: c'eſt grand pitié: c'eſt grand dommage. Si l'eſtranger nous venoit ſur les bras, A dieu la France elle tomberoit aiſément és mains du premier aſſaillant , maintenant qu'elle eſt deſpourueue, & qu'elle s'en va deſpouillant iournellement de ſes bras droits , de ſes parreins, ſes deſſenſeurs.

Voila la plus part des deuſis que i'entendois tenir à table , aupres du feu dans les logis. Et Dieu ſçait ſi ces harengueurs en deſpitant à tous propos accompagnoient leurs beaux diſcours de iuremens & de blaſphemes, ie n'eu onques tant de regret , i'eſtois contraint leur laiſſer dire , ie n'oſois point

point me descouurir ny faire semblant de mon-  
strer quel des partis ie maintenois. Cependant i'al-  
lois poursuuant mon chemin, n'ayant eu presque  
iamais faute d'un entretien de mesme estoffe selon  
les gens que ie rencontrois : Dieu voulut qu'un  
iour ie trouuay par les chemins deux gentilshom-  
mes de la Religion, qui s'estoyent depuis les mas-  
sacres reuoltez de peur de la mort, bien montez &  
armez de mesmes qui s'en alloient tout droit au  
camp assemblé deuant la Rochelle: non pas, ce di-  
soyent-ils, afin de faire mal aux assiegez: que plu-  
stost ils mourroyent mille morts que le penser:  
ains seulement pour empescher qu'on ne confi-  
scast tous leurs fiefs & qu'on les rendist roturiers,  
suyuant le ban qui en estoit fait & publié par tou-  
te la France contre ceux qui refuseroyent de se  
trouuer en celle armee: & aussi pour plus seure-  
ment garantir, eux & leurs familles en montrant  
l'attestation de leur seruice.

Ces pources gens à demy morts de la fascherie  
qu'ils auoyent d'auoir offensé Dieu contre leur  
conscience portoyent vn incredible regret des  
cruautez exercees sur nos freres, des trahisons, des-  
loyautez & autres confusions qu'on voyoit em-  
my le Royaume Et en soupirant maintefois mon-  
stroyent de porter vne enuie de recouurer leur li-  
berté, comme qu'il fust, fust-ce au prix de leur vie,  
si l'occasion s'y presentoit.

Ceux là m'assurerent que Sancerre, où i'auois  
enuie d'aller tout premierement estoit de bien  
pres assiegee & la Rochelle tout de mesmes, qu'il  
n'y auoit moyen d'y entrer ou de se glisser dans le

parc des ouailles qu'en se meslant avec les loups, lors qu'il y a escarmouche dressée: mais que le danger y estoit grand de toutes parts. Oyant cela apres auoir prins langue d'eux sur ce qu'ils scauoient de l'estat de nos freres assiegez: entendant qu'ils estoient assez bien garnis pour quelques temps & resolu d'eux tresbien deffendre, ie prins mon chemin tout droit vers nos freres du Dauphiné, que ie trouuay en plusieurs endroits de leur pource patrie espars sous diuers Capitaines, qui par montagnes & coustaux, qui par les champs, qui par les villes, par les villages & chasteaux.

Montbrun, Mirebel, l'Edyguier, & avec eux nombre de gentilshommes estoient ceux-là qui conduisoient nos pources freres ramassez, armez au moins mal qu'ils ont peu pour se conseruer tous ensemble contre l'effort des ennemis, lesquels ils battoient bien souuent & estoient battus à leur tour.

Après que i'euy fait entendre aux principaux des Chefs & du Conseil l'occasion de ma venue, & qu'ils m'eurent ouy tout au long, ils remercierent beaucoup de fois Dieu & l'Eglise qui m'auoit enuoyé, de la bõne souuenance & compassion qu'elle auoit de leur estat, des bons auis & saintes ordonnances, que Daniel leur auoit dressées: les reconnurent fort necessaires à leur conseruation. Mais pour ce qu'il y pourroit auoir des difficultez sur quelques articles: & principalement, quand il seroit question de les mettre en pratique, pour le peu de cognoissance que les François ont d'un estat libre, & bien conduit; ayans esté presque  
toufiours



tousiours nourris en seruage , & commandez à baguette comme l'on dict, au plaisir de ceux que les Rois leur esleuoient dessus la teste : Car tel estoit leur plaisir : Ils prioient que ie ne trouuasse pas estrange si eux, (qui auoyent estroicte confederation , & intelligence avec nos freres de Languedoc, Viuaréz , & autres) me renuoyoient aues quelqu'un d'entre eux au Conseil qu'on tiendra à Nismes , pour ordonner de leur estat & police.

Quant à eux , ils cognoissoient facilement qu'ils auoyent besoin parmi eux de ces deux nerfs tant excellens pour tenir les vices en bride , & les soldats en leur deuoir : à scauoir de la discipline Ecclesiastique, & de la discipline militaire : ayans au reste tout ce qui rendoit les hommes hardis , & vaillans : A scauoir est, la bonne cause, qui rend la conscience tout asseuree , d'où le bon cœur a accoustumé de sortir , & la necessité de se deffendre, qui rend les couards courageux pour conseruer leurs biens, leurs vies, leur honneur, leur salut, & celuy de leurs familles, contre la rage de ces traistres, qui les assaillent à credit, d'un cœur animé à mal faire, alteré du sang innocent , qu'ils estoient tous bien resolus de iamais plus ne s'y fier : & de ne plus poser les armes , quelque paix qu'on leur sceust offrir, s'on ne leur bailloit de bons gages, bons ostages, & respondans.

Sur ces mots, de ne poser les armes , pource que le seigneur de Gordes, qui commande pour le tyran en Dauphiné , auoit rescrit à quelqu'un des chefs de nos freres , des lettres fort douces , luy

promettant de le conseruer, & bien traiter, s'il vouloit mettre bas les armes, il y en eut en la compagnie qui releuerent ces mots (de ne plus les poser) leur semblant bien qu'ils ne pourroyent moins faire, quand cela seroit commandé par le tyran, (ne voyans pas les bonnes gens, que ç'à esté tousiours la ruse des ennemis, de les desarmer premierement, pour les surprendre plus à l'aise sous le beau manteau de la paix.) L'opinion de ceux-cy fut cause que la resolution fut reuoquée en doute, & la question mise sur les rengs, à sçauoir mon qui premier doit laisser les armes, nos ennemis, ou nous. La matiere fut debatue à plein fonds, pro, & contrà, iusques à ce qu'un ieune homme, brave, & gaillard qui a l'entendement bien fait, nourry aux lettres, & aux armes, & versé en matiere d'estat, là resolut en ceste sorte, & presque sous ces mesmes mots.

Si on dispute par le droit, il n'y a celuy qui ne confesse qu'on ne peut iustement requerir quelcun qu'il cesse de parer, de mettre la main au deuant, & de se deffendre, que premier on n'ait cessé de tirer, de frapper, & d'offenser: car estant toute chose qui a vie, naturellement apprinse à la conseruer, c'est consequemment vn ordre du tout naturel que qui cherche de l'oster, doit cesser, premier que celuy qui ne tasche qu'à la retenir: & ne se peut presumer qu'il en laisse la volonté, tant qu'il en retient les moyens tous desployez entre ses mains. Donc pour vider ceste question, il faut voir qui est l'agressé, & qui l'agresseur, qui poursuit, & qui sauue sa vie: qui tire les coups, & qui met

met le bouclier au deuant,& cela fait, elle est résolue.

Chacun ſçait, que quelques mois auãt ces troubles derniers, les François de la religion monſtrèrent bien qu'ils ſe voyent merueilleuſement en la parole de celui qu'ils cuidoyent eſtre bon Roy, quand ils remirent volontiers entre ſes mains, long temps auant le terme, les villes qu'il leur auoit baillees pour ſ'y couvrir cõtre les coups des ennemis publiques de la paix.

Ceſte fiance, ne pouuoit eſtre ſans grande amour : ne ceſte amour, ſans fort prompte obeifſance. Ils eſtoient tous paiſibles, & auoyent tellement effacé de leur eſprit toute ſouuenance de guerre, qu'à peine ſe ſouuenoyent-ils où eſtoient leurs armes.

Le 24. d'Aouſt par le malheureux Conſeil des perfides, proietté de plus longue main, ſous l'appas de banquets & nopces, les principaux d'entre eux furent meurtris dans le palais Royal, & dans la capitale ville du Royaume: ce maſſacre fut ſuyui preſque par toutes les autres principales villes, contre la volonté du roy Charles neuſieme, (s'il faut croire à ſes premieres lettres de declaration) nonobſtant que les officiers de la Couronne, ſes autres ſatellites, courtiſans, & archers, & les gouuerneurs des prouinces (comme chacun ſçait) commençaſſent la tuerie, & que les parlemens, & ſieges Royaux y tinſſent la main: & que les maiſons de ville fiſſent, ou aidáſſent l'exécution: tellement qu'en l'eſpace de quelques iours, tous ceux de la Religion qui ſe retrouuerent eſ



villes furent miserablement mis à mort : encores toutesfois ne prîmes nous pas les armes : mais partie de nous se contenta de fuir, partie de fermer la porte, par vn mouuemēt naturel, à la mort qui nous poursuuoit.

Finalemēt quelques vns de nos freres, fondez sur lesdites lettres que le roy Charles auoit escrites, esquelles il declaroit, que ceux de Guyse auoyent commencé ces tueries à Paris, pour preuenir la vengeance que l'Amiral reguary eust peu faire de sa blessure, ou ses amis, pour l'indignation qu'ils en receuoient, & sur quelques autres declarations qu'il faisoit, que ces Massacres auoyent esté faits contre sa volonté, & qu'il en feroit la punition, se resolurent de deffendre leurs portes, contre ceux qui avec grosses armées venoyēt pour leur couper la gorge dans leurs maisons : & apres infinies protestations, voyans les glaiues teints du sang de nos freres, apprestez contre le leur, chercherent les moyens de s'en parer, & se couvrir au moins mal qu'il leur fut possible. Dont il appert que nous auons prins les armes pour nous deffendre, & non pour offenser autrui, & que par consequent c'est à ceux qui poursuyuent nostre mort, de mettre les armes bas les premiers.

La loy ciuile permet à l'esclaue, poursuyui par son maistre courroucé, l'espee au poing, prest de la luy mettre au trauers du corps, de luy fermer la porte de sa chambre mesme, pour s'y sauuer, & s'il la veut forcer, de la barrer le mieux qu'il peut : & s'il l'efforce plus outre, de se mettre cōtre luy,

pour

Pour luy empescher l'entree.

Que si ce n'est point le maistre qui fait ceste violence: mais quelques gallands de maistres seruiteurs, qui sous l'autorité du maistre le veulent tuer, il n'y a doute que la loy ne luy permette encores d'auantage. Et si on luy dit, qu'il ouure hardiment, qu'on ne luy fera point de mal, & qu'il refuse de ce faire tât qu'on a des armes à la main, il n'y aura aucun qui le condamne: d'autant qu'en l'espouuamment où il est reduit, ne pouuant, s'il ouure, & qu'on le vueille tromper, auoir recours qu'à se ietter par les fenestres, il ne peut estre assureé qu'on n'ait point de volonté de luy nuire, tant qu'il voit qu'on en retient les moyens en sa main.

Or les Rois, quand ils sont bons, sont appelez Peres du peuple, & par consequent ils doyuent traiter leurs suiets comme enfans. Et la loy qui donnoit aux Maistres puissance de vie & de mort sur les esclaves, (qui depuis fut fort moderee par les Empereurs) n'eut oncques lieu sur les enfans. Dont appert qu'é ce cas, il est beaucoup plus permis aux enfans, qu'aux esclaves: & plus requis des Peres que des Maistres: estant chose toute assuree que les suiets doyuent estre tenus en autre reng que d'esclaves.

Quel sera donc l'office d'un Pere en cest endroit, d'un pere) dis-ie, s'ainsi le faut nommer) que les enfans, de la bonté desquels il a si souuent abuse, ne redoutent pas sans grande occasion, voyans leurs freres tout freschement morts deuant leurs yeux? Sera-ce seulement de leur monstrier

bon visage de leur parler doucement d'une paix? de leur monstrier la main? Mais quand ils la voyent armee d'un glaive tout sanglant: quand ils le voyent environné de ceux qui les ont tuez, & de leurs plus grands ennemis: mais quand ils scauent que luy mesme a commandé tout ce forfait: a annoué tous les massacres, & proietté les trahisons, Est-il possible qu'ils le puissent reputer aucunement Pere? Et quand bien ils seroyent si fols, pourront-ils bien hausser leurs yeux, pour luy cōtempler le visage, ou prendre garde à ce qu'il dit? Que fera donc vn Pseudo-pere pour oster ceux de desespoir qu'il deust traiter ainsi qu'enfans, & pour les garder s'il poursuit de se precipiter tout outre? Il iettera pour le moins son espee, il laissera toutes ses armes bas. Il fera retirer ceux desquels ils se mesfient. Il cassera ses satellites. Il chastiera tous ses bourreaux, condamnera tous ses forfaits. Lors s'approchant de ses enfans, les consolera de paroles: les deschargera de toute crainte, & leur tendra sa main plus douce: alors il ne faut parauenture point douter, qu'ils ne s'attendrissent, qu'ils ne fondent en larmes, & ne se iettent comme à ses pieds s'ils sont vne fois asseurez que ces façons luy procedent du cœur.

Que si l'on dit qu'il y va de la reputation d'un Roy de faire le semblable, ie dy donc qu'il n'est pas honorable à ce Roy-là de porter titre de Pere de son peuple, veu que les titres se donnent pour l'effect, & cest effet conuient à ce nom-là.

Entre deux combatans en vn duel, il y a de l'honneur à qui fait quitter les armes à sa partie. Entre  
deux



deux Princes, à qui contraindra son ennemy vaincu, desnüé de ses armes, hors de tout espoir, de requerir la paix. Car on combat à qui sera le plus fort. & le plus puissant : mais quand entre le Pere & les enfans pour la meschanceté du pere on en vient là, l'honneur du pere est acheué de perdre, s'il s'essaye de les vouloir forcer, de leur faire rendre les armes le pied sur la gorge, de les mener en triomphe liez au derriere de son chariot. Ce luy est (dis-ie) vn trop lourd deshonneur de le faire : c'est se rēdre ignominieux soy-mesme, & pourchasser sa honte à ses despens.

Son honneur est de se monstrier benin, & doux, enclin à pitié, recercher tous moyens de les regagner, & les retirer du desespoir où il les a mis. Et le Prince qui ne suit ceste voye, sous vn faux pre-texte de conseruer sa reputation, la pert en ce point, & acquiert celle d'vn tyrā inhumain. Pour ce aussi qu'on pense que ces suiets viennent en cōpetence avec luy, & qu'il veut monstrier qu'il est plus fort qu'eux : comme ainsi soit qu'il deult monstrier (s'il luy estoit possible) qu'il est meilleur Prince, qu'ils ne sont suiets : & plus benin, & clement, qu'ils ne sont obeissans.

Les bons Princes, sont estimez estre l'image de Dieu en terre. Dieu auquel les hommes sont plus tenus qu'aux Rois & Princes, veut auoir cest honneur de nous aimer premier que nous luy : & ne le pouuons aimer, que premier il ne nous aye aimez. Il ne se courrouce iamais iniustement, cōme les hōmes à toutes heures : & toutefois il cesse plustost de nous hayr, que nous luy : & despouil

le plustost ses armes, que nous, nostre rebellion.

L'amour est vne vertu non petite, & naturellement veut commencer du plus parfait, du vray Prince, vers ses suiets: du vray pere, vers ses enfans, descendant, plustost que montant: & lors par vne certaine reflexion les enfans commencent à aimer le Pere: les suiets, le Prince.

Et cōme c'est aux peres de cōmencer, aussi est-ce à eux-mesmes de recōmencer, s'il s'interrompt & s'ils viennent à desfiance, de cercher les moyens de les affermer.

Brief, qu'on considere le droit, ou l'honneur, il est tousiours requis à vn Roy, de quitter les armes premier, que ses suiets: à plus forte raison l'est il requis, ô compagnons, à vn tyran, traistre, & perfide, duquel le mienx traité de ses suiets recoit ce mal de luy estre serf, & esclau, cōtre tout droit & deuoir.

Ce ieune homme sembla si vieux, si prudent & sage en son discours, qu'il n'y eut homme en la compagnie qui ne courust de pieds, & mains tout soudain apres son auis: ainsi fut la premiere resolution d'entre eux prise de ne plus se desarmer, pendant que le tyran, & ses satellites seroyent armez, comme de nouveau confirmee par les voix & suffrages de tous les assistans: ausquels suyuant les raisons de ce vieux ieune homme sembla bon d'ainsi le faire: tant pour conseruer la reputation du roy Charles neuueme, auquel, comme à bon pere de famille ( car ainsi aussi s'appelle il soy-mesme ) touche de se desarmer le premier: Que (& plus veritablement ) pour garder avec leurs  
vies

vies, ce qu'ils doyuent auoir de plus cher en ce monde. Surquoy ils se ramentoyent l'un à l'autre ce que Nancé capitaine des gardes du tyran, fit par son commandement en la iournee de la trahison, aux gentils hommes couchez en l'antichambre du Roy de Nauarre: lesquels, comme tu scais, il fit tuer, le tyrā les regardāt d'une fenestre, à la porte du Louure, apres les auoir tous defarmez de leurs espees, & dagues, & plusieurs autres exemples des anciens, & modernes tyrans qui en ont vſé tout de mesmes.

Et sur tout ils se resouuenoyent, comme d'aucrſſemens tresnotables, de ce Bordereau de memoires qui fut enuoyé, comme tu scais, au defunct Amiral, vn peu auant les noces tragiques de la sœur du tyran, lequel bordereau, tous eux disoyent vouloir apprendre par cœur, pour ne l'oublier à iamais: ayant comme ils disoyent le mespris d'iceluy esté cause de la ruine & des miseres que nous souffrons tous aujourd'huy.

*Lhi.* Voila de bonnes gens, & bien resolus. Dieu les vueille fortifier, & maintenir en leur saint propos. Il vaut mieux estre sage tard, que de ne l'estre iamais: & ne le pouuant estre aux despens d'autrui: il vaut mieux l'estre à ses despens: voire, aux despens de ses freres: (quoy que le prix soit par trop cher) que de ne l'estre point du tout, ny à quelque prix que ce soit: se souuenant qu'ils ont affaire à des ennemis, qui se sont tousiours plus tost seruis de nostre simplicité, pour nous nuire, que des moyens qu'ils eussent.



L'Italien nous enseigne vne tresbonne leçon en son meschant petit prouerbe. Non viti fidare (dit-il) & non farai ingannato. C'est à dire ne t'y fie point, & tu n'y seras pas trompé. S'il fut iamais temps de faire son profit de la ruse, & malice Italiene, il est maintenant. Et s'il y eut iamais gens contre lesquels il ayt esté de besoin d'employer & le bec, & les ongles, de se seruir de toutes peaux, d'essancer toute sorte de chiens & de leuriens, voire bien de dogues, François, & Anglois il ne m'en chaut: c'est maintenant qu'il le faut faire contre ces furieuses, & enragees bestes Medici Valoyse: maintenant, dis-je, qu'il n'y a ny loy, ny foy qui de ces gens retiene la malice. Mais ie te prie pourfuy.

*Le pol.* Apres ceste resolution, deux de la troupe furent ordonnez pour venir avec moy en Languedoc: afin de faire entendre aux nostres, la conclusion de ceux du Dauphiné, & d'en rapporter du Conseil general ce qu'il trouueroit bon de faire pour la conseruation d'eux tous. Estans arriuez à Nismes, (où le Conseil de plusieurs proninces, villes, villages & chasteaux faisons profession de la Religion, fut assemblé) luy ayant fait entendre le contenu de ma charge & ceux du Dauphiné leur legation: apres qu'ils eurent monstré cōbien ils estoient ayés de nostre venue: qu'ils nous eurent remercié du bon office que nous faisons: & de la peine que nous prenons pour le corps de l'Eglise François, ils me respondirent, que desia deuant ma venue le Conseil estoit suffisamment auerty de l'arrest, auis & ordonnances que Da-  
niel

niel auoit donné en nos affaires par vn petit dialogue qui a couru imprimé, contenant vn deuis passé d'être l'Eglise, Alithie, & nous autres : qu'ils estoient bien aises de l'auoir veu, & d'estre aduertis par le menu des actions de nos ennemis : qu'ils voudroyent bien que les tyrans eussent aussi veu ce Dialogue : afin que cognoissans en telle peinture muette leurs vilainies, ordures, trahisons, & cruautéz, que la peinture viue du sang innocent, qui crie vengeance, va tous les iours ramenteuât, deuant le iugement de Dieu, & l'humanité des hommes, ils apprinsent comme Iudas, estans conuaincus en eux-mesmes de l'auoir fort bien mérité, d'esparner la peine au bourreau, s'estranglans tous à la bonne heure. Que puis que ces perfides n'ont pas eu honte de commettre telles infametez, qu'on ne doit point craindre de les publier par tout l'vniuers : & cōme ils ont noircy leurs ames de crimes si execrables, qu'on ne doit point faire difficulté de noircir leurs renommées par la legende de leurs vies : & quāt au reste, il y a certains Catholiques, & autres François, qui ayans horreur de la confusion que ces mastins Florentins, leurs enfans & supposts ont introduit en France : vont ramassant au vray en tous lieux & places le surplus de leurs faits & gestes qu'ils mettront en lumiere au premier iour, avec la legende secrette des honnestetez de la cour, & feront aussi toucher au doigt à toute la Noblesse & peuple François endormy d'un trop profond sommeil les indignitez, extorsions & pilleries insupportables que le tyran & ses satellites, hors de la Religion (de la-

h

quelle ils n'ont cure) seulement en ce qui touche la police, estat & gouuernement du Royaume, exercent iournellement sur les biens, vie & honneur des pources François. S'asseurans que ce sera vn bon moyen pour faire qu'il s'en trouue quelques vns d'entre vn si grand & comme infini nombre d'esclaues & forçats, qui seront contrains de honte, ou de regret plustost au prix de leurs vies de recouurer leur liberté avec celle de leur patrie. *L'hist.* Telles gens meriteront bien, si Dieu veut qu'aucuns il s'en trouue, qu'on leur dresse des statues, ainsi qu'à des liberateurs & peres de toute la France. Et ne doute pas si cela aduiet (comme il est tresnecessaire) que tout le Royaume ne repose, quiconque soit que l'on eslise pour s'asseoir au throne vacant. Iamais le fils de ce iuge inique, que Cambyse fit escorcher pour orner le siege iudicial de sa peau à cause des torts & iniustices qu'il faisoit au peuple de Perse, ne fut plus homme de bien étant assis sur la peau de son pere, que seroit celuy qui succederoit au tyran, quand bien seroit vn de ses freres: considerant la malheureuse fin où la tyrannie conduit ceux qui l'exercent. Mais ie te prie comme s'est fait cela, que l'on ait imprimé nos deuils que nous eusmes avec Alithie? Et qui est ce qui les peut auoir redigez si tost par escrit?

*Le pol.* Ie ne te le scaurois dire, si d'auenture ce n'est Eusebe Philadelphe qui fut presët à nos discours. Mais tant y a qu'ils sont imprimez, encores m'a on fait entendre qu'un Catholique en a esté Imprimeur: & qu'il en a vendu luy mesmes à beau-



beaucoup de ses cōpagnons avec vn certain autre liure qu'on nōme des fureurs Frāçoises, qu'un Allema fit en Latin tost apres les iours du massacre. *L'hi.* Nous sommes tous tenus à ceux qui s'essayēt de nous remettre le cœur au ventre, comme on dit. Dieu vueille que tout cela serue à resueiller les sept dormans.

*Le pol.* On m'a dit qu'il a ia serui & seruira encore d'auantage, n'en doute pas. Les ferts sont bien fort eschauffez. Mais, pour reuenir à mon dire, le Conseil de Nismes me fit aussi entendre en ce que touche les quarante articles de la police de Daniel (car autāt y en a-il de marquez en ce Dialogue imprimé) qu'ils les trouuoient fort bons, saincts & dignes d'estre obseruez & gardez en ce principalemēt, qui touche la discipline Ecclesiastique & la discipline militaire qu'ils confessoient estre la bride, l'esperon, l'espee & le bouclier l'une de l'autre : & toutes deux ensemble la targe, la garde & le soustien de nous tous : ils trouuoient aussi fort necessaire le dernier d'iceux articles, suyuant lequel nos freres du Dauphiné se sont resolus de ne iamais plus se defarmer, qu'ils auoyēt arresté de faire aussi le semblable, iusques à ce qu'ils voyent la tyrannie bas & court bridee par nos anciennes loix de la France avec des bons & bien asseurez gages, gardiens de la liberté ciuile des François. Et cependant ils auoyent enuie de dresser & entretenir apres tant de malheurs, qui leur sont auenus par leur sotte credulité, vn estat asseuré, qui approchast tant que faire se pourroit de celui qui estoit iadis en leurs prouinces.

Pour ce faire ils auoyent donné charge à sept des plus aduisez obseruateurs de l'antiquité de recueillir de tous les bons liures qui traitent l'histoire & estat ancien des François & Gaulois, l'ordre, police & forme de gouuernement qui estoit parmi eux, auant que la tyrannie fust en regne : & particulièrement celuy de leur patrie du temps que la religion en fust chassée, pour ramener le tout à leurs principes.

*L'hi.* C'est tresbien fait : pleuſt à Dieu que i'y fusse pour leur en dire ce que i'en ſçay. Le docte Pasquier en son liure des recherches de la France, releuera grandement de peine ces sept deputez. Et le grand Hotoman en sa Francogaule, qu'il a mis de nouveau en lumiere les en iettera hors du tout tant il cotte dextrement les passages qui peuvent seruir en ce fait.

Ce seroit vne belle chose, si l'on pouuoit (en retenant l'ancienne religion) que les Albigeois du temps du comte Raymond : les pources de Lyon, ceux de la vallee de Pragela, ceux de Cabrieres & Merindol ont tenu & que nous tenons auourd'huy plus depurée (Dieu mercy) ramener cest estat present tout confit & rouillé en vices au modèle de ce temps-là. C'est vn auis que tu ſçais bié estre le souuerain remede à vn estat du tout pourry & prest à cheoir comme est celuy de France.

*Le pol.* Cela est certain : & s'appelle radresser, non pas renuerſer l'estat, le ramener à son principe. Et pour certain ces bonnes gens, pour la part qui les touche, sont sur le point d'en venir là.

*L'hi.* O le beau trait que ce seroit! pourueu qu'il fust

fust suyui des autres pays de la France. Ce seroit vne belle pierre philosophale, pour enrichir les pources gens qui sont rongez iusques aux os par les enfans de Catherine. Au moins seroyent-ils deschargez des impôts & tailles nouvelles.

*Le pol.* Tu dis vray. Quant au surplus de la police & l'ordre de Daniel, le Conseil a esté aussi d'aduis de le pratiquer en substance, reténât tousiours toutefois les noms des charges & estats accoustumez en leurs prouinces. Vray est qu'ils cognoissent, qu'il y aura grande difficulté aux Elections premières charges, pource, que le peuple n'est pas accoustumé d'aller, comme l'ancien Romain, querir leur Dictateur, leur maieur ou gouverneur à la charrue apres les bœufs. Et leurs gouverneurs n'ont iamais accoustumé, comme vn Quintius Cincinnatus, de retourner à la charrue apres que la guerre est passée ou que leur charge est expirée.

Ains au contraire vn Caporal veut estre quant & quant sergeant, le Sergeât veut estre enseigne, l'Enseigne Lieutenant, le Lieutenant Capitaine. Et ainsi tousiours en auant sans s'abbaisser ny se desmettre, en danger de monter trop haut.

*L'hi.* Voila qui va mal. Les Romains quoy qu'ils fussent au trement ambitieux & cupides d'honneur & gloire auoient en telle recommandation le bié & honneur de leur Republique, qu'ils quittoyent volontiers du leur pour le salut de leur patrie. En cest endroit principalement ils auoyent cela de bon qu'ils ne refusoient point d'aller cōme personnes priuees en vne armee, à laquelle



l'annee au parauant ils auoyent commandé en chef.

Quintus Fabius ayant esté Cōsul marcha gayement sous son frere Marcus Fabius. Et Manlius Consul en vne armee contre les Thoscans, ne refusa de se trouuer en la bataille commandé de ceux qui luy auoyent obeï. C'estoit vn ordinaire à Rome que celuy ne desdaignoit pas d'accepter la petite charge qui auoit exercé la plus grande.

Et combien que cela ne semblast pas honorable pour le priué, si estoit-il bien fort vtile pour le public: car à la verité dire vne Republique se doit beaucoup plus asseurer & esperer d'auantage és deportemens d'un citoyen qui d'un grand degré descend volontiers au bas ou mediocre, que non pas de celuy qui ne tache qu'à monter & à deuenir grand. A vn tel on ne se peut guere bien raisonnablemēt fier s'on ne l'accompagne tousiours de gens de tel respect, de telle vertu & reputation qui peussent par vn graue & prudent Cōseil & par leur autorité moderer le desir de nouuelleté & de remuement qui se pourroit facilement loger dedans le cœur & cerueau d'un tel homme.

*Le po.* Il est ainsi. Et aussi nos freres esperent que la Noblesse fille naturelle & legitime de la vertu & prudence, qui a sa vraye source de la crainte de Dieu, se lairra tellement conduire au desir qu'elle a de voir le regne de Dieu auancé, & l'Eglise conseruee, qu'elle fera fort aisément tout ce qui pourra appartenir au bien d'un si precieux seruice &

ce & à la liberté de son estat & de sa patrie , preposant tousiours le public à son particulier profit.

Que le peuple aussi respectera de tant les Nobles qui logeront ceste vertu , mere-nourrice de Noblesse, qu'il n'y a rien qu'ils ne facēt pour leur obeir en ce qui sera de leur charge , & pour les honorer en priué autant qu'ils peuuent desirer d'eux. Et qu'au reste tous ces deux Estats se souuiendront avec celuy de la Iustice de ce que Valerius Coruinus qui fut fait Consul dedans Rome le vingtroisieme an de son aage , dit pour lors à ses soldats : que le Consulat estoit le guerdon & le prix de la vertu & non du sang. Et aussi tous ensemble par vne bonne intelligence s'en iront chercher la vertu & la suffisance , là où elle sera logee, sans respect de l'aage ou du sang, pour l'esleuer en tel degré qu'ils cognoistront estre propice pour leur commun bien & salut.

*L'hi.* Si cela est bien pratiqué ce sera vne belle chose. Aussi si cela ne s'y trouue, i'espere bien peu de leur fait.

*Le pol.* Ne doute pas qu'il ne se face , i'en ay bon gage , Dieu mercy , il feroit bon voir que ceux-là qui professent vn Iesus Christ , fissent conte de leur honneur au detrimēt de son Eglise , & à la perte du troupeau : ou que l'ambition malheureuse regnast, où l'esprit de Dieu doit auoir souverain Empire.

*L'hist.* Ia n'aduienne, ce seroit assez pour tout ruiner. Car ceste ambition a tousiours ruiné les Republiques.

*Le pol.* Ne crain pas, tout ira bien, Dieu aidant. Au surplus touchant les autres principaux articles de la police de Daniel, comme i'ay dit, ils sont resolus de les pratiquer en substance, singulierement le 17. où il est parlé d'essire au Maieur general, ou gouuerneur cinq ou six lieutenans, nō pour commander tous à vn coup, ains vn apres la mort ou desmise de l'autre, la mort dis-ie, qui en peut aduenir ordinairement ou extraordinairement par l'aguet ou poison de l'ennemy, pource que ce bon nombre de lieutenāts conseruera le Chef & les membres en plus grande seureté : le Chef, pour autant que l'ennemy dira, pourquoy le ferons-nous tuer ? Il y a des Lieutenans qui feront possible mieux que luy. Les membres, pource que le Chef mourant ils ne seront pourtant desprouueus de chef, comme il nous est aduenu en ce dernier massacre du mois d'Aoust, à nostre tresgrand regret & ruine.

Le Conseil trouua aussi fort bons les 22. 23. & 24. articles de Daniel. Le 22. leur sembla tres-necessaire pour deux raisons : l'vne pour empeschier que aucun des chefs ou quelque autre citoyen, n'attente ny entreprenne rien sur & au preiudice de leur commun estat & liberte ciuile : l'autre, pource que cela aduenāt, ou estant faulsemēt cuidē & creu par le peuple & imposē à quelqu'vn des grands, le peuple aura dequoy s'en resoudre en proposant l'accusation, & poursuyuant l'accusē si besoin est, pour le rendre conuaincu, le faire condamner & punir selon que le merite le requerra.

L'hi,



*L'hi.* Cela va bien. Car autrement il pourroit auenir tout plein d'inconueniens, s'il n'estoit loisible d'accuser les plus grands. Et s'il n'y auoit ordre suffisant estably pour les chastier. Quelqu'un pourroit complotter avec l'ennemy : le peuple iailoux de sa liberté ne pourroit que mal volontiers souffrir ses desportemens, on luy dresseroit des parties. Celuy-là qui se voudroit preualoir de ses amis, on viendroir de là aux factions & partialitez & moyens extraordinaires, qui sont la ruine des estats libres. Ou s'il estoit loisible de calomnier & faire courre de faux bruits par cy par là contre vn chacun: comme il est auenu maintesfois qu'on a mis à sus aux plus gens de bien qu'ils auoyent desrobé le thresor publicque à d'autres, qu'ils pouuoient bien prendre vne telle ville s'ils eussent voulu : & à d'autres qu'ils ont vendu plustost que rendu par force vn tel chasteau, & plusieurs autres telles calomnies.

Si, dis-ie, il estoit impunément permis de calomnier, il n'y auroit homme de bien, qui ne fust desgouté de sa charge, l'ennemy se pourroit preualoir de telles fautes, & en somme tout iroit en confusion. Comme il cuida auenir à Rome, apres que Furius Camillus l'eut deliuré des mains des Francois.

Il sembloit bien que tous les citoyens Romains sans faire tort à leur reputation deuoyent ceder à la vertu de ce grand Camillus, comme de leur liberateur, & à la verité aussi chacun luy deferoit volontiers le premier rang. Le seul Manlius Capitolinus ne pouuoit supporter de le voir en tel-

le reputation & credit, esmeu d'une meschante emulation & ialousie, & d'une bonne opinion de foy mesme: luy semblant bien d'auoir pour le moins merit  en sauuant le Capitole des mains des Fran ois, autant que meritoit Camillus en les dechassant du tout. Cela fut cause que tout outr  d'enuie ne se pouuant contenir pour la gloire & renom de Camillus, il alla sem t parmi le peuple plusieurs faux bruits encontre luy, & contre les Senateurs Romains, pour les mettre en mauuaise opinion enuers le peuple. Entre autres choses il disoit que le thresor qu'on auoit assembl  pour bailler aux Fran ois & racheter le Capitole, auoit est  usurp  par quelques vns des grands: que si on le pouuoit rauoir on le pourroit conuertir au profit publique, soulageant d'autant le peuple des tributs ordinaires, ou en acquittant quelque autre debte. Ces faux bruits, ceste calomnie sembla de telle importance & de si dangereuse consequence au Senat, qui voyoit desia comme le peuple commen oit   tumultuer, qu'il fut contraint, pour remedier   la desunion & desordre qui s'en pouuoit ensuyure, de recourir au moyen extraordinaire, qui estoit accoustum  parmi eux  s extremes dangers, s auoir de creer vn Dictateur dedans Rome p ur cognoistre de ce fait.

Le Dictateur cre , il fait appeller Manlius deuant luy, & estant le Dictateur conduit au milieu des Senateurs, & Manlius au milieu du peuple en vne place publique. L  Manlius fut interrog  de ce qu'il s auoit du thresor publique, & luy fut c mand  de dire entre mains de qui il le cuidoit estre,

estre, que les Senateurs auoyent aussi bonne enuie de le sçauoir comme le peuple. Mais pour ce que Manlius n'en respondoit point pertinemmēt, ains en tergiuersant disoit qu'il n'estoit ia besoin de leur dire ce qu'eux mesmes scauoyent trop mieux, il fut mis en prison par l'autorité du Dictateur, qui de calomniateur fit deuenir par ce moyen Manlius accusateur. Et estant par apres sa fausseté & enuie cognue fut chastié, comme il le meritoit.

Par là & par autres exemples auenus en beaucoup de Republiques mal ordonnees l'on peut voir aisément, combien de maux peuuent auenir en vn estat grand ou petit au detriment de la liberté ciuile: si cest ordre & liberté de pouuoir accuser quiconque soit d'entre les grās, n'y est estably. Nostre France depuis que l'ordre des trois estats a esté supprimé, que les offices de Iudicature, de Conseillers & Presidens, & pour le dire en vn mot, depuis que la police & la iustice a esté estouffee & corrompue, vendue en gros & en menu en a produit d'exemples lamentables.

Il ne faut que se remettre en memoire les calamitez auenues pour le massacre fait à Vassy par le duc de Guyse: & celles qui ont ensuyui la coniuration du Triumvirat, contre lequel nul n'osoit mot sonner, quoy que l'on sceust ses entreprises.

Ausquelles on n'osa s'opposer qu'avec vne biē forte armee, laquelle suyui de plusieurs guerres ciuiles a fait tomber la pource France de la sieure en vn chaut mal, comme l'on dit.



*Le pol.* Cela n'est que trop veritable : Or ces raisons & exéples avec quelques autres semblables, qui furent amenez, ont esté cause que nos freres de Nismes se sont resolus, comme ie t'ay dit, d'establir cest ordre parmi eux. Sçachans l'auantage qui leur en peut reuenir, & le bien que la creation des Tribuns du peuple (qui estoient les gardiens de la liberté ciuile & qui pouuoient à vn besoin former les procès aux plus grands) a apporté à l'anciéne Rome du temps d'un Martius Coriolanus & autres semblables esprits qui estoient retenus en crainte par l'autorité d'un tel magistrat.

Quant au 23. article, ce qui le leur a fait approuuer a esté la souuenâce qu'ils ont des desbauches & licence à mal faire que la pratique contraire a causé par cy deuant en leurs armées, & en leurs villes & retraites. Si d'auenture il aduenoit qu'un gentilhomme, un capitaine ou soldat qui eust fait quelque force, larcin, meurtre, ou autre telle villaquerie fust condamné à mourir, à estre harquebousé, ou à passer par les piques. Si cestuy-là mesmes auoit fait quelque bon seruice auparauant, il n'y auoit pas faute de quelques fauoris des grâs qui venoyét soudain aux requestes interceder enuers le chef pour la vie du cōdamné, qu'ils disoiét estre bon soldat, ou quelque braue gentilhomme, qu'il estoit bien à cheual, qu'il tiroit bien l'arquebousade, que c'estoit grand dommage de le faire mourir, & autres semblables remonstrances, voire bien souuent remonstrances de ce qu'il n'auoit iamais fait, par cest artifice ils importunoyent tellement le chef qu'ils se faisoient donner le criminel

nel, & faisoient aller en fumee tout iugement & condemnation. Dont il aduenoit que le condamné au lieu de s'amender alloit multipliant ses fautes, cuidant que tout luy fust permis sous couleur qu'on le pensoit estre braue, gaillard & bien adroit soldat.

*L'hi.* Cela est bien fort dangereux : il n'y a celuy qui ne condamne le fait des Romains en semblable cas, quand pour les merites d'Horace, qui par sa vaillance auoit vaincu les Curiaces, & rendu par ce moyen là Rome maistresse des Albains, ils luy remirent la fratricide qu'il auoit commis enuers sa sœur, laquelle il meurtrit au retour de sa victoire, pour le regret qu'elle portoit d'y auoir perdu son mary. Au lieu qu'Horace deuoit estre chastié par supplice de mort, comme il le meritoit tresbien.

Il vaut beaucoup mieux pratiquer ce que les Romains plus auisez firent par apres enuers leurs citoyens & soldats en remunerant les bienfaits & bons seruices de quelque honneste petit guerdon selon la portee de la republique & dispensation du temps : & en chastiant rudement les vices & les laschetes, cōme ils firent enuers Manlius Capitolinus. Auquel pour auoir sauué le Capitole, comme ie te disois n'agueres, ils donnerent vne petite mesure de farine (present assez conuenable pour ce temps-là) en recognoissance de sa vertu, & ne laisserent pas pourtant de le condamner & ietter apres du haut en bas du mesme Capitole qu'il auoit peu deuant gardé, à cause de la seditiō qu'il auoit cuidé faire naistre dedans Rome par

son enuie & meschante nature.

*Le pol* Il vâut beaucoup mieux, vrayement aussi nos gëns en sont bien là logez.

Quant aux 22. & 24. articles, nos freres cognoissans de quelle importance ils sont, n'ont garde de faillir à les obseruer, ains en sont da tout resolus. Ils scauent qu'aux guerres passees ceux des ennemis auxquels ils donnoient la vie, ceux qu'ils prenoient à mercy les laissant aller bagues sauues, comme il est aduenu souuent, le lendemain ou l'autre apres, au lieu de leur sçauoir bon gré de la vie qu'on leur laissoit: venoyent pour rauir la leur se monstrans plus cruels & rudes qu'ils n'auoyent esté parauant. Ainsi donc que les brigands s'asseurent de n'en auoir pas bon marché, si Dieu les baille entre les mains de quelcun de nos gallans hommes, ils sont resolus, ne te chaille.

*L'ib.* Voire mais. Les ennemis en pourront faire autant aux nostres.

*Le pol.* Tu dis vray s'ils leur tombent entre les mains. Mais aussi que penserois-tu, que tost ou tard ils veulent faire si nous leur venons entre les mains, quoy qu'ils nous promissent la vie, si ce n'est de tuer, empoisonner, faire mourir ou nous forcer, que ie repute beaucoup pire?

Or ceste resolution de nos freres de ne prendre à mercy aucun des ennemis seditieux & armez fera trembler nos ennemis, qui nous assaillent & offensent cõtre leur conscience & contre tout droit d'humanité pour complaire au desir du tyran, fera di-ie reboucher leur fer à la premiere goutte de sang qu'ils sentiront couler de leurs corps eux  
qui



qui combattent de gayeté ou plustost de malice de cœur sans y estre contrainsts, & fera qu'à la fin persõne ne voudra venir à la guerre, ou porter les armes contre nous quelque commandement que le tyran leur en face, nous voyans ainsi relolus. Desia y en a-il beaucoup qui se tiennent bien loin des coups & tirent leur espingle arriere, aimans mieux estre reputez couards & recreus, que fols & meschans tout ensemble, en se faisans battre à credit. Sur quoy i e te veux dire vn trait, qui passe encores bien plus outre, du ieune Candole, que tu cognoissois beau-frere de ceux de Montmorency. Estant en l'armee que le mareschal Danuille auoit assemblé deuant Sommieres que les nostres tenoyent, & qu'ils ont rendu à la fin, sous honneste composition, que Danuille a gardee aux nostres, dont le tyran ne luy scait point de gré. Estant di-ie là au camp ce ieune seigneur de Candole, & voyant tant de seigneurs, capitaines, gentilshommes & soldats que les nostres faisoient mourir en se deffendant vaillamment, il a dit & beaucoup de fois à son beau-frere Danuille en iurant & blasphemant : hé que nous sommes fols mon frere de nous faire ainsi blesser, battre, meurtrir & tuer à l'appetit de ces meschans (parlant du tyran, de sa mere, de ses freres & conseillers) qui nous ont meurtri nos parens, nos amis & nos alliez ! Et qui nous payeront aussi quelque iour en mesme monnoye.

*L'hi.* Ce trait vaut bien qu'on s'en souuiene: Candole auoit bon iugement. Mais qu'est-il deuenu le pource homme?

*Le pol.* Il est mort en ce siege là, & avec luy durât le siege plus de cinq ou six mille personnes des ennemis y ont esté tuez: ie te conteroye bien tout au long le commencement, le milieu & la fin de ce siege: mais ie serois trop prolix, i'interromprois mon propos: & aussi tu le pourras voir tout à loisir avec le discours du siege de la Rochelle & de Sancerre: tout cela est imprimé, & ie le porte avec moy, ie te le monstreyeray demain si tu as loisir de le voir.

*L'hist.* Je t'en prie beau Sire: mais retourne sur ton discours.

*Le pol.* Comme ie te disois ceste derniere resolution des nostres de pratiquer toute extremite de rigueur contre nos ennemis, avec ce qu'on les a desia bien frottez Dieu mercy par tout où ils sont venus, refrénera vn peu leur rage, & refroidira leur cholere. D'autre part elle enflambrera le cœur des nostres, qui combattans pour la necessité & deffense d'une bonne cause sembleront des demi Césars estans resolu de bien obeir à leurs chefs, de porter patiemment les travaux de la guerre, & de vaincre ou de mourir, si l'on vient aux mains, & au combat, plustost que de iamais se rendre.

*L'hist.* Il n'y a rien qui face mieux vaincre, qu'une sainte obstination en vn combat ou en bataille, supposé que tout soit rengé, & que le fondement soit bon: il me semble que dix des nostres en deuoyent combattre cinq cens de tels volleurs, de tels brigands, comme sont tous ces satellites.

*Le pol.* Cela est sans doute: aussi pour dire la verité ils les ont tres-bien estrillez. Or quant au

article de Daniel touchant la douceur, de laquelle il veut, qu'on vse enuers les Catholiques paisibles: Cela est bien tout arresté qu'il ne leur sera fait aucun outrage ne force en leur conscience, honneur, vie & biens: ains seront conseruez en paix & amitié comme bons compatriotes & freres bien aimez.

Sçachans bien le regret que portent telles gens des extorsions & cruautéz, dont on vse en nostre endroit, & l'enuie qu'ils ont de voir la tyrannie bas, & les anciés ordres de la France remis au dessus. A cause de quoy tant s'en faut qu'on les vueille surcharger, qu'au contraire on les espargnera, autant qu'il sera possible aux contributions qu'on sera contraint de faire pour nostre conseruation, chargeans plustost les nostres que ceux-là.

Quant aux Euesques, prestres, moynes, & autres gens de l'Eglise papale, qui ne porteront point les armes & qui seront contens de viure parmi nous sans rien attenter, & sans esmouuoir ou seduire le peuple qu'ils auoyent deceu, ie sçay aussi qu'on leur donnera moyen de viure honnestement, & le mieux qu'il sera possible. Le surplus de leur reuenu sera pour descharger le peuple.

*L'hi.* Ce sera vn ordre parfait, s'ils pratiquent tous ces articles.

*Le pol.* Ne doute pas qu'ils ne le fassent, si Dieu leur preste sa faueur. Mais pour te dire le surplus que i'ay appris en mon voyage: apres la resolution prise en ce Conseil, sur beaucoup d'autres choses necessaires pendant que i'estois de seiour à Nismes, mal disposé à voyager, nous receuons



tous les iours lettres de ce qui se passoit dedans & dehors la Rochelle, nous entendîmes que apres que la Rochelle fut de toutes parts assiégée par les Iannissaires du tyran, ses deux freres y arriuerent le 15. de Feurier 1573. menans le roy de Nauarre, le prince de Condé, & le ieune comte de la Rochefoucaut, comme en triomphe deuant eux, avec bon nombre de Seigneurs Catholiques, de courtizans, d'Atheïstes, d'Epicuriens, de blasphemateurs, de Sodomites, & d'autres tels officiers, que le tyran auoit chassé d'aupres de luy & de sa cour, non qu'il fust marri de voir tels galans pres de sa personne: ce sont ses mignons fauoris, ce sont ses appuis & soustien & les delices de sa Mere: ains tout despité, tout enragé, blasphemât tousiours de cholere, de ce qu'un chacun n'alloit pas, comme il demandoit, en l'armée.

Depuis l'arriuee du duc d'Aniou, les Rochellois furent assiégés de plus pres, battus de beaucoup plus de pieces d'artillerie & en plus d'endroits furent minez, escallez, assaillis & trauaillez en toutes sortes dont l'ennemy se pouuoit auiser. Eux de leur part faisoient le plus souuent sorties braues & gaillardes, assaillans courageusement les ennemis iusques dans leurs tranches & les estrillans tellement le dos, sous le ventre & par tout, que plusieurs de nos ennemis contraints d'abandonner la vie, quittoient les charges les plus belles à leurs compagnons fuyans, qui bien souuent ne gardoyent guere ce qu'on leur auoit delassé, estans les plus marries du monde de ce que nos bons Rochellois les visitoyent par trop souuent:

uent: & de ce qu'ils les repouffoyēt trop rudement de leurs murailles, ſouſtenās mieux qu'ils ne vouloyent & plus longuement leurs aſſaſts. Nous ſceufmes que le ſeigneur de la Noue qui par grād merueille & admirable prouidēce de Dieu auoit eſchappé les filets des traiftres, ſe trouuant lors du maſſacre de Paris dans Mons en Haynaut qu'il auoit aidé à ſurprendre par commandement du tyran, duquel ils attendoyēt ſecours ſuyuāt ſa promeſſe donnée: nous ſceufmes, di-ie, qu'il eſtoit reuenu en France & à la cour, apres la reddition de Mons, ſous l'aſſurance du duc de Longueville & le ſauſconduit du tyran: nous ſceufmes qu'il eſtoit entré dès le commencement des approches dans la Rochelle accompagné de l'abbé de Gadaigne avec charge expreſſe, que le tyran luy auoit donné de diuertir ſ'il eſtoit poſſible les Rochellois de leur conſtance & opiniaſtreté, qu'ils appellent de ſe deffendre, & de leur promettre bon traitement, ſ'ils ſe vouloyent laiſſer tuer avec liberté de conſcience. A ceſte nouuelle pluſieurs d'entre nous furent extremement marris de ce que ce gentilhomme auoit accepté telle commiſſion. Les autres eſtoient faſchez ſimplement, de ce que au ſortir de Mōs il n'eſtoit allé en Angleterre, en Allemagne ou en Suiſſe, pour ſeruir à ce qu'il euſt peu pluſtoſt que reuenir en Frāce. D'autres excuſoyēt ſon retour, à l'occaſiō de ſes enfans qu'ō luy detenoit deſſous garde, qu'il deuoit taſcher de les rauoir: & qu'il n'auoit de moins peu faire que d'accepter contre ſon gré vne charge tant deſhoneſte: quelques autres eſtoient bien aiſes, qu'ō luy euſt donné telle commiſſion.

Croyant bien que cest homme là ne pourroit que beaucoup seruir pour faire sagement resoudre du chemin le plus expedient, les citoyens de la Rochelle. En somme les vns en parloyent d'une sorte, les autres d'une autre. Quant à moy en telle diuision & partialité d'opinions, ayant sceu que le seigneur de la Noue, pour tout cela ne s'estoit point souillé en Idolatrie, recueillant de là vn tesmoignage de sa bonne conscience, ie suspendi, comme ietiens encores suspendu, mon iugement de son affaire: ne voulant rien temerairement prononcer d'un gentilhomme si bien qualifié que cestuy-là, que i'ay aimé & honoré, comme ie desire de faire tout le reste de ma vie. Tant y a que nous sceusmes, comme iet'ay dit, son arriuee dans la Rochelle, ce qu'il proposa aux Rochellois, le peu qu'il y exploita pour le tyran, comme il s'en retourna à bast vuide à la cour.

Nous sceusmes qu'il fut enuoyé pour la seconde fois avec le mesme Abbé & vne charge vn peu plus ample à la Rochelle: & qu'à ceste seconde fois y estant rentré, n'ayant rien peu negotier de sa charge au plaisir du tyrā il estoit demouré pour gage dans la Rochelle, ayant renuoyé son Abbé pour annoncet les nouuelles à son maistre de la grande obstination des bons Rochellois.

Or si l'arrest & seiour que le seigneur de la Noue fit dans la Rochelle seruit ou non aux bonnes gens, ie ne t'en puis dire autre chose pour n'y auoir point esté durant ce temps-là. Tant y a que i'ay depuis ouy dire aux Rochellois mesmes, & au seigneur de l'Anguillier, qui estoit de sa tenue: que



que les Rochellois apres Dieu doyuent au seigneur de la Noue, tout ce qu'ils ont du premier cœur & de l'asseurance qu'ils eurent sur ces premiers commencemens, qu'il leur mit le cœur au vêtre, qu'il les ordonna mieux qu'on ne sçauroit dire, qu'il les aguerrit leur faisant faire plusieurs bonnes & belles forties avec leur auantage qui leur seruoit de bonne curee, luy estant tousiours le premier à la meslee, & le dernier à la retraite.

Au surplus pource que le siege continuoit longuement deuant la Rochelle, que les bleds & poudres approchoyent de leur periode, & l'esperance d'estre auituaillez alloit tousiours amoindrisant. Les Rochellois ayans pour leur conseruation fait tenter toutes sortes d'honneſtes ſecours & remedes, furent contraints à la fin de regarder comme de nouueau à leurs titres & liberté, pour ſçauoir au vray quelle estoit l'obligation que pretendoit la maison de Valois sur eux, s'elle s'estendoit iusques là de leur pouuoir rauir leurs vies, leurs biens, leurs honneurs & celuy de leurs femmes, & leurs familles : & iusques à les faire perdre & damner avec tous les diables pour faire seruiſſe aux Valois, comme ils demandoient en substance. Surquoy ayans trouué par eſcrit en bonnes & anciennes pancartes, que l'obligation estoit fort petite & bien aisee, sous des conditions toutesfois qu'on leur auoit ſouuent rompu, eux ayans tousiours de leur part plus ſatisfait, qu'à leur deuoir. Et lors que c'estoit à tout rompre: apres auoir fait clerement voir leurs droits au Conseil, qui pour ce fut aſſemblé d'entre eux & qu'ils eu-

rét à vne autre fois recueilly l'auis sur ce poit trouuant le seigneur de la Noue differét bien fort d'opinion d'avec leur auis tout courant, pour des raisons qu'il alleguoit, dont le peuple ne se pouuoit satisfaire : ils commencerent dès l'heure à mal estimer & parler de cest homme tant renommé, iusques là qu'il fut contraint, craignant que mal ne luy auint sauter, comme on dit, del poile & se ietter dedans les braises, accompagné de Champigny, & de quelques autres amis, avec lesquels il s'alla rendre, ainsi que nous fusmes auertis le mercredi onziesme iour de Mars en l'armée du duc d'Aniou: duquel selon l'apparence il fut recueilly volontiers & assésuré de sa personne. Il ne fut pas si tost en l'armée de l'ennemy, que les soldats par dessus les rempars luy reprocherent qu'il auoit delaissé Syon, pour aller en Egypte: mais i'en espere prou de bien.

Durant le siege, à ce qu'on nous rapporta, nos freres de la Rochelle ont souuent parlementé avec le duc d'Aniou touchant quelques moyens de paix, de laquelle l'ennemy oyoit fort volôtiers parler se voyant frustré de l'esperance de pouuoir forcer la Rochelle, pource qu'il auoit perdu vn bien fort grand nombre de sa noblesse, & tresgrād nombre de Capitaines & soldats, & que les suruiuans auoyent le cœur failly, quoy que les Suisses en nombre de 6. mil fussent arriuez à leur secours.

En fin le duc d'Aniou ayant receu certaines nouuelles qu'il estoit esleu roy de Poloigne, par les menees de Monluc Euesque de Valence & de ses autres agents. Election autant à l'auantage & sou-

soulagement de l'Eglise Françoisse qu'à la ruine & subuersion de la liberté des Polonois, si Dieu n'a bié grand pitié d'eux: ayant, dis-ie, receu ces nouvelles, son ambition luy commandant de se haster à porter la couronné: il ouyt lors plus volontiers parler de paix qu'au parauant. Et ayant fait sortir les deputez de la Rochelle pour parlementer, Il receut, lors de leurs mains le 25. de Iuin leurs articles & leurs demandes qu'il enuoya incontinent par deuers Charles le tyran.

Tost apres l'armee de l'ennemy, qui ne cherchoit que le repos toute harassée d'auoir esté si souuēt battue & moquée, commença à se desbander çà & là. Et aussi les nostres à auoir de relasche plus qu'ils n'eussent osé penser.

Je ne te dis pas le nombre de ceux qui ont esté tuez du costé de l'ennemy: il passe plus de huit mille. Je ne te nōme pas aussi les principaux d'entre eux qui y ont esté tuez ou blesez, pource que le discours qui é est imprimé en nōme la plus part.

Seulemēt ie te diray en passant, qu'un seul boulevard appellé del'Euangile, contre lequel l'ennemy s'heurta le cuydant emporter de volée, à fait perdre à vne infinité des ennemis leur meschante paillarde vie sans qu'ils ayent rien exploité. C'est de là d'où fut tiré vn coup de coulaurine qui tua le duc d'Aumale derriere vn gabion. c'est de là où l'espee vierge du Perō se retirant des trêchees le iour qu'ō batit ce boulevard de 40 canons fut blessé au dos qu'il luy auoit tourné: c'est ce boulevard que les Princes accompagnez de la Noblesse allerent assaillir le septieme d'Aoust où



le Gonzague duc de Neuers, le Marquis du Maine, Clermont, le Gas, & vn grand nombre d'autres assaillans furent blessez & plus de trois cens tuez. C'est ce boulevard que l'ennemy fit sapper & miner, duquel vn grand quartier se renuersa par deuers les Rochellois qui rendit l'endroit plus fort que deuant: les autres quartiers de pierre, les pieces de bois & ruine de la terre, renuerserent tous dans les trenchées de l'ennemy, chose qui fit perdre la vie à plus de deux cēs d'entr'eux, chose qui estoit fort horrible de voir emporter en l'air les bras, iābes, & autres membres de Messieurs nos ennemis, & d'en voir tirer vn grand nōbre deffous les ruines de la mine. C'est ce boulevard duquel (estant batu de nouveau & estant de nouveau miné & assailli en grande diligence par les Capitaines & soldats de l'ennemy, ainsi qu'ils estoient presques au dessus) ils furent repoussez par trois fois & contraints par les nostres de se retirer à leur courte honte, & grāde perte de nos ennemis. C'est aussi ce boulevard sur lequel quelques troupes des ennemis estans montees, & ayāt trouué vn Corps de garde des nostres endormy, le tuerent & mirent en pieces, l'onzieme du mois de May. Ce nōobstant ce boulevard est tousiours demouré aux nostres.

Tout cecy que ie te viens de dire, tu le verras au discours mesmes que nos ennemis en ont fait.

*L'hi.* C'est vn boulevard remarquable, & croy moy, ce n'est sans emphase & sans vn mystere caché que ce nom-là de l'Euāgile luy a ainsi esté imposé. A y regarder de bien pres il produit mes-

mes effets que l'Euangile assailly a accoustumé de produire. Il a repoussé les efforts de l'ennemy , & renforcé ceux qui le deffendoyent , pendant qu'ils ont esté au guet & sur leurs gardes. Mais quand ils se sont endormis leur a laissé couper la gorge : & en fin il est demouré entre les mains des gens de bien sans leur pouuoir estre arraché. Le Seigneur a fait tout cecy se monstrant grand & admirable en la conseruation des siens.

*Le pol.* Cela est sans doute : or escoute , afin que i'acheue de te dire , ce qui s'est passé durant ce siege de la Rochelle. Apres que les deputez de l'ennemy & les nostres eurent parlementé des moyens de paix , voyant que nos freres de la Rochelle demandoient par leurs articles plusieurs choses concernant toute l'Eglise Françoise, & ne vouloyent entendre à aucun accord , quoy qu'ils fussent merueilleusement pressés, affligés & harassés, sans que de mesme le reste de nos freres receust vn bon soulagement en ses oppresses , remonstrans qu'il n'estoit pas honneste qu'vn de leurs membres souffrist peine ou plaisir : sans faire part & du mal & du bien aux autres membres de leur corps. Voyant, dis-je, qu'ils insistoient à cela, l'ennemy leur accorda qu'ils peussent librement communiquer avec ceux de Montauban , & ceux de Montauban avec eux pour le benefice de paix.

Et de fait ceux de Montauban vindrent , comme ie t'ay voulu dire , durant le siege à la Rochelle avec memoires de nos autres freres , sous sauconduit de l'ennemy : & messerent leurs demandes & celles qu'ils estimerent estre bon de faire,

pour le reste du corps de l'Eglise Françoisse avec celles de la Rochelle. Lesquelles, comme ie t'ay dit, furent enuoyees au tyran sur la fin du mois de Iuin dernier passé. Le tyran & tout son Conseil esté comme fondeurs de cloches, quand la fonte n'a pas bien pris, ne sçachâs plus de quel bois faire fleches, n'ayant ny gens, ny argent, ny viures pour pouuoir plus long temps camper: & ne pouuant à force ouuerte emporter ceux de la Rochelle, se contentant d'y auoir receu & d'auoir fait receuoir de mesmes à son frere le duc d'Anjou vn escorne & perte la plus grande, que iamais tyrans receurent en ce monde: & ne voulant pas que les ambassadeurs de Pologne, qui venoyêt saluer leur beau roy le trouuassent embesoigné en vn si cruel ouurage & en affaire si honteux: le tyran (dis-ie) fut contraint recourir au dernier remede, duquel il a tousiours vsé pour nous ruiner & piper. Il fit sur nos demandes & articles vn edict au mois de Iuliet, par lequel, apres auoir déclaré dés l'entree que son intention a tousiours esté de regir & gouuerner son royaume plustost par douceur & voye amiable que par force, il accorde à ceux de la Rochelle, gentils-hommes, & autres retirez en icelle les points & articles qui y sont specifiez, tant pour eux que pour les habitans des villes de Montauban & Nismes, gentilshommes & autres retirez en icelles & aucuns autres ses suiets pour lesquels ils ont supplié. Premièrement que la memoire de toutes choses passees depuis le 24 d'Aoust dernier passé à l'occasion des troubles & emotions auenues en la France demourera esteincte & assopie comme de chose  
se



se non auenue, deffendant à tous ses suiets de quelque qualité qu'ils soyent qu'ils n'ayent à en parler ny en renouueller la memoire.

*L'hyst.* Mon Dieu le vilain edict: ie te prie ne m'ē recite pas d'auantage: est-il possible qu'il y ait tant d'impudence en tout le reste des meschans qu'ē ce perfide tyran? qui apres auoir tout rauagé & ensanglâté toute la Frâce aux quatre coins & au milieu, veut faire à croire maintenant, qu'il a eu tousiours intention de conduire le tout doucement & par la voye amiable? Ha malheureux! Et est-il possible encores qu'il ose maintenant deffendre de iamais ne parler de si horribles cruantez? ou pense-il par son edict pouuoir effacer la memoire de ses trahisons comme de chose nō auenue? que n'entrepréd il quand & quand de deffendre sur grosses peines au sang innocent respandu de ne demander point vengeance deuant le tribunal de Dieu? ha schelme! Et les pierres n'en parleront elles pas, quand les hommes seroyēt si lasches que de t'obeir en cela? O le grand coup que ce tyran a fait pour nous en cest endroit, c'est vn bel article de paix. C'est autant comme s'il disoit: il est vray poures bestes que le 24. d'Aoust, & depuis en çà i'ay tué & fait tuer, & massacrer traistreusement, sans difference d'age de sexe ny de qualité tous ceux que i'ay peu d'être vous? Et ne tient pas à moy, que ie ne face mourir tout ce qui est demouré de reste. Car telle est mon intentiō: mais ie veux & entens qu'on croye qu'il en va bien tout autrement, & qu'il n'en est rien auenu, quoy que le ciel & la terre le sçache: ha beste furieuse & enragée si iamais il en fut au monde!

Si espere-ie qu'il t'auindra quelque iour pour beaucoup qu'il tarde à tout le moins ce qui auint à Tryfus ce tyran insigne, mais sans comparaison meilleur que tu ne fus iour de ta vie. Ce vilain ayant deffendu par son edict à ses suiets de ne parler point l'un à l'autre ny en public ny en priué, (craignant qu'entre eux ils n'auisassent de se remettre en liberté) ses pources suiets furent contraints pour exprimer leurs conceptions les vns aux autres d'vser de gestes, de contenance & signes des yeux, de la teste & des mains tels qu'ils pouuoient pour s'expliquer. Mais ces façons & moyens de se faire entendre, leurs estans aussi deffendus : vn pource bon homme outré du creuecoeur & desplaisir qu'il sentoit d'un ioug si pesant, s'en alla au milieu de la place, commença à se plaindre en foy mesme, à lamenter, à gemir & à plourer, tellement qu'il attira vne grande multitude de ses concitoyens à larmoyer avecques luy pour leur dure & miserable condition. Cela estant entendu du tyran, ne pouuant souffrir seulement qu'on se plaignist de ses cruautéz, s'en vint droit à la place, où ceste pource multitude desarmée & plourante estoit assemblee : pour leur empescher encores celle naturelle faculté de gemir & larmoyer. Mais Dieu voulut que le peuple ne se pouuant plus contenir, s'estant rué dessus les gardes & satellites du tyran, leur arracha des poings les armes & mit le tyran infame en mille pieces & lopins.

*Le pol.* Voila bonnes gens, compagnon, ie croy bien qu'apres ce beau trait Tryfus le tyran n'eust osé les empescher ny leur deffendre de se plaindre

plaindre & lamenter.

Mais reuenant à parler du nostre : Par cest edict mesmes il ordonne qu'il ne sera loisible ne permis à ses procureurs generaux , ny autres personnes publiques ou priuees en quelque temps, ny pour quelque occasion que ce soit faire mention , proces ou poursuite des choses auenues depuis le mois d'Aoust en ça en aucune cour ou iurisdiction.

*L'hist.* Cecy est encores pire que les mots precedents n'estoyent. Car en deffendant à ses procureurs generaux de n'en faire aucune poursuite : c'est tout autant que s'il disoit : la coniuration que ie mis à sus à l'Amiral & aux autres Huguenots pour auoir quelque couleur en mes cruautez , quoy quelle soit faussement excogitee par moy & mes speciaux Conseillers , & qu'elle n'ait apparence quelconque de verité ny mesme aucune verisimilitude , est toutefois tellement vraye , que ie veux qu'on le pense ainsi. Et partât mes procureurs vous en pourroyent vn iour tirer en cause deuant mes parlemens & autres iuges & officiers. Mais ie ne veux pas qu'ils le fassent , pourueu que vous aussi ne vous plaigniez nullement de ce qui vous a esté fait ny en faciez aucune poursuite en aucune cour ou iurisdiction. Le tyran sera tousiours en liberte de nous en ietter le chat aux iambes quand il voudra & quand il nous tiendra en puissance. Mais quant à nous il ne veut pas que durant sa meschante vie , ny apres sa vilaine mort , si Dieu nous en donne quelqu'autre qui nous vueille faire raison , que nous en facions la poursuite deuant la iuris-



diction des hommes, ny deuã celle de Dieu. Il faut bien dire que ce tyran a excédé du tout les bornes de toute impieté & iniustice. Pour l'honneur de Dieu, fay moy ce plaisir que nous ne parlions plus des edits de ce bourreau, de ce sauuage: si non que de bon heur il s'auisast d'en faire vn qui commandast de l'estrangler avec la truye & les cochõs, tous ses supposts & conseillers. En ce cas ie serois d'auis qu'on vlast vers eux de douceur, ne permettant pas qu'ils tombassent en la misere de Neron, qui ne trouua lors qu'il se vit reduit en extreme destresse, vn seul ami ny ennemy, qui luy voulust faire ce plaisir de le despecher & tuer. Ie serois, dis-ie, bien d'auis qu'on ne les fit gueres languir, de peur qu'ils ne se retractassent, quand ils verroyent l'enfer ouuert & tout prest à les receuoir.

*Lepol.* Ie serois bien de mesme auis. Et croy qu'aussi si tous les bons Catholiques en desireroient tout autant pour se voir par là despestrez du ioug de ce mange-suiet. Mais cependant tu me semble trop difficile à ne vouloir point que ie parle de cest edict tant signalé: ie dis signalé notamment, causant la paix ou le relasche que nos freres en ont senti lors: alors que pas vn de nous ne s'y osoit ny s'y pouuoit attendre: tu es bien vn merueilleux homme à ne considerer pas cela.

*L'hist.* Ie le considere bien, & ren graces à Dieu de bõ cœur pour la deliurâce miraculeuse des pources assiegez. Mais ie suis tant saoul d'auoir parler de ces edits, i'en ay les oreilles tant battues, qu'aussi tost que i'en entends vn mot, peu s'ẽ faut que ie ne rède ma gorge, & sur tout s'il y a quelque chose bonne  
pour

pour nous en son edict, & qu'il l'appelle irreuocable. Car en ce cas tousiours il nous faut croire qu'il en fera comme de cestuy-là de l'an 1570 au mois d'Aoust, qui n'a serui à autre chose qu'à nous attraper & nous perdre, quelque irreuocable qu'il fut. Et se faut tousiours souuenir de ce dōt on auertit le deffunct Amiral. Que le tyran ne permettra iamais que ses suiets, qui se feront vne fois eleuez en armes pour quelque occasion iuste ou iniuste que ce soit, iouyssent de la faueur & benefice des loix: A plus forte raison me dois-ie fascher de ce vilain edict dès son entree si effronté & inique.

*Le po.* Toutefois si en diray-ie encores deux ou trois traits sous ton congé.

*L'hist.* Tu le peux faire: mais ie m'asseure que s'il falloit esplucher le sens caché & les mysteres contenus dedans les articles de tels edits irreuocables, que ce ne seroit iamais fait. Et l'heure me semble fort tarde, il est temps de penser ailleurs.

*Le pol.* J'auray fait en deux mots. C'est qu'il ordonne que la Rochelle, Nismes, & Montauban, & les gentilshōmes & autres qui iusqu'à lors se sont cōseruez en la Religion pourront iouyr de l'exercice d'icelle. Et ceux qui pour crainte de mort ou autre infirmité ont esté contrains de faire promesses & obligatiōs, & bailler cautiōs pour chāger de religiō sont deliurez de telles promesses & cautions.

*L'hi.* Les premiers, quoy qu'il leur promette n'aurōt pas seulement la vie, s'ils s'arrestent à cest edict. Les derniers cōfessans leurs fautes sont absous du souuerain roy de telles promesses. Mais il vaut mieux mourir vne autre fois que d'en plus faire.

*L. pol.* Au reste la Rochelle, Nismes & Montauban iouiront, ce dit cest edict, de leurs priuileges anciens, & modernes droits de iurisdiction & autres esquels ils seront maintenus & conseruez sans auoir aucune garnison, en baillant durant deux ans quatre des principaux bourgeois de chacune desdictes villes, qui seront choisis par le tyran entre ceux qu'ils nommeront, & changez de trois en trois mois pour demonstration & seureté de leur obeissance.

*L'hist.* Ce terme de deux ans m'est fort suspect, quand ie me souuiens des deux ans de l'autre edict irreuocable. Et ces bourgeois qu'on baillera ne seront pas à leur retour si assurez qu'au parauant. Et assure toy qu'il n'a voulu qu'on fist ce changement de trois en trois mois, que pour auoir meilleur moyen de corrompre tant plus de gens: afin de surprendre ces villes. Au demeurant iet'accorde qu'elles iouyront de leurs priuileges, si elles pratiquent les articles de Daniel, la resolution de ceux du Dauphiné, & celle que tu m'as dicté de nos freres de Nismes, autrement ie n'y voy point d'ordre, quelque edict que le tyran face.

*Lepol.* Aussi ne s'y fient-ils pas, & sçauent fort bien dès ceste heure à quoy ils se doyuent tenir. Mais tant y a que la Rochelle en sent quelque soulagement, non par la vertu del'edict, ains par la vertu de la force, ou plustost par grace de Dieu, qui a fait retirer l'armee & le camp de nos ennemis.

Quant à ceux de Montauban & Nismes & toutes les Eglises de la Guienne, Languedoc, Viua-  
rez,



rez, Gettoudam, Serreschauffee de Thoulouze, Auvergne, Rouergue, haute & basse Marche, Quercy, Perigort, Limosin, Agenois, Armagnac, Comminges, Conserans, Bigorre, Albret, Foix, Lauragais, Albigeois, pays Castrez, de Villelaugues, Mirepoix, Carcassez, & autres pays & prouinces adiacentes, esquelles par grace de Dieu y a grande quantité d'Eglises, pas vne d'elles n'a fait conte, ny n'a daigné s'amuser aux paroles de cest Edict, n'aussi pareillement nos freres que ie t'ay dit du Dauphiné.

*L'hist.* O qu'ils sont sages ! pourueu qu'ils sçachent se tenir tousiours sur leurs gardes, & ne plus s'attendre au Tyran. C'est le seul moyen pour r'auoir leurs libertez & priuileges, & pour garder avec leurs vies, leurs biens, cheuances, & honneurs, que personne ne leur rauisse la liberté de leur conscience, & l'exercice de la religion.

Mais ie te prie de me dire, comme il va de ceux de Sancerre. C'est Edict dernier n'en parle-il point?

*Le pol.* Rien du tout. Quoy que nos freres de la Rochelle en ayent fait bien grande instance, sçachant le calamiteux estat où ils estoient reduits. Mais ie te diray sommairement ce que i'en scay.

Quant à nos pources freres de Sancerre, le Sieur de la Chastre Gouverneur pour le Tyran en Berry, les assiegea dés le mois de Ianuier dernier passé, fit batterie avec dixhuiet ou vingt pieces d'artillerie, en diuers endroits de leur

ville, fit bresche de cinq cents pas, & le ieu dy deuant Pasques, leur liura vn assaut fort & rude, duquel se voyant viuement & bien repoussé avec sa courte honte, & perte de bon nombre des siens, comme l'histoire, que ie te monstrey, en fait mention: il s'est contenté de les tenir assiegez, par le moyen de quelques forts & trenchées, qu'il fit faire pour empescher les nostres de sortir, & les viures d'aller à eux: s'assurant par ce moyen, de les faire à la longue mourir de faim.

Et en ceste façon, les a tenus de tous costez enfermez, sans les assaillir de plus pres, que de la portee d'un mosquet, depuis le mois de Mars iusques au mois d'Aoust dernier.

Durant lequel temps, ces bonnes gens ont eu vne infinité de mal aise, de faim, de poreté & disette. Laquelle, plus ils alloient auant, plus s'alloit augmentant, iusques là, qu'ils ont esté contrains de manger cuys, fouliers, parchemins bouillis, & autres telles estranges viandes.

Cependant, la parole de Dieu qui leur estoit iournellement preschee, nourrissoit leurs ames en toute abondance.

Eux se voyans reduits en telle perplexité, qu'ils n'attendoient plus que la mort, prioient sans cesse le Seigneur pour leur deliurance. Que si son bon plaisir estoit, de les exposer és mains cruelles & barbares de leurs ennemis, qu'il les fortifiast & raffermist de cœur, de corps & d'ame en vne constante foy & esperance de  
la vie

la vie eternelle, iusques au dernier soufpir de ceste-cy.

Les foldas, le Peuple, les femmes & iusques aux petits enfans de la ville, qui suruiuoient à la faim, languissans és trenchees, emmy les rues & dans les maisons, ne cessoyent de tendre les mains au ciel, d'y esleuer leurs yeux, attendans secours du tref-haut.

Leurs ministres faisoient vn singulier deuoir à les consoler, à les exhorter & encourager à bien faire, & à mieux esperer. Leur remonstrans: que combien que la conspiration des ennemis s'estendit iusques à vouloir racler la memoire des bons de dessus la terre, afin qu'il n'y eust que le seul regne des meschans en vogue: que toutefois il en iroit tout autrement.

Que les Roys de la terre auoyent beau se mutiner, beau comploter, & s'esleuer contre le Seigneur pour rompre & secouer son ioug, & pour ruiner son Eglise: que celuy qui habite és cieux s'en rira: que le Seigneur se moquera d'eux, leur parlera en son courroux, & les estonnera par sa fureur, qu'il les cassera par son sceptre de fer, & les brisera comme vn vaisseau de potier. Qu'ils s'asseurent que la pierre, que Nabuchadonozor vit en songe coupee sans mains, cassera le fer, la terre, l'airain, l'argent & l'or de l'image, & seront comme la paille que le vent emporte, & que ceste pierre deuiendra vne grande montagne, & remplira toute la terre, brisant tout autre Royaume, Principauté & hauteffe, qui s'oppose au Royaume eternel de Iesus Christ.



Partant mes freres ( leur disoyent-ils) ne vous faschez point, pour raison des mal-faisans, que vous voyez ce semble prosperer. Car ils seront coupez soudain comme le foin, & viendront à faner comme l'herbe verte.

Attendez en patience le Seigneur, ayez ferme fiance en luy, & ne portez point d'enuie, n'ayez mesmes aucun regret de celuy, qui espere en ses laschetes. Car les malins seront extermines, mais ceux qui ont leur attente au Seigneur, seront benis de luy, ils ne seront point confus au mauuais temps.

Le Seigneur est puissant pour donner la manne du ciel, pour faire sortir de l'eau de la pierre dure. Mieux vaut peu de chose au iuste, que foison de biens aux meschans, ils ont (dit Dauid) desgainé leur glaive, & ont bandé leur arc pour abbatre le poure & indigent, & pour meurtrir ceux qui cheminent droit.

Mais leur glaive entrera dans leur propre cœur, & leur arcs seront rompus. Il est vray, mes freres disoyent-ils) que c'est vn argument suffisant selon la chair pour chopper & faire comme banque route à Dieu, de voir comment les ennemis de l'Eglise prosperent, qu'ils se glorifient en cruauté & violence enuironnez d'orgueil, comme d'un carcan, que la graisse leur pousse leurs yeux hors de leur chef malicieux, & que bien souuent, ils ont dauantage que n'a desiré leur courage.

Au contraire voir vn Dauid, voire toute vne Eglise en destresse, ses iours defaillir comme fumee

mee, ses os hais, comme vn tison, son cœur frappé & seché semblable au Pelican du desert, ou comme le hibou qui se tient és lieux sauuages, semblable au passereau priué de sa compagnie, qui se tient sur la cime du toict, le voir manger la cendre comme le pain, & mesler son boire de pleurs.

Mais certes si nous sommes enseignez comme il appartient par la parole de Dieu, nous trouuerons que le Seigneur a logé les meschans en lieux glissans pour les precipiter en ruyne, pour les destruire en vn instant, & les consumer d'une maniere espouuantable.

Et d'autre part, nous voyons que Dieu incline son oreille au besoin, à la clameur de ceux qui patiemment l'attendent, les tire hors du borbier, les deliure des dangers, affermit leurs pieds, adresse leurs pas, & les loge sur vn roc fort & assésuré. Nous verrons vn Elie, au temps de la plus grande famine nourry par les corbeaux, & quelques fois par les Anges. Nous le verrons enuoyé à la vesue, qui n'a point de pain, ains seulement pleine main de farine, & vn peu d'huy-le, n'attendant que la mort. Nous le verrons nourry, la vesue sustentee, la farine, & l'huy-le continuer à les nourrir, & ne defaillir nullement.

La main du Seigneur n'est point abregee, son bras n'est point accourcy, le Seigneur est le Roy qui seul peut tout ce qu'il veut, il ne permettra point, qu'un cheueu de nostre teste tombe en terre sans sa volonté, partant ne nous es-

froyons aucunement pour le dessein des hommes qui ont iniustement deliberé de nous mettre tous à mort avec nos femmes & enfans , soyons plustost asseurez, que si le Seigneur a ordonné de nous deliurer tous , ou aucuns de nous que nul ne luy pourra resister , s'il luy plaist que nous mourions tous, ne craignons point.

Car il a pleu à nostre Pere , nous donner vne autre habitation , qui est le Royaume celeste , auquel il n'y a point de mutation , pourteté , misere, larmes, pleurs, dueil, ou tristesse, ains felicité, & beatitude eternelle.

Il vaut beaucoup mieux estre logez avec le poure Lazare au sein d'Abraham, qu'avec le mauuais riche, avec Cain, avec Saul, avec Herode, ou avec Iudas en enfer.

Cependant il nous faut boire du breuage que le Seigneur nous a préparé vn chacun selon sa portion.

Il ne faut pas que nous ayons honte de la croix de Christ, ny regret de boire du fiel duquel il a esté le premier abreuvé : sçachans que nostre tristesse sera tournée en ioye, & que nous rirons à nostre tour, quand les meschans pleureront, & grinceront les dents.

Par telles & semblables paroles , les pasteurs sollicitans iournellement le peuple , de se preparer à receuoir tout ce qu'il plairoit à Dieu leur enuoyer , les enseignoyent & entretenoyent de plus en plus en tout deuoir & bon office de pieté & crainte de Dieu. Lors que contre toute esperance , Dieu estant par maniere de dire, comme descen-



descendu pour voir leur affliction , le vingt & sixieme du mois d'Aoust dernier passé : lors qu'ils ne pouuoient , selon l'apparence humaine , autre chose faire (s'ils ne vouloyent renier Dieu) tout à plat , que se laisser mourir de faim , ils furent reçeus à composition par le seigneur de la Chastre (non sans le sçeu du Tyran, quoy qu'au parauant, il eust dit, qu'il les feroit manger l'un l'autre. Dieu luy ayant pour ce regard flechy & amolli le cœur) qui leur promit de leur laisser la vie & biens sauues , & l'exercice de la Religion à la forme de l'edict, moyennant qu'ils donnassent quarante mille francs au Tyran : ce que les pources gens ont fait & accomply.

Quoy que les ennemis par apres contre toute foy donnee selon leur coustume , ayent pillé & desrobé ce que bon leur a semblé de leurs meubles, demantelé leur ville, enleué iusques à leur horologe, & massacré quelques vns d'entre eux, & notamment le Bailly & Gouverneur de Sancerre. Et contraint les autres , qui ne iouissent d'un seul brin de liberté, d'estre vagabons & errans à la mercy des volleurs & brigans. Au surplus, ie ne veux pas oublier à te faire entendre, que l'un des moyens, desquels Dieu s'est principalement seruy pour la deliurance de ces bonnes gens de Sancerre, a esté la venue des ambassadeurs de Pologne, qui arriuerent en la Cour du Tyran, quelques iours au parauant la composition de Sancerre.

*L'histor.* Ie te prie declare moy vn peu par le menu ton dire , ie ne puis pas bonnement

entendre comment ce peut estre que les Polonois ayent seruy à faire deliurer les Sancerrois.

*Le pol.* Je te diray comment Les Polonois apres la mort de leur Roy Sigismond dernier decedé sollicitiez par l'Euesque de Valence , & le ieune Lansac , lesquels comme tu scais, leur farent enuoyez en ambassade , d'elire à leur Royaume vaquant, le Duc d'Anjou apres quelques remises, ne firent que bien peu, ou point de difficulté d'en faire election pour des considerations particulieres, reuenans, comme il leur sembloit, au bien de leur estat.

Mais ayans tost apres entendu les nouuelles des trahisons de ceux de Valoys & des massacres qu'ils auoyent fait faire en la France sur les fideles , indignez extremement contre ceste maison, ils furent bien fort marris , d'auoir fait vn si meschant choix , & n'eussent pour rien voulu auoir eleu d'vne si traystresse race, homme qui leur deust commander , craignant qu'il ne leur mist vn iour leur Patrie en pareille combustion que la France. Tellement que volontiers se fussent departis de ceste election, pour proceder à Election nouuelle, n'eust esté que desia, ils auoyent irrité tous les autres competeurs , qui pretendoyent de paruenir au Royaume de Pologne , en ce principalement qu'ils les auoyent postposez au Duc d'Anjou. Contrains donques & forcez de s'y tenir, d'autant mesme que le Turc allié de la maison de Valoys les en sollicitoit avec des conditions auantageuses pour la Pologne.

Ceux

Ceux de la noblesse & des autres estats de Pologne faisans profession de mesme religion que nous (lesquels à ce que j'entens sont en bien fort grand nombre & des principaux du pays) estimās que le faict de France attouchoit de près à leur estat & affaires, tant pour la pieté & crainte de Dieu, que pour la charité & compassion de nos freres affligez & le mesme danger auquel ils pourroyent tomber: voulans esprouuer le traitement qu'ils pourroyent attendre d'un estranger par celuy qui seroit fait aux naturels subiets en pareil cas, deuant que bien asseurer & raffermir l'election du Duc d'Aniou, entrerent en conference & negotiation nouuelle avec l'Euesque & Lansac, desquels entre autres choses le 4. de May 1573. ils obtindrent par promesse solennelle iuree & signee de leurs mains au nom de leur maistre le tyran, Que pour remettre la paix en France, le tyran aboliroit tout ce qui a esté fait durant les guerres ciuiles, que les fideles François pourroyent habiter par toute la France sans estre recerchez en leur conscience, ni contraints d'assister aux seruices de la Papauté. Que ceux qui se vouldroyent retirer hors de la France pourroyent vendre leurs biens, ou iouyr de leurs reuenus en terres qui ne sont ennemies de la France. Que les heritiers des meurtris seroyent remis en leur bon nom & honneur nonobstant tous edicts & arrests. Que les estats des defuncts qui auroyent esté vendus, seroyent remboursez en deniers à leurs heritiers.

Que les foruscis pour la religion pourroyent r'entrer en leurs biens & honneurs, & habiter



seurement où bon leur sembleroit de la France. Que les villes qui tenoyent lors la religion auroyent l'exercice libre d'icelle sans aucun contredit ne garnison. Que l'on enquerroit diligemment des meurtriers & massacreurs, & que punitiō exéplaire en seroit faite. Et que l'Euesque & Lansac à leur retour en Frâce feroyēt de sorte que le Duc d'Aniou s'employeroit enuers le tyran pour obtenir de luy vn lieu en chascune prouince de la France, auquel l'exercice de la religion seroit librement faict.

Ces articles ainsi promis & iurez aux Polonois, les ambassadeurs François s'en reuindrent à la Cour du tyran pour donner les certaines nouvelles de l'election du Duc d'Aniou. Tost apres les estats de Pologne enuoyerent en France pour saluer leur Roy esleu & prendre de luy le serment en tel cas requis en ambassade fort honorable. Laquelle ils chargerent aussi de pourfuyure l'accomplissement de ces articles, dequoy principalement la noblesse de la religion, & six ou sept des Palatins de Pologne leur firent tresgrande instance : estimans que de la pratique de ces articles dependoit entierement la paix de la France & vn essay de ce qu'ils doyuent esperer en Pologne.

Ces ambassadeurs Polonois ne furent pas si tost arriuez à la Cour du tyran, qu'apres l'auoir salué & son frere leur Roy esleu, deuant que parler de leurs affaires de Pologne, ils leur parlerent de remettre la paix en France & de l'y conseruer & entretenir mieux qu'ils n'auoyēt fait par le passé

Autre

Autrement ils ne voyoyent point que l'alliance avec le Frâçois peust seruir aux Polonois pendant que la France seroit en vn tel galbuge & en vn si mauuais mesnage. Surquoy le tyrâ leur ayant respondu qu'il auoit desia tout<sup>o</sup> pacifié par son edit, leur en fit monstrier vne copie, laquelle ayât veue & bié cōsideré les mots de l'edict le trouuât court & captieux & tout & par tout, ny voyât rié aussi qui fauorisast ceux de Sâcerre, que les ambass. Polonois auoyēt entēdu estre extrememēt pressez, esmeus de la cōpassiō de leur fait, ils firēt instante requeste à la mere du tyran pour leur deliurance. Et trouuans là l'Euesque de Valence, ils le sommerent de sa foy donnee en Pologne touchant les articles de paix. Mais la mere du tyrâ qui sçauoit bié l'estat des poures Sâcerrois, s'assurant qu'aujourdhuy ou demain ils se rendroyent la hart au col à toute mercy, respondit que Sâcerre estoit à vn Seigneur priué, qui auoit esté offensé par ses suiets. Et que le Roy luy auoit presté ses forces pour les chastier, & ne luy vouloit faire tort anticipant dessus ses droits. L'Euesque ayant auoué ce qu'il auoit promis & iuré, faisoit semblant de prier pour ceux de Sancerre, affermant que iamais il ne fust venu à bout de sa charge enuers les estats de Pologne sans les voix, suffrages & faueur des Seigneurs & gentils hommes de la Religion. Cependant il prioit les ambassadeurs Polonois de luy donner relasche de deux ou trois iours, pour se pouuoir acquiter de sa promesse, & qu'ils ne doutassent nullement que les choses iroyent mieux qu'ils ne pensoient.

Or vſoyent ils & la mere & l'eueſque de ceſt artifice & renuoy pour auoir cependant leur plaifir de l'entiere euerſion des Sancerrois, qu'ils ſçauoyent comme i'ay dit eſtre preſts à ſe rendre, pour ſuiter à mourir de male-faim.

Les Polonois ſe voyās ainſi réuoyez ayās appris par le bruit courant l'extremité des Sancerrois retournent le lendemain trouuer la mere Catherine, la prient & l'adiurent d'auoir compaſſion des Sancerrois, qu'ils ne ſoyent pas pirement traitez que les autres, qu'õ donne bien le pain aux chiës, qu'à plus forte raiſon le doit on fournir aux Chreſtiens, & que la cruauté eſt par trop grande, de vouloir faire mourir de faim ceux qui (comme ils eſtoient informez) n'auoyent en rien failly : ſi d'aüecture on ne veut appeller faute, ſeruir à Dieu purement, & defendre ſa propre vie. Partant la ſupplient d'y auoir eſgard.

A cela la bonne dame leur reſpondit, que lon traitoit leur compoſition, & que de bref ils en auroyent quelque bon contentement.

En ces entrefaites la compoſition que i'ay dit de Sancerre fut faite, & portee à ſigner au tyran, qui en blaſphemant reſpondit, commé il auoit deſiadit quelques iours auparauant, que par la mort Dieu il ne vouloit point de compoſition & qu'il n'en ſigneroit point. Que par le ventre Dieu il les vouloit voir manger les vns les autres Et de faiët il ne l'eüſt point ſignee, ſans ce que ſa mere & ſes plus rufeſz conſeillers luy remonſtrerent que s'il ne ſignoit ceſte compoſition il gaſtoit tout ce qu'on pouuoit attendre de la  
nego-



negociation de Pologne : que les Polonoys avec lesquels ils n'auoyent encores rien conclu estans informez d'une telle rigueur, s'en offenseroyent grandement & seroyent bien gens pour rebroffer leur chemin sans vouloir passer outre à leur charge.

Cela, di-ie, fut cause que le tyran la signa, Dieu luy ayant par sa prouidence fleschyle cœur pour ce regard. Voila le moyen duquel Dieu importuné d'autre part par les prieres des siens, & ayant son honneur par maniere de dire engagé à leur conseruation, s'est seruy pour la deliurance de ces pources Sancerrois. Et ne doute point aussi que les nouuelles de la venue des Polonois, dès lors qu'elles furent entendues à la Cour du tyran, & au camp deuant la Rochelle, comme ie t'ay dit, n'ayent esté aucunement cause de faire leuer le siege & d'accommoder les affaires de nos freres de la Rochelle.

*L'hi.* Cesont choses merueilleuses que les œures de nostre Dieu. Et à y bien penser, à vray dire, on ne se peut remettre à la memoire l'issue du siege de la Rochelle, de Sancerre, & du siege de Sommieres, dont tu me parlois n'agueres, qu'on ne voye clairement & à l'œil que Dieu y a monstre & fait paroistre d'une part l'innocence & iustice des siens : & d'autre part par consequent l'iniustice & infame desloyauté de ses ennemis. Car l'estonnement des trahisons & massacres si cruels & inopinez estoit plus que suffisant pour faire perdre le cœur aux plus vaillans & aguerris.

Les longs & obstinez sieges, tant de rude & furieux assauts & autres exploits & ruses de guerre estoient bastans pour emporter des places beaucoup plus fortes. Et toutesfois Dieu a tellemēt pourueu aux siens par vne admirable bonté & prouidence, & a tellement encouragé le peu qui restoit qu'ils ont fait teste à toute la force de leurs fiers & sanglans ennemis sans secours d'aucun de leurs voisins, quoy que les ennemis en ayent emprunté de toutes pars selon leur coustume, ayans perdu de leurs gens en ces trois sieges plus qu'ils n'auoyent perdu en toutes les trois guerres passées.

Cela me fait, quand ie le considere, esperer encores plus auant. Que comme Dieu par vne faueur speciale: & secours extraordinaire a besongné iusqu'à present, qu'aussi vn iour en nos presences & deuant nos yeux ou des nostres, il fera l'entiere vengeance du sang innocent respandu, & nous dōnera vn tel relasche que nous n'oseriōs demander pour luy seruir sans nulle crainte en toute paix & seureté. Ce qui me le fait ainsi croire outre les promesses que nous en auons en l'Ecriture, & l'essay que Dieu en a fait freschement en telle deliurāce est ce que i'ay particulierement marqué en l'election du Roy de Pologne, laquelle n'estant faite (ce sembloit) que pour assouuir l'ambition du Duc d'Aniou, a neantmoins seruy à faire venir d'un pays bien fort lointain des hommes Chrestiens & genereux pour porter parole vertueusement pour le soulagement des bons: lors que nos affaires estoient en  
si mise-

si miserable estat que nos Patriotes & tous nos voisins nous mescoñoissoient en plain iour:& que nul d'eux ne s'osoit entremettre d'en dire vn seul petit mot, ou s'il le faisoit à l'adventure, c'estoit par maniere d'acquit. Mais ie te prie conte moy vn peu ce qui s'est apres ensuyui de la poursuite des Polonois.

*Le pol.* Ie te diray ce que i'en scay. Apres que la composition de nos freres de Sancerre fut signee par le tyran, sa mere fit entendre aux Polonois que les Sancerrois estoient contens & qu'ils auoyent ce qu'ils auoyent demâdé. Et au reste que quâd les Polonois en seroyent d'aduis elle seroit bien aise de voir leur charge touchant les affaires de Pologne parfaite & accomplie.

Les Polonois bien aises pensans que nos freres de Sancerre eussent esté bien traitez, monstrent d'auoir enuie de despecher le surplus de leurs affaires: Mais deuant que d'entrer plus auant ayant examiné & conseré l'edit du tyran avec les articlés que l'Euesque & Lansac leur auoyent iuré & promis, & trouuant que l'edit estoit bien fort esloigné desdits articles: en ce principalement qu'ils promettent vne diligente inquisition & seuer punishment des massacreurs, desquels ce bel edit defend de paler seulement, & d'en renoueller la memoire: ils se resolurent d'en ouurir propos au tyran. Et de fait, l'estans allé trouuer, ils luy firent vne roide & ferme instance sur l'execution desdits articles que ses ambassadeurs leur auoyét promis en son nom.



Mais le tyran leur respondant en vn mot leur dit qu'il n'auoit rien promis de cela, ni aussi donné charge à personne de leur en rien promettre : les Polonoys oyans vn tel langage & voyans là l'Euesque present, le sommerent de sa promesse, luy firent recognoître son seing appose au bas des articles, & luy ayans demandé, qu'il dist au vray, comme il en alloit: Il confessa d'auoir signé les articles, mais que ç'auoit esté sans charge ny mandement, considerant que s'il ne les signoit, il ne pouuoit venir à bout de sa charge à son honneur.

*L'hi.* O quel honneur, traistre pariure ! hé comme il meriteroit bien des estriaieres en cuisine.

*Le pol.* Tout cela luy fut reproché en la presence du tyran par les Polonoys, lesquels irrités d'vn si desloyal patelinage, se partirent de la presence du tyran sans luy rien dire dauantage de ce iour-là.

*L'hi.* A dire la verité, humainement parlant, le tyran eust esté vn grand sot d'auouer en cest endroit-là mōsieur l'Euesque avec sa mitre. Car de là s'ésuyuroit si les articles s'obseruoyēt, cōme il est traïsfraisonnable & expedient pour le bien de paix que monsieur le tyran, sa mere, son frere, son beau pere, le Peron, ses autres conseillers & supposts seroyent traitez, comme meritent les plus lasches & villains meurtriers, que le diable ait iamais mis en besongne depuis Cayn iusqu'à present.

*Le pol.* Cela est certain. Voila pourquoy ayant  
pensé

pensé à ses affaires, il se garda bien d'y consentir. Mais à parler à bon escient qui voudroit examiner de pres la pratique du tyran, de sa mere & de l'Euesque & sauuer l'honneur de sa mitre, il trouueroit que ce Cornu ( quoy que le tyran l'ait desauoué ) n'a iamais rien promis aux Polonois touchant ces articles, que par commâdement du tyran, pour leur persuader en Pologne ( engageant en cela sa conscience aussi bien que Puybraca védu la siéne par son Epistre, Ornatissimi) que le tyran estoit bien fort homme de bien, Treschrestié & paisible, & que tant s'en faut qu'il eust iamais fait faire ou consenty à ces massacres, qu'au contraire il seroit tousiours bien aisé d'en faire faire vne diligente enqueste & punition tresrigoureuse.

Mais maintenant que les Polonois abusez par ces piperies en sont arriuez si auant, qu'il leur est malaisé de se retracter : & que d'autre part le fait des massacres est cognu de tous estre procedé du commandemēt du tyran & de ses principaux supposts: craignant qu'on ne le prinst au mot, il le nie comme vn meurtrier.

Au reste quant aux autres articles iurez aussi aux Polonois, il est bel à voir pour la plus part, s'on les confere avec l'edict du tyran, que l'Euesque n'en a aussi rien promis que par expres commandement, comme chose que le conseil du tyran estoit desia resolu d'accorder de parole seulemēt par escrit à nos amis, pensant par là les appaiser, comme les enfans d'une pōme : mais ne voulant que l'on pēsast que les Polonois nous eussent ap-

porté ce meschant petit relasche, le tyran par son edict se hesta de nous l'accorder auparauant leur arriuee.

Or pour reuenir aux Polonois, eux estans quelque iour apres ce beau tour qui leur fut ioué, entrez à traitter des affaires de leur Royaume: apres auoir receu le serment du duc d'Aniou, qu'il n'attenteroit rien de parole ny de fait contre les loix de Pologne, ains les regiroit & gouuernerait selon icelles, ils voulurent aussi qu'il leur promist d'entretenir & laisser paisibles les Polonois en leur religion reformée Papistique & autre, telle qu'elle y est.

Et comme sur cest article il se print à faire quelque difficulté, les ambassadeurs luy repliquerent qu'il falloit donc qu'il fist son conte, qu'il ne leur seroit iamais Roy, qu'ils ne veulent point vn tyran, lequel leur force la conscience, ny vn qui sous vn faux pretexte de zele de Religion leur dissipe la paix publique, qu'ils ont enuie de nourrir.

Et insisterent tellement sur cela, qu'il fallut que le duc d'Aniou leur en passast le serment & promesse.

*L'hist.* Ha poure gentilhomme! Il est à craindre ie t'asseure qu'il en ait blessé sa conscience, tant il fait du religieux. Quel zelateur!

Mais i'ose dire que si l'on eust requis de luy vn serment en propres termes de seruir à iamais au diable, qu'il en eust donné la parole d'aussi bon cœur, & aussi bien qu'il luy sert de fait en sa vie, plustost que d'estre repoussé d'un Royaume si



opulent.

Au reste on voit bien par là quelle est la Religion de ceste maison de Valois. Vne partie de Pologne est pleine, comme chacun sçait, d'Anabaptistes & d'Arriens, qui sont vrais ennemis de Dieu & de son Christ nostre Seigneur : & neantmoins il leur va promettre de les conseruer & garder.

Il y a aussi, par la grace de Dieu, vn grand nombre de Polonois, qui font profession de mesme Religion que nous: il promet de les y laisser & de les y entretenir. Il fait bien quoy qu'il soit contraint: i'en suis tres-aise, Dieu soit loué.

Cependant il ne peut laisser viure ceux de sa nation, qui croyans vne mesme chose, ont tous les iours prié pour luy. Ils ne sçauroyent mieux faire paroistre qu'ils n'ont aucun soucy de Dieu, que par ceste diuersité de traitement: en laquelle ils monstrent au doigt, comme en tout le reste de leur vie, qu'ils ne font aucun conte que de leurs delices & de ce qu'ils pensent seruir à leur grandeur, & n'employans la Religion, par maniere de dire, que comme vne maquerelle d'estat, & couuerture de leurs cruautez.

*Le pol.* Il est ainsi: mais pour poursuyure, ces ambassadeurs Polonois ayans receu ceste promesse, & s'asseurans de la luy faire bien garder & de le tenir en bride sous les loix de leur patrie, ne se pouuoient pas bien contenter de voir la pource France si mal traittee par ceux-là qu'elle a elle-  
uez.

Partant dresserent vne requeste bien amplement pleine de toutes sortes de raisons diuines & humaines, & de moyes encore plus amples, propres à establir la paix : & ainsi faite & signee ils la baillerent à leur Roy pour la presenter au tyran. Mais à ce qu'on m'a fait entendre, on les renuoya tous à Mets : où le tyran avec sa cour alloit accompagner son frere qui s'en alloit en son exil, où Dieu l'a voulu releguer, pour le bié de chacun de nous. Que Dieu doint à ces bonnes gens autant de bien & de bon heur, que nous auons souffert de mal, de malheur & de malencontre sous ceste race de tyrans.

*L'hi.* Amé, par sa grace. Je serois tresmarray qu'ils eussent le moindre mal de tous les nostres. Mais ie te prie dy moy vn peu, est-ce tout ce que tu as appris durant le temps de ton voyage?

*Le pol.* C'en est bien la plus grande partie. Mais encor y a-il quelque trait, que i'ay appris, Dieu soit loué, qui te seruira à l'histoire : & à monstred de plus en plus l'honnesteté de nos Valois.

*L'hi.* Ie te prie, amy, dy-le donques, & ne crain pas que ie le cache. Leurs actes ont bien mérité qu'on n'attende apres leur mort à dire leur vilaine vie.

*Le pol.* Tu dis vray : & c'est vne hôte, au lieu qu'vn chacun deust crier à l'eau, au feu, à l'arme, à l'aide contre ces traistres malheureux, qu'il s'en trouue encore de si lasches qui n'osent leur tenir propos qu'en leur disant vostre clemencé, vostre bonté, vostre douceur, vostre Maiesté treschrestienne : ores qu'ils sçachét qu'il n'y a schelmes plus vilains que



que ceux-cy.

*L'hist.* Je ne croy pas qu'un homme rond parle jamais de leur clemence, ny de leur bonté & douceur, sçachât combien ces misérables sont cruels, felons, inhumains. Quant au tiltre de Treschrestien on le deut, pour ne point flatter, changer en Archiantichrestien, pour appliquer des noms es choses qui fussent significatifs.

*Le pol.* On le deut faire vraiment. Mais ie gage qu'outre ce que leurs flatteurs, & quelques autres qui s'en approchent ayans affaire à eux prophangent ordinairement ces beaux & sacrez mots, les attribuant à ces perfides : qu'il y aura encores quelques vns des Tres-illustres princes d'Allemagne, qui au voyage que le frere du tyran y fera s'en allant en Pologne, n'auront pas honte de l'en appeller & de luy faire aussi bel accueil, que l'on feroit à un honneste homme.

Si quelcun pour legere faute se trouuant mis au bâ de l'Empire, est recueilly par quelque Prince, soudain l'Empire luy courra sus. Mais à ceux-cy qui sont attaints, sont conuaincus & condamnés deuant Dieu & deuant les hommes, d'estre des schelmes execrables & ennemis du genre humain, sous couleur qu'ils sont des gros schelmes, un chacun les honorera, iusques à se confederer & se ligueur avec eux. Quelle misere!

*L'hist.* Ne sçais tu pas que le prouerbe en a donné son iugement. La censure tourmente les pigeons, laissant aller les corbeaux libres. Mais n'entrons pas ie te prie plus auant en ceste matiere : tel luy baisera la main qui la luy voudroit voir bruslee:



& tels ira-il visiter qu'il voudroit desia voir par terre : leur dam, s'ils ne sçauent choisir l'occasion que Dieu leur appreste.

Or dis maintenant ie te prie ce que tu m'as encores à dire.

*Le pol.* I'en suis content. Apres que i'eu seiourné à cause de mon indisposition quelque temps à Nismes, où nous receuions (comme ie t'ay dict) tous les iours à force nouuelles, entendant qu'on traitoit la paix : & que les ambassadeurs Polonois de la Religion estoient en chemin pour venir en France, ie m'acheminay par l'aduis de nos freres à Paris, où la cour du tyran estoit, pour voir vn peu sa contenance & celle de ses courtisans à leur retour de la Rochelle.

Ie trouuay à mon arriuee, qui fut sur la fin de Iuillet, que l'edit dont ie t'ay parlé estoit desia ietté au moule : tellement toutesfois que de honte, quelque meschant & trupellu qu'il soit, on ne l'osoit point publier au Parlement ne dans Paris : craignant de fascher les Sires Pierres, & d'apprester à d'autres à rire pour leur argent tout despendu meschamment.

Cependant nos beaux assiegeurs estoient de retour à la Cour, non pastous, non, comme il faut croire, ains seulement les reschappez : ie parle de nos courtisans. I'y vy les trois Roys qu'on appelle : le tyran, le Roy de Pologne, & le tiers, le Roy de Nauarre : qui pour rendre graces à Dieu pour la paix ou leur deliurance, ne cessoyent de le despiter & de le prouoquer à ire par leur lasciuie puanteur, & autres tels Sardanapalismes.

Ie ſceu que ces trois beaux Sires s'eſtoient fait ſeruir à la table en vn leur banquet ſolennel à des femmes toutes nues, auſquelles apres le banquet ils bruslerent avec des torches allumees le poil de leurs parties honteuses.

Après cela comme ils eſtoient en peine de ſcavoit en quoy ils employeroiēt le reſte de la nuit, ie ſceu qu'ils auoyent mandé à Nantouillet Preuoſt de Paris de leur appreſter la collation, qu'ils la vouloyent aller prendre chez luy. Et que de fait ils y allerent, quelque excuſe que Nantouillet ſceuſt alleguer pour les deffenſes.

Ie ſceu qu'après la collation, la vaiſſelle d'argent de Nantouillet & ſes coffres furent fouillez & pilliez par les Rois & leurs ſatellites: & diſoit-on dedans Paris, qu'on luy auoit pris & volé plus de cinquante mille francs. Et qu'il euſt mieux fait le bon homme de prendre à femme Chasteau-neuf, fille de ioye du Roy de Pologne, que de l'auoir refuſee: qu'il euſt mieux fait auſſi d'auoir vèdu ſa terre de Nantouillet au duc de Guyſe, que de ſe faire ainſi piller à ſi grands & puisſans voleurs.

En ſomme ie ſceu que le lendemain le premier Preſident de Paris fut trouuer le tyrā, & luy dire que tout Paris eſtoit eſneue pour le vol de la nuit paſſee: & que quelques vns vouloyent dire qu'il l'auoit fait pour rire, & qu'il s'y eſtoit trouué luy meſmes.

A quoy le tyrā reſpōdit, que par le ſang Dieu il n'en eſtoit rié, & que ceux qui le diſoyēt auoyēt méty: dōt le Preſident treſcōtent: i'en informeray

dōcques, sire (repliqua-il) & en feray faire iustice. Non, non, respondit le Tyran: ne vous en mettez pas en peine, & faites entédre à Nantouillet qu'il aura trop forte partie: s'il en veut demander raison. Voila que ie sceu au vray quant à ce fait.

Après ie sceu qu'un autre iour les Rois firent dresser partie à douze de leurs courtisans, contre douze filles de ioye des plus honnestes de Paris: & que pour la mieux voir iouer, ils firent tendre en yne salle douze liets de cāp sans rideaux: où chacun avec sa chacune en la presence de ces Rois n'auoit pas honte de deffier ses compagnōs à pailarder.

*L'hi.* O mon Dieu, qu'est-ce que i'oy dire! hé que voila d'infames actes! Je ne croiray iamais que Neron, Caligule, Heliogabale, & le vilain Sardapale ayent approché que de loin à l'infameté de ceux-cy.

*Le pol.* Or escoute: j'apprins à Paris d'auantage: que le tyran auoit mandé & escrit deux fois à son frere le roy de Pologne durant le siege de la Rochelle, qu'il deust faire estrangler la Mole un gentilhomme Prouençal, fauory du duc d'Alençon.

*L'hi.* Je le cognoy bien: & quelle raison en auoit-il? la Mole est-il pas Papiste & le balladin de la cour?

*Le pol.* Il est vray. Mais tant y a que le tyrā le commanda, quoi que son frere ne fist rien que mōstrer seulement les lettres à la Mole, afin qu'il aduist vn peu de plus pres à son fait que par le passé.

*L'hi.* Et ne dit-on pas l'occasion qui esmeut le tyran à cela?

*Le pol.*



*Le pol.* On dit qu'il n'en auoit point d'autre que l'occasion de ialousie, de tant que la Mole estoit fauorizé d'une ieune princesse que ie ne nomme point pour le respect de son mary, plus que le tyran n'eust voulu. Apres ie sceu que pour ceste occasion mesme, le tyran voyant que son frere n'auoit voulu faire despecher le Mole, fit vne nuict dessein luy-mesmes de l'estrangler dedans la cour, où la Mole estoit retourné apres le camp de la Rochelle.

Et pour ce faire sçachant que la Mole estoit en la chambre de la duchesse de Neuers dás le Louure, il print avec luy le duc de Guyse, & certains gentilshômes que ie te nommeray iusques à six, auxquels il commanda sur la vie d'estrangler celui qu'il diroit avec des cordes qu'il leur distribuait.

En cest equippage le tyran portant vne bugie allumée, il disposa à la sortie de la chambre de la duchesse de Neuers ses compagnons bourreaux sur les brisées que la Mole deuoit prendre pour aller à la chambre de son maistre le duc d'Alençon. Mais bien seruit au pource ieune homme de ce qu'au lieu d'aller à son maistre, il descédit trouuer sa maistresse: sans rien sçauoir de la partie, laquelle il ne pouuoit autrement eschapper qu'en descendant en bas, comme il fit au lieu de monter à son maistre, come les autres le pensoient.

*L'bi.* Voila vn ieune homme perdu, s'il ne prend garde de bonne heure aux embusches de ce tyrā.

*Le pol.* Il a beau se donner de garde: s'il ne prend l'expedient de Bodille: & s'il ne fait, comme l'on

dit, d'une pierre deux galands coups, deliurant foy & sa patrie de ce monstre pernicieux, & mettant le duc en sa place : maintenant que l'autre est bien loin. Autrement c'est fait de la Mole : le tyran iamaïs ne pardonne à pas un de ceux qui le faschent, quelque mignon de cour qu'il soit. Et ie t'en diray une preuue que possible tu ne sçais pas.

*L'hi.* Ie t'en supplie. Ie suis tout prest de t'escouter, si c'est quelque preuue nouuelle qui puisse seruir à l'histoire.

*Le pol.* Ce que ie te veux dire, n'est pas nouueau à quelques vns qui me l'ont dit pour chose seure. La pluspart ignore le fonds de la trahison du tyrá : & cecy me semble tout propre pour aider à bien l'esclaircir.

Tu sçais que Lignerolles fut tué à Bloys la cour y estant, & que le bruit courut entre aucuns, que le roy de Pologne, qu'on appelloit lors Monsieur, l'auoit fait tuer pour auoir descouuert au tyran un paquet d'Espagne qui venoit à Monsieur, traitant de quelques intelligences secrettes à l'Espagnol.

Autres pensoient que c'estoit simplement Villequier, qui pour desmeller sa querelle s'estât accompagné de ses amis, auoit anticipé sur Lignerolles luy en prestant une dans le sein.

Mais voicy la vraye occasion de la mort de Lignerolles que i'ay appris estant en Cour, de la bouche d'aucuns des grands, qui cuidoyent que ie fusse encores Papiste.

Le tyran & sa mere qui desiroient sur toutes choses

choses faire mourir l'Amiral & d'exterminer tout le reste des Huguenots de la France. Apres auoir cherché dès la paix de l'an 1570. parmi tous ses supposts & courtisans vn qui fust assez habile à leur tracer, quelques moyens pour executer subtilement leur proiect, puis que la force n'y auoit de rien peu seruir. S'asseurans qu'il n'y auoit aucun à leur gré mieux auenant à forger vne lascheté, quelque beste qu'il soit, au reste, pour l'insigne meschanceté qu'il nourrit dans son courage, que l'Italien Birague, Gardesaux: ne voyans pas aussi qu'il y en eust vn qui sceust mieux garder leur secret.

L'ayans fait venir à eux, luy communiquerent leur dessein & volonté: & luy donnerent charge expresse d'auiser de tout son pouuoir à leur tracer ce qu'il croiroit pour seruir à l'execution de leurs desirs.

Birague se voyant de tant honoré, tout aise de ce qu'on l'auoit preposé en affaire si important aux autres de sa nation, leur promit de faire en sorte qu'ils auroient contentement.

Ils ne faut pas douter (ie diray cecy en passant) qu'il ne se promist dès lors d'auoir l'estat de Chancelier qu'on luy a du depuis baillée en recompense de ce seruice.

Quelques iours se passerent durant lesquels, (comme tu peux penser) le vilain eut beau discourir tout à loisir & à part soy de ce qu'il iugeoit necessaire.

A la fin il se resolut qu'il estoit du tout expedient de mettre en auant de traicter & resoudre à



quelque marché que se fust le mariage de la sœur du tyran avec le prince de Nauarre: afin de pouoir attirer par ce cordeau les Huguenots, l'Amiral avec la Noblesse à la discretion de la cour. Que pour faciliter cest affaire, il ne falloit nullement pardonner à beaux semblants, presens, promesses, & autres telles attrapaires & eau benite de cour iusques qu'on les vist dans Paris, où la cour pour ceste occasion se remueroit au besoin: eux y estās venus, recueillis & caresséz qu'il falloit pour le temps des nopces leur dresser vn fort à plaisir bien troussé & bien équipé, comme à mode de guerre, au Pré aux clerks, ou pres des Tuyleries, sous couleur de faire exercer les courtisās, les vns à assaillir: les autres à deffendre le fort pour l'esbat & passetemps des dames. Qu'il estoit de besoin de faire que l'Amiral fust le chef des assaillans: & qu'il fust suyui des gentilshommes de la Religion, qui lors se trouueroyent en cour, desquels il ne falloit pas douter qu'il ne s'en trouuast vn bon nombre: & que ceux qui deffendroyent le fort fussent des plus feaux & asseurez courtisans, Capitaines & soldats du tyran: desquels les chefs auroyent le mot de guet de tout ce qu'il leur faudroit faire. Qui seroit, selon son auis, de charger à plomb leurs harquebouzes, les encarrer & tirer droit à l'Amiral & à ceux de sa troupe, leur courre sus à bon escient, & les tuer, comme qu'il en fust, apres auoir fait quelque semblant au commencement de combatre & de se deffendre seulement pour le plaisir.

Que cela fait on viendroit facilement à bout  
des

des autres Huguenots quelque part qu'ils se retirassent. Quant à la couuerture du fait, lors qu'il seroit executé, qu'on trouueroit assez de pretexte qu'il n'y auoit pas faute de quelque grosse conspi ratio, dont on les prouueroit autheurs, pour leur ietter le chat aux iambes:

Après que Birague se fut resolu de la sorte, luy semblant qu'on ne pouuoit mieux, il fit entendre au tyran & à sa mere tout ce qu'il en auoit tracé. Eux considerans que l'affaire seroit assez bien cōduit, s'on le demenoit de la sorte, apres auoir fait à Birague quelques difficultez sur la forme, & sur la matiere:& le moyen de l'exploicter, se resolerent à la fin de suyure ce chemin-là & ces brisees par l'auis mesme du comte de Rets, à qui ils le cōmuniquerent, qui s'y accorda de tout point. Si mirerent le mariage sur les rangs, & firent tout ce que tu sçais, pour tirer les nostres en cour.

Quelques iours apres ceste resolution le tyran la voulant faire entendre à son frere le duc d'Aniou, le fit coucher avec luy, comme il a de coustume, quand il le veut entretenir de quelque chose d'importance. Et luy ayant communiqué tout, le fit iurer & promettre de n'en iamaïs rien reueler, d'auoir seulement bon courage, qu'il s'asseuroit d'en voir le bout.

Le duc d'Aniou voyant ceste entreprinse bien difficile à digerer, se dispensa de la communiquer à Lignerolles sous vn grand & profond siléce, que Lignerolles luy iura.

Afin que Lignerolles qui estoit son plus grand mignō, selon le iugemēt & discours qu'il en pour-

roit faire, luy dit librement son auis, apres y auoir bien pensé pour mieux faciliter l'affaire.

Mais comme Lignerolles, ne trouuant rien à redire à vne trahison si bien proiectee, luy fist la chose bié aisee : sans en rien parler d'auantage leur dessein demoura couuert. Iusqu'à ce qu'un iour le vieux Briquemaut, qui sollicitoit avec Teligny & les autres les affaires de la Religion à la Cour: estant allé parler au tyran pour auoir quelque iustice des meurtres commis à Rouen sur les fideles apres la paix, & le trouuant froid & restif d'en commander le chastiment : s'auança de dire au tyran qu'il seroit à craindre, s'il n'en faisoit faire vengeance, que les Papistes deuissent si insolens qu'ils se permissent encores d'auantage, & que les Huguenots ne les pouuans supporter fussent contraints de recourir aux armes, s'ils n'y voyoyent autre moyen d'en auoir iustice : dont s'enfuyuroit qu'on retourneroit en guerre aussi forte qu'auparauant.

Ce langage esmeut le tyran à commander au mareschal de Montmorency de s'en aller iusqu'à Rouen, pour voir de remedier à tout.

Cependant Briquemaut s'en estant allé de la presence du tyran : le tyran fit vider sa chambre pour pouoir blasphemer à l'aise & se despiter tout seul.

Lors que Lignerolles estant admis dans la chambre du tyran pour luy parler de quelque affaire, le trouuant esmeu de cholere, s'auança de luy demander tout doucement l'occasion de  
son



son mal talent: qu'il estoit aisé à iuger que la Ma-  
iesté estoit esmeue.

Ventre-Dieu, ce dit le tyran, & qui ne seroit  
en cholere d'ouyr ce bougre de Briquemaut,  
(ainsi appelle-il le plus souuent les gens de  
bien) me brauer & me menacer que ie suis pour  
rentrer en guerre, si ie ne punis ceux de la ville  
de Rouen?

Hé Sire, respond Lignerolles, & ne pourriez  
vous attendre sans tant vous fascher de ces cho-  
ses, l'assaut & deffense du fort.

Or cela disoit Lignerolles pensant rappaiser  
le tyran, & luy voulant faire sentir qu'il auoit eu  
part au Conseil: se mōstrant par là aussi sot, qu'il  
se cuidoit estre habile.

Le tyran l'entendant ainsi parler, se doutāt d'e-  
stre descouuert: Quel fort, repliqua-il, mort-Dieu  
ie ne sçay que vous voulez dire. Le fort Sire, dit  
Lignerolles, du iour des nopces que sçaez.

Le tyran en ayant ouy plus qu'il n'eust voulu,  
changeant de propos, renuoya Lignerolles, qui  
s'auisa possible bien tard qu'il auoit yn peu trop  
parlé.

Soudain apres le tyran ayant mandé sa mere,  
luy demanda s'elle auoit descouuert leur pot aux  
roses, que par le sang quelque yn en auoit ia parlé.  
Mais trouuant que sa mere n'en auoit rien dece-  
lé, il fit venir le comte de Rets, auquel d'abordee  
il va dire: Petit vilain, par le sang Dieu, ie t'ay  
fait trop grand, petit belistre: mais ie te fe-  
ray bien si petit, qu'on ne te verra pas sur terre.

tu descouures mes secrets, Bougre, ie me donne,&c.

Ce pource vilain du Peron se voyant ainsi rudoyé, plus mort que vif & tout tremblant, commença à respondre au Sire, que iamais il n'auoit pensé seulement d'en ouurir la bouche: le suppliant de le faire pendre, s'il trouuoit qu'il ne fust ainsi.

Le tyran ne sçachât que dire, s'en alla lors trouuer son frere, luy demandant s'il n'auoit point parlé à quelcun de cest affaire. Et comme son frere, en le suppliant de luy pardonner, luy eust confessé qu'il s'en estoit descouuert à Lignerolles, & non à autre, le cognoissant homme secret & de discours, afin d'en auoir son auis pour mieux executer le cas. P'ay bien cognu, dit le tyran, que quelcun luy auoit parlé: vous m'avez fait vn desplaisir qui me gardera de vous rien plus dire: quant à Lignerolles, c'est vn sot, il faut qu'il meure. Car escoutez, ie ne veux pas qu'il en ouure iamais la bouche.

Le duc d'Anjou, cognoissant sa faute, celle de Lignerolles & la cholere du tyran, ne sceut autre chose que dire, sinon qu'il ne s'y opposoit pas.

Dés ceste heure-là le tyran ayant fait venir à soy son frere bastard le Cheualier, luy comanda d'aller trouuer le ieune Villequier, de luy fournir six ou sept bons hommes pour escorte, & luy dire de sa part que par le sang il estoit lasche, couard & recreu de courage, s'il n'essayoit à auoir raison de Lignerolles, qui luy auoit fait tort.

Le Cheualier ne faillit pas à s'aquitter bien de sa charge, laissant Villequier resolu, armé & accompagné de mesmes. Mais Villequier en trouuant Lignerolles, seigna du nez sans l'oser attaquer comme le tyran desiroit.

Qui fut cause que le tyran l'ayant sceu manda querir Villequier, & apres luy auoir dit des pouilles, luy defendit de se trouuer iamais deuant luy, s'il ne tuoit à ce coup Lignerolles : luy donna vne espee & bien bonne tranchâte & l'arma luy-mesmes de son iacque de maille, commandant au cheualier de l'accompagner mieux que la premiere fois de gens, qui ne fissent point faute de tuer bien mort Lignerolles, & qu'il le leur dist de sa part. Ce commandement faits la partie fut dressée de nouueau en laquelle le Côte de Mansfeld papiste qui pour lors estoit à la Cour & S. Jean de Montgomery & quelques autres gentils-hommes accompagnerent Villequier, qui estant allé tout resolu trouuer le pource Lignerolles, l'attaqua de cul & de teste, le blessa, & comme il s'enfuyoit la bonne aide de sa quadrille l'ataignit & porta par terre d'un coup d'espee à trauers le corps. Ainsi mourut le beau fils Lignerolles l'un des fauoris de la Cour.

Quant au dessein, que ie t'ay dit basti par le garde-seaux Birague, cōbien que l'on dressa suuant sa trace, le fort pour le temps des nopces: toutesfois, pource que l'on sentit que l'Amiral ne vouloit point estre de la partie, & que bien peu de noblesse de la Religion y voudroit assister: le tyran fut contraint, pour assouyr son las-



che desir, de prendre vn autre expedient par l'aduis de ces premiers conseilliers & du Duc d'Aumale & de Neuers, ausquels il communiqua le fait vn peu auant les nopces.

En ces entrefaites le Duc de Guise, qui doutoit que l'Amiral auquel il portoit particuliere inimitié, luy eschappast & qu'il se retirast de la Cour, comme il en auoit enuie, luy fit tirer le coup d'arquebousade que tu scais le vendredy deuant le massacre. Qui fut cause qu'ils changerent encores leur proiect, faisans à l'œil & selon l'occurrence (au desceu de ceux, à qui ils auoyent cillé les yeux avec leurs caresses de Cour) leurs traistresse & desloyalleguerre sur les gens de bien, mal auisez. Voila ce que i'en ay peu apprendre de plus veritable en la Cour.

*L'historiog.* Ce fait est autant remarquable que nul autre de ceux que tu m'as recité, afin que vn chascun cognoisse la desloyauté des tyrans: & que les Courtisans apprennent ce qu'ils en doyuent esperer.

*Le pol.* C'est merueille qu'en voyant tant d'exemples apparens, voyant le danger present, personne ne se veut faire sage au moins aux despens d'autrui: & que de tant de gens qui s'approchent si volontiers des tyrans, il n'y a pas vn qui ait l'auisement & la hardiesse de leur dire, ce que dit le regnard au lion ( qu'on dit estre le Roy des bestes, qui faisoit, comme dit le conte, le malade dans sa taniere) ie t'irois voir luy dit il (Sire) & bien souuent de bon cœur: mais ie voy tant de traces de bestes qui vont en  
auant

auant vers toy, & en arriere qui reuiennent ie n'en voy pas seulement vne.

*L'hist.* Si feu monsieur l'Aímiral eust sceu ce conte & qu'il eust parlé en regnard, il nous en eust à tous mieux pris. Mais la brebis comme tu sçais, ne sçait rien faire que beeler, & ne sçachant avec les loups hurler pour desguiser sa voix, elle n'a garde d'eschapper. Mais quant à ces autres Courtisans: quel remede?

Quand ces miserables voyans reluire le thresor du tyran qu'il tire de la sueur du peuple, & de la despouille des bons, regardent tous estonnez les rayons de sa brauerie : & allegez de ceste clarté s'approchent de luy, sans regarder qu'ils se mettent dans la flamme quine peut faillir à les consumer.

Ainsi le Satyre indiscret voyant, comme disent les fables anciennes, esclairer le feu trouué par Promethee, le trouua si beau qu'il l'alla baiser & s'y brusler.

Ainsi le papillon qui espere iouyr de quelque grand plaisir se met au feu de la chandelle, qu'il voit estre clair & luyfant, et prouuant en iceluy son autre vertu qui le brusle.

C'est vne chose bien certaine que ces coquins mendie-faucurs souffrent vne peine incredible, à qui y regarde de pres : estans contrains d'estre nuict & iour apres à songer pour plaire au tyran, & se rompre, se tuer, & traualler pour inuenter nouueaux moyens de trahir, de tuer, de paillarder, de piller, de defrober, & qu'ils laissent leur goust pour le sien,

& neantmoins se craindre de luy plus que de tout homme du monde: auoir tousiours l'œil au guet, l'oreille aux escoutes pour espier d'où viendra le coup, pour descouurir les embusches, pour sentir la mine de ses compagnons, pour aduiser qui le trahist, rire à chascun, se craindre de tous, n'auoir aucun, ny ennemy ouuert, ny amy asseuré, ayant tousiours le visage riât & le cœur transy, ne pouuant estre ioyeux, & n'oser estre triste.

*Le pol.* Tu as descrit en deux mots la vie de ces miserables. Mais pour en parler à bon escient & ne plus flatter le dé, comme l'on dit, tout ainsi que la Repub. de laquelle les Rois philosophent, ou en laquelle les Philosophes sont gouuerneurs (selō le dire de Platon) est heureuse sur toutes autres: Et que c'est vn tresgrand heur d'estre suiet à vn bon Prince qui soit suiet à la loy, laquelle ait pour seure garde de peur qu'elle ne soit violee, quelques estats ou parlemēs. Ainsi que iadis nostre France, & cōme encore quelques vns de nos voisins l'ont pour le iourd'huy parmy eux. Aussi est-ce vne grāde misere de demeurer sous la seruitude d'vn tyran, chasseur desloyal & d'vn conseil de mesme estoffe, qui ne garde ni foy, ni loy, aucune equité ou droiture, non pas mesme l'humanité, ni les loix que nature imprime dans le cœur des plus malloirus. C'est (di-ie) vn extreme malheur non seulement pour les Courtisans: ains aussi pour tous les François de quelque religiō & condition qu'ils soyēt d'estre suiets à vn maistre, duquel on ne peut iamais s'asseurer qu'il soit bon,  
puis



puis qu'il est tousiours en sa puisſâce d'estre mau-  
uais quād il voudra, & d'auoir plusieurs tels mai-  
ſtres: c'eſt autant qu'on en a eſtre autant de fois  
extrememēt mal-heureux. Mais ie ſçaurois volō-  
tiers, comme il ſe peut faire que tant d'hommes  
tant de bourgs tāt de villes, & tant de prouinces,  
endurent ſi long tēps vn tyran ſeul, qui n'a moyē  
que celuy qu'on luy donne, qui n'a puisſance de  
leur nuire, ſinon tant qu'ils ont vouloir de l'endu-  
rer, qui ne ſçauroit leur faire mal aucū, ſinō alors  
qu'ils ayment mieux le ſouffrir, que luy contredi-  
re? Tant plus i'y penſe, plus i'en ſuis eſbahy.

*L'hi.* Et moy de meſmes, ie t'aſſeure. Mais ie te  
prie, mon grand amy, que i'aye ce bien maintenāt  
de t'ouyr ſur ceſte matiere, faire vn peu le preſtre  
Martin. Ce ſuiet eſt propre à ce temps, & ie ſçay  
bien que tu l'entens auſſi bien qu'homme de no-  
ſtre aage. Commēce, ie t'eſcouteray, i'ayme mieux  
veiller toute nuit.

*Le pol.* I'en ſuis content: auſſi bien y a-il long  
temps que i'en ſuis ſi gros, que ie creue d'enuie  
que i'ay d'enfanter ce que ie ſens de c'eſt affaire:  
Mais ie proteſte bien que ie n'en parleray point  
comme les Huguenots en parlent, ils ſont trop  
doux & trop ſeruiles: i'en parleray tout ample-  
ment en vray & naturel François, & comme vn  
homme peut parler des choſes ſuiettes à ſon iu-  
gement, voire au ſens commun de tous hommes:  
aſin que tous nos Catholiques, nos patrio-  
tes & bons voiſins & tout le reſte des François  
qu'on traite pire que les beſtes, ſoyent eſueillez  
à ceſte fois pour recognoiſtre leurs miſeres, &

auiser trestous ensemble de remedier à leurs malheurs. A la verité dire, mon compaignon, c'est vne chose bien estrange de voir vn milion de miliõs d'hommes seruir miserablement ayans le col sous le ioug, non pas cõtrains par vne plus grãd force : mais aucunemēt (ce me semble) enchâtez & charmez par le nom seul d'un, duquel ils ne doyuent ne craindre la puissance, puis qu'il est seul: ne aimer les qualitez, puis qu'il est en leur endroit inhumain & sauvage.

La noblesse d'entre nous hõmes est telle, qu'elle fait souuent que nous obeissõs à la force: il est besoin de temporiser, nous ne pouuons pas tousiours estre les plus forts. Si dõques vne natiõ est contrainte par la force de la guerre de seruir à vn (comme la citè d'Athenes aux 30. tyrans). Il ne se faut esbahir qu'elle serue: mais se plaindre de l'accident, ou plustost ne s'esbahir ny ne s'en plaindre, ains porter le mal patiemment & se reseruer à l'au enir à meilleure fortune.

Nostre nature est ainsi, que les communs deuoirs de l'amitié emportēt bõne partie du cours de nostre vie. Il est bien raisonnable d'aimer la vertu, destimer les beaux faits, de recognoistre le bié d'où l'on la receu, & diminuer souuent nostre aise pour augmēter l'hõneur & auātage de celuy qu'on aime & qui le merite. Ainsi donc si les habitants d'un pays ont trouué quelque grãd personnage qui leur aye monstřé par espreuue vne grande prouidence pour les garder, vne grande hardiesse pour les defendre, vn grand soin pour les gouverner: si delà en auant ils s'appriuoisent de  
luy

luy obeir & se fier tant de luy, que de luy donner quelque auantage (ie ne sçay si ce sera sagesse de l'oster de là où il faisoit bien pour l'auancer en vn lieu où il pourra mal faire ) mais il ne peut faillir d'y auoir de la bonté du costé de ceux qui l'esleuent, de ne craindre point mal de celuy de qui on n'a receu que bien.

Mais bon Dieu ! Que peut estre cela ? Comment pourrons-nous dire que cela s'appelle ? Quel mal-heur est celuy-la ? Quel vice ? ou plustost, quel mal-heureux vice, voir vn nombre infini de personnes, non pas obeir, mais seruir, non pas estre gouuernees, mais tyrannisees : n'ayans ni biens, ni parens, ni femme, ni enfans, ni leur vie mesmes qui soit à eux Souffrir les paillardises, les pilleries, les cruantez, non pas d'une armee, non pas d'un camp Barbare, contre lequel il faudroit despendre son sang & sa vie, mais d'un seul, non pas d'un Hercule, ne d'un Samson, mais d'un seul homme au le plus lasche & femelin de toute la nation. Non pas accoustumé à la poudre des batailles, mais encores à grand peine au sable des tournois. Non pas qui puisse par force commander aux hommes, mais tout empesché de seruir vilement à la moindre femelle. Appellerons-nous cela lascheté ? Disons nous que ceux la qui seruent à un si lasche tyran soyent couars & recreuz ?

Si deux, si trois, si quatre ne se defendent d'un, cela est estrange, & possible pourra-l'on biē dire lors à bon droit que c'est faute de cœur. Mais si



cent, si mille endurent d'un seul, ne dira l'on point qu'ils ne veulent, non pas qu'ils n'osent, se prédre à luy : Et que c'est non couardise, mais plustost mespris ou desdain. Si l'on voit, non pas cent, non pas mille hommes : mais cent pays, mille villes, vn million d'hommes n'affaillir pas vn seul, duquel le mieux traité de tous en reçoit ce mal d'estre serf & esclaue : Comment pourrons-nous nommer cela ? Est-ce la scheté ? Or y a-il en tous vices naturellement quelque borne, outre laquelle ils ne peuuent passer. Deux peuuent craindre vn : & possible dix le craindront : Mais mille, mais vn million, mais mille villes si elles ne se defendét d'un ? Ce n'est pas couardise, elle ne va pas iusques là : non plus que la vaillance ne s'estend pas qu'un seul eschelle vne fortteresse, qu'il assaille vne armee, qu'il conquiere vn Royaume. Donc quel monstre de vice est cecy, qui ne merite encore pas le nom de couardise, qui ne trouue pas de nom assez vilain, que la nature desauoue auoir fait, & la longueur refuse de le nommer.

Qu'on mette d'un costé cinquante mille hommes en armes : d'un autre autant, qu'on les range en bataille, qu'ils viennent à se ioindre, les vns combatans pour leur franchise, les autres pour la leur oster : ausquels promettra-on par coniecture la victoire ? Lesquels pensera l'on qui plus gaillardement iront au combat ? ou ceux qui esperét pour le guerdon de leur peine l'entretenement de leur liberté ? Ou ceux qui ne peuuent attendre autre loyer des coups qu'ils donnent, ou qu'ils reçoient, que la seruitude d'autrui ?

Les vns, ont tousiours deuant les yeux le bon heur de la vie passée, l'attente de pareil aise à l'aue- nir, il ne leur souuient pas tant de ce qu'ils endu- rent ce peu de temps que dure vne bataille, com- me de ce qu'il conuiendra à iamais endurer à eux, à leurs enfans, & à toute leur posterité.

Les autres n'ont rien qui les enhardisse, qu'une petite pointe de leur conuoitise, qui se rebouche soudain contre le danger, & qui ne peut estre si ardente, qu'elle ne se doie (ce semble) esteindre par la moindre goutte de sang, qui sorte de leurs playes.

Aux batailles tant renommes de Milciades, & de Themistocles, qui ont esté donnees deux mille ans y a, & viuent encore aujourdhuy, aussi fresches en la memoire des liures, & des hommes, comme si c'eust esté l'autr'hier, qui furent donnees en Gre- ce, pour le bien de Grece, & pour l'exemple de tout le monde, & qu'est-ce qu'on pense qui donna à si petit nombre de gens, comme estoient les Grecs, non le pouuoir, mais le cœur de soustenir la force de tant de nauires, que la mer mesmes en estoit chargee, de deffaire tant de nations, qui estoient en si grand nombre, que l'escadron des Grecs, n'eust pasourny seulement de Capitaines aux armées des ennemis: sinon qu'il semble que ces glorieux iours-là, ce n'estoit pas tant la bataille des Grecs contre les Perses, comme la victoire de la li- berté, sur la domination, de la franchise, sur la con- uoitise.

C'est chose estrange, d'ouyr parler de la vail- lance que la liberté met dans le cœur de ceux qui

la defendent.

Mais ce qui se fait tous les iours deuant nos yeux, en nostre France. Qu'un homme maistne cent mille villes, & les priue de leur liberté, qui le croiroit, s'il ne faisoit que l'ouyr dire, & non le voir? Et s'il ne se voyoit qu'en pays estrange, & lointaines terres, & qu'on le dist, qui ne penseroit que cela ne fust plustost feint ou trouué, que non pas veritable? Encores ce seul Tyran, il n'est pas besoin de le combattre, il n'est pas besoin de le deffaire, il est de soy-mesme desfait: mais que le pays ne consente pas à sa seruitude: il ne faut pas luy oster rien, mais ne luy donner rien: il n'est pas besoin, que le pays se mette en peine de faire rien pour soy, mais qu'il s'estudie à ne rien faire contre soy.

C'est donques le peuple mesme, qui se laisse, ou plustost se fait gourmander, puis qu'en cessant de seruir, il en seroit quitte.

C'est le peuple qui s'asservit, qui se coupe la gorge: qui ayant le choix, ou d'estre serf, ou d'estre libre, quitte sa franchise, & prend le ioug, & pouuant viure sous des bonnes loix, & sous la protection des Estats, veut viure sous l'iniquité, sous l'oppression & iniustice au seul plaisir de ce Tyran. C'est le peuple qui consent à son mal, ou plustost le pourchasse: s'il luy coustoit quelque chose à recouurer sa liberté, ie ne l'en presserois point: combien qu'est ce que l'homme doit auoir plus cher, que de le remettre en son droit naturel, & par maniere de dire, de beste reuenir homme?

Mais



Mais encore ie ne desire pas en luy vne si grande hardiellé, ie luy permets, qu'il aime mieux vne ie ne scay quelle seureté de viure miserablement, qu'une douteuse esperance de viure aisé.

Quoy si pour auoir la liberté, il ne luy faut que la desirer? S'il n'est besoin, que d'un simple vouloir, se trouuera-il nation au monde, qui l'estime trop chere, la pouuant gagner d'un seul souhait? & qui pleigne sa volonté à recouurer le bien, lequel on deuoir racheter au prix de son sang, & lequel perdu tous les gens d'honneur, doiuent estimer la vie desplaisante, & la mort salutaire.

Certes tout ainsi, que le feu d'une petite estincelle, deuiant grand, & tousiours se renforce: & plus il trouue de bois, plus il est prest d'en bruler. Et sans qu'on y mette de l'eau pour l'esteindre, seulement n'y mettant plus de bois, n'ayant plus que consumer, il se consume soy-mesmes, & vient sans force aucune, & n'est plus feu. Pareillement les Tyrans plus ils pillent & exigent, plus ils ruynent & destruisent, plus on leur baille, plus on les sert, de tant plus ils se fortifient, & deuiennent tousiours plus forts, & plus frais, pour aneantir & destruire tout, & si on ne leur baille rien, si on ne leur obeyt point, sans combatre, sans frapper, ils demeurent nuds & desfaits, & ne sont plus rien, sinon comme la racine estant sans humeur, ou aliment, la branche deuiant seche, & morte.

Les hardis, pour acquerir le bien qu'ils demandent, ne craignent point le danger, les auisez ne

refusent point la peine. Les lasches & estourdis ne scauent ny endurer le mal, ny recouurer le bien, & s'arrestent en cela de le souhaiter. La vertu d'y pretendre leur est ostee par celle lascheté: le desir de l'auoir, leur demeure par la nature. Ce desir, ceste volonté, est commune aux sages & aux indiscrets, aux courageux, & aux couards, pour souhaiter toutes choses, lesquelles estans acquises, les rendront heureux & contens. Vne seule chose en est à dire, en laquelle, ie ne scay comme nature defaut aux hommes pour la desirer, c'est la liberté, qui est toutefois vn bien si grand & si plaisant, qu'elle perdue, tous les maux viennent à la file, & les biens mesmes qui demeurent apres elle, perdent entierement leur goust, & saueur, corrompus par la seruitude.

La seule liberté, les hommes ne la desirent point, non pas pour autre raison (ce semble) sinon que s'ils la desiroient, ils l'auroient: comme s'ils refusoient faire ce bel acquet, seulement par ce qu'il est trop aisé.

Poures & miserables François, peuple insensé! nation opiniastre en ton mal, & aueuglee en ton bien! vous vous laissez emporter deuant vous le plus beau, & le plus clair de vostre reuenu, piller vos champs, voller vos maisons, & les despouiller de meubles anciens & paternels, vous vivez de sorte, que vous ne vous pouuez vanter que rien soit à vous. Et sembleroit que meshuy, ce vous feroit grand heur, de tenir à mestayrie vos biens, vos familles, & vos vies. Et tout ce desgast, ce mal-heur, ceste ruine, vous vient non pas des ennemis,

nemis, mais certes bien de l'ennemy, & de celuy que vous faites si grand, qu'il est, pour lequel vous allez si courageusement à la guerre, pour la grandeur duquel ne refusez point de mettre à la mort vos personnes. Celuy qui vous maistrise tant, n'a que deux yeux, n'a que deux mains, n'a qu'un corps, & n'a autre chose, que ce qu'a le moindre homme du grand & infiny nombre de vos villes, Sinon qu'il a plus que vous tous, un cœur desloyal, selon, & l'avantage, que vous luy donnez pour vous destruire, d'où a-il pris tant d'yeux, dont il vous espie? si vous ne les luy baillez. Comment a-il tant de mains pour vous frapper? s'il ne les prent de vous? les pieds, dont il foule vos citez, d'où les a-il, s'ils ne sont des vostres? Comment a-il aucun pouvoir sur vous, que par vous? comment vous oseroit-il courir sus, s'il n'auoit intelligence avec vous? que vous pourroit-il faire, si vous n'estiez recelateurs du larron qui vous pille, complices du meurtrier qui vous tue, & traistres à vous-mesmes.

Vous semez vos fruiçts, afin qu'il en face desgast, vous meublez & remplissez vos maisons pour fournir à ses pilleries & volleries, vous nourrissez vos filles, afin qu'il ait dequoy rassasier sa luxure: vous nourrissez vos enfans, afin que pour le mieux qu'il leur scauroit faire, qu'il les mene en ses guerres, qu'il les conduise à la boucherie, qu'il les face les ministres de ses conuoitises, les executeurs de ses vengeance, & bourreaux des consciences de vos concitoyens: vous rompez à la peine vos personnes, afin qu'il se puisse mig-



narder en delices , & se veautrer dans les sales & vilains plaisirs : vous vous affoiblissez afin de le rendre plus fort , & roide à vous tenir plus courte la bride.

De tant d'indignitez, que les bestes mesmes ne les souffriroyent point , vous pouuez vous en deliurer si vous essayez, non pas de vous en deliurer: mais seulement de le vouloir faire. Soyez resolu de ne seruir plus, & vous voyla libres, ie ne veux pas que vous le poussiez , ou esbranliez: mais seulement ne le soustenez plus, & vous le verrez comme vn grand Colosse , à qui on a desrobé la base, de son poix , de soy-mesme fondre en bas & se rompre.

*L'hist.* Il n'y a rien de plus veritable entre les choses humaines, que ce que tu viens d'enseigner: que pleut à Dieu, que ces beaux mots eussent pieçà esté semez au beau milieu d'une grande assemblée de nos Catholiques François , ie m'assure, qu'ils y auroyent esté fort bien recueillis , & qu'il n'y auroit celuy d'entre eux , qui n'en fist bien son profit: nul auquel ils ne creassent par maniere de dire, vn nouuel esprit dans le ventre. Et quoy que le peuple François semble auoir perdu long temps y a toute cognoissance , & que par là, on puisse iuger, que sa maladie soit comme mortelle, puis qu'il ne sent rien plus son mal : si est-ce, que i'oserois promettre , que ce discours vn peu dilaté, & accompagné de raisons, & d'exemples & de quelque belle forme d'administration de l'estat, de la iustice, & de la police, approchant à celle que nos anciens Peres auoyent parmy eux,

eux , du temps que les Estats estoient en regne, dont M. Hottoman nous a fait vn fort gentil & riche recueil en son œuure Gaulefrançoise , i'oseroy (dis-ie) asseurer que cela recueilleroit les coqs, leur feroit hausser les crestes , battre les aïles, & courir sus de bec & d'ongles, contre ceux-la qui les tiennent captifs : & seroit suffisant moyen pour faire qu'vn chacun pensast à recouurer sa liberté, à crier apres les Estats, à les redresser, & remettre. On verroit bien tost l'aage d'or , que les Tyrans ont effacé de France, pour y planter celuy de fer, d'oppression, & d'infameté, reluire comme au parauant, la paix, l'amitié & concorde surgir & croistre à veüe d'œil, & faire à iamais sa demeure parmy nos naturels François: he que c'est vne grand pitié ! qu'vne si belle nation, si grande & si opulente, soit par si long temps mal menee, à l'appetit de six ou sept : desquels le meilleur ne vaut pas qu'on prenne peine de le pendre. Mais ie scaurois fort volontiers, s'il te plaisoit de me le dire , comment c'est , que tous nos François se sont ainsi laissé deschoir , & comme ceste opiniastre volonté de seruir s'est si auant enracinee dans leurs mouëlles , qu'il semble maintenant, que la memoire de la liberté ne soit pas si naturelle.

*Lepol.* Si ie n'estois accablé de sommeil, ie te discourrois bien au long , d'où procede la maladie & la matiere peccante d'icelle. Mais ie t'asseure l'amy , que i'ay les yeux pieçà cillez, & les lèures comme cousues. Nous aurons demain bon

loisir : ie suis d'auis si tu le veux , que nous seiournions nos cheuaux , en attendant qu'vn Courrier viene , que nos freres du Languedoc me doyuent enuoyer bien tost.

*L'hist.* Quel courrier est-ce ? le cognoistroye-ie point ?

*Lepol.* C'est Spoudæ. Je croy bien que tu le cognoy.

*L'hist.* Mon Dieu ! he ie ne cognoy autre. Il n'a garde de faillir à nous apporter des nouuelles.

*Lepol.* C'est pour cela qu'on me l'enuoye , & ie l'ay chargé à mon despart , de passer par cy hardiment , & de s'enquerir de mes nouuelles , en ce logis cy où nous sommes.

*L'hist.* Cela va bien , que i'en suis aise ! attendons le plustost trois iours.

*Lepol.* Je le veux bien. Le Seigneur nous face la grace de reposer en seureté , & nous doint à nostre refueil , de le seruir en toute crainte , au nom de son Fils nostre Seigneur Iesus Christ.

*L'hist.* Ainsi soit-il.

F I N.















